



NAZIONALE

BIBLIOTECA

41

6 B

30

VITT. EMANUELE

ROMA








A N N V A E  
L I T T E R A E  
S O C I E T A T I S  
I E S V

ANNI. M. D. LXXXVIII.

AD PATRES, ET FRATRES  
eiusdem Societatis.



R O M A E,  
In Collegio Societatis Iesu.  
M. D. XC.

---

Cum facultate Superiorum.

*Ex Libris Recensit S. M. M. Jovis  
et Pauli de Urbe 1818*



# ANNUAE LITTERAE SOCIETATIS IESV

ANNI. M. D. LXXXVIII.

PATRIBVS, FRATRIBVSQ.

Societatis Iesu, gratia, & pax  
Christi Domini.



**R**EDEO ad vos Patres, Fratresq.  
Carissimi cum annalibus, prope-  
tis quidem illis, ut antea, sed &  
parciore materia, & cura minore:  
illa enim annua, & per se etiam an-  
gustior: hac a negotijs emergenti-  
bus contracta: ut venerit saepe in mentem praestitisse  
repudiare opus inceptum, quam cogi perficere  
negligenter: hanc cogitationem religio compescuit,  
& suspicio affectatae modestiae. Iam nemo est, qui  
me magis accuset, quam ego ipse: nec excuso: quod  
confugisse videor ad patrocinium tum veritatis, tum  
etiam perspectae vestrae humanitatis. Ab hac spe  
ijs circumcisis, quae per scripta anno proximo tam ci-  
to non erant repetenda (quid enim reseram socio-  
rum numerum, locorumque in quibus versantur, aut  
ea, quae ut magis communia, minus sunt in prom-  
ptu, cum praecipue Castellana, & Peruana Prouin-

cia siluerint? ) ad rem ipsam aggrediar . Illud ta-  
 men pramoneo, accessisse ad Societatem Collegia  
 quattuor . In Austria Crumlouienſe, Mo-  
 nasterienſe in Rhenana, In Lugdunenſi  
 Anicienſe, Alquerienſe in Sardi-  
 nia . Nunc, Deo fauente,  
 initium capiam a Pro-  
 uincia Romana .



PRO-

# PROVINCIA ROMANA.



CONTINET has Prouincia socios quingentos quinquaginta sex. In Domo professa fere centum: in Collegio Romano, vt ne excipiantur loca, quæ ad ipsum pertinent, centum nonaginta tres: in Collegio Pænitentiariorum tres & viginti: totidem in Seminario: in Domo Probationis, quinquaginta sex: In Collegio Germanico duodecim: sex in Anglicano: in Maronitarum duos: In Lauretano, Illyrico, & Montis Sancti sex & quadraginta: In Senensi septemdecim: vno amplius in Florentino: In Perusino vnum & viginti: quindecim in Maceratensi: vno minus in Recinensi: In Tiburtino decem. Ex his omnibus locis desiderati nouem: adlecti in nostrum numerum triginta tres.

## COLLEGIVM ROMANVM.

DISCIPLINÆ causæ ad nos concurrentium, & quidem e prima nobilitate numerus sic auctus, vt eorum multitudine obsideantur schola, & magistri onerentur: nec commode omnibus satisfieri

A 3 possit:

possit! & sunt tamen qui malint vel hoc modo suos retineri, quam differri ad tempus. nempe arcentur cuncti ab illi cebrâ peccandi, & virtutis emulatione singuli accenduntur, nec sane alias plenius illustriusve gymnasium fuit. interdum etiam doctorum virorum frequentia & amplissimorum principum splendore celebratur. Ex illa porro iuventute moribus & ingenijs inclyta conflatum est Parthenium Sodalitium duplex, curriculum pietatis, & religionis familiarum incrementum. neque enim sterilis est Virgo, ipsiusq. educatu noua quotidie soboles Filio succrescit. Quo maior est religio fratrum nostrorum in Collegio, & discendi diligentia. hanc testantur tum saepe plias, tum maxime cum viris illustrissimis beneuolentiæ causa ades nostras inuisentibus, quod sit plerumque ex improviso, conueffiunt interiorem ambulationem tam multis cultisq. versibus, vt perinde in exiguitate temporis copiam, & in copia elegantiam admirere. nam religionem declarant, vt mittam domestica, conciones crebræ ad custodias publicas, ad cænobia Virginum, ad alia vrbis templa: ceteraque generis eiusdem. Sed hoc præcipuum. Vir quidam fama iuxta, vitaq. improbus, sacerdotij dignitatem quo erat præditus, flagitiorum magnitudine polluebat. addiderat ad dulcedinem peccandi inueteratam consuetudinem. Erat quippe annorum instar septuaginta. ad hunc adiit superiorum permissu. re prius beatissima Virgini Andicæq. apostolo diligenter commendata, vnus e magistris. ille paratus simulatione

non admittebat auribus verba, quæ iaciebantur. tandem, ut non difficile est coarguere mendacium, non ausus diutius dissimulare culpam, simulato dolore discussit admonentem. sed peruersitate hominum maior est Dei clementia. iniectus corpori morbus animum correxit: a quo vix plane conualluerat, cum serio resipiscens eundem magistrum in Collegio conuenit, ab eoq. adductus ad Sacerdotem non fictam pœnitentiam ostendit liberrima confessione.

## DOMVS. PROBATIONIS & Collegium Pœnitentiariorum.

**C**UM Sixtus Quintus Pontifex maximus ex aqua quam subterraneo riuo & opere arcuato induxit in montem Quirinalem, & a veteri suo nomine Felicem dixit, fescunciam dedisset domui Nouitiorum, populus Romanus liberalitatem Principis æmulatus, materiam concessit fistulæ extruendæ. Et nunc aquas salientes videas in hortos amœnos, & quia aliquanto ampliores, ut scripsimus anno proximo, ad relaxationem animorum magis opportunos. Idem Pontifex eleemosynæ nomine ad nos misit aureos nonnullos, cum declarauis beatum Didacum Complutensem habendum esse in numero Sanctorum. Tyronum industria & exercitatio, quæ debet. Ex ijs cum aliqui e peregrinatione reuertentur, sexto ab vrbe lapide inciderunt in pauperem morbo fameq. confectum. igitur cum eum cibo po-

tuq. refocillassent, lignea impositum crati ad nosodochium Sancti Spiritus mirantibus caritatem agrotorum praefectis, ipsomet agroto gratias agente, multa de nocte attulerunt.

POENITENTIARIORVM ope consilioq. ad Religiosorū familias, multi conuersi, reuersi non pauci, quidam etiam ad catholicam religionem: soluti aliquot Ecclesiasticis vinculis, quibus erant innexi, emendatiorem vitam instituire quamplurimi, omnibus antea maculis confessione purgatis. e dono libellorum piorum rerumq. piacularium multiplex fructus. cetera in consideratione tacita reponantur.

## SEMINARIUM ROMANVM & Collegium Germanicum.

CONVENTVS adolescentium, qui Mariam virginem patronam adoptarunt, magnos in pietate processus habent. affligunt corpora, quantum quidem illis conceditur, supplicijs: excolunt animos virtutibus: ad valetudinaria etiam se extendunt, agrosq. adiuuant pecunia operaq., & imbuunt saluari doctrina. Clerici duo in Nostrorum numerum adscripti. Laxata aliquantulum domus angustiae horto domicilioq. contiguo, quod e Dominicanorum familia conductum habemus. Nec minor in litterarum studio progressus. Philosophicas theses defendere nonnulli in celebri virorum illustrium atque adeo Cardinalium corona. Cardinalis autem Rusticucius, panes quem regimen Seminarij, amat  
in dies



in dies probatq. disciplinam Nostrorum, vel ob alumnorum fructum, vel ob concursum petentium.

EPISCOPVS Vratislaviensis, vnus ex ijs qui e ducti olim edoctiq. in Collegio Germanico, calicem misit ex auro solido affabre factū, amoris sui monumentū: aestimatur fere aureis mille. Distentus idem assidua procuratione muneris sui, vt limina Apostolorum ad præscriptum tempus salutare non posset, ad fratris filium litteras misit, vt se apud Pontificem maximum excusaret.

### COLLEGIVM ANGLICANVM.

EX HOC Collegio quod constat alumnis quinquagintaquinque, missi duo in Belgium: Sacerdos item vnus de Societate in Hispaniā. Sacerdotes deinde vndecim in Angliam. E quibus tres Societati se adiunxerunt. ex his vnus in Belgium, duo in Angliam contendere iussi. Sed & hi erant adhuc in Gallia, cum dissoluta classe Hispaniensi, intuta nuntiabantur omnia, insidæq. in portibus Anglia: ita cautius videbatur expectare dum deferuesceret procella. At vnus e nostris tyronibus plenus animi nihil prolatandum ratus, quod in maioribus periculis appareat illustrior diuina providentia, socium & duos alios sacerdotes secum rapit, perducitq. saluos in Angliam: ea res Angliis catholicis adiumento fuit, & sacerdotibus alijs, vt statim e Gallia soluerent, exemplo. E duobus, qui hoc anno huic Collegio se tradiderunt, alter antequam cederet e pa-

tria,

tria, patrimonij portionem quæ ad se pertinebat, fratri concessit nomine donationis, ut ne tamquam in damnati bona inuaderent hæretici, ubi auditum esset eum sacerdotem esse factum. Alter cum anno octogesimo tertio traiecit in Galliam, ut Remis catholice agat, resstantibus ventis in Angliam reijcitur, & a satellitibus regijs comprehenditur in portu. Sistitur consilio, rogatus causam fugæ, ut Catholicus, inquit, cum sim, inter mihi similes verser. cum frustra deterretur ab acclamantibus, detrusus est in carcerem: & sexto denique mense parentis ipsius fideiussione liberatur. quinque annos domi cum fuisset, nactus idoneam tempestatem ad nauigandum, transmisit in Galliam: Romam deinde pedester venit. Sacerdotes hoc anno tres fortiter iuxta feliciterq. pro fide Catholica mortem optetiere. Ricardus Ligus: comprehensus hic cum in quodam carceris cubiculo ad sacrum celebrandum se parat: Ioannes Cornelius, & Ioannes Lous. narratur de hoc quiddam minime silendum. Ibat cum matre, die inclinante, præter pontem Londinensem, in quo martyrum capita in sublimi proposita ostentui: ea conspicatus ingemuit cum suspirio: scitanti causam matri respondit, quod video capita fratrum meorum: neque antea latabor quam e beato eorum numero mihi esse contigerit. ea vox cum delata esset ad magistratus ab hæretico qui in transitu exceperat, eadem nocte Lous captus, mox etiam donatus martyrio: cuius spem amplexus animo, nisi rem ipsam fuisset adeptus, numquam acquiesset.

ROMANA. 811  
COLLEGIVM LAVRETANVM  
& Illyricum.

**P**RAETER sollemnes peregrinorū aduentus. Autumno Vereq. cetero etiam anno permagnus numerus sacrosanctam visitantium domum, seseq. aperientium fructus. Insignes meretrices duæ ad honestiorem vitam traductæ, mira gratulatione Episcopi illius urbis, vnde discesserant. Quadragesima Aduentuq. Domini definitis diebus, festis item toto anno, concio habita Antislite Cleroq. audientibus, probantibusq. hunc perinde, vt alios Nostrorum labores. vsurpata per fraudem pecunia restituta: & certa quidem dominis, incerta pauperibus, dominorum loco. namque multi secuti antea Zachæum errantem, eundem voluere sequi penitentem. Virorum illustrium lites, periculosaq. cognatorum & affinium iurgia æquis conditionibus & pace finita. hæc & talia: neque enim omnia ponuntur: sanctissimæ Virginis Deiq. matris beneficio: quæ munificans salute homines, ea in æde, in qua concepit olim salutem mundi, præsentiam suam admirabiliter ostendit.

**Q**UI IN Illyrico instituuntur, Episcopo assistunt sacra facienti, non parua cum laude pietatis: & qui iam instituti, in patriam redierunt, vitæ integritate, & sedulitate audiendarum confessionum, ita se probant suis Episcopis, vt alij expetantur.

## COLLEGIUM RECINETENSE.

**A**DIVVATVR maxime ciuitas oblectaturq. usurpatione ac renouatione Christiana doctrina: nec fere alij urbem intra extraq., virorum etiam ac mulierum cantus exaudiuntur: præcipue puerorum: e quibus vnus annorum trium, quam agebat animam dedit in cantico mortalium mentes ad cælum inuitante. nec minor pœnitentium fructus. Ferijs natalicijs communicarunt amplius mille in nostro templo, cuius supellex insigniter aucta. Aliquot Sanctorum reliquiæ nobis donatæ: quas inter non exigua pars costæ beati Viti, cuius nomine gaudet nostra ades, & patrociniò ciuitas Recinetensium. ita excipi placuit magnifico apparatu: ad hunc modum. Quatriduo ante dies noctesq. campana æra pulsata: ipso die maximum in urbe templum conuestitum aulaeis & versibus in martyrem, suffitumq. suauissimis odoribus. dum populus confluit, vespertinæ preces concinuntur symphonia pulcherrima: in queis audita Viti laudes, & recitatum dein multigenum carmen, quod referebat simile argumentum, ab adolescentibus. cum mouere se inciperet pompa, magnus tormentorum fragor increbrescere, vt obtunderet canoram vocem tubarum: procedebant omnes Sodalitates urbis cum luminibus amplius quadringentis. Religiosorum singulæ familiæ ordine psallentes: iuuenes Illyrici immisti clero, ad viginti. Sacræ reliquiæ Viti, Mauritiij, Vrsulæ, vrnulis tribus ferebantur argenteis

a tribus Cleri proceribus. Circum tensam effundebantur decem e Nostris, candido amictu, accensas faces manu praeferentes. Sequebatur Picentium Praetor (ad hunc diem Macerata aduenerat) cum magistratu & capitibus urbis: ex innumera vtriusque sexus & maxime muliebris multitudo. Vbi ventum in forum maximum, permisso cantu sonituq. clariora gaudij signa: flexum denique ad nostram ad eam ibi tum Angelorum specie cultuq. pueri pro foribus loco eminenti, Sanctos orant, quorum reliquiae portabantur, ut ne grauentur dignatione sua maius facere templum eorum nomini consecratum. ingressos excepit noua Musica Latinaq. elegia, & oratio Italica, tanta dicentium venustate, ut audientes lacrimis non temperarent. postremo cum clausisset omnia temperata varietas vocum lituorumq. canentium, magna gratulatione discessum est: etsi ne tum quidem ab omnibus: mansere multi, iterumq. rediere alij, beatorum corporum lipsana venerantes, nec illius tantum diei fuit letitia, sed per multos etiam gratis & cogitationibus & sermonibus reuocata. Ceterum confessiones audita, restitutiones factae, amicitiae reconciliatae non paucae. tres mulierculae a prostituenda pudicitia traductae.

# COLLEGIUM MACERATENSE.

**D**UO e nostris fratribus lenta tabe consumpti. aliqui in eorum locum suscepti. nec defuere

fuere qui impatientes mora aditum sibi ad alios ordines inuenerunt. non leue aestimatu quantum boni attulerit concionum Sacramentorumq. usus & frequentia ciuitati. Vtiles fuere Nostri in lectulo, magis in patibulo morientibus. Caput Virginis e felici cœtu beata Vrsula ab ade principe in nostram assensu Antistitis, quasitissimis honoribus, illatum Sodalitij Parthenij admirabilis cursus ad omnem pietatem. Ex hoc Collegio Camerinum Mastelliamq., item Osimum, & ad Montem Philatranum, de voluntate Episcoporum suscepta profectio: quibus omnibus de locis vniuerse dici potest: tradita elementa doctrinae, infundente cantu res salutare in animos, cum oblectatione discantium: explicatas quæstiones de Officijs Christianis: habitas conciones ad populum, & ad virginum cænobia: opem latam agris vinetisq.: auditas confessiones innumeras: aliaq. communia: De Camerino, hoc præterea, excitatam Episcopo populoq. cupiditatem instituendi Collegij: eamq. ad rem communibus multorum studijs ac minime exiguum priuatim publiceq. sepositum.

### COLLEGIVM PERVSINVM.

**E** SCHOLIS, vt hinc ordiamur, Academia Congregatioq. quæ Minorum dicitur, effloruit. duo ex his Societatem impetrarunt, & vtriusque multis experimentis per ipsorum domesticos perspecta constantia: maxime alterius, cui res & spes offerre.

offerebatur, & concessa voluptas nuptiarum. Nec minus frugifera Maiorum congregatio, quatuor ex ijs in varia cænobia sponte transeuntibus. Exercitationibus Patris nostri Ignatii ad meliorem vitam informati permulti. Adiuta concionibus Monasteria virginum, & aucta multarum introitu. Conciones perceptionesq. Sacramentorum in templo nostro frequentes: interdum Gubernatore urbis panem, qui de celo descendit, ministrante: quod cum semel fecisset natali die Ioannis Baptiste cognominis sui, eodem die viris multis nobilibus natalitium prandium in Collegio dedit. Pacificata mulier cum interfectores fratrum duorum: & vir primarius cum altero a quo letale vulnus acceperat: utriusque pacificatio publico testimonio firmata. Sed & hic, reconciliatus matri fratriq. quibus iamdiu succensebat, ut nec alloquio dignaretur. Latum id civitati, quo magis tumens odium videbatur in grave periculum erupturum: Præstita opera assidua obcuntibus: enituit in primis nauata civi, duobusq. fratribus, apud suos non obscuro genere, damnatis supplicio: maior horum patientia, pœnaq. acerbior: sed ita constantes excepere mortem, ut ira sceleribus debita in misericordiam verteretur. Iuerunt in vicina oppida Sacerdotes duo: & habitis concionibus, auditis confessionibus, euulsis superstitionibus peccatisq., odijs restinctis, hominibus ad rerum restitutionem bonamq. frugem adductis, traditis denique in ijs fidei Christianæ, fructus non mediocres reportarunt.



## FLORENTINVM ET SENENSE

Collegia

**I**N TEMPLO maximo, vt mos gereretur Illustrissimo Cardinali, eidemq. præfidi Sacrorum, concionatus vnus e Nostris diebus dominici Aduentus, magno concursu. neque id in æde nostra multisq. Sodalitijs vrbani fieri desitam. Magnus Etruriæ Dux cum ad nos venisset, perhumaniter templum, cuius exterior facies nunc magis visenda, & Collegij lustraturus angustias, exceptus est a Nostris accommodata ad tempus oratione, elegantiq. apparatu versuum Latinorum Græcorumq. quos & in volumen coniectos ad se voluit asferri.

**AT SENIS** Pater Marius Fabricius, nota in concionando satandæ amæniq. ingenij, atque eo validior in persuadendo, populoque acceptior, aduersa valetudine oppressus concessit evia, haud facile quisquam aut egrotans tantæ curæ ciuitati fuit, aut moriens mærori: illam testati facientes vota pro eius salute, & crebris nuntijs inuisentes: hunc recentem quidem, lamentis & lacrimis, nunc etiam dolore ac tristitia testantur, ita eundem & lugere honestum putarunt, & æquum putant meminisse. Tacuit corpus in templo a primo diluculo ad crepusculum vltimum, solatio confluentium. Et certe vir egregius, quamquam medio in spatio integræ ætatis correptus, quantum ad officiosos labores, longissimum tempus peregit. Confessiones audite e sex celeberrimis virginum, & e carcere publico: in quo &



tempestiue habitæ conciones : adiutique ad recte moriendum infirmi : eodemque tempore iacta documenta circumstantibus ad bene viuendum . finita multorum inimicitie : etsi difficilis videbatur exitus veterum iurgiorum . Is adolescens , de quo proxime scripsimus admirabiliter immutato , se quotidie fit melior , & ut minus oneratur opibus , quarum bonam partem distribuit pauperibus , liberior excurret in somita virtutis : Res domestica sacraque supellex non parum accreuit . Adita oppida quadam editione Archiepiscopi , adiutaque , ut verbo absoluaui , muneribus Societatis : ut missionem paucis post mensibus iterare oportuerit .

## COLLEGIVM TIBVRTINVM

& Sedes Montis Sancti

**N**OVITEMPLI celebritas & recepta iam consuetudo Christianæ doctrinæ magno decori & emolumento huic ciuitati fuit . igitur pueri puellæque magis parentibus obsequentes & utiles per urbem cantiones lasciuie expulsæ : propositum pudicitie in multis virginibus , & in quibusdam nato firmatum : fuit & suis concionibus suetus : unde frequens confessio , & pietas magna multorum . Sed nihil æquo profuit ac beata Symphorosa filiarumque reuerentio : quorum opem postcentes in rebus dubijs audiuntur . & certe , mulier illius inuocatione mortem effugit , grauemque xterum , Geminorum puerorum quibus propere a Statteo & Ne-

mesio nomen, enixu, leuauit. Itum hinc quoque in pagos vicinos, serendisque seminibus pietatis, & extirpandis superstitionibus aliquid effectum. In vno puella opinione omnium & sermone multorum energumena, post traditionem sacrosanctorum mysteriorum, pro sana relicta.

**MONS ETIAM SANCTI** sedes vt in promouenda adificatione, ita etiam in perdu-  
cendis ad Christum animis suos progressus habet. a  
duobus Sacerdotibus festis diebus confessiones non  
pauciores centum, plures in magis sollemnibus au-  
diuntur: vt res fere superet fidem. Templum etsi ve-  
tus angustumque, non caret ornatu & cultu. Do-  
ctrina Christiana vsus nuper inuectus pueros allicit  
cum voluptate ad discendum, eorumque parentes  
retinet in amore Societatis: cuius rudimenta talia  
& incrementa noscuntur.

#### MISSIONES DVAE.

**TATE** vrbs est Marucinorum: Castellio  
Aretinus oppidum in Etruria. Vtroque mis-  
si concionatum Quadragesima Nostri. Et illic qui-  
dem ad Collegij fundationem multorum cura con-  
uersa. Scriptum ea de re ad Castrucium Cardina-  
lem, vt ageret cum Pontifice: iuitque ad Patrem  
Nostrium Generalem vir nobilis offerens vniuer-  
sam hereditatem, cuius vectigal annuum aurei sex-  
centi. Doctrina Christiana, quae tepuerat, seruor ad-  
ditus: collectitia stipe pauperibus noxiisque sub-  
uentum.

uentum. Introduc[t]a consuetudo sexta quaque feria, vesperascente calo, super solitas preces, ad pulsum campanæ orationis dominicæ angelicæque salutationis quinquies recitandæ pro numero Christi domini plagarum. Cetera exequi non est proposita breuitatis.

CASTELLIONE ubi nullus antea auditus erat e Nost[ri]s, mira ad frequentem communionem vitæque mutationem commotio animorum. Institutus eam ob causam hominum cætus sub patrocinio Spiritus Sancti quot mensibus communicantium, consulentiumque, vel quasita eleemosyna, necessitati fodere non valentium, & erubescantium mendicare. Ceterum tantus ad nostrum concursus, ut vix spatium respirandi esset. Quattuor se ad Capuccinos ( quorum domicilium subleuatum commendatione concionatoris ) duo ad nos se adiungere decreuerunt. Explicatus quotidie catechismus: pijsque puerorum cantiunculis permulsa aures grandiorum, simul letantium temporibus presentibus, & præterita deplorantium, quibus hæc erant ignota, prospicientiumque ne postera fraudarentur: eam oppidanus quidam Sacerdos provinciam suscepit. Et si commune omnium desiderium habendi Collegij: & ne reuoluatur ad irritum, pecunia conferri cæpta. quamquam & Cortonæ quoque urbi vicina eiusq. episcopo eadem mens iniecta: etenim affulsisse omnes dicunt ad oculos splendorem Societatis, cuius antea, ut ferme accidit in rebus ignotis, nulla cupiditas esset.

20

NEAPOLITANA  
PROVINCIA.



VERUNT in Neapolitana Pro-  
vincia trecenti circiter ac triginta,  
Neapoli in Professorum Domo se-  
ptuagintaquinque, in Collegio de-  
cem supra centum, in Probationis  
Domo minimum quadraginta, in  
Collegio Nolano triginta quattuor, in Catacensi  
duo & viginti, in Aletino viginti, quatuordecim  
in Bariensi, in Cirinolano duodecim, Aggregati  
ad Societatem trigintaduo, Mortui septem.

DOMVS PROFESSA.

MAGNVS hominum ad rem diuinam con-  
cursus, magna erga Deum pietas nobilium,  
nec parua in Societatem beneuolentia: & certaue-  
re Studijs Nostri, ut gliscente piorum cœtu, crebre-  
sceret celestium obseruatio. ita, super id quod nume-  
rum sacra frequenter obeuntium non prompte inie-  
ris, qui omnis vitæ maculas aperiendo eluerunt,  
fuerunt ducenti: quo facto & puella elusit hostem  
reterem fallendi, qui adolescentem amatorem si-  
mulans, apparebat per noctem, & vir quidam illu-

flris depulit morbum : quanquam & in multis ma-  
 iestate auxit Virginis non frustra eius implora-  
 tum imminenti morte praesidium . Matrona nobi-  
 lis, quæ a nobis erat alieniore animo , filius letifera  
 comprehensus lue per omne corpus grassante , & ir-  
 rita remedia sentiebat, & medicos desperantes : ac-  
 cersuntur ad extremum Sacerdotes e Nostri : ad  
 quorum genua mater prostrata cum lacrimis , En  
 meus, inquit, filius miseram relinquit, intercedite  
 vos, & vestris apud Deum precibus abeuntem re-  
 tinete . admonent Nostri spem in Deo omnem ac  
 Deipara collocandam : fecit nihil hæsitans : mirum  
 dictu : eo ipso temporis puncto retroagi morbus cæ-  
 pit, & alluari adolescens, sic prorsus, ut non multo  
 post apparuerit, qui humanis consilijs non poterat,  
 diuina ope sanatus . Pari nobilitate mulier altera  
 egrotabat ipsa salutis incerta : alloquium expetiit  
 vnius e Nostri, a quo erecta est in spem valetudi-  
 nis, si Virgini se commendaret : at illa post eius abi-  
 tum exire omnes e cubiculo iubet, tum ad Mariæ  
 imaginem manus tendens : Dei mater, inquit, sa-  
 nitatem petentirestitue, ut valenti corpore & animo  
 valeam tibi in posterum deservire : hæc cum dixisset,  
 uti agrum animum solet, somnus cepit : videt per  
 quietem eximia pulchritudine feminam, quæ leniter  
 apprehensam manu obuertit in alteram lectuli par-  
 tem : dein bono eam animo esse iubet, quasi quod  
 sperarat adeptam : nec vanum fuisse somnium fides  
 valetudinis firmavit . Ad nobiliorum sodalium,  
 de quo proxime, tenuiorum Oratorium ( ita enim

appellatur) accessit. hi iam ferme ducenti: bis singulis mensibus accepta lege communicandi: quibus & cura aliqua de proximorum salute: quos maxime facinorosos esse accipiunt, ad horum amicitiam adrepunt, ut paulatim adducant ad pœnitentiam: & ipsi interdum præsentiam numinis experti: ut uni euenit: qui cum pro suis familiaribus pressis ære alieno sponsor factus trudendus esset in carcerem, ad cæli reginam fufis precibus, ita vidit flexos animos creditorum (erant sex) ut omnes communi mente debitum remiserint. Ceterum instituta hoc anno in æde nostra supplicatio per extremos tres illos dies, quæis a carnis sagina nomen, tanta cum frequentia mortalium, ac religione, ut Cinerum diem Bacchanalia præuertisse viderentur. matronæ illustres Nostorum hortatu nosocomia iam adeunt frequentius, ægrotosque alloquio curaueque reficiunt: hoc profecto speciosius, quanto clarius nobilitatis lumen, quod earum facta in obscuro esse non sinit.

## COLLEGIVM NEAPOLITANVM.

**F**ACTVS aliquanto minor Sodalium numerus, in magno ære alieno, minuenda impense. Sed ut ne minora extarent officia religiose pietatis multiplex occasio vel quæsitæ, vel oblata. ad triremes itum, & ad carcerem, eodem animo fructuque, quo annis superioribus. Sed domi quædam inualuit infirmitas, quæ præbuit materiam caritati. Erysipelæ morbi genus est, sacro igni non absimile: serpit illius

illius more inflammatque: perniciosum imbecillis corporibus, valentibus molestum: nec abest periculum contagij: hoc, paucis diebus multorum corporibus correptis, quinque Sacerdotes extinxit: in his Patrem Andream Spinulam, Collegij moderatorem, insigni laude pietatis: qui cum agris frequenter assidet, parat fomenta, cibos ministrat, sui que memor, ut dicebat, muneris, & obliuis (admonitus licet) inualetudinis, non veretur contactum: morbum primo, dein mortem visus accersisse, eo maiore accendit luctu sociorum pectora, quo propter singulares animi virtutes videbatur dignior vita longiore. Hic ille est quem Romæ e medio honorum cursu, magnæque opum affluentia, ad pauperem humilemque vitam vocanti Deo paruisset in Romana Prouincia annuæ litteræ anni octogesi secundi suppresso nomine testantur. Ceterum ut de sodalitijs communia prætereantur: e maiore sedecim in varias Religiosorum familias, & in nostram quidem sex post philosophicum curriculum cooptati. Ex hoc sodalium numero vnus agrotus in patriam remittitur: addidit se collega comitem illi & administrum quamuis ignoto: ita, noctu etiam, cubitum abeuntibus reliquis, agrum seruabat: nec caruit solatio: visa, ut dicitur, Deipara præbens potionem decumbenti: qui tamen cum & morbi pertinacia & itineris incommodo fieret deterior, simul pro valetudine orauit Virginem, in spem vitæ redire cepit, febri depulsa: is nunc Neapolim reuertit confirmatus corpore, eo consilio, ut aliquando ad nostrum ordi-



nem aggregetur. E minore Sodalitio etsi multi ad nostram Religionem animum adiecerunt, leci faciunt angustia, ut mos geri nisi per paucis non possit: fuerunt hoc anno quinque ingenio iuxta & genere illustres. ex eadem vena vir pietate excellens non contentus annis superioribus filium nobis concessisse, minorem natu alterum attulit hoc anno: nec plus se sperare de liberis potuisse affirmans, nec illo spei respondere felicius, quam si diuino cultui manciparentur. In ceteris cœtibz qui ex opificibus ferme constant, non minus vtiliter laboratur. Vnus ex illis beneficio constitutum publice sacellum vsui mendicorum: & inuentus Sacerdos, qui super sacrum quod illic facit diebus festis, singulis mensibus saluari confessione purgatos ad communionem admittit: neque hi solum docentur doctrinam Christianam, sed & vagum muliercularum genus, quæ canendi studium a lasciuia carminis, in diuinas laudes contulerunt: & incipit aliquando per urbem hac mendicorum turba, magna oculorum oblectatione, auriumque, longissimo agmine, & dulcissima modulatione. In montis etiam Vesunij oppido a prædio nostro non procul, conflatum Sodalitium e viris nobilibus, qui urbanam commorationem proximò rure distinguunt: explicata Christiana lex rudibus pueris grandibusque: quod etiam natalitijs ferijs alio in oppido facilitatum: & nunc, curionibus in Nostrorum vestigia intentis, magnâ indoles pagani in pietatis enituit.



## PROBATIONIS DOMVS.

**I**N HAC tertiani nonnulli, recentes magnæ expectationis duo & triginta: hos inter vnus Seminarij Neapolitani alumnus: qui cum arcetur Nostrorum congressu, Societatis tamen consilium domesticis licet peruertere, aut interuvertere cupientibus, per triennium fuit summa constantia: in omnibus mira contemptio rerum humanarum: ea suspicitur in vrbe honorum appetente, cum adollescens nobiles vili semiamitti tunicula præter suorum ora stipem queritant ostiatim ritu mendicantium. Rusticis etiam & pueris Christianæ vitæ elementa Neapoli tradita, forisque: ium a Sacerdote cum socio ad oppidum sanctæ Christinæ, magnaue utilitas consecuta: quamquam ipsa quodque Domus ciuium liberalitatem experta: nam præter quotidianam Proregis beneficentiam, sacraque incrementum supellectilis, ad coemendum prædium quattuor aureorum millia contributa.

COLLEGIVM NOLANVM  
& Cirinolanuni.

**N**OLAE scholarum numerus auctus, sollemnique præmiorum distributione excitata alacritas discendi. Nostrorum opera inter insignes nobilitate familias discordiæ sedatæ. Spiritualia exercitia magno cum fructu apud nos obierunt primores nonnulli. Seminaria Dux cum bona parte fami-

familiarium sanctæ hebdomadæ ferijs & post Pascha aliquot diebus continenter in Collegio versatus est, nunc in odeo psalmodia, nunc in templo liturgiæ intentus: magna utrobique significatione pietatis. Post discessum e solido argento Lychnum pensilem misit, non vulgari opere, ingentis beneuolentiæ argumentum. Missus ex hoc Collegio in urbem quamdam aliquot dierum itinere Sacerdos, ita expleuit, ut verbo dicam, munus omne Societatis (ponetur hoc vnum, quod placato aduersario exemit hominem e triremi) ut peractis concionibus ad inchoata perficienda, intermissa reuocanda, cetera confirmanda, mensem præterea vnum, rogatu ciuium, manere debuerit.

COLLEGIVM Cirinolanum auctum numero fratrum, & nouarum ædium ædificatione. instituta Parthenia Congregatio non debili principio: vnus e sodalibus eo præcipuam curam intendit, ut ad eandem vitæ rationem quamplurimos adducat: alter ex eo cætu graui mole ruentis lapidis oppressus, nec subito extinctus, tantum habuit spatij dum omnibus instructus Ecclesiæ Sacramentis abiret. id quod plerisque pro miraculo fuit: & horum sodalium exemplo, Nostrorumque cohortatione factum videtur, ut, quod antea negligebatur, sacri dies a negotiosis operarum quiete templorumque celebratione discernerentur. Bis in ade nostra quadragenarum horarum supplicatio indicta imbris euocandi: & præcationem a Deo admissam ostendit aqua præter expectationem e celo delapsa. E concionibus

bus & catechismo. vtilitas non pœnitenda: in magno, e longinquis etiam locis, consentientium concursu, auditi qui omnem vitæ cursum reuoluere sexcenti: muliebres superstitiones sublata permulta: super ceteras, illa, qua funerea non egrediebantur domo, nisi vbi mortuum diu eluxissent. as alienum quod non retinebatur salua conscientia redditum. finita graues dissensiones multorum. Sacerdos vnus cum iter faceret, in transitu per quamdam urbem adiuuit hominem qui ducebatur ad supplicium, itaque firmavit animum eius, vt noluerit producere vitam etiam spe liberationis iniecta.

## CATACENSE COLLEGIVM.

**D**O MI forisq; proximorum saluti Nostorum opera nauata. Sacerdos vnus (ex quo coniectura fiet de reliquis) excepit confessiones totius vitæ amplius centum: persuasum non nemini vt in gratiam cum inimico reuerteretur, consilio cædis abiecto. Sed & mulier filij necem, qui quattuor confossus vulneribus domum relatus, vt in matris conspectu expiraret, ita forti animo tulit, vt victo gemitu funus prosecuta, postridie sacra mysteria suscepit in templo, miseritque parricidis qui nuntiarent, illis se filij mortem doloremque suum Christi causa condonasse. Duo missi in vicina oppida ad mercaturam animarum. Edoctæ mulieres sexu improuidæ de vanitate superstitionum, atque ex illis deductæ: earum vna, quam venerabantur ceteræ

ut magistram, cum concionaretur noster, exclamavit pleno auditorio, magno se ad eum usque diem in errore perseverasse; iam artem ipsam cum omni instrumento deposituram. restituta etiam pecunia non bona fide retenta. ceterum res domestica aucta. Vir nobilis moriens annuos aureos octogenos Collegio legavit. aucta quoque Sodalitas beata Virginis: ipsaque Societatem auxit vno adolescente.

### COLLEGIVM ALETINVM.

**O**DIORVM flammæ restinctæ, sublata monopolia, redhibitum æs quod abierat mala fide, flagitia compressa, Sacramenta frequentantium plurimus numerus, Christianæ legis præcepta diebus festis, tum in Collegio nostro, tum etiam in quadam urbis paræcia explicantur. data opera ut ludi magistri ad nostrum exemplum suos erudiant: ægrotis, ijs maxime qui propius absunt ab interitu in tempore succurritur: eo in genere, duo qui plane iacebant ab alienati a sensu ad aduentum Nostrorum receperunt animum, quidam etiam vocem, qua iam diu caruerat, auctoremque muneris Dei matrem clarissime exclamavit. Sodalitates antiquum suum obtinent in proximorum salute procuranda. Ex ijs qui manu victum expediunt ad varia cœnobîa tredecim adiuncti: & aliqui mori videntur in desiderio nostræ Societatis. E discipulorum Sodalitio quattuor in alios ordines, totidem in nostrum, tantum abest ut inuitis parentibus, præ gaudio lacrimanti-

mantibus adscripti, *Vnus* tamen inuentus pater nobilis ac ferox, qui etsi diu resistit adolescentulo filio Societatem exoptanti, victus tandem constantia precum, admirante ciuitate, eum cum litteris ad Patrem Generalem misit, quibus ut admitteretur vehementer orabat. Ceterum laxata spatia templi aliquot aureorum millium impensa, opere utique visendo, per ampla domus comparata Nostrorum commorationi peropportuna. aliquorum testamento quadringenti aurei Nostris relictæ. multa alia indies accepta beneficio piorum. *Vnus* quidem aureos obtulit mille, ac præterea lychnuchum pensilem ex argento mirabili artificio.

## COLLEGIUM BARIENSE.

**N**OBILIUM Congregatio & viris & virtutibus crescit, publicum carcerem inuisunt fere quotidie, victos eleemosyna sustentant, modico are alieno obstrictos solunt, aliorum conueniunt creditores, ut laxiorem diem statuunt soluendo: ingravescente annona magnus frumenti numerus coactus inopia leuanda. Quadraginta horarum in templo nostro decreta comprecatio Septembri mense, continenti orantium similiter & se verberantium ordine insignis. hæc inter, reliqui ciues ad pietatem inflammantur: eam auxit quiddam quod auditum est duabus feminis, earum euincendo contumaci animo, accidisse, earum altera morti proxima etiam si accitus esset. Sacerdos non confiteri obli-

obstinauerat muliebri peruicacia: sequenti nocte per quietem ad diuinum tribunal adducta, flammisque addicta erat feralibus, nisi matrona excellenti specie ac pietate miserta, subsidij a confessione quaerendi admonuisset: discussit recordiam cum somno, Sacerdotem vocari iubet, absolutaque, vix præ gaudio compos, illud habuit vsque in ore, quoad loquendi potestas fuit. Deo grates, ab inferis sum erepta. Atque hæc Barij. Alibi altera maiore miraculo. Nonum hæc, vt postea compertum est, annum, stultitia, an alterius suasu, impie de Christo eiusque matre sentiebat: sanctum quidem vtrumque, sed neque illum Deum, neque illam virginem: ingressa cænobium mulierum, tam dirum venenum coquens in pectore, ab imaginaria confessione accedebat ad venerandum Eucharistia Sacramentum: & accipiebat quidem pandens sepulcrum gutturis panem Angelorum, sed vbi licebat per adstantium adspectum, mox expuebat in linteolum indignissime proculcandum: & hanc tamen non abiicit Dei clementia: tertio Paschatis die cum dominicum corpus de more obtereret, acque, quales ferre ad ornatum capitis mulieres solent, atrociter confingeret, e quolibet punctiuncula fluidus sanguis eminebat: viso perterrita in ignem proiecit: vereri visus ille conditorem suum in geminas diuisas partes loco cessit, & seruauit illæsum: tum vero piget mulierem incepti, execrandum scelus agnoscit, vocatoque Sacerdoti curatori animarum palam aperit: de huius sententia & illius voluntate res Barium defertur

ad Nostros, per hos deinde ad Superiores: & consul-  
tum femina. Valuit, quod in illos dies incidit iubi-  
leum Pontificium cuiuslibet noxæ expiandæ: eidem  
interea oblata dicitur imago Euangelistæ Ioannis  
cum Deipara Virgine: quæ etsi primo indignationis  
manifesta, postmodum, ut sunt placabiles celestium  
animi, spem veniæ viamque ostendit. Et visitur  
etiam nunc sacrosancta Hostia sanguineis guttulis  
interpuncta: quam, etsi Sacerdos ille vehementer  
contendit, ut accipiant seruandam in templo:  
dilata deliberatio ad aduentum Patris  
Prouincialis, qui propediem nun-  
tiabatur affuturus.



# P R O V I N C I A S I C I L I E N S I S



**S**UNT in Siciliensi Prouincia loca  
vndecim, de Nostreis tercentum  
quadraginta quinque. Panormi,  
in Professorum Domo quinquagin-  
ta, in Collegio vndetriginta, Mes-  
sana, in Collegio octogintaquat-  
tuor, in Probationis Domo nouem & triginta. In  
Catanensi, Syracusano, Calateiironensi Collegijs,  
vndeuiceni. In Rhegino ac Riuenensi viceni septe-  
ni. In Drepanitano sedecim. Duodecim in Collegio  
Montis Regalis. Decessere ex tota hac Prouincia  
sex. Accessere ad Societatem viginti quinque.

**MINAEI** praeterea (hac est vrbs in medi-  
terranea insula) liberalitate domini Thomae Verre-  
rij & Desiatæ eius vxoris, qui necessaria omnia ad  
nostrum vsu[m] receperunt, & multo plura factis  
praestant, iacta Collegij fundamenta: eorum exem-  
plo excitata ciuitas, priuatique nonnulli, inceptum  
promouent. Spes est fore ibi socios, re constituta,  
amplius quadraginta. Octo interea in ea vrbe ver-  
santur: in temporariam adificationem quattuor:  
totidem in spiritualem, atque ex his Sacerdotes duo,  
insistunt: & iam nunc affulget aliquis fructus. quæ  
res ciuium animos, ex Nostrorum muneribus par-  
te aliqua praecepta ad vrgendum opus accendit.

**ILLVSTRISSIMA & religiosissima**  
Dux



Dux Montis Alti cum eiusdem pietatis Principe eius filio Collegium in Calatanaiceta oppido petit, cunctaque ad eius sustentationem perbenigne pollicetur: ea causa fuit, cur quinque e Nostri eo mitterentur: quibus non instrenue laborantibus dilata desideria augentur.

PANORMITANA PROFESSORUM DOMUS.

**A**D TEMPLUM pietatis causa confluentium multitudo eadem quæ annis superioribus: id est, maxima: ut vigintiduo Sacerdotes omnium excipiendis confessionibus sufficere vix possint. adiuti agri decumbentes in lecto, eodemque tempore aliorum utilitati consultum. nam, ut hæc duo de multis, concubinatus mutatus matrimonio: & decem millium aureorum summa, de quibus iudicio ambigebatur, remissa. Quattuor e limine mortis extracti: unus ne veneno, quod erat iam paratum in prandio: tres ne ferro tollerentur: & erat iam certa merces sicarijs promissa: in locum videlicet odij amor cessit: Et opportunitas Nostrorum consilij, immanitatem sceleris occupavit. Adolescentium lusus quidam, morum perniciēs, Nostrorum suasu, edicto publico prohibitus. fraudatam pecuniam restituere multi: unus aureos mille: rescidit alter sex contractus illicitos, duasque donationes vi extortas. Carmina scriptitabat unus honestis auribus indigna, eademque cum amicis per

lasciuia & iocum in vrbe passim cantitabat, vnde  
rixa cædesque multæ: hic a Nostreis admonitus,  
neutrum facturum in posterum se voti religione Deo  
obligauit. Sacerdos vnus e nostris Catechumenos  
quotidie ad Fidem instruit: e quibus hoc anno ba-  
ptizati sex. Sodalitas Dei Matris de qua proxime  
scriptum, quibus viris constet, hinc facile perspi-  
cies. Conuicijs prouocabantur diuersis temporibus  
duo, & vero incitabantur ira ad referendam iniu-  
riam: sed vterque rexit ea cogitatione animum,  
quod de Sodalitio esset: hic admotam capulo sua  
sponte manum (habebat enim gladium) repressit,  
& aduersarium molli sermone placauit: eum ille a  
quo laceffebatur, duci iussit in proximum templum,  
& ab admirante veniam petijt genuflexus, quod  
ipsi causa iracundiæ fuisset: gloriosa prorsus, qua se  
vicit vterque, victoria. Vni adolescenti oblata  
erat puella infami lenocinio, constanter reiecit: do-  
mum adducta, per posticum egressus euasit fla-  
gitium. Perductæ ad alterum duæ: Virgo vna ad  
alium: vehementer perductores primum increpiti  
deinde cum intellectum esset male suada egestate id  
fieri: si scelere discederetur, promisit ille pecuniam:  
hic etiam dedit: eaque vt virgo aleretur in Monte  
Pietatis effecit. Sed & sodalium opera, orba pa-  
rentibus virgo, data dote, nuptui tradita: corro-  
gato item ære germanæ sorores duæ in Virginum cæ-  
nobio collocatæ: eorumdem præterea beneficio gra-  
uis multorum inopia subleuata. Ita, tum ex ijs quæ  
de Nostreis frequenter audiunt, tum ex ijs multo  
magis,

*magis, quæ eorum animis instillat Deus, quotidie enim semihoram rerum diuinarum meditationi tribuunt, sunt omnes ad benefaciendi consuetudinem adducti.*

### COLLEGIVM PANORMITANVM.

**I**AM E CONDVCTIS migratum est adibus, & Collegij pars, cui manus extrema imposita, dum interea perficitur cetera, habitari cæpta. In ea est aula, scholasticis dicta exercitationibus, perampla: ubi & celebrata studiorum instauratio: datum drama peregregium spectante Prorege, ac nobilitate vniversa: publiceque præmia adolescentibus tributa: magno incremento scholarum, & discipulorum incitamento. Aucta enim Congregatio beata Virginis: e qua sex in varias Religiosorum se abdidere familias: alij plus viginti eodem animo opportunitatem expectant. Difficilis inter duos & implicata controuersia, qua illaqueari videbantur bona animique litigantium, vnus e Nostri auctoritate explicata est, redditu vtriusque in gratiam, & facta trium aureorum millium restitutione.

### COLLEGIVM MESSANENSE.

**G**RAVI quidam perpetrato facinore, cum multis eum stricto ferro persequentibus, in Collegium confugisset, & corporis & animi salu-

tem inuenit: illi enim excommunicationis obiecto metu a persequendo deterriti: ipse ad meliorem mentem reductus. Aurei quater mille a tribus: octogeni item annui, qui nescio quo pretextu iam diu retinebantur, suis dominis redditi. Lites duæ, de tribus una, de octo altera aureorum millibus, diremptæ. Inueterata odia publica priuataque etiam inter plerosque nobiles restincta. Occursus maleficijs cadibusque multorum. Duobus, qui quartum iam & decimum annum incestis iungebantur nuptijs, eorumque liberis utiliter prospectum. Concubina a pluribus exacta. ceterum ex hoc Collegio ad oppida quædam per totam Quadragesimam missi operarii nonnulli: & retulerunt fructus non pœnitendos: ex ijs præcipue locis, quibus Nostri non auditi, sed solum fama cogniti: permonebantur videlicet oppidani concionibus: mirabantur laboris patientiam, victus tenuitatem, pecunie contemptum: ab hac opinione omnis utilitas: nempe in vno oppido templi maximi ædificatio iam diu pendebat interrupta: suadente Nostro, promouendi operis, tantum est pecunie collectum, vt bona pars templi excitata sit, quæ magnam hominum multitudinem accipiat, sacerdotum vsibus opportuna: & volebant quidem incolæ extare in columna insignia sacerdotis, grati animi monumentum: sed ipse prohibuit. ita in magna erat caritate, & sequebatur auctoritas. igitur erudire confluentes, & excolere, corroboratas maiorum consuetudines, blasphemias, senoris, iniusti matrimonij, superstitionum excindere, bonas inserere,

rere, sacras Sodalitates duas, optimatum vnā, alteram popularium instituere, certis eas legibus quæ ad pietatem, ad opera misericordiæ, ad mensuram præcipue Sacramentorum frequentationem pertinent, deuincire: doctrinam Christianam diebus festis tradere: vt tantus iam sit & rebus & hominibus impositus nitor, vt propter pulchritudinem vitæ melioris se ipsi mirentur. Extrema pene Quadragesima quadraginta horarum indicta supplicatio: ad quam, qui expiassent prius confessione animam, tantum admissi: ea res utilis etiam publice fuit: post longam enim siccitatem noxiam frugibus, elicti imbres. Et placuit, vt id quotannis seruaretur, publico decreto firmari. Hic accidit quiddam, quod propter eius admirabilitatem tacendum non videtur. Mulier vna tertium iam annum accedebat ad diuinas epulas, impure: quo scilicet specie communicantis, alijs imponeret. Et ore quidem sumebat sacrosanctam hostiam, sed eam postea illibatam demittebat sibi in pectus: domi cum esset, obuolutam linteolo, consutamque condebat in arcam. Hac ubi, Deo illam aspiciente, meliora respexit, & communicauit citra simulationem, narrauit a se diligenter conquisitas in arca hostias, nullas inuentas: non sine miraculo. Altero in oppido ingens confessionum fructus: & totius vitæ exceptæ sexaginta: eæ vt recte fierent, atque ordine, ratio confitendi in templo explicata: Socer norum cuius erat sinistra fama, inimicum alter interficere cogitabant: eam mox ille ad sacerdotem nostrum adduxit, vt se ipsa

aperiret : hic inimicum vt ageret gratias : quod  
 vterque diftiteret fe ea quam proxime audierat cō-  
 cione placatum . Tantum reliquit Noster hinc di-  
 scedens fui defiderium , vt scalas eas quibus ascen-  
 derat in suggeſtum , suggeſtumque ipſum , pro quo  
 docuerat , lacrimantes oscularentur . Alio in oppi-  
 do, virgines Deo dicatæ ita incenſæ ſunt ſtudio per-  
 fectæ religionis , de qua ſacerdos diſſeruerat, vt vl-  
 tro rerum ſuarum clauēs, ne quid peculiare haberent  
 clauſum , offerrent : eius rei poteſtatem ille reſerua-  
 uit Epifcopo, qui aduentare dicebatur . Inter viros  
 nobiles duos , & inter milites qui praſidium agita-  
 bant, & oppidum totum diſcordia ſedata : hæc qui-  
 dem tanto maiore cū fructu , quanto irritatis vtrin-  
 que multorum animis , grauius periculum immine-  
 bat . Collata eleemoſyna inopum ſubſidio, & orna-  
 mento templorum .

### MAMERTINA PROBATIONIS

Domus .

**T**YRONVM magna in frangendis animis  
 vis & perſeuerantia . In noſocomijs quidem  
 vbi & ſaucij curantur , in eorum tractandis marci-  
 dis cicatricibus vulneribusque purulentis , ita fir-  
 mis apparent peſtoribus, vt a vulnerario ſint regē-  
 di : eorum vni atque alteri quedam accidere prodi-  
 gij ſimilia . Laterum dolore cruciabatur pater Re-  
 ctor , nouitijs precibus ſe commendauit : vnus  
 ingenti caritate Deum erat , vt Patris cruciatum  
 in ſe

in se transferret. Lenatus statim Rector: ipse autem adeo tortus, ut nix ferre dolorem posset, senserunt preces auditas. Iussus alter inter cœnandum de more concionem habere, imperium non tam pertinacia recusavit, quàm verecundia refugit: cum inambularet deinde in aula animo satis anxio, patrem Rectorem videre visus, qui eum acerrime increpuit, verberationem pœnæ loco imposuit, additis minis, interdictum eum iri societate, si iterum non obsequatur: hoc magis ille mœrore prostratus, rem ad unum e sacerdotibus retulit, hic ad Rectorem ipsum, qui admirans vehementer, toto illo die se ne verbum quidem cum eo novitio fecisse affirmavit.

## COLLEGIVM RHEGINVM

**N**VMERVS Nostorum, quam superiori-  
bus annis, aliquanto amplior, quoniam con-  
scientiæ casus explicari cœpti, non parua auditorum  
præcipue ex clero, utilitate, & frequentia. Discipu-  
lorum Sodalitas, ea maxime quæ grandioribus con-  
stat, in dies ut numero, ita etiam pietate augetur.  
Quattuor ex ijs inter Capuccinos adscripti. Quadra-  
genarum horarum supplicatio sæpius celebrata. Lo-  
cum, quo conveniunt, ita eleganter exornarunt, ut  
Prorex ipse cum visendum interdum cum suis pro-  
ceribus putet. Ceterum Proregis ipsius pietas, tum  
re ipsa est ingens, tum utilis exemplo. Sunt & illa  
communia. Lites compressæ, iniuriæ remissæ, pecu-



nia reddita, cædes prohibita, expiatis sceleribus  
vita melior a multis instituta: familia integra per-  
purgata: retractæ mulieres a pellicatu octo: a fû-  
ga, vt ne amicum sequeretur, vna, a veneno altera.  
Est & consultum illius saluti, quæ vt effugeret in-  
proborum manus, præcipitium cogitabat. hæc, vt  
dixi, communia: hoc fortasse proprium. Vir solū-  
tioris vitæ sæpe admonitus a Nostreis vt meliorem  
institueret, dum negligit, abreptus consuetudine &  
dulcedine peccandi, vidit domi dæmonis speciem  
flammati, cornigero capite, & intentantis manum:  
exterritus domo profugit, remque vni e Nostreis ad-  
huc trementi corpore narrauit: idemque, vt alias  
quamplurimi, magistrum habuit officij metum.

## DREPANITANVM, BIVONENSE

& Calataiaronense Collegia.

**I**N SINGVLIS totius vitæ confessiones  
audita nonnullæ. DREPANI persuasum  
duobus, vt concubinas eijcerent: duobus item hone-  
stis viris, vt peruereri posito odio in mutuum amo-  
rem reuertenterentur.

BIVONÆ similiter pax inter propinquos  
restituta. Sodalitas duplex minorum maiorumque  
adolescentium, & opificum cætus, Oratorium vo-  
cant, suos progressus habent. Ciuitas erga nos mu-  
nifica. Mulier quæ illigata sibi videbatur igne in-  
extricabili, vt peccata abiecit confessione, quod su-  
giebat oculos incendio liberata.

CALA-

*CALATA IERONAE* tres spectata virtutis adolescentes Societatem ingressi. Pro re Anglicae horarum quadraginta comprecatio obita insigni caerimonia, ab omni aetate, & ab ordinibus vniuersis. Hic & *Biunone* adiutus utrobique vnus, vt capitalem pœnam, quam suis sceleribus debitam dabat, æquissimo animo ferret.

# COLLEGIVM SYRACVSANVM.

**V**T DE CONFESSIOE, concione, doctrina Christiana explicatione, multorum reconciliatione, pecunie restitutione, ægrotorum, & eorum qui custodia publica attinebantur, visitatione, quadragenarum horarum, quæ ter indicta hâc anno, supplicatione, nihil dicatur: Catechesi rite formati, apparatuque magnifico baptizati Turcæ, Æthiopesque, ad triginta. Virgo cuius pudicitia forma obsistebat, cœnobitica vitæ, paupertas, collectitia pecunia, & voti particeps, & periculi expers reddita. Beatissimæ Virginis Sodalitas iam duplex: virorum nobilium vna: ij præsent Montis Pietatis, corrogataque pecunia subueniunt inopiæ verecunda: eorum altera qui scholas frequentant. Tertius est denique, vt scriptum proxime, conuentus opificum: neque vllus in ijs quæ sunt eorum muneris, a sodalibus prætermittitur pietatis aut officij locus: Ciuium apparet erga nos liberalitas: adiuta Collegij edificatio: ager auctus: ades constructa: sacellum dilatari cœptum.

## COLLEGIVM MONTIS REGALIS.

**A**DITI, audiui, adiutique saepe qui carcere tenebantur: hoc celebriore spectaculo, quod e collecta pecunia cibi coempti, & apud nos cocti conditique per mediam urbem ad carcerem usque portabantur. mulier ab infami corporis questu vi concionum abducta: vir qui fortasse maleficis cantionibus prohibebatur ne cum uxore operam liberis daret, frustra tentata opē venescarum, peccata primum cum esset confessus, tum ablutus aqua lustrali, postmodum de accepto beneficio gratias egit. Instituta minorum adolescentium Sodalitas: & iam nonnulli in Benedictinam familiam cooptati, plures nostram efflagitant. Archiepiscopi magna erga nos benevolentia: postridie sui in hanc urbem aduentus ad nos humanissime accessit: inuisit non raro gymnasium; sapientius templum: ubi & sua manu sacramenta populo præbet.

## CATANENSE COLLEGIVM.

**T**ANTVS sacra mysteria frequentantium numerus, ut nouem sacerdotes (neque enim plures hic versantur) non omnibus satisfaciant. aris alieni restitutiones factæ: Libri Magici combusti: concordati dissidentes: excitati multi ad Christianam mortem, tum qui moriebantur in lectulo,

Etulo, tum qui capite plectebantur. Maiorum natu Congregatio augetur quotidie: magna in omnibus observatio legum, quas acceptas a Patre Generali avidissime complectuntur. Unus eorum apud externum sine iusta causa offenderat: a quo videlicet ira percito, cum denunciata essent inimicitia, sacerdotis admonitu hominem quotidie per semihoram Deo commendabat: nec irritæ preces: incidit ille in morbum: nec satis opum ad recuperandam valetudinem: submittebat interea sodalis quotidiana eleemosynam: quod is ubi rescivit, profusus pudore lacrimis veniam petijt accepitque. Discipulorum numerus maior quam pro gymnasio: nec defuit civium benivolentia in annonæ sterilitate. Missi ex hoc Collegio, Quadragesima, Nostri ad loca duo. LEONTIVM, ubi pacati cōplures: pellices expulsæ: a duobus, quas habebant concubinas, uxores ductæ: virgines duæ conquesta eleemosyna in matrimonio collocatæ: Sodalitium institutum ad opera misericordiæ: sublevandis pauperibus octavo quoque die fit collecta: in maiore hebdomada quadraginta horarum carimonia vicitim obita, magna approbatione civitatis. Alij missi in oppidum cui nomen a SANCITO MARCO: et aliquis extitit fructus. Quattuor virginum cœnobiaz ad severiorem disciplinam revocatæ: lis quinque aureorum millium, quæ per viginti annos tenuerat, composita: altera tanta pecunia, in qua fraus intercesserat, a dominis recepta: aurei bis mille

mille quingenti stipis nomine ad templi laxandas  
 angustias contributi. Hac & alia Nostris  
 laborantibus effecta: nec labor ille mo-  
 lestus (adeo caritas gaudet be-  
 nefactis) qui ad proximo-  
 rum salutem & ad Dei  
 gloriam refere-  
 batur.

# MEDIOLANENSIS PROVINCIA.



**S**EPTEMDECIM supra du-  
centos Mediolanensis Provincia  
aluit. In Domo professa Sancti Fi-  
delis trigintanovem; in Brerano  
Collegio quinque & sexaginta; in  
Genuensi & Taurinensi tricenos;  
in Comensi tredecim, vndecim in Vercellensi, in  
Domo Probationis Aronensi viginti septem. Ad  
meliorem vitam vocati vndecim, ad Societatem no-  
stram omnino sedecim.

## DOMVS SANCTI FIDELIS.

**I**NITIVM habuit Sodalitas conflata e primo-  
ribus ciuitatis circiter triginta; e quibus sunt  
Comites Marchionesque nonnulli: sexta quaque fe-  
ria conueniunt in sacellum: sacro intersunt, & co-  
hortationi Nostrorum: vbi & eluerunt peccata,  
perceperuntque dominicum corpus non semel non  
mediocri cum fructu. Qui meliorem vitam exorsi  
superiore retexta, non exiguus numerus: nec defue-  
runt, qui a salutariconfessione peccatorum non ani-  
mo tantum anxio, sed agroto etiam corpori reme-  
dium

dium petiere: viro certe cuidam nobili qui proximus morti de anima desperauerat, quod eos diceret qui misericordiam consumpsissent, sperare amplius non posse: sacerdos consilium, auxilium, salutem attulit, in spem tandem diuinæ clementiæ, quæ nulla hominum malitia exhauriri potest, impulso: & apparuit sententiæ mutatio: nam & ille se uoto religionis obstrinxit, & bona sua omnia in usum pauperum testamento legauit: & consecuta ipsius talis est mors, ut eam admiraretur quisque, nec facile obliuisceretur. Multi Nostrorum hortatu remisissent inimicis noxam, vnius etiam pœnam commemorabili exemplo. Homicida tenebatur in carcere, scelus erat capite luendum, nisi exoraretur aduersarius: & iam pronus erat ad ignoscendum Dux Senatusque: recta ad illum sacerdos: sed hominem ita obfirmatum reperit in iratundia, & ardentem ad vlciscendum, ut verba iacerentur: orat saltem ut ne grauarietur interesse sacro, quod erat facturus: non abnuuit: admirabilem vim sacrificij: adeo in contrarium est repente mutatus, ut non solum fecerit gratiam delicti, sed vltro eodem cum sacerdote venerit in custodiam, reumque benigno vultu, verbisque magnum præ se amorem ferentibus curauerit absolui. Sed & puellæ iam nubili in eius supremis quiddam accidit admirandum. In magnam febrem inciderat, accersitur medicus, imperat inter cetera de more confessionem: commodum abierat sacerdos, vociferatur illa miserabilem in modum, comburor, comburor, ferte opem: accurrentibus dome-



domesticis, alterum, inquit; sacerdotem adducite non integre confessa: ne illa duo inferorum monstra flammantia, quorum vapor modo afflauit, miseram absorbeant: mox impetrasse veniam ex poenitentia indicauit securitas animi, qua post horam vigesimam quartam a confessione decessit. Adiuncti etiam qui extremo supplicio afficiebantur: in his fratres germani duo ea magnitudine animi ac pietate, ut cum grates agerent Deo, haberentque eius ministris, admiratio simul miseratioque eorum homines incesse-  
rit.

COLLEGIVM BRERANVM.

EX IIS qui morbo consumpti, Pater Cosmus Stella, alter e Scholasticæ Theologiæ professoribus, repentino moritur: dedit moriens, quod & fecerat viuens, raræ inter homines virtutis specimen Nostri, externisque. cum deficiente spiritu hortaretur Collegij moderator, ut supremo eo tempore diceret aliquid ad adstantes, quod prodesse meminisse, sermone primum vultuque erga Rectorem reuerenti se modeste excusauit: sed cum persisterent idem orare omnes, quærerentque hoc tantum, quæ videretur compendiaria ad perfectionem viæ, collectis animi corporisque viribus, viæ crucis, inquit, viæ mortificationis, viæ instituti Societatis: & cum hac dixisset, quieuit. Excitati hoc dicto fratres nostri quibus & stimuli additi a Patre Laurentio Magio lustrante prouinciam, cum hortatus  
priuatim

priuatim eos & publice, non sermone magis omnes  
 promouit, quam, quod ad persuadendum magis va-  
 let, exemplo. Ad scholas magna nobilitas & fre-  
 quentia, earumque tanta existimatio, vt quamlibet  
 leuem dent speciem ingenij adolescentes, certatim  
 ciues ac magistratus etiam publici, vel non inuitati  
 accurrant. Illud cum primis memorandum. Exhibita  
 est pulchro artificio versuque pereleganti, Augu-  
 stini conuersio, non solum virorum principum, sed  
 & Ducum præcellentissimorum, Mantua, & Terræ  
 Nouæ, plausu incredibili: tantoque omnium ordi-  
 num ætatumque concursu, vt, rogatu præcipue sum-  
 mæ arcis Præfecti, Costacciarj Episcopi, aliorumque  
 nobilium ac cænobitarum, quos excluderant locorū  
 angustia; fuerit repetenda: resque ipsa visa semper  
 cum maxima oblectatione vtilitatis plurimum at-  
 tulisse: ita e tenero poemate insuebat in animos ho-  
 minum sensus quidam pietatis, qui ex oculis exun-  
 dabat. In hanc urbem cum Soræ Dux Iacobus Bon-  
 compagnus commigrasset, memorque eximia cari-  
 tatis, quam viuente ipso Gregorio Pontifice, cuius  
 sancta memoria, erga Societatem vniuersam osten-  
 dit, perbenigne inuississet Collegium, exceptus est a  
 Nostis honorifice, non sine grata commemoratio-  
 ne beneficiorum quæ accepimus: quod & illi iucun-  
 dum fuit. Ceterum ardore studiorum non extingui-  
 tur feruor pietatis: nec defuit in adolescentibus, ijs  
 præsertim qui e cætu Parthenio, laus, vel in medio  
 flammarum, seruata pudicitia, aliqui deuouerunt se  
 Deo in cænobijs: omnes denique munera caritatis  
 diligen-

diligentiſſime exequuntur. In proximo pago (eſt enim interdum itum in pagos) vnius e noſtris fra-  
tribus concione permota mulier, quæ amico aſſue-  
uerat, multum licet fremente illo & ruente ad ter-  
rorem, minasque, ſaniora reſpexit. Maior vtilitas Po-  
derino (oppidum eſt nobile in Taurinis) allata: inte-  
ſtinis ardebat odijs, nulla Præſecto parendi cura,  
nulla ſacræ poteſtatis reuerentia: conſtitendi conſue-  
tudo omiſſa, aut inter paucos retenta: magna diuini  
cultus incuria virorum ſeminarumque: ad hoc ve-  
pretum perpurgandum inuitatu aliquot oppidanorū  
rogatuque Proepiſcopi, a Patre Provinciali, in pro-  
latione ſtudiorum miſſus ſacerdos, auctore Deo ea  
præſtitit, vt mutatis hominum animis, alia ſpecies  
rerum, ipſius quoque oppidi ſpecies alia videretur.  
inimicitia reſinctæ: exempta Præpoſiti colendi ne-  
gligentia: inſtaurata catechiſmi traditio: lites com-  
poſitæ: alia id genus effecta permulta: & ſi cum ob-  
ſtinato pluſculum fuit negotij: hunc filij cades,  
quem vnicum habuerat, ad immane odium parrici-  
darum efferauerat, præ vltionis cupidine animæ ſa-  
lutem nihil penſi habebat: deſectaue iam cum eſſet  
etate, & oppreſſus articulorum doloribus, quas  
manu non poterat inimicitias, exercebat lingua:  
perreptabat videlicet ſudo meridie in forum, & re-  
fricatione damni domeſtici, inſenſum in abſentes  
animum aſperabat: ſed huius quoque duritiem in-  
fregit verbum Domini conterens petras, quod e  
ſacerdotis ore mittebatur: vt profeſſus tandem ſe-  
nex deponere ſe offeſam erepti filij, ſe ſe cum Deo

reconciliarit perceptione Eucharistia; populo plaudente, eamque oculis hauriente fidem, quam vix auribus habuisset.

### COLLEGIVM GENVENSE.

**M**IRABILIA duo, præter cetera, Genuæ acciderunt: ex quibus si reddantur, pretium erit cognoscere artem mali demonis trahentis mortales ad flagitia, quo minor sit spes veniæ, crescente multitudine maleficiorum: Adolescens nondum annum vigesimum egressus inexplabilem animum sanguinis ac scelerum gerebat: id quo fidentius faciat, diabolumque habeat ad mala obsequia promptum, statuit se ei denouere: hoc cum stetisset, domo exit solitarius: paulum processerat, cum præter pedes conspiceretur quasdam veluti stellas de cælo delapsas: cum gradum sustinisset admirandus, atra quedam imago se se obtulit in densa nube supra humanum modum: Satanam esse ratus, perhonorifice excipit capite aperto, dexteramque protendit: cum tam magnifica salutatione nullum responsum eliciuisset: nisi quod comes erat additus via, existimans paruum illi honorem habitum, Apostolorum principes Petrum & Paulum, ipsumque adeo eorum magistrum infami ore execrari cœpit: cum ire pergerent, propter beati Petri adem nubes euauit: sed paulo post reddidit se eodem habitu incessuque: cumque rursus se ex oculis subtraxisset, reliquit miserum cuiuslibet patrandi facinoris su-

rore incensum. At videte Dei clementiam: cum ferox scelerum iuuenis ad plura accingeretur, opera sodalium quorundam e religiosa familia, quibus forte eam rem narrauerat, ad vnum e nostris sacerdotibus adductus, ab eoque ad meliorem mentem reuocatus est, peccandi libidine reiecta. Igitur hoc primum: sequitur alterum. Vir erat improbus ac pane perditus ad extremum: hunc etiam, vt se se demoni dederet, inceffit cupido: solinago obijcit se is, quem querebat, in pueri specie, ita fœda, vt cruce frontem muniret vulnerari metuens aspectu: & ruebat tamen in interitum animæ: verum ab amico rei fortasse conscio, vt mutaret viuendi rationem, ductus ad sacerdotem vnum e nostris, rediturum postridie promisit: discedit: in itinere offusa oculis caligo, itaque atrociter verberatus in facie, vt prope affligeretur ad terram: recurrit ad crucis arma salutaria: nemineque conspecto peruenit ad ades, quo intendebat, puerum cum tibi offendisset, arbitratus aliquem esse de vicinia, vt abeat inde, & domum se referat, hortatur: ego vero, inquit ille, hinc non abeo, & domus mea hac est, quam vna tecum teneo, paratus tibi ad omnia quæ imperabis: tum demum intellexit illud pueri quid esset: & tunc quidem signo crucis obiecto, vt semel atque iterum antea: postero die confessione facta omni terrore animum atque etiam errore liberauit. Ceterum & in publica custodia apparuit vis diuinæ benignitatis. Reus attinebatur multa scelerum fama dilaniato tormentis corpore, a damnatione non pro-

cul, quod ipse nesciebat : auersabatur porro sacerdotem nostrum, qui frequens in carcerem, tamquam dirum omen mortis, vel nuntium : cum eum tamen perstaret Pater hortari ad confessionem, parere constituit monenti : igitur cum reptaret ad sacellum, ter se ad ingrediendum, cum subinde caderet, impediri sensit : ut fuerit inter aliorum manus deferendus : tertio post die per Eucharistiæ Sacramentum placato numine, cum duas horas in religiosa precatione posuisset, opportuna morte imminentem pœnam effugit, ceterisque vinctis per salutarem confessionem expiandi animas fecit exemplum. Interim ciues de totius vitæ peccatis auditi circiter ducenti : ne agitarent fenus & in vsuras extenderent, persuasum multis : alijs ut redderent iniuste parta : & vni quidem, ut aureorum mille, alteri, ut duo millia. Procurata dos aliquot puellis, quarum pudor in lubrico versabatur : eodemque consilio, interposita quorundam auctoritate virorum, factum initium alendarum feminarum, quæ orbe parentibus magistra paupertate scholam celebrant, vel cogitant impudentiæ. Et quoniam ex attenuata superioris anni inopia, & artificum exiguitate quæstus, adhuc multos vrebat annona, frigore fameque stratis per vicos & compita corporibus : destinato loco his omnibus a senatu, magnaquæ vi pecunie ad hoc opus erogata, subuentum : dataque opera a Nostris eorum animis confessione purgandis, sacraque doctrina imbuendis : aliquid etiam deriuatum studiij in cænobia virginum : ita, quemadmodum precedenti

denti anno in nonnulla meditationes rerum diuinarum inuehi ceptæ, hoc anno in vnum ex illis præcipuum quotidiana commentatio, & ea quidem horaria introducta: nec defuimus externis. Angli duo iuuenes nostrorum diligentia prauas de Fide opiniones eiecerunt, quas animo imbiberant. Ceterum conglutinati dissidentes: quos inter presbyteri duo huius diæceseos, re antea sine vlllo effectu a multis tentata: atque ij nunc sunt illud vitæ genus ingressi, vt qui præterita comparant cum præsentibus, admirentur: vir denique unus qui præpotentum duorum metu, quibus erat offensus, per quadriennium se domo tenuerat cum graui iactura rei familiaris, nostris orantibus, obtinuit, vt securus odij ab vrbe discedere, & in alia regione negotiari libere posset.

MISSIO.

POSTULANTE Episcopo Centurionio qui mortem obiit, missi de Nostris in Finarium oppidum duo, adeo viles oppidanis fuere, vt cum eorum discessum æquo animo ferre non possent, inierint rationem Societatis introducendæ: instruxerunt domum, redditus annuos constituerunt, omnia necessaria contulerunt. ad concionem matutinam doctrinamque pomeridianam admirabiles concursus, fastiditis etiam ludis, quod sane quam mirum fuit, in Bacchanalibus. Sed ne tam præclara incepta spatio languescerent, primorum accessit aucto-



ritas. Instituta etiam Sodalitas virorum e prae-  
 pua nobilitate, ad centum fere & quinquaginta, ubi  
 de rebus spiritualibus quot hebdomadis semel ve-  
 nitur in colloquium: altera adolescentium viginti-  
 quinque concelebratur festis diebus. Societatis  
 exercitationibus expoliti nonnulli: ex his iuricon-  
 sultus sacerdos effectus: & virgo Genua coenobium  
 ingressa, actum cum ludi magistris, de pietate in  
 scholis cum litteris iungenda. pax inter discordan-  
 tes composita: & interuisi agrotantes. multa id  
 genus communia, Finarini, & vicinis etiam in pa-  
 gis ad Dei gloriam audita visaque. Duo illa eximia  
 adolescens dum de confessione cogitans abstractus a  
 curis alijs in se inquitur diligentius, improuiso im-  
 petu ab inimico circumuentus duo vulnera accipit,  
 vnum in humero, alterum in pectore: nec potuit qui  
 effundebatur sanguis cupiditatem illam obruere:  
 eo vix dum absterfo, sacerdoti se aperuit cum lacri-  
 mis, & inimico condonauit iniuriam: acceptum id  
 Deo fuisse recepta postmodum valetudo declarauit.  
 Virgo duodecimum iam annum visu laborabat, ad  
 altaris Sacramentum cum accederet primum, tanta  
 fiducia sensuque mentis ab eo quem acceperat ore  
 sanitatem petere est ausa, vt ea reddita, clariorem  
 subito lucem mirantibus oculis simulque gaudio la-  
 crimantibus, e templo discesserit.

COLLEGIUM TAVRINENSE

cum missionibus.

**P**ATER Laurentius Magius remertens e Gallijs, hanc prouinciam, ut in itinere, visitare iussus, ab hoc Collegio, quod ei primum occurrit, duxit exordium: illudque eius officium caritatis & prudentia plenum, multas ad res Nostris perutile fuit. Deceffit coadjutor temporalis vnus, tanta, & eminebat in vultu, cum letitia, ac voluptate, ut qui similes affectus didicerat alias abscondere, submo- leste ferret, se ne cum quidem cum maxime vellet, occultare posse. Quattuor in Societatem scholastici adsciti. Vnus domo Gallus linguarum scientia & Philosophia apprimè instructus: Nicanus alter iu- ris prudentia studiosus, iam laurea donandus, iam destinata sibi vxore aucturus suis letitiam fami- liamque: nec destitit eum bonorum hostis per obla- tum socium ab instituto detertere, & distingere in itinere: sed aduersus omnia firmavit animum Christi amor, ac vicit. Tertius fuit prænobilis Dynastæ fi- lius nostræ disciplina alumnus: cui & si pater prin- cipio non iniquus videbatur, mox in consfciendo ne- gotio eum nodum moramque obiecit, pratexens amorem posteritatis, ut adolescenti mira vtendum fuerit, & modestia in non irritando, & patientia in perfringendo. Quartus denique, qui recens a No- stris scholis publicum vrbs gymnasium studiorum causa celebrabat. Sunt & alij qui idem parturiunt: differuntur videlicet, donec ad plenum formetur in

illis Christus. Scholæ nostræ frequentantur a Subalpina nobilitate splendidissima, & elucet pietas in singulis: vni quidem sacerdoti nostro quinquaginta quicquid aduersus Dei legem admisissent in omni vita, confessione exposuerunt. Ad tria Virginis Sodalitia, duoque, vt vocant, Oratoria, illustris accessit Academia, Duce non nesciente & probante, e viris eruditissimis: eaque esca multi ad suscipiendam cogitationem melius instituendæ vitæ allekti. In sodalitiū maximum præter Nuntium Apostolicum Venetumque Oratorem, ipse etiam Dux cooptatus, eo argumento pietatis, vt nec contentus grandi pecunia quam submiserat, eodem accesserit, religio-  
saque exercitationi sodalium tamquam vnus e multis in communi scamno interesse voluerit. Spiritu-  
alibus commentationibus eruditi multi: e quibus primarij nonnulli, reique participes publicæ, cum domum nostram se recepissent, quod gerebant, munere tantisper intermisso, hominibus, vt sit, & in aula & in vrbe cuncta interpretantibus, sermonem dederunt. Quantopere Dux erga doctrinam Christianam quæ pueris explicatur, sit affectus, vel ex hoc coniectare licet: quod cum subueritus quidam e nobilitate, ne si optimatum filij eam publice recitarent in templo, inferius eorum genere videretur, ipsique Duci non adeo acceptum esset, super eare Ducem per idoneos viros consulisset, hoc tulit responsum, Ego vero ne dum moleste feram filios virorum nobilium Catechismo institui, meos quoque ad idem exemplum, vbi per atatem licebit, exerceri

exerceri iubebo. Hæreticus quidam custodiebatur  
in arce propter atrociam eius scelera vita priuandus :  
quam tamen Dux, memor operæ ab eius fratre sibi  
impigre nauatæ, permissurum ostenderat, si resi-  
pisset. Cepit hanc prouinciā unus e Nostri,  
quam etsi duram omnes dicebant, tamen in pri-  
mo congressu ita rem Deo adiunxit, ut quem diu  
ante obfirmauerat animum, hæreticus ad leniora con-  
uerteret. Ex eorum numero, quibus ad supplicium  
rapiendis præsto fuerunt Nostri, centurio erat igni  
tradendus : qui opportuna eorum frequentique co-  
hortatione, & piorum librorum lectione consilium  
cepit christianæ & fortiter mortis appetendæ. &  
præmunijt se ad illam volumaria afflictatione cor-  
poris atque inedia, ita constanter, ut omnibus qui  
eum inuiserent, inuiscabant autem quamplurimi, ad-  
mirationi esset : supplicium illud, quod esset prome-  
ritus, accepturum asseuerans beneficii loco, & ad  
grauiora se offerens Deo paratissimum. Cum pri-  
mum introductus est qui necessitatem ultimam de-  
nuntiaret, nihil mutato vultu nec voce, Benedictus,  
inquit, qui venit in nomine Domini: ingredienti car-  
nifici, frater benedicat tibi Deus : cum ligarentur  
manus, laus domino meo Iesu Christo, qui mei cau-  
sa vincula sustinuit : cum collum circumdaretur fu-  
ne, an non pro me Domini mei collo funis iniectus ?  
cum per vias incederet, assidue Deum collaudabat,  
effusumque populum cohortabatur ad bene viuen-  
dum : in ipso patibulo peccatorum reliquias confes-  
sione deterfit, exposcens astantium preces, admo-  
toque

toque ad machinam corpore clausis oculis, inter  
 has voces, Domine Iesu miserere mei, stupentibus  
 omnibus qui aderant, & collacrimantibus migravit  
 e vita. Pium opus, vulgo dictum virtutis hospitium  
 tanto ante animo & cogitatione descriptum, ad vi-  
 rilis muliebrisque sexus etatem omnem, quæ pau-  
 pertate premitur, subleuandam, hoc tandem anno  
 initium habuit: separantur in iisdem edibus alteri  
 ab alteris, & in utili aliqua perdiscendo artificio  
 honeste occupantur. Singulis mensibus audiuntur,  
 docenturque Christiana elementa diebus festis a  
 sacerdote nostro fratreque, qui sunt in hoc Collegio  
 etate maxime promota. Actum, ut prava quedam  
 & vetus tolleretur consuetudo tripudiorum, Ducis  
 interdicto, præcipue circa templa: itaque iam, si for-  
 te, saltantes abdunt se in angulos: & inde tamen  
 frater vnus e nostris ingenti ardore mentis, interru-  
 ptis choreis, tacere iussis fidicinibus, puellas ad  
 Christianam doctrinam extraxit. Magna est apud  
 oppida circumiacentia virosque principes de Socie-  
 tate existimatio, ut non tantum ad nos adeant cau-  
 sa consilij, sed suos liberos nostra discipline in ipsa  
 morte committant: quod quidam cum fecisset, eius  
 rei tutores admonuit. Sed & Dux Serenissimus,  
 eiusque vxor, Infans item Serenissima, non obscura  
 Nostros beneuolentia prosequuntur: neque enim  
 solum ad adem nostram sæpius adierunt, sed sexta  
 etiam quaque feria Quadragesimæ, cum ad sacram  
 sindonem in templo maximo sermonem haberi ab  
 vno e Nostris voluissent, nullum diem intermise-  
 runt:

runt: quin ipse Dux, sic est illis sermonibus delectatus, ut quo reguſtandi poteſtas eſſet, curauerit deſcribendos. Ex ijs, qui cum Eccleſia redierunt in gratiam, ſorores tres fuerunt, vna cum fratre germano ſtatu grandiore: qui cum educati eſſent in hereſi, piorum nunc hominum fidei curaque commendati in perfectæ religionis viam videntur ingreſſi. Data præterea opera, ut nobilis quedam Congregatio, quæ iamdudum eſt in hac vrbe, procurationem eorum ſuſcipiat, qui ſalutari tingendi aqua, ad eam Catecheſi præparantur: eoque in munere adiuuantur a Noſtris: & hoc anno baptizati duo, e Maumetana colluuiæ, Aſer vnus, Hebræus alter quattuordecim annorum: Hic a femina Chriſtiana quam famulam domi habebat, edoctus ut ad Chriſtum accederet, a patre profugit: Taurinum deinde miſſus a Dynaſta nobili ad Apoſtolicum Nuntium, a Noſtris inſtructus, quod propter eius celeritatem ingenij fuit quam facillimum, tertia feria Pentecoſtes a Proepiſcopo ablutus, a Duce & a nutrice Principis filij e ſacro fonte ſuſceptus eſt: ante baptiſmum ad populum Iudeosque, qui Ducis edicto omnes conuenerant, grauiter & erudite ſermonem habuit: egit grates primum Deo qui eius animum cupiditate Chriſtiane religionis incendiffet, tum execratus Iudaicam ſuperſtitionem, parentes valere iubens, eorum loco Chriſtum agnoſcēs, matremque Virginem, ita permouit auditores, ut pluribus exciuerit lacrimas, omnibus admiratione defixis, agit nunc in conſuetorum contubernio benigniſſimi Ducis impenſa:

*mira cum virtutis specie, & laude probitatis.*

**I N P A G O S** multos oppidaque Subalpinae regionis excursum est: ac primum quadragenis ieiunij diebus sacerdos cum laico in cænobio oppidoque fuit, cui nomen a sancto Benigno, obitaque munia Societatis: in cænobio sermones habiti ad monachos de monastica disciplina, quæ instaurata in plerisque: horariæ preces a cænaculo in templum translata: restituta ieiunandi consuetudo. Alio in oppido adeo gratis animis exceptus usus Christianæ doctrinæ, quo in munere versabatur frater, & Franciscanus concionator semper interesset, allata causa, ut absentis deinde locum impleret.

**I N P E T R O S A M V A L L E M**, ut Montis Regalis Cardinali illustrissimo mos gereretur, ex auctoritate Patris Generalis missi duo de Nostri conciones, etiam ab hæreticis, libentissimis animis exceptæ: magna enim hoc tempore spes eorum reuerſionis: tum quia Salutij, ad quos illorum erat perfugium, iam in Ducis Sabaudia potestate, tum quia ipsorum multi a tam salutari consilio, a ministris scelerum se abduci querebantur: & iam nunc cum fallere possunt oculos obseruantium, concedunt furtim in tēpla Catholicorū, magnaue humanitate Nostri rogati æque, non rogatique, libenter inferuiūt.

## COMENSE COLLEGIVM ET

Aronensis Nouitiorum Domus.

**C O M I** muliercula tres ab infami quæstu deductæ: Tres virgines cænobiticam vitam complexæ:



plexa: aliqua ita se totas diuino cultui dederunt, ut suis parentibus fuerint exemplo. sed & nuptæ aliquot, viris ad pietatem amplectendam, adiumento fuerunt. Maioris ieiunij sexta quaque feria in sacello Collegij habiti sermones de Pœnitentia perutiles, tanto cum sensu audientium, ut ciues quidam auctoritate graues & ætate a lacrimis non temperarent. Ceterum funestus annus ciuitati fuit morbo quodam letifero grassante: at Nostri sine timore contagij noctu diuque horis pæne singulis præsto erant laborantibus: quod perinde utile multis quam gratum omnibus fuit: neque tamen scholarum cura intermissa: e quibus nonnulli ad Religiosorum familias se contulere.

**ARONÆ** decessit Pater Philippus Cappagnus. A prima adolescentia vixit in Societate magna opinione sanctitatis: cum liberatus esset onere Comensis Collegij, cui præfuerat exemplo magis, quam imperio, Centurionio Episcopo rogante Saonam missus, vbi & commoratus est admirabili cum fructu: hinc cum redisset, iuit iterum in Nouariensem diœcesim, quæ Nostrorum desiderabat industriam: vbi duos cum adlaborasset menses, fructu laborem fallente, quodam in oppido inter montes, in ipso suggestu acuta febre correptus, relatusque in hanc domum vim morbi non sustinuit. Eius obitum dicitur Deus piæ cuidam mulieri, cui erat ille a confessionibus, præmonstrasse. Fundebat pro sacerdote antequam missionis obiret munus, preces intimo affectu, cum arborem intuetur in magnam altitudinem

nem expansis ramis excrescere, e quibus flores fructusque vberrimi, statimque mortuo trunco rigentibus folijs exarescere, sed egressam ex ea columbam miri candoris in calum euolare. hæc omnia interpretans illa, ad Patrem, qui in bonorum operum copia animam nulla labe infectam Deo redditurus esset, referenda coniiciebat. euentus visum approbavit. Ceterum adiuti quoad fieri potuit Nostorum studio multi: & tæta quadam lue ad plures serpente, moribundi: inter hos vnus atrocitate morbi, an cogitatione malefactorum, redactus ad insaniam diabolum clara voce implorans orabat enixe, vt infelicem animam extraheret e corpore: non distulit captator animarum: intrare visus cubiculo excusso, cunctisque spectantibus qui aderant, arreptum hominem & sublatum e lecto iam iamque asportare conari: sed cum pro ægroto Deum illi comprecarentur Iesu nomen assidue inclamantes, destitit ab incepto: accitus vnus e Nostris moderatione prudentiaque ita ægrum animum delenijt, vt cum præstitisset Deo pietatem quam debebat, quantum quidem poterat per difficultatem morbi, & angustias temporis, a demone relictus tranquillissime expiravit. Extorserunt tandem ciues hoc anno repetitis precibus e Societate concionatorem per ipsos dies quadraginta qui Pænitentia addicuntur: habebat diebus festis mane concionem, sub vespertinam, differentibus pueris de doctrina Christiana, vt erant instituti, in disputatione & dialogo, ex occasione ipsius capiti pro suggestu familiariter explicabat, tanta cum vilitate

utilitate audientium ac voluptate, ut cum secundum Paschales ferias discessisset, iisdem flagitantibus, qui inchoatum opus pertexeret, fuerit subrogandus.

# VERCELLENSE COLLEGIUM.

**H**IC tandem sedem fiximus, qui antea fueramus inquilini. Templum est in urbe amplum, plenumque dignitatis, nostris muneribus appositum: proximum habet alterum Canonitorum Collegio nobile: illius ne possessio nobis daretur, numquam nec Cardinalis illustrissimus, nec Reuerendissimus Episcopus Vercellenses, quorum tanta erat auctoritas, ut nihil eis denegandum videretur, impetrare potuerunt. Sed nimirum bonum est in Deo spem ponere quam in Principibus: hoc enim anno ciuitas post eorum obitum, comitante etiam Duce Serenissimo, ut id nobis liberum sine ulla tergiuersatione traderetur, a Pontifice maximo obtinuit. Et missum est Pontificium diploma perhonorificum, quo & assignatum Societati templum, & facta potestas emendi propinquas ades, quæ Nostorum commorationi necessariae forent. Igitur, ut ciuitati bene de nobis merenti grati essemus, duæ scholæ iam diu expetite Grammaticæ una, altera Humanitatis, apertæ: concionumque & Catechismi factum initium: etsi hic quoque acutæ febres, quæ morte afficiebant corpora multorum, materiam Nostris præbuerunt caritatis exercendæ: sic ut non raro domi vnus aut alter relinque-

linqueretur, alijs agrotorum subsidio profectis: eo-  
 que in genere, quæ diuinam approbauere providen-  
 tiam, euenire nonnulla. non nemo recens a confes-  
 sione affectus errore mentis: nec defuit qui abdu-  
 ctus est a non communicandi pertinacia: & alia com-  
 munia. illud quidem ad memoriâ insigne: quod  
 quidam cuius frater erat interfectus, cum adhuc su-  
 per calidum cadauer lacrimas effunderet, tantum  
 tribuit, suggerente vno e Nostri, amor aduersus  
 Deum, vt liberarit metu ac suspitione eos qui cædis  
 insimulabantur. Hæc propter, atque alia, ciuitatem  
 habemus Societatis nostræ perstudiosam: ipsius au-  
 tem Sarnani Cardinalis (is enim nunc est Episco-  
 pus) Vicarium, Nostrorum precibus tam multa tri-  
 buentem, vt eorum rogatu eximens alios a tiremi-  
 bus, minuens alijs, aut omnem remittens pecunia-  
 riam multam, magnis beneficijs obstringere  
 plures non cesset: quo magis laborant  
 Nostri, vt suis officijs, & studio  
 ciuitatis, & Proepiscopi be-  
 neuolentia respon-  
 deant.

# V E N E T A P R O V I N C I A .



**C**OMPLECTITVR Veneta  
Provincia domicilia duodecim ,  
socios amplius tercentum , Vene-  
tijs quadraginta, Patavij quinquaginta,  
Bononia viginti septem, Fer-  
rariae vnum & viginii, Tredecim  
Mutinae, octodecim Parmae, Foroliuij quindecim,  
Brixiae quadraginta, Nouellariae septem & trigin-  
ta, Placentiae quindecim, Mantuae duodeuiginti,  
Septem in Domino quieuerunt: Tredecim in Socie-  
tatem admissi.

## D O M V S V E N E T A .

**A**D LABORANTIBVS Nostris no-  
socomium institutum, curandis remigibus, qui  
prius in exarmato aliquo nauigio omnium rerum  
egeni miserrime agebant . magna vis pecunia quam  
intervenierat fraus, an inscitia, ad dominos reuertit.  
Periclitanti seminarum aliquot pudicitiae consul-  
tum . Viri nonnulli a concubinarum assuetudine ad  
bonestiores vitam traducti . Rhetymnae, quae &  
Rhetima dicitur, Episcopus a summo Pontifice duo  
Collegia fundanda in Creta insula impetrauit, vt in-  
colis prodesse: secumque sacerdotes duos, toti-  
dem laicos auexit . Cum deinde clarissimus vir Io-

annes Baptista de Monte Venetorum militia Præfectus, illius insulæ arces & præsidia inspecturus discessisset, sacerdotem unum a confessionibus habere voluit: huic frater additus: vterque confecto prior negotio, cum alijs in eadem insula manebit. Pontificius Legatus, & designatus Aquileia Patriarcha, nostræ Societatis exercitationibus instructi. Cum proximum iubileum in hebdomadam sanctam incidisset, & in tam populosa vrbe, superante multitudine confiteri volentium, a sacerdotibus audiri omnes non possent, Pontificius Legatus hortatu Nostrorum a Pontifice obtinuit, vt repetendi esset facultas: factumque mirifico cum fructu. Sacerdotes e. Nostris duo, a quibus magnâ utilitas ad procuracionem animarum (ex his vnus Valentinus Arigonius) acuta febre extincti.

### COLLEGIVM PATAVINVM.

**D**I A L O G I duo in præmiorum distribucionē ad excitandam iuuentutem magna frequentia dati. Germanæ mulierculæ duæ a turpi vita ad honestam, ad Catholicam veritatem ab hæresi conuersæ. Exercitijs spiritualibus eruditi circiter quinquaginta: in his fuerunt Archiepiscopi duo, Episcopus vnus Gallus, diuersorum cænobiorum concionatores duodecim, vnus nouitiorum magister Dominicanæ ordinis, vicarij Episcopales duo, totidem Dynastæ, tres Abbates, Legatus regius vnus, nobiles Veneti nonnulli, reliqui Dalmatæ, Rutheni, Itali,

Itali, magni nominis omnes : ex his illi fructus. Religiosi sodales suos externosque cohortationibus iuuant & exemplo, aliquos ad eundem Sacerdotem adducunt, a quo fuerunt imbuti, similiter imbuedos. alij e longinquis regionibus in patriam reuerterunt eo animo, suis ut ciuibus prodesse possent. nonnulli rebus humanis remisso nuntio, varias Religiosorum familias, & nostram quidem duo, ingressi. De vno breuiter edisseram. Dederat hic operam Nostris philosophiam docentibus Mediolani, dederat & specimen publice sui profectus : cum vocaretur a Deo ad nostram Societatem, nec praberet aures, iuris ciuilis studio Patavium concessit. Sed cum difficile esset contra stimulum calces, nullamque caperet quietem, suasu vnius e Nostris qui erat illi a confessionibus, instituendum se permisit commentationibus Patris Nostri Ignatii, exploranda diuinae voluntatis. Vix prima septimana exacta, manus dedit, eo animi impetu, ut negaret differenda, quibus de aeterna salute agitur, consilia. Pater qui erat pro Prouinciali, Brixia aberat. hic mora impatiens, citato equo, continuato die ac nocte itinere miliaria prope centum emensus, bene mane Patri se sistit : aperit consilium. Prudenter is pro re spem iuueni offert, ne id esset nimis properum : hoc magis incensus ille, instat vehementius : spem dat dubie menti Pater, sed nihilominus differt. Et iam iuueni exarserat cupidine Religionis : ubi precibus nihil proficit, se ipse accusat cum gemitu : non audior a te Pater, quoniam ego prius Deum non audiui :



ergo pretium ob stultitiam fero: iam aliquo, vel Bononiam ibo, vbi vita & moribus me dignum esse vestra Societate probem. Res magnæ caro emuntur. Hic hominem vt certum consilij vidit Pater diuinitus flexus, Vicisli, inquit, tua constantia: iam nihil moror: & excepit gratulantem. Alter quadriennium in iuris scientia posuerat. Sed quoniam de his loquimur qui fuerunt accepti: accepti enim sunt sacerdotes duo, vnus Theologus, perfectus alter in omni parte humanitatis, vtriusque linguae sermones apprime doctus: itaque versatus in instituenda iuuentute, vt excellat: Clericus præterea vnus philosophus, vnus medicus, reliqui coadiutores duo.

**E F F E C T V M** est opera Nostrorum, vt politici quidam libri, e quibus prudentia hauriebatur inimica Deo, castigarentur: id negotium Nostrorum vni impositum, confectumque communi omnium assensu. Scholaſtici duo e diuersis nationibus, exorta rixa se mutuis vulneribus affecerant: hunc sua vtrumque natio vltum ibat accincta ferro, propriam nationis existimationem agi existimans: intercessit sacerdos vnus: sauciorumque cum prius purgasset confessione animos, studia reconciliauit: quibus sedatis, modicis remedijs reliqui motus confedere. Cum in itinere, quod est hinc Venetias, continenter naues vltro citroque commeent, illudque navigationis spatium plerumque confusa more multitudinis, per licentiam in sermonum lasciniâ versatur, si quando Nostri (vt saepe) eo

ex numero esse contigerit, ijs sermonibus eunt obuiam melioribus ordiendis, spargendisque libellis, quibus ad pietatem conuectores incitentur: res maior aestimatu quam dictu. Sacerdos vnus e Nostris spectata vir prudentie apud quem iam Episcopus, ad quem ierat accersitus, magna cum eius utilitate triduum posuit. Simultates inter ciuitatem, atque Episcopum tumescentes repressit: Seminarium ab eodem Episcopo institutum composuit: nec molto post cum Synodum celebrare vellet Antistes, rerum capita de quibus erat acturus, eidem Sacerdoti excutienda misit, qui Patavium redierat. gestus est mos ipsius voluntati. Is autem est ille terrarum tractus qui Episcopo subijcitur, vt quod in ijs decretum est, propter locorum propinquitatem, sit multis circa populis utilitati futurum.

## COLLEGIVM BONONIENSE.

**Q**UIDAM animum habebat ad flagitia precipitem, nec resipiscebatur. Oblata est ei noctu, dormienti an vigilanti, species Angeli, sic eum increpantis: Et potes miser ac miserande, cum tot sceleribus offensam Dei contraxeris, sine cura somnos ducere, nec cernis qua te pericula circumstant? Quin moras rumpis, & reconciliaris Deo? quod si non omnino es sine mente, rape tandem occasionem. In alijs rebus celeritas periculosa, in hac vna est tutissima. Defixit ea vox metu audientem: hominique vitæ sapienter instituendæ initium fuit. Ma-

ritus: in uxorem promptam ferocibus, in propinquum alius immodicum linguae, ferrum stringere obstinuerant: sed de Nostrorum consilio immutauit se uterque: & ille quidem, ut mulierem immutatam, & veniam ut peteret, prouolutam ad genua suppliciter vidit. Perseuerantiae sodales notoriam studio & nomine, excitatas aliquot discordias & grauissima etiam odia, duas inter nationes quas in iurgio accenderant vulnera utrinque accepta, sedarunt. Schola nostrae aucta ob Collegium praecipue nuper ab Archiepiscopo institutum Conuictorum nobilium, qui erudiuntur, a Nostris: eas semel Palaeotus Cardinalis sua praesentia benedixit: quo etiam die cum tribus Episcopis & primarijs Academiae doctoribus, magnus conuiujs, apud nos cibum capere voluit. In Collegij aedificatione mille aurei plus minus expensi. Factum etiam argentum, sericamq; vestis sacrae suppellectilem cumulauit.

## COLLEGIVM FERRARIENSE

**M**AVMETANA mulier perducta ad Fidem. Haeretici tres, atque ex his relapsus vnus, ad Ecclesiae gremium reducti. Mulier sexagenaria Catholico ritu numquam confessa, id ut faceret edocta. Varij ad varia canobia se applicarunt. Coniuges placati duo, qui, e graui litigio quod intercesserat, diuortium meditabantur. Ad vetera Grammaticae & Humanitatis gymnasia, additus cumulus Rhetoricae: magna discipulorum diligentia & pie-

& pietas, sodalium præcipue Mariæ virginis, ij sollemni carimonia exceperunt munus Patris Nostri Generalis, quo cum Sodalitate principe Romana coniungebantur.

## MVTINENSE ET FOROLIVIENSE

Collegia.

**M**VTINAE aucta re familiari, aucta etiam familia.

**E**FORO LIVII in loca propinqua crebò excursus, & explicatus Catechismus. In vno disciplina puerilis restituta. In duobus cum a fratre nostro aleatores deprehensi essent, molliter primum obiurgati, tum inducti, vt abiectis aleis ad litanias recitandas flexis genibus conuerterentur. Inueterauerant per annos duodequingenta, tres inter familias inimicitia, nec ullus reperiebatur finiendi modus: vires enim adij non facile mitigabantur, & erat consuetudo insuperabilis: placuit diuina bonitati, vt hoc in opere conatus Nostrorum adduceretur ad effectum, tam felici successu, vt ea res vna in his annalibus Foroliuense Collegium facere possit insigne.

## PARMENSE COLLEGIVM.

**S**UAM IN NOS benevolentiam Ranutius Princeps multis rebus declarauit. In locum Patris Petri Angeli Consulis qui est mortuus, alte-

metni-

E 4 rum,

rum; ut sibi essent a confessionibus, delegit: actioni publicæ Christiani Catechismi summa cum voluptate & commendatione humanitatis suæ interfuit. Extremis Bacchanalibus, quo tempore male sana iuuentus in omnem licentiam se effundit, cum exposita esset in æde nostra sacrosancta hostia palam adoranda, ad eam venerabundus accessit: quod auxit populi religionem. Denique, ut alia mittantur, Hebraum, qui institutus a Nostriis, nostro in templo ab Episcopo abluebatur, excepit a fonte. Congregatio Virginis fructus aliquos dedit: tres ex eo numero religiosam vitam amplexi. Cum sex Societatem nostram expeterent, vnus tantum voti compos effectus. Quod ad rem Collegij pertinet, ea pecunia, quam Dux Octavius nobis testamento reliquit, æs alienum dissolutum. Mulier primaria quinos videnos aureos in annos duodecim nobis legavit. Villam suburbanam ad exitum perduxit amicorum benignitas. Templum quoque ditius factum donata veste, quæ ducentis minimum aureis æstimatur.

## BRIXIENSE ET VERONENSE Collegia.

**B**RIXIÆ Sacerdotem vnum annos agentem duodenonaginta Deus ad se vocavit: hic ut multis magnisque virtutibus clarus, tum patientia, qua oculorum cæcitatem per totum quadriennium tulit, fuit maxime conspicuus. Tres in Societatem

tatem adscripti : adiutores rei domestica duo , scho-  
lasticus vnus praeſtanti ingenio . Discipulorum nu-  
merus ita auctus , vt ad tres superiores classes , quar-  
tam adijci oportuerit tradendis Grammaticae rudi-  
mentis : eorum pietatis hoc erit ſignum , quod Iubi-  
leo proximo , magiſtris hortantibus , qui ad nos ven-  
titant omnes , octo decem ve exceptis , peccatorum  
maculas eluerunt confessione , vel a primis annis ,  
uel a generali ultima repetita . Reſtitutiones duceno-  
rum trecentorumve aureorum factae non paucae . Con-  
fessiones vitae totius audite fere innumerae , ita vt  
vnus acceperit circiter quadraginta .

VERONAE nihil memorabile accidit hoc  
anno : niſi quod noui templi fundamentis vix iactis ,  
Veronenſis quidam medicus , tertiam bonorum par-  
tem ( ea eſt aureorum trium millium ) ad eius edi-  
ficationem ſponte legauit :

## DOMVS PROBATIONIS

Novellariae.

ANNONAE caritas Nouellarienſi pau-  
pertati nec grauior , quamuis magna fuerit ,  
videri debuit : & fuit valde ſalutaris . nam , prae-  
terquam quod Comes Alphonſus priuatas quas-  
dam familias ſua benignitate ſuſtentauit : Comit-  
is Camilli fratris liberalitate , a natali Domini , ad no-  
uam vſque meſſem mane quotidie duceni pauperes  
paſcebantur , alternanti ordine : vt centeni accepti  
plena menſa ad qua Comes ipſe miniſtrabat , centeni

cum

cum binis panibus dimitterentur, postridie ipsi ad mensam accubaturi. Medio hoc tempore omnes Christianis praeceptis eodem adiutore Camillo a Nostis instruebantur. Quotidianum spectaculum visus sane quam auditu iucundius. Aegrotus quidam de nobis benemeritus, iam nulla spe vitae, cum eum supremas agere oporteret curas, captus est tam alto somno, ut timendum esset ne mori iungeretur. excitantem quemcunque quasi interpellatorem quietis cubiculo expelli inbebat. accitus denique vnus e Nostis ita prudenter egit, ut ager sopore discusso, rebus suis dispositis prospiceret animae salutem. quo statim facto, alienatis sensibus spiritum efflauit.

### COLLEGIVM MANTVANVM

(Mantua & Placentinum.)

**M**ANTVAE annuum Collegij vectigal ductum incertum est: nam duorum aureorum millibus, quos Hercules Cardinalis frater Ducis Niuernensis Societati reliquerat, exactis, res soli cormentur: & vnus e Nostis centenos vicenos aureos in singulos annos Collegio addixit. Dux praeterea vrget templi adificationem, magnisque quotidie beneficijs praeuenit desideria nostrorum. Inter viros uxoresque, quorum vnus iam venenum parauerat, reconciliationes quattuor factae. multi male parta dominis reddiderunt.

PLACENTIAE obierunt duo, Sacerdos & Coadiutor: morbi ille grauitate sese repente, hic diutur-



*diuturnitate paulatim consumptus. Sed huius iam  
 eturam alterius admissu compensatum iri speramus.  
 In ade maxima, maioris ieiunii diebus, & bona par-  
 te anni, concio habita, non sine fructu. Sacra my-  
 steria, quod antehac raro factum, iam primores vr-  
 bis frequentant. Consuetudo erat vetus, vt nobiles  
 matronæ non in vjs modo, sed & in templis aperto  
 capite essent: nunc eiusdem concionatoris admonitu  
 abolita. itaque & puellæ, non tantum matres, in-  
 cedunt velatis capitibus. Multi degustata dulce-  
 dine Christianæ pietatis, ad diuini amoris studium  
 incensi. Cædes repressa. pacificationes factæ. Ad  
 Sodalitium beatæ Virginis interius alterum adiun-  
 ctum, vbi meridianum tempus ab adolescentibus  
 pijs vtilissime collocatur. Serenissimus Princeps  
 Ranutius cum huc veniret, templum inuisit, cuius  
 parietes carmine plurimo & emblemate conuestie-  
 bantur: acceptus Græca Latineque oratione a stu-  
 diosis adolescentibus: hoc eorum officium gratum  
 sibi fuisse & probatum, non verbis modo, sed hac  
 etiam re ostendit: quod ea omnia referri in libellum,  
 sibi que reddi voluit. hinc aucta erga nos beneuolen-  
 tia ciuitatis. Reuerendissimus Episcopus multis mu-  
 neribus pretiosaque veste templum exornauit: eius  
 liberalitatem ciues imitantur: qui etiam discitant,  
 plurimum se templi ipsius munditia & elegancia  
 delectari.*

# PROVINCIA POLONIA.



**N**UMERUS in Prouincia Polonia numerus fuit ad tercentum quinquaginta. Bransbergæ vnde viginti, Pultoniæ & Claudiopoli viceni bini, Vilnæ quinquaginta tres, Pofnaniæ viginti octo, totidem Iaroslauia; Polocia vndecim, Lublini vnus & viginti, Riga tanquam in exilio, octo, Callifij oftodecim, Niefuifii quindecim, Derpati totidem, duodecim Alba, Cracouia in domo sanctæ Barbaræ tredecim, in Nouitiatu duodequadraginta, in fede Varadinenfi quinque, in Moldauica missione tres, in Kolinienfi duo, in Suetica, vnus in aula Sereniffimi, tres cum Prouinciali excurrunt. Transierunt in Societatem viginti: emigrarunt e vita decem.

## BRANSBERGENSE COLLEGIVM.

**S**CHOLAE quæ anno superiore pestis metu intermiserant, redintegrata Autumno ineunte, reuocante se multitudine, sine iactura. Sed cum Vere recruidisset vis morbi in locis propinquis, regnumque pene totum inuolueret, dilapsis Prouinciæ Collegijs fere omnibus, quo minus Bransbergam attingeret, Seminariorum pietati, quorum regimen penes Nostros, datum videtur: qui enim in ijs

versantur adolescentium cœtus, tota æstate quadragenarum horarum supplicationem, in orbem suam quisque vicem obeundo, sub Autumnum, magis imminente malo, frequenti pompa sese acriter in templo nostro diuerberando, attonitis primum civibus insolite rei spectaculo, dein motis religione, non destiterunt finem orandifacere, nisi periculo depulsa. mirum de vrbe commeatibus peruia, Dantiscum inter, Elbingam, & Regiomontium, emporia celebratissima: in quibus pestis sæviebat, vt penetraverit Vilnam octoginta leucis distante Dantisco: & si Bransbergam quoque calamitas se intendit per duos menses, sed stetit intra suburbia: ceterum civitas intacta. Et in his tamen angustiis Domus pauperum studiosorum aluit adolescentes quadraginta: e quibus sex aberrantes a Fide redierunt in viam: obierunt duo: tres in Societatem adscripti: sed & Nostri admoniti periculo, consilium ceperunt edificandæ domus suburbanæ opportuno secessui, in vtrumque tempus, siue timori perfugium, siue labori levamentum.

## COLLEGIUM VILNENSE.

**A**CCESSE ad Societatem duo: ad Ecclesiam Catholicam centum quadraginta unus: a schismate emergsi duo de septuaginta, ab hæresi sexagintanovem, plerique illustres: & duo quidem magistratu præditi, præest alter finibus regundis, alter iudicijs: duo item iuvenes summa claritudine

dine generis quo Duces attingunt, nobilis praterea vnus perterritus somnio, quo se vidit in eodem balneo cum cacodamone lauante. ea est etiam apud aduersarios Nostrorum existimatio, vt cum ijs de religione concertationem vltro refugiant: quo magis crescit eorum pertinacia, & dignatio minuitur. Certe hac ratione perducta ad Catholicos virgobilissima: fratrem habebat Anabaptistam: cum eo, vt fit, terens sermonibus diem alter eiusdem sectae gloriatus est obtrussisse argumentum Sacerdoti catholico, quod soluere nequisset: tum virginis frater, vide ne laceffas Iesuitas, facillime diluunt: id virgo vbi audiuit, adiens ad Nostros, veniendum sibi putauit in eam sententiam quam intellexerat esse firmiorem. pari nobilitate vnus adolescens a puero educatus in haeresi, e Nostrorum concione cui interfuit, venit in suspicionem false Zuinglianorum doctrinae. & voluit committere disputationem coram amicis quos habebat socios erroris: erat ei vxor item Zuingliana: igitur accito ministro, cum gymnasiarcha Zuinglij, accersuntur etiam nostri. ex eo ira ministro mota: nec perpeti posse, adeo expectare Nostrorum aduentum: discessum meditari retinentibus amicis, muliere ad eius pedes accidente, ac ne se perditam vellet cum lacrimis orante: socio denique per vaniloquentiam animos addente. at furere nihilominus ille, & obseratis foribus dictitare se pro ianua vsurum fenestra, donec tandem turpem exitum extorsit: adsunt Nostri: minister nullus eius socius restabat, verecundia credo magis, quam virium conscientia.

scientia. ceciderunt enim animi statim: & vera praefatione merum Grammaticum se professus non Theologum, responsurum spondit ad omnem quaestionem, quam ponerent in Grammaticis. Ceterum, Ne sutor ultra crepidam. ea res deridiculo haereticis, qui discessere stomachantes, adolescenti quem aliena stultitia sapientiore fecit, documento fuit. & facerent idem plures, si ministris disceptare audientibus ad liquidum veritas explorata esset. Sed quo pauciores convertuntur, eo virtus animi maior, & constantia robustior. Adolescens opulentis parentibus & claris, cum ab illis sollicitaretur ad haesim, exheredaturos alioqui minitantibus, maluit cuidam opifici locata opera victum quierere, quam violare fidem, quam Christo dedisset: alter a procaci femina pudicitiae periculum pecunia redemit. Sed & mira firmitas puella e patre Lutherano: a quo propterea seruili atteritur opere, additis verberibus: & defatigata non apponuntur cibi, nisi vetiti; & si forte seorsum coquit sibi olera, aut legumina, succo inficiuntur interdicto: quo & interdum per vim ingesto sublinitur os comedentis: hac cum fert illa a quo animo, tum vero, quod discipiunt parentes, cum haeretico futuram in matrimonio negat. Expiarunt peccata vniuersae vitae duo supra nongentos: a turpi quaestu abducta duae & triginta: multi a veste haesive quam cogitabant: una a consilio abigendi partus. duabus praeterea feminis, quarum pudicitiae insidiabatur demon spectris nocturnis, virtute diuini agni in consecrata cera subuen.

*Subuentum. Nec erga vincētos Nōstrorum opēra desiderata est. ijs laborantibus educta est mulier e carcere, in quem cum amico erat coniecta; ac deinceps honeste collocata. Vir nobilis compertus homicidij euasit vtramque mortem. Scythia multorum facinorum reus pridie quam afficeretur supplicio, saluari aqua tinctus, sacroque viatico instructus est. Cum autem ex lege regni latrocinij damnatum eam pœnam sequi oporteret, vt viuus secaretur in quatuor partes, eamque animus cogitando perhorresceret, exoratus est aduersarius, quamquam Lutheranus, vt mitiore esset contentus. Illustrissimus Cardinalis Raduillus, per sacram Quadragesimam, vt saepe alias, exercitationibus nostris in Collegio operam dedit. exemplum ex eius cohorte complures secuti. Mulier Scythis Maumetana non ignobilis, quam crebra piarum seminarum de religione colloquia adduxerant ad Fidem, ab eodem Cardinale baptizata in templo nostro, & post paulo vir: cuius, vehementer licet flagitantis, abnuebat contubernium iam Christiana praestantis animi, nisi is Maumeten prius exuisset, vt rite iungerentur. Cum eodem Cardinale illustrissimo diœcesin lustrante fuit Sacerdos vnus e Nostreis, nō defuit muneri suo. Ea in lustratione, muniti Sacramento Confirmationis quater mille, confessi, quantum poterant vel a pueritia meminisse, trecenti triginta tres, ab hæresi vnus, a schismate absoluti duo de viginti. Parochis tradenda disciplina relictum exemplum: eorum non pauci spiritualibus commentationibus ex culti. Ceterum*

terum in gymnasio nostro multi quotidie ad pietatem (plures enim mittuntur, hæreticorum etiam filij, utilitate comperta) Catholicis præceptis erudiuntur: & sunt omnes ita propositi tenaces, ut ab eo plerique nec deterreantur minis, nec verberibus arceantur. Sed in hoc cursu rerum Octobre mense interuenit pestilentia: eius metu Nostri dilapsi fere omnes, quibus in locis diuersati sunt, non inutiles fuere. Oppidum quoddam non infrequens, quod Sacerdote perquamdiu caruerat, Nostrorum aduentu reuixit: æs alienum restitutum, odia sublata, baptizati multi, hæretici schismaticiue nonnulli ad meliorem mentem reducti. Eadem pane effecta in pago Collegij, cui Emodeci nomen: hoc præter cetera: nobilis virgo, quamuis renitente patre hæretico summæ auctoritatis viro, Catholicam religionem complexa est. Duo per id temporis fuerunt apud Raduillum Cardinalem fructu minime contemnendo. In oppido quodam tam crassa erat ignoratio rerum, ut porcæ immolarent Deæ Telluri, Solem multi Lunamque venerarentur: dedocti sunt pro concione oppidani has superstitiones, & ab ijs, alijsque, a veneficiorum etiam usu deducti. At eorum, qui manserunt in vrbe, inuisendis agrotis, curandis, fouendis, pauperibus collecta elemosyna adiuuandis, mortuis sepeliendis, confessionibus audiendis, furtis & latrocinij prohibendis, compluribus a contagione arcendis, ita confecta fuit caritas, præ qua vitam despiciebant, ut omnium in se oculos conuerterent, & obstruerent ora maledicentium;



tium: nec quicquam tam in votis erat totius ciuitatis, quam vt redirent ceteri ( quod & factum est diuino concessu ) omnes incolumes .

## COLLEGIVM IAROSLAVIENSE.

**C** O M M Ū N I C A R Ū N T in ade nostra quatermille septingenti octogintaquinque : aperuerunt malefacta omnium annorum trecenti septuaginta nouem : eorum vnus accepto beneficio : quod persequentibus inimicis , aqua gelida , in qua noctem vnā ac diem dimidium fuerat collo tenus immersus , latebram praeuisset : alterum quemdam rusticum renocabat malus daemon a confessione , hominis instantis tibias specie sapius obiecta : sed ardor poenitentiae difflauit ventosam imaginem . Ad Ecclesiam redierunt schismatici duodecim , haeretici sex , & vnus qui descuerat ad Turcas . Tartarus praeterea , & Iudaeus , instituti ad baptismum : mulier a tadio vitae , altera ab inanitate superstitionum ad vitam meliorem adducta . Sacerdotes duo instructi exercitijs nostri Patris Ignatii , in suis muneribus egregie versantur . adolescens deprehensus in furto capitis erat postridie damnandus : it ad eum Noster , vt opem ferat afflicto : sed ita consternauerat hominem ignominia mortis , & terror , vt orationem dominicam dicere incipientem mens ipsa deficeret , non tantum memoria : lacrimae dumtaxat anhelum pectus inundabant : dilatatum est supplicium : dum tandem confessus est , & postridie quam  
perce-

percepit Eucharistiam fidentiore animo decessit e vi-  
ta. Mulierum quoque nonnullarum pudicitia amor  
enituit: inuenta sunt, quæ fuga periculum euase-  
runt, quæ resistendi audacia: & discessit vna vul-  
nerato corpore, pudore intacto. at hoc, quod se-  
quitur, illustrius. Vir perditus equo insidens cum  
in mulierem incidisset solam in agro, ad eam adhin-  
niit, arripit manu renitentem, vociferantem, & hu-  
manum auxilium summa contentione implorantem:  
sed frustra, nemine exaudiente: igitur tacitis votis  
inuocat miserorum patronam in desperatissimis re-  
bus matrem Virginem, cum sponcione ieiunij ad cer-  
tos dies: preces auditæ: desilire properantem cæ-  
cum libidine ferociens equus, ceteroqui mansuetus,  
iactatione crurum & cernicis in transversum agit:  
ut cum vna manu sustineri non posset, ad regimen  
fuerit altera adhibenda, dimissa muliere, quæ se sta-  
tim ex arcto nexu, Deiparæ gratulans, præcipiti fuga  
euellit. Neque omittendum est, ac vna florenos mil-  
le sponte oblatos ad nostri temp<sup>is</sup> glorificationem. Sed  
luctuosum illud tempus quo peccata lues vulgabat  
morbos illustravit studium Nostri iuuandi pro-  
ximos. Singulis fere diebus prædicationes exceptæ, &  
quidem generales, præter prædicationes supra posuimus,  
centum sexaginta. Itaque ad loca vicina, de  
quibus nonnulla rediit. Præuorscÿ (nomen est  
oppidi), vnus e r<sup>egionibus</sup> concione & Catechismo fre-  
quenti, fere p<sup>er</sup> mensem, ita pietatem promouit, vt  
oppidanorum luxus, qui erat non modicus, verte-  
rit in cultum celestium. confessi de peccatis totius

vitæ ducenti circiter & sexaginta, Denæ opificum  
 Sodalitates magistræ intemperantiæ sublata ex Se-  
 natus consulto. Magicarum litterarum nota in mem-  
 brana auertendi pueris morbi, vel fascini, exusta.  
 actum cum duobus primoribus, vt ponerent odia in  
 perniciem itura. Neophytus in Fide firmatus.  
 Leopolum quoque excursum est sacrorum antistite  
 rogante: præculi Sacerdotes futuri: quinquaginta  
 sex auditi de criminibus quæ vniquam admiserant:  
 fenebris pecunia reddita: duo de peruersa religionis  
 sententia detrusi. Hestio quadragenarius salubri a-  
 qua lotus. vnus ab amentia, confessionis remedio,  
 liberatus. Dissidentes aliquot mutuo reconciliati.  
 Cuiusdam simplicitatem astus Calvinistæ nobilis il-  
 luserat, correxit pene miraculum: persuasum est ho-  
 mini vt ad sacrilegam cœnam accederet: dum inhias  
 panem, quem execrandus porrigebat Sacerdos, re-  
 pente in prauum elapsæ manus, vt debilis factus vi-  
 deretur: instante ministro, & segnitiam verbis ca-  
 stigante, sumere iterum parans, siderato similis ita  
 prostratus est animo, & corpore, vt ostentui esset:  
 tum vero publice hæresim detestari, & palam præ-  
 dicare nulla veneratione prosequi illum panem,  
 quem simplicem esse intelligeret: post hæc centum-  
 uiginti milliarium Germanicorum itinere ad nos ve-  
 nit, & caelesti pane rite atque ordine refectus est.  
 Rudnici (hoc etiam oppidum est octo millibus di-  
 stans) magnifica fundatrix Domus Probationis Cra-  
 couiensis de tota vita voluit confiteri: quod factum  
 ab alijs quadraginta: irrita matrimonia correctæ:

nutan-

nutantes roborati in Fide. Sed & vnus olim nobis adeo offensus, vt vel audito Iesuitarum nomine furenter irasceret, nunc ita mitis est factus, vt & semper audierit concionantes, & si quando vocati apud eum sumerent cibum, honore iudicioque letaretur. Premisla, in templo maximo, inuitatu Proepiscopi, concionatus vnus ferijs natalitijs, & hebdomada precedenti, audiuitque nonnullos e Sacerdotibus ciuibusque confitentes: omnibus propter paucitatem dierum satisfacere non potuit. Matrona, & claritudine familie, & hereseos pertinacia, nobilis, bonam mentem habere cepit, magna piorum gratulatione, quorum numerus auctus. reliquit hic discedens ignotum pridem nomen Societatis, non tantum magnum, sed etiam bonum.

## COLLEGIVM CLAVDIOPOLITANVM.

**O**PERA, in iuuentute erudienda, re Catholica Hungaricis, Germanicis, Latinis concionibus, alijsque Societatis nostra muneribus promouenda, præclare stetit. Ex flore iuuenum ad nos ventitantium hæresim exuerunt ad sexaginta: septem ingentiorum animum ad Societatem applicarunt: præter alios duos, qui, vt esset res cautior, Romanam missi. Magnus omnium fuit labor in discessu ab Aegypto: sed Deum sequenti nihil difficile. Ex his vnum ex Seminario, rem fortasse subodorati parentes in patriam acciuerunt: & quamquam ipsi cognatique adulescentem absterre minis, allidere

blanditijs, nuptijs retinere conati, ab eo tamen relictis, quod Christo adherere bonum esset. Similis alteri cum propinquis Catholicis pugna, & victoria fuit. Alius cum ad suos redisset, parentemque genuisset Catholicæ religioni, contempta aula viri principis, ut abiectus esset in domo Dei sui, ad nos victor reuertit. Ceterum magnus eorum ardor, qui in Seminario Pontificio pauperumque Contubernioalebantur: ut si quis recens accederet, eum puderet in tanta Catholicorum multitudine hæreticum esse: & si aliqui interdum ita se duos præbuerunt, ut fuerit opus (quamquam nocturnis imaginibus interpellante diabolo) Patris Nostri Ignatii exercitijs ad eorum pectora emollienda. Ex Seminario Pontificis baptisinate lustrati duo splendidis natalibus. Iam qui conuersi sunt, turpem ducentes parentum hæresim, vel cognatorum (a Nostri licet communiter singillatimque admoniti, ut non nisi prudenter, & captato tempore id facerent, sepe etiam coerciti), opportune importune ut meliorem capefferent mentem, sic eos adhortabantur, ut illis terrori essent. Eam ob rem, cum actum est de Nostri exigendis, ut modo dicitur, iactatum ex hac disciplina timendum esse posteritati. Instituta erat congregatio Corporis Christi, frequentioris Communiois addito præcepto: ex sodalibus Parthenijs probatissimi quique in eam admittebantur: & spem dabat vberissimi fructus: nec fallacem futuram fuisse vel ex eo apparuit, quod cum, vix tribus mensibus ante quam pellere mur, habuisset initium, præter eos de quibus supra dictum

dictum est, quinque sunt Nostros secuti in Poloniam, ut inter socios adscriberentur. Est etiam cum alijs non infructuose laboratum: renuntiaverunt heresi supra centum: ex hoc numero sacerdos octogenarius, qui incestas nuptias contraxerat: & mulier, divina providentia: ducebatur ad patibulum, in eam incidit sacerdos magno ipsius bono: conversa, confessa, mortua est ritu Catholico. Viro cuidam capitalem penam Nostri deprecati. Siciliam (hanc crediderim esse regionem proximam) lustravit unus e Nostris, euidenti utilitate, precipue sacerdotum: nam & mores composuerunt plerique, & multi, ut melius instituerentur, Claudiopolim profecti: quod & fecerunt, professores litterarum, relictis scholis, quibus moderabantur: igitur ex ijs, qui nobis dabant operam, ut munus illud cum laude sustinerent submissi nonnulli: & si superfluento multitudine eorum a quibus expetebantur, non omnibus satisfactum: tres praterea alumni Pontificis sacerdotes effecti: ij, quemadmodum adiunxerunt Nostros quamdiu hic fuerunt in hac silva repurganda, ita etiam nunc, eorum vicem absentium utcumque explebunt, in semine tuenda, & conservandis reliquijs, ne afflatu pestilentis fideris exarescant. Non pigebit nunc collocare alia de pietate aliorum, re fortasse parva, sed ratione loci non penitenda. Aliquot nobilium familia diebus celebrioribus bidui itinere aut etiam tridui ad nos affluxerunt: sanctiore praterea hebdomada mulier primaria unius diei viam pedibus confecit causa Sacramentorum: magnam etiam admirationem

habuit Praefectus quidam arcia Catholicus: is enim cum vniuersa familia, totum templum nostrum, Crucem adoraturus, genibus perrepset. Reliquorum approbata religia tum saepe aliis, tum maxime in comprecatione quadragenarum horarum, qua hoc anno quinquies decreta, in quotidianis deinde orationibus, & supplicationibus publicis, qua per sexagimensem toto comitiorum tempore festis diebus indicta. Eximia pietas totius Academiae hac vnum sibi diem, alterum Seminarium Pontificis, tertium, congregatio sanctissima Virginis, delegerunt, continuis precibus numinis propitiandi: sed nullum cepserunt maius spectaculum insueti oculi, quam cum tandem ipsi adolescentes, vt in re trepida, a Nostris extorserunt publicam in templo nostro corporis diuerberationem, haec omnes machinae ad nos retinendos adhibebantur. Deo aliter visum. Sed antequam venio, ad tragediam, addam duo. Postridie feriarum beatae Virginis tectum templi de caelo tactum, sine ulla damno: nec caruit admiratione, cum in materia tam facili ad exardescendum timeri posset incendium. Nunc audite rem alteram, scitu dignissimam. In hac ciuitate rabula Arianns in die sancto Pentecostes multa contra diuinitatem Spiritus Sancti ore spurcissimo euomuit, sed non diu distulit poenam: eadem hebdomada in peruigilio augustissima Trinitatis, in quam, vt postridie inuehere tur, se instruxerat homo impius, cum relaxandi animi exisset domo concionabundus, non casu dicam, sed Dei iudicis indicio, sacrilegam linguam

appre-



apprehensam sibi ipse mordicus ita compressit, ut infixis dentibus conscinderet. ergo tum quidem male dicendi (neque enim umquam postea suggestum conscendit) nec ita multis post diebus viuendi etiam finem fecit.

## REPETITA BREVITER HISTORIA

Nostrorum clectorum e Transilvania.

**I**AM QUONIAM hoc ventum est, ut dicendum sit de Nostrorum e Transilvania egressu, paulo altius repetenda quadam, & de ingressu videntur. Stephanus Bathoreus Vainoda Transilvania, quo erat studio proferenda Catholica religionis, Societatem nostram perinde benigne, quam liberaliter, in Transilvaniam inuitauit. ea dum tener deliberatio, delectus ad Polonia regnum, Christophorum germanum fratrem in principatu Transilvania sibi successorem relinquit: nec multo post Christophorus, cum & ipse idem cuperet, suadente rege, prudenter inchoatum consilium constanter perducit ad exitum. It in eam regionem Societas confirmatur comitijs publicis, fundatur Collegium, & Academia, Claudiopoli, attributis bonis Canobij Monasteriensis. Christophorus interea Sacerdotes aliquot e Nostreis secum retinet Alba, quibus magistris, Principis filij pueritia adolesceret: quod etiam moriens in extremis mandatis reliquit: idemq. Stephanus rex, in morte, quod & ante fecerat in vita, probauit. Hac cum ita essent, & Nostro-

rum cura educatus Princeps optima indolis per omnem honestarum artium cultum, Deique timorem transigeret pueritiam, & Transilvana iuventus, Nostris docentibus Claudiopolim haberet sedem studiorum, ac magistrum, gaudebant primores regni, & Principis, & filiorum profectum: tamen non sine indignatione: verebantur, ne augeſcente non tacitis incrementis religione Catholica, falsa eorum secta dilaberetur. Igitur quamdiu Stephanus concessus est orbi, iram metu prementēs, ad ipsius se nulum fingebant simulatione obsequij: ubi defecit is, quem timebant, nec satis roboris adolescentulo Principi ad resistendum, male dissimulatum odium aperiunt, & Ministris accendentibus faces tam Calvinistis quam Arianis, in omnibus conventibus, de nobis exterminandis plurima dissertabant: obijciebatur scopolus duplex: primum, nemo reperiebatur idoneus rector Principis adolescentis, quem satis amplius doctores Iesuitae instruxerant, qui etiam apud illum caritatem sibi parauerant loco auctoritatis: deinde verebantur, ne si quid contra Catholicos designassent, incommodarent Principi, in petitione Polonici regni. Illa ubi spes concidit, capiente sollemnia regni Sigismundo, huc intendunt, ad Iesuitas non quidem e Transilvania (hoc enim maioris operis videbatur) sed saltem e Principis aula remouendos: sic facilius factum fore, ut teneram adolescentis mentem, Catholicis orbatam praeceptoribus & praeceptis, peruerterent. Igitur Kalendis Novembribus, Egnedini, in conuentu, Nobilitas Transilua-

na Arii & Caluini impietatum æmula, a duobus, vt fama est, vel a tribus dominandi cupidis impulsæ, institit petere a Principe, eiceret Iesuitas, Idololatriæ olim explosæ restitutores, Hispanica inquisitionis perductores, buccinatores Romani Pontificis, inuentutis corruptores: hæc enim crimina spargebantur, testis nominibus, & ad fallendum instructis: quæ ne ipsi quidem Catholici satis intelligerent. petierunt Nostri, vt capita accusationis scripta darentur: illis abnuentibus, ad Principem & Senatum impetrato aditu: præfati ad eam diem tacuisse in omnibus cætibus, quod illustrissimi Principis & Senatus amplissimi beneuolentiam erga se perspectam haberent: de qua ne tunc quidem dubitarent: nunc maleuolorum obtreccionēs in tantum prorupisse, vt nisi respondeant, silentium aut timidum, aut contumax haberi posset: Pater, qui erat pro Prouinciali, legit defensionem, quam scriptam habebat, perlectamque Principi tradit. Laboratum est in his comitijs, quæ erant peculiaris loci vnius, vt in publicis res tota cognosceretur, irritò conatu. Nobilitas in eo perstitit, instigantibus Arianis: quin & ad illud vsque tempus tributum soluturam negauit: nec aliter fecit ac dixit, pessimo exemplo. Catholici interea Claudiopoli, Albæ, Verradini, ad placandum numen conuersi, precationibus, supplicationibus, corporis castigatione, inedia, nihil non agunt. Theses a Nostreis de vera falsaque idololatriæ ad excutiendum propositæ. Quies aliqua videbatur rerum, conuentu publico in comitialem

tialem annum; qui erat proximus, reiecto: sed non  
 ferre iniquitatis ministri: tentaturos aliquid Iesui-  
 tas hoc tempore, affore Andream Barborem Car-  
 dinalem, qui aduentare dicebatur, ceptum omne  
 sua praesentia & auctoritate disturbaturum: tun-  
 dendum ferrum, dum candet: hostem impulsu pro-  
 sternendum. *Valescere impetu, audacia consilia,  
 mora transire.* Hæc ubi accepta auribus ani-  
 misque, exoriuntur comitia repentina, inita in op-  
 pido Saxonico, Meggesio, per uigilio Apostoli Tho-  
 mæ, ea die volitare Ariani, & eorum affectu Cal-  
 uinista: inserere se consultantibus, & Principis  
 consiliarios nonnullos, quos euocauerant, turbulen-  
 tis concionibus obtundere: rapiendum esse tempus,  
 regnum in tuto collocandum exturbata Papistica di-  
 sciplina. Quid enim agunt aliud Iesuitæ, nisi ut  
 Romano Pontifici obtemperemus? hos ne semper  
 timebimus, per secreta colloquia cum Principe,  
 per liberos nostros domi, per argutos sermones in  
 publico? Quin vos eiectis istis speculatoribus oc-  
 casioni intentis, liberatis regnum periculo, in-  
 uentutem insidijs, senectutem metui? Hæc illi in  
 comitijs: ad quæ etiam Nostri (magis ne sibi dees-  
 sent, quam quod inclinatum iam Nobilitatem & in  
 proclive labentem retenturos sperarent) sibi venien-  
 dum rati, duce Christophoro Ceresurio viro Catho-  
 lico & pio, in confessum Senatorum deducti pri-  
 mum, deinde in templum, quo conuenerat Nobilitas  
 (etsi eos aliqui non introducendos censerant) cum  
 admissi fuissent, sacerdos is qui Prouincialis vicem  
 gere;

gerebat, in hunc ferme modum Latina lingua locutus est. *Ut comitia ista vobis, coniugibus, liberis vestris, toti regno prospera eueniant, Deum immortalem oro obtestorque: neque ego tantum, sed quot sunt mihi socij vestris in terris, atque adeo, (ut vnum idemque sentimus omnes) in orbe Christiano vniuerso: quo magis miror, quid cause sit, cur de amicis vestris expellendis consilia agitetis. Septimus annus est, viri nobiles, ex quo in Transiluaniam Societas nostra rogatu accersituque Principum vestrorum est introducta: hanc ij, tres ordine, sua auctoritate, vestri etiam conuentus, publica fide firmarunt: nihil a nobis actum, dictum, cogitatum, quod esset aduersum rationibus regni, aut a dignitate vestra alienum. iam manere in nostra possessione quæ tandem inuidia est? Vnum obijcitur verbo crimen, auditu quam intellectu suspiciosius: quod istos vestros doctores, qui, ut nequid grauius dicam, abutuntur facilitate vestra, si modo congressionem, ut sepe alias, non refugiant, vel toto regno disceptante, docere parati sumus. Quod si benefactis hæc gratia rependitur, ut inauditi, indefensique mittamur, qui manebit honos Bathoreorum generi, si indignos vocabant, si ambiebant arcendos? Sed eorum factum, si rem ipsam consideres, salutare Transilvaniæ fuit, & iudicium laudandum: etiamsi aliqui turbent. Cauete vos ne turpe sit vobis sine causa eos dimisisse, quos illis fuit accersisse gloriosum: nobis quidem, locus quo recipiamur ab expetentibus, deesse*

esse non potest. Ceterum, viri nobiles, ad tam gravem deliberationem ne adhibete celeritatem, & iram: hac enim rationi inimica est, illa consilio: cunctatio & maturitas propiores sapientiæ. Hac cum dixisset, eadem Hungarice repetijt sacerdos alter, addita brevi refutatione eorum, quæ pridie a Ministro contra summum Pontificem, & Catholicam religionem iactata essent. Ad hæc atque talia, a Nobilitate Senatuque, obtentu longioris consultationis, dissimulata responsio. Eodem tempore Ceresurius, nomine Catholicorum, qui erant non pauci, litteras obtulit, quibus postulabant, ut secundum decreta regni æqua esset omnibus religionis libertas, ne ve ipsi carerent pastoribus animarum, aut eorum pastores acerbe tractarentur. Sed tunc quoque, ut sæpe, vicit deterior sententia. Postridie, quamvis repugnantibus Rathoreis, ceterisque Catholicis, & vero etiam Somborio Quastore regni Lutherano, Nobilitas ad Principem misit libellum supplicem, quo iterum urgebat, ut Idololatria, & Iesuitæ eius propagatores e regno extruderentur: responsum dilatum a Principe in alterum diem, datumque nobilibus in hanc formam. Inique postulari ab ipsis, a se honeste permitti non posse, rectores pueritiæ suæ, sibi a patre patruoque rege commendatos, publicis comitijs approbatos, nullius criminis reos, sed ne levi quidem suspitione præstrictos, invidiam tantum Catholicæ religionis, quam ipse pariter profiteretur, indicta causa, eijcie regno: æquum deinde esse, ut etiam Catholicorum, & aliquorum præ-



præterea procerum alterius sectæ preces excipian-  
tur: quorum vel salutem animorum, vel institutio-  
nem liberorum, quo utroque in munere cum utili-  
tate totius regni elaborant Iesuitæ, negligere nefas.  
Die sequenti alius obtruditur ab hæreticis libellus  
in Nostros maxime criminofus: eos esse hostes ani-  
marum, infestos fidelibus, turbidi ingenij, auctores  
inuehendæ Hispanicæ inquisitionis: proinde iam nunc  
tandem regno excutiendos, ne prauitas tam infen-  
sa molientium, in publicam perniciem erumpat. ad-  
debatur, quæ bona a nobis possiderentur, Stephani  
regis & Christophori Bathoreorum concessu, saluis  
legibus teneri haud posse, aduersum comitia, quæ ce-  
lebrasset Isabella regina. cautum illis erat, ne bona  
ecclesiastica semel ad fiscum deuoluta, in usum ec-  
clesiasticum vilo umquam tempore reuenterentur.  
alterum offerunt contra, quando res scriptis ageba-  
tur, Catholici, & superiora diluebantur: iniustum  
fuisse illud conciliabulum, & sine capite pro vano  
habendum, inualido perinde initio, & irritio fine.  
quam enim iniquiorem legem, quam si Clerici, quos  
æquitas ipsa eximios habet, suis bonis, atque eo-  
rum iure fraudentur? Hæc inter, Præfectus, Gu-  
bernatores appellant, malorum omnium caput, pe-  
nes quem & ærarium publicum, & satellitium, per  
suos, ut ferunt, emissarios concitata multitudo  
minutæ Nobilitatis, varioque terrore expugnatis  
Catholicorum animis, qui cum Principe sentiebant,  
ipsum etiam Principem, defectionis metu iniecto,  
velinuitum adegit subscribere impijs postulationi-  
bus:



bus: nec mora: in peruigilio natalis Domini, sub horam alteram noctis, accitos Nostros in aulam ita eos Cancellarius cum altero Senatore allocutus est. Quandoquidem vniuersæ Nobilitatis sententia co decurrerunt, ut vos absitis e Transilvania, & Princeps vnus tantam molem sustinere non potest, nisi malit obteri, vestri consilij est, quid faciendum esse censeatis: & cupit quidem ille memor vestri beneficij, suorum magistrorum tueri innocentiam, & iura defendere: sed nunc tamen eo in cardine res est, ut vel vobis sit cedendum in præsens prouincia, vel ipsi in perpetuum principatu: parendum tempori, & minimum eligendum de malis, sunt effata sapientum: magnæ procellæ sunt populi in idem conspirantis: & imminente naufragio, conseruandæ salutis, vel carissimæ merces in mare deiçiuntur, nec vero fas vobis habere omnia loca, quæ hæctenus in Transilvania habuistis: aduersari hoc legibus, quibus vetitum Ecclesiasticos recipere bona, quæ semel amiserint: & hunc locum maxime premere aduersarij: nec habet Senatus, quid respondeat. ita eo non prohibente magis, quam approbante, defensio vestra confedit. Equidem & si vos monitore non egetis, tamen in hoc ancipiti malo, id darem consilij: ut quando id non potestis, quod vultis, velitis id, quod potestis. Quin vos offertis vltro, quod estis amissuri, & hanc initis gratiam a Principe, ut qui a vobis cū hic fuistis, accepit eas artes, quibus se regat, retineat vestro discessu auctoritatem regnandi Vestrum non dimicare hoc tempore erit vincere: quibus  
etiam

etiam expediet semel cadere, quam semel pendere. Ad ea breuiter Nostri, temporis, & muneri conuenientia. Abrogatum posterioribus decretis, illis prioribus, quæ vel ab initio nullum robur: non esse e dignitate Transiluanie, a Principibus accitos homines, confirmatos auctoritate comitiorum, eijci finibus, ut exturbentur bonis, quibus homines inbiant: nam quæ alia causa mittendi? Quod si implacabiles sunt animi multorum, ut consulatur publicæ tranquillitati, medium capiatur consilium: simus aliquo tuto in loco, dum residat tumor, & furor incensus interiectu temporis languescat. non deerit fortasse, qui iniuriam impositam Principi, nostra restitutione reprehendat: Nihil valere quæ dicebantur. Natalis dies illuxerat: antequam sacrum facerent, haberentve concionem, Princeps ipse renuntiat, stetisse sententiam, ut cederent ex omnibus ciuitatibus regijs, eamque reuocari non posse. sint tamen, si volunt, in suo Monastoro, quod cænobium est Claudiopolitano suburbio continens. Ad extremum libellum supplicem dedere Nostri, breui auditu, cum expostulatione: hic etiam frustra fuit. eodem die, auctores tragædiæ edictum consonum orationi Principis in Comitio promulgarunt: neque eo tantum contenta Nobilitas, iisdem inflammantibus, seu quia priora processerant, utens occasione, plus etiam petijt, quam a principio optare ausa esset, ut tota in Transilvania ijs ne esse liceret. Igitur postridie in ferijs sancti Stephani protomartyris post sacrum, quod postremum audiuit Prin-

ceps, sollempni exordio, Principes persecuti sunt me gratis, ultimum telum vibratum est in Iesuitas. Prohibuit Praefectus pedem efferre ex hospitio, & ad aulam accedere: nec desuere, qui, Nostrorum nomine, quaesierunt de Principe, num adhuc vellet uti eorum opera in sacris faciundis: respondit Praefectus nihil amplius istis sacris Principi opus fore. ita die sancti Ioannis sacrum instrumentum remissum cum proluxa excusatione: coerceri non potuisse incitatum suorum libidinem, ne coercitio plus afferret mali: cautius visum, nihil adrectare sine spe obtinendi: eos discedere se non assentiri, sed pati communis debet esse dolor in vulnere communi. & certe ingemuit bonus adolescens eiectioni Nostrorum. itaque per totum diem non temperavit a lacrimis, ut is siccandis duo linteola madefierent.angebatur praecipue, cum cogitaret, hoc facto insignem aspersum iri maculam nomini suo, quod Iesuita apud Pontificem maximum, ceterosque Principes Catholicos, in luce posuissent. igitur eo die, Meggestio dimissi, Claudiopolim versus, vnde post tres septimanas omnino discederent: quo die tanta repente vis ventorum, & turbo, dicitur extitisse, ut & tectum templi, in quo conflatum fuerat infame decretum, & camini culmen ex adibus Principis, & pontis Albani partem deiecerit. Post hac, ut daretur siue inimicorum paenitentia, siue amicorum consensui spatium, postulata a Nostreis missa ad Principem. eorum tria capita. primum, ut liceret expectare, dum tempus mitesceret, neve hieme gelida,

& ni-

& niuosa per vias iam clausas discedere cogerentur: deinde vt Pater Lelesius, qui olim adnotus spei Principis in eo informando multis laboribus, tam infirmitatem corporis contraxerat, vt propius abesset ab extremo, Alba, prope templum Catholicum, opperiretur mortem, & sepulcrum: demum, vt exituris daretur publicum testimonium de titulo discessus: cum ob crimen nullum amandentur, sed ob inuidiam Catholicæ assertionis. illa priora duo silentio transmissa: nec, miserante licet, ac retinere cupiente Principe, Patri Lelesio decumbenti in lecto manere permissum: inhabili quamquam corpore labori, & itineri, fuit asportandus. Postremum postulatum concessum cum testificatione irritata in nos Nobilitatis studio religionis: adiecto in alijs rebus honore verborum. nec gauisi diu architecti facinoris. Præfectus ille, & gubernator, aut excitator potius ventorum, qui scitum extorsit, statim abire magistratu iussus, & nihil impetrans nostris bonis, quæ iam spe deuorarat, cum despondisset animum, antequam Nostri Claudiopoli discederent, est mortuus: votiferatus, sero, & se miserum clamans, quod non seruasset fidem Stephano regi, Iesuitis expulsis, alij qui Nostri discessuris non satis moderate ferebant latitiam, repentina animorum mutatione, ita sunt in fugæ misericordiam versi, vt fauere etiam inceperint: quin & de reductione cogitent, ni Ministrorum pertinacia resistat. Nobilitas quoque, vt bona carendo magis intelligimus, quam fruendo, seipsa collegit, cum liberos

qui in Seminarijs domi erudiebantur; nunc in Germaniam, Galliamve, mittere, & habere illic maximis sumptibus cogantur. Insultabant interea alij Claudiopoli, quo Nostri conuenerant, & vix manus abstinebant: sed & Principis nota erat voluntas, & ipsius iussu, dispositum presidium ante fores Collegij, violentos impetus retardabat. per eos ipsos dies munia Societatis exercita incredibili fructu: ad concionem, profestis etiam diebus, concursus maximus: ad confessionem tantus, quantus in nauinaufragio ingruente: nec facile dictu est, qui fuerit sensus Catholicorum, & nonnullorum, alta licet infectorum hæresi, Nostris abeuntibus. Prosequebantur illos mæsti, mæstiores redituri: sacras manus osculis fatigabant: tam crudele discidium flebili vultu lamentabantur: ad festinum reditum, implorata ope Pontificis, & aliorum Principum, exhortabantur: orabant solatium solitudinis: tandem questibus finem imposuit necessitas profestionis:

### MISSIO MOLDAVICA.

**M**OLDAVIA, quæ & pars Valachiae, Transilvaniae contermina, per multa, non minus bellorum, quam cognationum arbitria, superioribus temporibus iactata est: & nostra quidem memoria, Sigismundo Augusto regnum Poloniae tenente, Alexander aliquamdiu quietus imperitavit: dum a Despota Sami Turcicis Bassis, vtru-

mor fuit, auro corruptis, adnitentibus hæreticis e Polonia, exturbatus est Principatu. Dominatum exercuit Despotas, ea perfidia, qua inuaserat: Catholicas ades, veris possessoribus exactis, dedit hæreticis profanandas. Hunc deinde Thomsa, Moldauis conspirantibus, vita & dominio exiit. Sed neque Thomsæ diuturnum imperium fuit: propter crudelitatem Moldauis offensus, reuocatoque Alexandro, eiusque sobole, eiectus, & a Sigismundo rege Leopoli capite multatus est. Moritur Alexander, resque Moldauorum in filium eius Bogdanum translata: is, dum extra fines ditionis versatur incautus, a Christophoro Thorouio in vincula conijcitur: mortuum Moldauis existimantes, Iuoniam virum strenuum, & egregium bello, Principem legunt: restituere moliebatur Bogdanum Sigismundus, sed obsistente magna nube Turcarum, nec ille restituitur, & Iuonia in prælio, interimitur, magna inimicorum strage edita. Turcæ imponunt Moldauia Petrum, hominem moderatum, & tantæ molis capacem: nec diu potitus imperio, Ianicula Turcicis viribus succincto, in Moldauiam irrumpe, in Turciam se recipit: non multo post Ianicula, cum seuitiam sumpsisset in suos, in Polonos superbiam, & querelam ad Turcam fœderatum Stephanus Polonia rex detulisset, in Moldauiam Petrus reducitur: Ianicula fugiens capitur, & ad Stephanum regem adductus pœnam capite luit. Igitur, cum magna esset apud Petrum Stephani veneratio, deque eius pietate, & Orthodoxæ religionis

studio, accepisset a Barptolemaeo Bruto Albano Praefecto cubiculi, simili exemplo Ecclesias Catholicis restituere cogitavit: dat interea negotium Archiepiscopis, Leopolitano, & Neapolitano, qui tunc Pontificis Nuntium agebat in Polonia, ut aliquot Iesuitas promouenda Catholica Fidei, a Pontifice obtineant: curae id fuit Pontifici maximo, remque Romae commendatam Praeposito Nostro Generali, & in Polonia Nuntio, Aldobrandinoque Cardinali Legato, confici iubet. Decedit Stephanus: ex legatione Romana redit Leopolitans Antistes: cum Petro Principe negotium vrget: tandem hoc anno Kalendis Septembribus Sacerdotes duo Ioannes Sionianus, & Iustus Rab Moldaniam ingressi, cum commendatione Pontificis, & Sigismundi Poloniae regis: acceptique perhonorifice. Quoniam autem Princeps erat in castris, & pleraque loca peste infestabantur, dum ea deserviret, in oppido quodam loco satis tuto, & commodo, collocati: Romanum appellant. Pretium erit cognoscere quaedam de Principis pietate, ut vel ex hoc initio liceat coniectare, Deo adiuvante, qui sit finis missionis futurus. Redditas sibi primum litteras Pontificis exosculatus, capiti imposuit: more gentico, causa venerationis. Locuti cum illo per interpretem sermonum: itaque libenter auditi, ut lacrimae e turgentibus oculis eminerent. Oblata sunt & inunscula, & caelestis agnus in consecrata cera, & libellus martyriorum depictus: grato animo accepta. Libellum postridie Princeps cum evolveret, de Graco sacerdote (Calogorum



rum vocant) defixis oculis in Petri martyrio, qua-  
rit quid sentiret de primatu Petri. Hic Græcus, pri-  
mum designatum fuisse inter Apostolos, propter or-  
dinem, & Hieronymum testem citabat: ceterum æ-  
quam potestatem omnibus fuisse. Instat Princeps,  
Cui claves a Domino commissæ? Petro, excipit al-  
ter. Vbi sanguinem fudit Petrus? Romæ. Vbi re-  
liquiæ eius requiescunt? Ibidem. Igitur, addit  
Princeps, vbi caput Petrus posuit, ibi & claves  
successoribus reliquit. Elinguis ad ea Calogerus.  
Iterum scitatur, vellet pro Christo subire marty-  
rium: non ita æquo animo, respondet Calogerus. At  
mibi vile esset corpus, Princeps ait, si ea gloria con-  
tingeret, vel morte mercanda. Dicebat idem ad  
Nostros (per nouem enim dies, quibus commorati  
sunt in castris, ter apud illum fuere) in ditione sua  
nullum Ministrum hæreticum pati velle: curias om-  
nes, qua ritu Romano vterentur, omnesque curia-  
les, eorum potestati permittere. misit dein ad illos  
vnum atque alterum Ministrum, qui nuptias con-  
traxerant, vt statuerent pœnam, statim ipsius ius-  
su irrogandam. at Nostri non venisse, dixerunt, vt  
homines pereant, sed vt conuertantur, & viuant:  
nihilò secius Ministros illos ab Ecclesia Princeps re-  
mouit. Ipse porro Petrus, & magna pars regio-  
nis, ritibus Græcis & Ræthenicis vtuntur, Ræthe-  
nica lingua: neque Patriarcham Byzantium agno-  
scunt. In tota Prouincia quindecim circiter oppi-  
da, in quibus villisque proximis Hungari, Saxo-  
nesque: sed illorum maior pars: nullus litterarum

usus : notitia fere nulla . nec tamen hebes ingenium gentis , magis callide , quam simplicis . Coloniam fuisse Romanorum ex vultu , sermone , moribus , opinio est : nec spes deest mansuri fructus : modo vocandi Sacerdotes ( nam adhuc extra Nostros sunt nulli ) imbuendis animis , regendisque , Nostrorum instituta persequantur .

### POLOCENSE COLLEGIUM.

**N**E HOC quidem Collegium . ab aduersariorum tumultibus vacuum fuit . illis , iuxta cum alijs , mors Stephani animos exexerat . ita toto interregno in priuatis conuentibus Polociae , Vilnaeque , tum vero in publicis Lithuaniae , deinde in maximis , omnium ordinum , Varaviae , ubi agebatur de rege adoptando , agitatum perpetuo de dissolueno Collegio , tamquam nec e legibus esset , nec e rationibus regni . at , satis tutus est , cuius Deus suscepit defensionem . ea res non tantum declarauit , verum etiam acuit erga nos studia multorum . nam super Catholicos , haeretici aliquot , rerum capita , sic e defensoribus alioqui sui similium , repente patroni nostri euaserunt , vt summo studio sint adnixi ad nostram causam ab inimicorum impetu vindicandam . Sub eos dies quibus Sigismundus erat insigni regio euinciendus : quidam Dynasta , alijque sub umbra eius auxilij inuaserant in bona Collegij , vt manuque iniecta : sed missus a rege ex eius cohorte vir nobilis repulit iniquos eorum conatus , & Collegium

legium in pristina restituit: ipsique Dynastæ, vt in posterum quiesceret, per litteras imperatum. Ceterum per Nostros schismatici duodecim cum Ecclesia reconciliati: religionis vnus, & religiosæ familiæ desertor, ad Fidem redijt, statumque meliorem. Virgo iam adulta ex Anabaptistis parentibus sacro fonte lustrata. Nobilis vir nutans in Catholica sententia confirmatus. non pauci relictæ planè hæresi, etsi adhuc tenaces Ruthenici ritus, tamen Sacra nostra, & conciones frequentant: nec dubitandum est, quin extrema faciliora principijs sua natura difficilioribus in perpetrando opere consentiant. Numerum discipulorum auget, tum frequens iuuenum exercitatio in agendis dramatis, quibus capiuntur ciuium oculi animique, tum exacta magis Gymnasij disciplina. Creuit etiam ornatus templi liberalitate multorum. Et expetitur quidem a vicinis toparchis: sed ea inciderunt tempora, vt propter paucitatem operariorum, pia illorum vota laudari debeant, expleri non possint.

## COLLEGIVM CALISSIENSE.

**L**ABORIS materia sex Collegarum accessio. ne auxit numerum laborantium: e Cracouiensi Nouitiatu quattuor, aliunde duo submissi: datæ aures consitentibus amplius mille, & de peccatis quidem totius vitæ, fere quadringentis. Hæretici decem, & ex ijs nonnulli iam cino capillo meliorem mentem induerunt. Qui agebantur ad patibulum a de-  
spera-

speratione venia ad pœnitentiam adducti. Vexati a  
 demone, sacri agni gestatione liberati: addictus  
 Magicis artibus respuit. Septem octone a fenebri  
 lucro deterriti. Carnifex publicus rationem qua-  
 stus cum vita emendatione mutavit: mulierculæ  
 multæ placendi studium ab hominibus ad Deum  
 contulerunt: discipulorum fructus non contemnen-  
 dus: eorum maior, qui Mariam Virginem patronam  
 habent. Sex eo de numero Societatem complexi: in  
 pluribus alijs reiectis, quo spes longior, eo cura fla-  
 grantior. Sed interuenit his laboribus commune illud  
 hoc anno toti fere Poloniæ malum, pestilentia: du-  
 plici aditu in regnum irrupit, per Valachiam in  
 Russiam, & Poloniam minorem: per Gedanum in  
 Prussiam, Masoviam, maioremque Poloniam: &  
 Calissiensis quoque ciuitas, quæ ignara hætenus ta-  
 lis calamitatis, non fuit intacta. Septembre extremo  
 lues irrepsit: igitur, quod fieri amat in tali trepida-  
 tione, schola conticuerunt, & primores ciuium in-  
 tutiora dilapsi. Collegij interea moderatores cura  
 Nostrorum incolumitatis, & proximorum salutis  
 versabat: data est omnibus optio cédendi pro arbi-  
 tratu, aut manendi: ea fuit singulorum pietas, &  
 virtus, vt oblata occasione multis opem ferendi,  
 postposuerint tutæ fugæ periculosam commoratio-  
 nem: medium consilium captum. Sacerdos cum ma-  
 gistris duobus, & tyronibus quinque in vicino præ-  
 dio sepositi, Rector cum reliquis ad tres hebdoma-  
 das in Collegio mansit: hoc tempore, expiati fere  
 omnes in nostro templo, qui in ciuitate superabant:

auer-

auerruncandæ celestis iræ, publicæ supplicationes, quas multi nudis pedibus obierunt, indictæ: cum glisceret in dies magis contagio, alijs dimissis: sex (e quibus sacerdotes duo) Collegio, & Ciuitati relictæ non minore vsu ægrotorum, quam morientium fructu fuere: nec caruit admiratione in media flamma neminem afflatum fuisse. Non omiserim in hoc digressu duo oppida lustrata cum magno commodo vtriusque. Plezenia oppidum hæretico domino paret, & per viginti iam annos eiusdem sectæ Ministro: Catholici, si qui sunt oppidani, Catholicum templum vicini pagi frequentant: huc se contulerant Catholici plures pestis vitandæ: a queis vocatus sacerdos sub ferias natalitias, triduo concionem habuit, plurimorum confessiones excepit. Alterum oppidum Poniecum: in quod similiter hæreticus dominus hæreticum ministrum introduxit, vix adicula lignea Catholicorum sacris exclusa: hic quia longior commoratio, nempe bimestris, amplior etiam fructus: eius oppidi Curio, Catholicus quidē erat, sed per flagitia infamis, eum tamen non ferebant modo, sed etiā, respectu sacerdotij, venerabantur oppidani in religione constantes: cum hoc agere interim Noster, vt rectiorem iniret viam: negligebat is, aut differebat, peccandi consuetudine: diuinam vindictam minari ille, nec sane tardam: ita res cecidit: cum pridie bene valuisset, postridie mane repertus est in pauimento, suo volutatus in sanguine, quem abunde euomuerat, spiritu labente impos mentis: post paulo decessit. Eluerunt confessione maculas centum quadraginta

ginta vnus: & quantum poterant vel a pueritia recordari, tringintatres. Duo ad Ecclesiam reducti. Ceterum hic sacerdos eo in itinere quadraginta soluit peccatorum nexu, ex his duos, totius vite: virum item nobilem & senatorij ordinis, ab obstinata hæresi multorum annorum, magna bonorum gratulatione, conuertit.

### COLLEGIVM NIESVISIENSE.

**N**IESVISIENSIS Parochus vir maturus, & grauis post biennij experimenta Societati nomen dedit. Schisma deseruere amplius triginta: varias hæreses fere duodecim: multi, quorum in dubio erat animus, ad veram religionem impuls; ex his tenebris qui emerferunt, ita sunt ignari Christianorum elementorum, vt more puerorum sint edocendi. Extra horum confessiones, generales exceptæ quadraginta. Illustrissimus Cardinalis Raduillus cum cetera diœcesi Nieuisium quoque lustrauit. Salutatus honorifice a discipulis in absoluta parte Collegij. Ceterum in recognitione templi, quod nunc quidem est Nostris cum Parocho commune, quæ erant Parochi, pro sui ratione officij, cum diligenter explorasset, rerum nostrarum inspectui pepercit. Inciderat in iubileum a Pontifice concessum, compluribus Eucharistia & Confirmationis Sacramentum impertijt, in eaque lustratione persuasit Sacerdotibus multis, vt se Patris Nostrî exercitijs perpoliendos darent. Fundatoris nostri liberalitatis idem tenor,

nor, qui annis superioribus: vasa aliquot argentea, inducto auro, ad sacros vsus donauit, oblataque pecunia promouit Collegij adificationem. Nos eo magis in proximorum salutem intenti: assidemus morientibus, opem ferimus desperatis, & afflictiis. Ex hoc genere vnus, cum insimulatus furti, & post acerbam quaestionem, e carcere semustulatis pedibus emissus, mox veluti truncus sub dio iaceret in via, vnus e Nostris operareceptus primum a matrona honesta, refotusque corpore, & animi postmodum expiatis sordibus, excessit e vita. In publicam custodiam dum aditur, adolescenti, placatis aduersariis, mors remissa: confirmati multi ad Christiane fortiterque moriendum: vnus cum duceretur ad supplicium, duorum intercursum in se crimen auertentium, liberatus. Prouisum praterea per Nostros, vt qui suspendio sunt enecandi, non se ipsi precipitent e furca, sed expectent carnificis impulsus. Qua in re permultis in locis persape peccatur.

### DERPATENSE COLLEGIVM.

**P**ROPTER aquarum intemperiem laboratum est frugum inopia: & si quid erat, bellum inter duos dominos excitatum, absumpsit: sed eo maior copia fructuum spiritualium. Amisimus Patrem Ioannem Fornerium, magna, cum apud Nostros, tum apud externos, existimatione sanctitatis: sexdecim annos posuit in Societate in multorum itinerum laborumque patientia: vel fessa etate, q uae  
leuatio-



leuationem aliquam postularet, addiscenda Liuonica lingua, quo pluribus ferret opem ( & iam hoc ei procedebat ) cupidissimus. Hic primus de Nostreis in Liuania sepultus est. Nostrorum labor primum in scholis cernitur, quæ, & siluerunt nonnihil in hoc strepitu armorum, nunc tamen redierunt cum pace florentes: mittuntur etiam ab hæreticis filij, nec se grauate laturos ferunt, si Catholici euadant, dum apud Nostros litteris erudiantur. auxerunt opinionem varij dialogi tempestiue exhibiti: vnus elegantissimus in pompa Corporis Christi: eodemque die, de illius dicta nomine, ad exemplar Vlnensis, Congregatio instituta. ornatia Rhetoribus parietes templi multiplici carmine. Eorum virtus qui educantur in Seminario, cum ætate capit incrementa: ex ijs præfecti aliquot ecclesiis, quæ vacabant. Ceterum, etsi pietas plerumque refrigescit, ardente bello, sunt tamen intra, extraque urbem in excursionibus: e Polonis Germanis, Hætonibus, omnium erratorum in vita confessiones audita quadraginta. Exercitationibus informati quinque. Eucharistiam perceperunt domi nostræ mille quingenti: foris septingenti quinquaginta. Hæresim agnouerunt Germani decem, Poloni vigintiquattuor, schisma septuaginta. Matrimonia non legitima siue dirempta, siue instaurata, sex circiter & triginta: e pœna capitali quattuor erepti: adiuti alij dum ea afficiuntur. Trina quotidie beatæ Virginis salutatio in archibus quibusdam introducta. Dissensiones sopitæ, etiam inter Ecclesiasticos, & Toparchæ, alioqui  
 in

in multorum perniciem exarsura. Conciones habita  
 in templo nostro tribus linguis, & Hestonica, ple-  
 rumque ter millibus audientibus, magno plausu,  
 maiore fructu: templum item nostri prædij frequen-  
 tatur ab hominibus prope quingentis. Has ob res,  
 & adiuuamur vicissim in sacro instrumento: & duo  
 illi viri Nobiles, qui inter se pugnabant armis, cer-  
 tabant erga nos beneficijs, agnoscere prædicantes  
 pacis studium cum summa aequitate coniunctum. Ab  
 vnus vxore, licet non Catholici, ornatum templum:  
 alter vicini agri partem prædio nostro liberaliter  
 dedit: nec magis templi quam Collegij ædificatio  
 processit. Scholarum ruinæ resarcitæ. adiuvat stu-  
 diorum operumque progressionem Serenissimi regis  
 Sigismundi tertij humanitas: is cum litteras Ste-  
 phani, cuius beata memoria, de stata pecunia Col-  
 legio ædificando firmasset, addidit voces erga no-  
 strum ordinem amoris honorisque plenissimas.

## COLLEGIVM RIGENSE.

**D**E NOSTRORVM Riga discessu seces-  
 suque in proximam arcem, scriptum anno su-  
 periore. Igitur in hac relegatione, quiescentibus scho-  
 lis, frequenter excursum. Quadam in arce ædificata  
 a Stephano rege causa præsidij (Blolcausum appel-  
 lant) opera egregie collocata. Confluunt Lothauï,  
 vel ex centum milliaribus, vt a Nostreis imbuantur  
 iamque illis bina templa in nostris prædijs extrui  
 cæpta: multi inter se pacati: mulier Scythis magno

conuentu nobilium baptizata in sacello arcis. Quidam e numero opificum cum imaginibus vexaretur horrificis, vt pati non posset solitudinem, Nostorum suasu remedium a sacra confessione, caelestique agno quasiuit. Mulier, quæ multis annis, veneficijs, vt credebatur, illigata, fetus emortuos edebat, cum per multa milliaria ad templum perrexisset, vbi Nostri concionabantur, & accepisset salem benedictum adhibendum ad opsonia, viuos partus enixa est. Par coniugum per sexennium fuerat in perpetuo iurgio, non leui coniectura artis maleficæ: sacrarum vi precationum sacerdos restituit amorem, quem depulerant incantamenta. Alij etiam coniuges duo, nullo antea mentis vitio, cum semel adissent ad Lutheranorum cœnam repente stolidi effecti (& deuotionibus id quoque accidisse dicebatur) eadem ratione sanati. Itur ad agrotos, itinere licet multorum millium: acceptum id vulgo, quod Lutherani segiores abnuunt iter, nisi munere aliquo commoueantur: hac ratione non nemo a dæmonis iugo extractus. Vnus e Sacerdotibus, ætate iam ingrauescente, Lothauicam linguam ita addidicit, vt concionari, & aures præbere confitentibus posset. Obiit dominicis festisque diebus sex ecclesias, in orbem, diuini pabulum verbi, & Sacramenta administrās: ita opus factō, ne in vacuam possessionem Lutherani irrumphant: dum Parochi, quorum magna inopia ab Episcopo destinantur: interea, in his excursionibus, ad viginti millia passuum rudes Catechismum docentur, segnes ad pietatem inflammantur, confitentes de peccatis absoluuntur: reperti

reperit nonnulli homines exacta iam aetate, sic Fidei  
seruantes, ut qui per viginti trigintaue annos a Lu-  
theranis longissime refugerunt, ubi audierunt de  
Nostrorum aduentu, ad antiquos sacrorum ritus,  
& Sacramentorum, accedere latentur. accurrunt  
interim multi cum munusculis (quæ non accipiun-  
tur) orantes fieri sacrum votiuum Deiparæ, mala  
pecori, alijsque rebus auertendo: eumque morem  
fuisse, quamdiu apud ipsos erant monachi, patrum  
memoria testantur. Dedocti hæresim e Lothauis vi-  
ginti: e Germanis mulieres duæ: ac præterea vxor  
vnius Præfecti militum, cum aliquot alijs. Vnus  
denique Rigensis. Baptisma traditum Lothauorum  
Polonorumque infantibus cætum quadraginta vni,  
matrimonio iuncti quadrageni bini, terni deni ex il-  
licito contubernio in legitimum torum traducti: in  
Paschate confessi Lothauis quadringenti viginti: ex-  
tra Pascha, diebus festis dominicisque centum octo-  
ginta duo, Angelorum pane refecti: res ponderanda  
difficultate magis faciendi, quam paucitate facien-  
tium. durum hominum genus: & dominicum cor-  
pus sumere opulentorum virorum esse arbitrantur.  
Defertur diuinum ferculum ad egrotos, intra agrum,  
qui ad arcem pertinet, prosequentibus militibus  
præsidarijs, magna reuerentia. Sub finem Ianuarij  
virgo Rigensis Cænobij antistita, quam supra scri-  
psimus centesimum annum egressam, desiderio Sa-  
cramentorum, & mærore Nostrorum exilij, mor-  
tua est, nec nisi sacro instructa viatico, oleoque  
iuncta: sextum mensem caruit sepultura, iuxta illi

more Catholico persolui ciuitate prohibente. eam ob causam missus a rege vnus : nihilo magis obtemperatum : clanculum humari oportuit. Ceterum, Nostri cœnobio illi, quæ sunt ad corpus necessaria, omnia subministrant : quæ ad animum, occulte, nec sine periculo. Approbavit Sigismundus Nostorum in arce commorationem, mandauitque Præfesto, vt commodius diuersorium daret.

### MISSIO VOLINIENSIS.

**E** IAROSLAVIENSI Collegio Voliniensis missio instituta. in qua fere per annum versatus est Sacerdos, cum Laico, apud Bernardum Macecioschium fundatorem Collegij Lublensis, nunc Episcopum Luceoriensem. Voluit enim optimi vir animi, maximique consilij, lustraturus primo diœcesim aliquem de Nostris habere: & fuit pretium eundi. id fuit admirabile: quod Luceoria vbi princeps Ecclesia, & Volinia caput, ciues habet Rutheno Græcoque schismate infectos: Armenis deinde abundat Iudæisque, non sine Synagogis: vt in magna vrbe Catholicorum domus vix septem supra centum numerentur: sed & Vladica Ruthenorum antistes suam in arce Cerquam (ita illi suam vocant pseudoecclesiam) habet. magna eius auctoritas principibus viris innixa. indignum porro erat in maiore hebdomada Catholicorum campanas sile-re, aliorum circum omnia strepere: solum enim sonorem campanarum Popi crepant. numerus tamen  
confes-

*confessionum exceptarum a Sacerdote hac ratione subducitur . Luceoria in Quadragesima centum nonaginta octo . Post Paschales ferias Torcini centum quinquaginta : Olicæ triginta quinque : Brestæ centum trêdecim : Ianouia quinquaginta octo . obita cum Episcopo hæc omnia oppida : excultiq̃ue Sacerdotes iam facti, & præculi faciendi : Quodam in oppido , integerrimus antistes , sedulo quæsiuit de ijs, qui non communicassent ad Pascha: qui cum Ruthenis matrimonio copularentur : qui iniustas nuptias fecissent : qui pellices haberent : omnia, secretis schismaticis, ad Catholicum ritum direxit . ad Ecclesiam rediere nouem, plures in Fide firmati : Disputatum cum Popo, eiusque inscitia conuicta . Brestæ ( oppidum est regium frequens & nobile hæreticis scatens ) data est opera, vt Clerici mensa communi vterentur, in rem famamque multorum . e suggestu hæreses confutata : factumque, vt constitutis Catholicis hæretici vacillent : & iam eorum aliquot visi in templo sacrosanctam Eucharistiam venerantes : iudex quidam Brestensis, Ruthenis licet addictus, cum in supplicatione præferretur diuinum mysterium, vsque ad finem venerabundus voluit interesse : is fluctuatur animi, vt vehementer sit locutus cum Episcopo de Ruthenorum religione cum Romana conglutinanda: eo præsertim tempore, quo Patriarcha Byzantijs ad Synodum in Polonia cum suis Vladicis Vilnæ celebrandam adfuturus dicebatur . Illustres etiam viri, Palatinus Brestensis, & Præfectus arcis, quamquam hære-*

tici, ex Episcopi ipsius Nostrorumque consuetudine, iam melius de Catholicis sentire cæperunt. eodem loci puellæ duæ ex parête anabaptista iam grandiores natu lustrali aqua tinctæ. De reliquis Poloniæ domicilijs, quia nihil accepimus, nihil reddimus.

## A V S T R I A P R O V I N C I A.



**A**BET AVSTRIA. iam Collegia quinque: Viennense, Pragen-  
se, Olomucense, Gracense, & quod  
hoc anno additum, Crumlowiense,  
Domum vnam Brunæ, Probatio-  
nis. Missiones fuerunt diuturnio-  
res quattuor. Vratislaviensis, Furstensfeldensis, &  
in Vngaria Varalliensis, & Scellienfis. In his lo-  
cis omnibus ducenti quadragintanovem socij nume-  
rantur. Quattuor supremum diem explevere. In  
Societatem ingressi quinquaginta octo.

### VIENNENSE COLLEGIVM.

**V**IENNÆ ubi sunt socij sexaginta, ad-  
missi octo. Obdormiuit in Domino Pater  
Ioannes Merquicius, qui huc venerat e Gracio: ce-  
terorum integra fuit valetudo. ad Catholicos re-  
diere



diere tredecim supra ducentos: atque, ex eorum numero, quinque hæreticorum faces: alius, cuius nomen in duabus Academijs percelebre, neque parum in Liuonia Catholicis obfuerat. Duo erant adulescentes, vt pari inter se beneuolentia, ita religione diuersa: hic Catholicus, ille hæreticus. Vterque alterum in suas partes trahere cupiebat: et si Catholicus felicius fuit. Id, quia admirabile quiddam habuit, breuiter repetendum videtur. Ducebatur hic sepe ad insensissimum Catholicis nebulonem Caluinistam: cum eius interea fides nulla nutaret ex parte: & iam aliqua cum illo consuetudo: ægrotat buccinator exigua spe valetudinis: ad eum cum amico Catholicus: cum sermonibus tempus, vt sit, tere-retur, multaque in vtramque partem de religione differerentur, ad Caluinistam Catholicus: Per tuam, inquit, salutem perque iustissimum illud tribunal, ad quod sistemur omnes rationem reddituri, te oro ob-testorque, vt integro animo ac libero aperias, in vtra religione censeas præstare mori. Hic ille ter-giuersatus primo, & professus inscientiam suam, cum rursus vrgeretur. Bene, ait, tecum agitur adolescens, qui audis Catholicos: a quorum præceptis, si cara est tibi animæ salus, noli discedere. admirantibus cunctis, qui hæc accipiebant. Quintu, excipit Catholicus, in isto articulo, ac discrimine ultimo, rapis consilium, quod das alteri, & amplecteris religionem, quam veram esse confiteris? Sed quis mortalium reducat hominem in viam, quem Deus, vt sunt incomprehenfa eius iudicia, despexerit? Cla-

more enim ingenti, ac terribili eiulatu. De me iam conclamatum est: clausa est ianua. Hac ille moriens efflauit. Perculit ea res omnes vehementer, precipue filium, qui patris perfidiam execratus, veram fidem aspexit: illumque alterum, de quo dicebamus, adolescentem: is enim amico Catholico, qui hanc confessionem expresserat, manus dedit. Gallus quidam nobilis, sed hærescos veneno olim infectus, militiam exercuerat diu contra Catholicos, quorum multis gloriabatur euerfis bello templis, ac fæde incensis: magnis excitatus præmijs in Germaniam se contulerat: cum autem vnus e Nostreis familiaritate delectaretur, paulatim eo perductus est, vt oblatiis libris magistris mendacij, veritatem agnosceret: & nunc ex ea mutatione vitæ tantam percipit animo voluptatem, vt cogitet de relinquenda militia, quo inter Catholicos solutiore animo versetur. Mulieris vnus Catholicæ memoranda patientia. Erat perquamdiu cum viro hæretico, tres liberos enixa, duos virilis sexus, tertiam feminam: illi superstitionem patris sequebantur. Pessime accipiebatur a marito vxor, odio religionis: quæ cum postea incidisset in morbum, atque indubitatam mortem sentiret, ægre a viro extorsit, vt percepta sacrosancta Eucharistia Catholice moreretur. post eius obitum filia in cænobium virginum ingressa decessit. Filij superstites, matris sororisque religionem complexi, ipsi quoque moriuntur. Et tandem pater siue orbitatis malo, siue tam multorum vi exemplorum commotus, aperuit oculos, & per suorum vestigia, qui præ-

præcesserant , ad Christianæ pulchritudinis lumen  
emerfit . Datum id credam mortuæ uxoris preci-  
bus, & in recta fide , quod dederat viuens, docu-  
mento perseverantiæ . Medicus vnus cum hæresim  
eiecisset , eo statim flagrare cœpit desiderio animas  
curandi , vt vndecim secum adduxerit, & nunc etiã  
in eodem opere cum magna laude versetur . Alius  
Græcarum litterarum Latinarumque percallens, in  
Mathematicis plane perfectus , post varios errores  
hæresum ad veræ salutis viam perductus est . Huic  
a primis annis, incertum ridenda magis, an miseran-  
da , infederat opinio , Iesuitas non ex hominibus, vt  
ceteros , sed e monstroso quodam dæmonum genere  
esse procreatos . Sacra apud nos obeuntium myste-  
ria , cum toto anno , tum maxime diebus festis, tan-  
tus est numerus , vt obruant audientes . Ferijs Pa-  
schalibus , confessiones ter mille quingentæ quin-  
quaginta tres , & earum plurimæ, vel omnium, vel  
multorum annorum , exceptæ . Communicarunt bis  
mille quingenti . Turbidi quidam homo ingenij, cum  
a rixa & contentione calens discessisset , repente  
tanta dæmonum multitudine , sub terribili ferarum  
monstrorumque specie, circumuentus est, vt per to-  
tos dies quinque nullam inueniret, nec animo, nec cor-  
pore quietem : non cibum capere , nisi vi ingestum  
ori , non somnum poterat , non pedibus insistere .  
Exprimit signum Crucis , fundit ad Deum preces ,  
nihil propterea melius concipit tandem votum con-  
fessionis faciendæ . tum vero, intempesta nocte, sub-  
limis rapitur , & in vasta solitudine , septem mil-

lium spatio, eijcitur ante piscinam ingentem. non  
 deijcit ille animum, victaque corporis imbecillita-  
 te, Viennam ad nos contendit, votoque exoluto,  
 terriculis omnibus liberatur. Nostorum exorcis-  
 mo, a muliere vna demonium expulsum. alteri fa-  
 naticæ mens reddita, haustu aquæ lustralis. Res  
 scholastica efflorescit: studiosi octingenti: quos cum  
 fere instructos vidisset Aldobrandinus Cardinalis in  
 Poloniam Legatus proficiscens, lætatus est cum com-  
 mendatione mirifica illius iuuentutis. Tragicoco-  
 mædia, frequentissimo populo spectante, & appro-  
 bantibus Serenissimis Austriæ Principibus, data. Vti-  
 mur nunc Viennæ proceribus maxime benivolis:  
 Eorum auctoritate, si qua in nos cudentur menda-  
 cia e maleuolorum officina, euanescent. Martinus  
 Neostadiensis designatus Episcopus, vir nostri ordi-  
 nis amantissimus, adiecerat animum ad extruendum  
 Neostadij Collegium: huius consulti effectum mors  
 turbavit. moriens ille mille aureos nobis reliquit,  
 monumentum amoris. Vsus in valetudine, & in  
 morte vnius opera e Nostris, a quo etiam funebri  
 oratione laudatus. Simili beneficentia alius, in bi-  
 bliotheca vsus florenos contulit sexcentos. Donata  
 etiam sacra vestis, materia pariter & arte insignis.  
 piorum liberalitate templi splendor intus forisque  
 quæsit: vt quocumque conuertas oculos, sacra se  
 offerant signa, incitamenta pietatis. Apud Sanctum  
 Bernardum (vicum esse reor Collegio vestigale)  
 in proximorum salute non est inutiliter laboratum.  
 Septem a communione sub vtraque specie retracti  
 aditi

aditi agrotantes auditique, sacro communiti viatico, extremo denique oleo delibuti. mira omnia, eo in loco, ubi fere omnium contaminatis animis, ne tenues quidem reliquiae pristini moris harebant.

## COLLEGIVM PRAGENSE.

**C**ONSVETAE domi forisque conciones habitae tribus linguis, Boemica, Germanica, Italica. iisdem linguis doctrina Christiana tradita, dominicis diebus, quae, Italis praesertim, magno emolumento fuit: curatum proinde, piorum sumptibus, ut de Confessione libellus, Italico idiomate excuderetur. Ad Catholicam fidem, in hac urbe, sexaginta quattuor: ad communionem, quindecim conuerfi. Ex socijs triginta quinque, quibus Collegium constat, cum Sacerdos vnus, labente iam spiritu, extremis instructus Ecclesiae Sacramentis, nihil aliud expectaret, nisi mortem: ubi sacrum hausit liquorem, qui manat e corpore Sancti Nicolai, cepit conualescere. eademque medicina fuit medico vni, & alijs nonnullis agrotis, desperata valetudine. Per longum multi ad nos suscipiunt iter, dominorum negligentes offensam, contemnentes propositam poenam carceris, ut peccata fateantur. Fenebris pecunia restituta a compluribus, & ab vno quidem floreni sexcenti. Supremus regni praefectus Crupcense Monasterium Collegio donauit: pro cuius conseruatione, Casarea Maiestas hoc anno, taleros centum. Igitur in eo Monasterio per Quadragesi-

gesimam Sacerdos cum fratre mansit, ut Catholico-  
 rum excitaret reliquias: nec sine fructu. Etenim  
 ipso die Angelica salutationis, qui concioni interes-  
 sent, ducenti, qui ad Eucharistia sacramentum acce-  
 derent, quadraginta numerati. Crupca autem oppi-  
 dum est, Misiue Boemiaque confine scatens hære-  
 ticiis: magna hic, Nostorum commoratio, Catho-  
 licis voluptati fuit. Est in eo oppido, ades Deipara  
 Virginis: ad quam melioribus olim temporibus tri-  
 nis Pascha ferijs, & Pentecostes, ipsoque sanctissi-  
 ma Virginis natali die sollemnis erat peregrinatio:  
 eius nunc memoria abolita, ut renouaretur, placi-  
 tum Nostris eo excurrere: hoc fructu. conciones  
 habita Germanica, Boemicaque: qui confessione ex-  
 piarint peccata, auditi centeni ducentique: ex illorum  
 maxime ordine hominum, qui cum hæreticis Curio-  
 nibus uti cogantur, nullo nec carceris, nec suppli-  
 cij metu, se a Catholica fide abstrahi patiuntur. Et  
 horum quidem ea est constantia, ut antequam se ape-  
 riant, interrogent Sacerdotem, sub vna, an bina spe-  
 cie communionem tradat: nolunt videlicet falli ab  
 impostoribus. Nec vero vicini tantum huc con-  
 fluunt, sed qui absunt etiam decem duodecimve mil-  
 liaribus, sub vexillo. ornarunt hanc piam peregri-  
 nationem primores regni, ac præter ceteros, Nun-  
 tius Pontificius, qui & summum in Monasterij  
 templo altare consecrauit, exceptus perbenigne a  
 Crupcensibus Senatoribus, xenijsque honoratus,  
 Lutherum licet sequerentur. Ceterum in veteri tem-  
 plo nostro Sancti Clementis, aliquorum liberalitate,

in nouoque Sancti Saluatoris, vnius Parochi beneficio, altare nouum erectum: nec minorem nobilium beneficentiam, Domus pauperum, in qua centum & triginta bonæ spei iuuenes aluntur, experta. His cum Ianuario mense epulum datur, impensa cuiusdam mercatoris, inuitatus est Nuntius Apostolicus, & cum eo Consul Legatusque ciuitatis Coloniensis: quibus adeo placuit ea disciplina, vt dicerent se vbi Coloniā rediissent, de simili instituenda Domo relatueros. Et quamquam ab inuidis interdum, vt assolet, in Nostros sparsi rumusculi, tum apud Cæsarem, tum apud alios etiam, qui illos comprimerent, viri magnæ auctoritatis non defuerunt.

## COLLEGIVM OLOMV CENSE.

**R**EBVS HVMANIS ereptus Pater Ioannes Aschermannus, admirabili vir animi demissione, & patientia: qui cum in Polonia Prouincia fundanda, Austriaque iuuanda, multis annis laborasset, magno relicto sui desiderio, hic in patria, tam sancte mortem obiit, vt cum finis instaret, beatæ Virginis, quam veneratus est insigni semper obseruantia, hymnum, Ave maris stella, maxima omnium admiratione latissime decantarit. Ex quatuor adolescentibus, qui successerunt in demortui locum, vni votiua Societas reddidit vitam, quam atrox valetudo perditum ibat. Conciones ternis diebus festis, in præcipuis Paræcijs ciuitatis, Germanica lingua habentur: ad has accedit explicatio  
Cate-



Catechismi, & concio Boemica, quæ hoc anno in templo nostro instaurata. Fructum ex his experimur non exiguum, præsertim in hæreticis, qui audiunt frequentes. Pauperum, qui in xenodochio decumbunt, necessitati subuentum a Nostreis, nihil veritis loci graueolentiam: tanta prorsus sui victoria, vt hæretici, qui omnia cauillantur, hoc ipsum non admirari non possint. Omnes qui extremo supplicio dederunt scelerum pœnas, Catholice & pie, inter cohortationes Nostrorum, vita defuncti. Quibus diebus resurgentis Christi memoria recolitur, tria millia consuetium numerata: etsi Boemicorum inopia Sacerdotum, plures inauditi. Inter illos, centum deseruere hæresim: totidem in Fide firmati: multi viri mulieresque ab impuritate vitæ, quattuor a desperatione traducti. Ciuium aliquot familiæ, & coniugum paria, inter se grauiter dissidentium concordata. A feneratione pecuniam, quæ res hic non criminis loco, sed beneficij habetur, abstulerunt nonnulli. argumento est, quod opulentus ciuis grandem summam magistratui reddidit, admirantibus Senatoribus hæreticis Catholicisque: hoc magis, quod magnum præterea æs, sine vlla usurpatione fructus, ijsdem poscentibus libentissime mutuauit. Die festo Sanctæ Annæ, cuius hic ciuium Catholicorum nobilis Congregatio, magna fuit vis consuetium: cum alias, qui hoc facerent eo die, pauci, aut fere nulli reperirentur. Olomucensis antistes paternum in nos animum gerit: eiusque dignitate, quæ magna est, & a Cæsare nuper aucta, optimates adducti mul-

ti, nobis licet dissimiles in Fide, suam erga nos benivolentiam liberaliter declarant. Sed ad omnem civitatem egregie iuvandam aperuisset nobis aditum Bernardus Brūdalschius priscae nobilitatis Dynasta, multigena eruditione, & virtute insignis, si ei diutius vivere licuisset. Addixerat hic tum omnes facultates, quæ satis amplæ, tum seipsum, Societati: iamque a Reuerendo Patre Generali facta ei potestas Romam eundi. Sed mors iter oppressit: qua statim consecuta, eius amici prætendentes bonorum stabilium alienationem a familia, Prouinciæ legibus interdictam, certam pecuniæ summam nobis asperserunt, qua suburbanum prædium vtile satis & com modum Collegio coemptum. Eodem fere tempore hortus Collegio proximus, in quem, vt caducum, inuaserat ciuitas religione labante, diu licet repugnantibus hæreticis, Cæsaris decreto, nobis restitutus. Iuuentus scholastica, etsi armorum tempore aliquantulum imminuta, ita frequens fuit, & clara, vt Nostros non pæniteat. Ex ea nonnulli, approbantibus mirifice Theologiæ doctõribus, magisterio decorati. Abbas quidam Nostrorum per studiosus, nouo exemplo, aliquot Cænobij sui nouitios, etsi præceptorem domi habent, in Collegium mittit, vt a Nostris instruantur.

## GRAECENSE COLLEGIVM.

**M**ULTAE, & graues dissensiones a Nostria compositæ. Viri duo primarij, qui ita pa-  
ribus

ribus ardebant odijs, vt alter alterius aspectum tolerare non posset, adnitente vno e Noſtris, in mutuos venerunt amplexus. Nuptia, quæ nutabant, conſtabilita: reuocati ad Eccleſiam non pauci: atque, inter hos aliqui, quibus propter auctoritatem eruditionemque non vulgarem, rem Catholicam adiutum iri ſperamus. Nobilis quidam iuuenis, cum ad partes ſe conferret recta ſentientium, nec ſuorum rogatu, nec ſuaſu miniſtri, potuit a ſuſcepto propoſito demoueri: hinc ſpes non parua affulſit, diſſolutum iri pernicioſam coniunctionem, conſpirantis Nobilitatis contra veteres Eccleſiæ ritus. Hæreſim dedoſti multi, quam didicerant ab infantia. Mille ſexcenti triginta, ſub Paſchalia, apud Noſtros conſeſſi: quod in ea ciuitate admirabilius, in qua aduerſarij adhuc ſuas ſcholas habent, & templum: quocum maxima conſluit vis ciuium, tum huius prouinciæ proceres bene multi. Nobilis quidam morti proximus: ſepulturam in noſtro templo petebat, eius ſibi iure a maioribus relicto (hunc hæreſeos ſuſpicio perſtrinxerat) ne poſt eius mortem res eſſet in diſcrimine, ſignificatum eſt ei, id non aliter euenturum, niſi abſtineret a calice. hic ei metus iniectus, auctor extremi officiij fuit. Alter, cui malus demon adeo erat familiaris, vt eius vocem nudam corporis audiret ſæpiſſime, quod illi erat permoleſtum: cum hortatu Sacerdotis, loquenti non daret aures, nec redderet reſponſum, ea tandem vexatione liberatus. Curatum præterea, magnam partem Noſtris laborantibus, vt diuerſis in oppidis magiſtratus Catho-  
lici

lici hæreticis subrogentur. Et in hac quidem civitate, Senatorum pars, qui Catholicam amplectuntur religionem, est altero tanto maior, quam qui superstitionem hæreticam: cum triennio ante e Senatoribus ne vnus quidem hæreticus non esset.

## CRUMLOVIENSE COLLEGIVM.

**H**OC TANDEM anno, Maio mense, missio Crumloviensis in Collegium venit: hac serie. Illustrissimus Rosensis fundator noster, Barientsem antistitem, qui apud Casarem agebat Nuntium Pontificis: Præsules deinde multos, Dynastas & optimates complures Crumloviam acciuit, ubi erat etiam Præpositus noster Prouincialis. Igitur postridie iduum, cum hi omnes conuenissent, Fundatoris Cancellarius, eius nomine, orationem Latinam habuit perelegantem: tum Fundator litteras, quibus fiebat Collegij potestas, clauisque ipsius tradidit Patri Prouinciali: qui cum deinde, vt par erat, magno eius studio promouendæ religionis Catholicæ ageret grates, ac Societatis operam vicissim sponderet, pauca quidem verba fecit, sed ea quo minus artis præse tulerunt, hoc plus habuerunt auctoritatis. Conclussit sermonem Fundator humanissimus, libentique animo, ac prolixo, recepit se plura multo, ac maiora in hoc genere, quam adhuc præstitit, in dies præstiturum. Post hac itum in templum, ubi cum Apostolicus Nuntius sacrum fecisset, Pater Prouincialis, candelam, foundationis titulum rite atque ordine

dine dedit. Tum excepti omnes a Fundatore epulis exquisitissimis: dataque tragœdia ab adolescentibus, qui ad nos ventitant, pulcherrimo apparatu. Magna omnino eius diei species fuit. Ex hoc tempore Nostrorum numerus auctus, ut quindecim censeantur. Boemicarum Germanicarumque concionum idem fructus, qui alijs annis. Præsidis invitatu in vicinum oppidum Sacerdos excurrit, populumque Lutheranum, qui nullis domini minis flecti ad religionem poterat, paucis concionibus ita permouit, ut se tandem in heri potestate futuros pollicerentur. Pastores finitimi ad rationem pascendi gregis diligenter instructi. Vinctorum domus pauperumque, opem ferendo utrique, interdum adeuntur. Ad salutarem peccatorum expiationem, sanctamque synaxim accedentium, maxime ex occasione Iubilei, numerus, quam antea, frequentior. Qui omnem vitam retro egerunt, confitendo, exceptis scholasticis quorum maxima pietas, trecenti amplius fuere. Hæretici sex: qui sub utraque communicabant, multo plures, ad sapientiora conuersi. Cum propter aquarum intemperiem aduersa æstas esset frugibus, ex voto a quibusdam suscepto, qui & Nostros adesse voluerunt, est ad Sancti Thomæ supplicatum: statimque consecuta serenitas cali, quam nemo fuit, quin obitæ supplicationi ferret acceptam. Summo dierum aliquot cruciatu parturienti mulieri sacer Dei agnus perfacilem partum dicitur præstitisse.

## DOMVS PROBATIONIS BRVNENSIS.

**I**N BRVNENSI Probationis Domo fuerat amplius quadraginta: omnes incolumes, præter unum, qui cum Græcio Olomucium missus sit: mandæ valetudinis, hac iter facit, grauescente morbo, post sesquialterum diem decessit. Inter studia propria perfectionis, ceterorum animi salus minime negligitur. ad Ecclesiæ obsequium rediere tredecim. Hæreticorum libri ablati permultis: ut ab usu Calicis abstineant, persuasum hominibus duobus & viginti. In Christi ferijs existentis ab infectis confessi, ac plerique omnes repetita vita vniuersa, nongenti viginti septem. Qui agebantur ad supplicium, Nostrorum adiuti ope, Christiane mortui: & eorum quidam inter suprema cruciamenta adeo fortiter, ut admirationi essent. Hæc inter, quæ speciem habuere miraculi, euenere nonnulla. Quidam in inimicum ardebat, odio ita implacabili, ut subtraheret aures sermonibus, qui de reconciliatione haberentur. Hunc conuertit vnus e Nostris. Orat ut quandoquidem aures habet obstructas, oculos tamen sibi clausos esse ne patiatur: in templum nostrum concedat, dum defixo obtutu in beatæ Virginis imaginem, eam adprecetur: dictu mirabile, sed verum. Perculit is visus derepente hominem, ut exclamarit. Do veniam libens, obliuiscor iniuriæ. Condona tu mihi Deus, condona peccata mea: quæ etiam statim adhibita confessione sacraque communionem exiit. Vir quidam genere nobilior quam

I

fide,

fide, vxoris instinctu, Valdensẽ sectam ingressus, e templo, quod habebat, Sanctorum eiecit simula-  
 cra, illa præfatione vsus, quod videndi, audiendi,  
 loquendique sensu carerent. non diu dilata numinis  
 ultio. Qui videre noluit in æde mutas, vt dicebat,  
 surdasque imagines, in adibus mutos, surdosque li-  
 beros, quos identidem ei pariebat vxor, perferre co-  
 gebatur: res erat in ore multorum. Miser parens  
 venienti ad eum vni e Nostris infelicem sobolem o-  
 stendit: querit noster, qua ratione miserandæ animæ  
 adduci possent ad Fidem. Ostensa, inquit illi, Cruci-  
 fixi effigie, alijsque mysterijs, per signa, quibus  
 mentes oculorum nuntio moueantur. hac vna via  
 vtor quotidie ad meos erudiendos. Quod cum au-  
 disse Nostrer, culpam homini obiecit, quam  
 luebant filij immerentes: & res ipsa, quæ apparebat,  
 de sacrarum imaginum ad rudes docendos vtilitate,  
 confessionem veritatis extorsit. Huic illud non val-  
 de absimile. Cives nonnulli a Catholicorum ritibus  
 abhorrentes, prætextu ad nundinas necessaria pro-  
 fectionis, relinquunt supplicem pompam, qua Do-  
 minicum corpus per urbem circumfertur. Currum  
 conscendunt: vix ab urbe processerant mille passi-  
 bus: non leui cum damno vectorum, vehiculum in-  
 uertitur. Luxatur vni brachium, alteri penitus con-  
 fringitur: hic oculum amissum queritur, crumenam  
 ille cum aureis quadringentis, quæ numquā inuenta:  
 ita omnes, animis corporibusque afflictis: repetunt  
 urbem, calamitatis fama præmissa, & negligentia di-  
 mini cultus exempta. Impurus quoque adolescens  
 grauem



grauem neglectæ religionis, & manifestam pœnam dedit. Seduxerat virginem e cœnobio, cum ea ad hæreticos profugerat liberiore licentia. Sed non ef- fugit iram Dei. Percutitur corpus morbo insanabi- li, tumore primum, dein sanie odoris intolerandi: vt cum ab eius attactu omnes refugerent, pessimam vitam miserrima morte finierit. Infelix interea fe- mina tam atrocibus conflictatur malis, vt ab ipsis etiam hæreticis, quorum propter similitudinem morum sperabat patrocinium, non sit tantum deser- ta, verum etiam expulsa. Mulier erat in nosoco- mio, acerrima diaboli oppugnatione, ita oppressa, vt nunc aquis vitam sibi extinguere, nunc cultro, quem gnarus nocendi porrigebat in manus, eripere moliretur, prohibentibus cunctis, qui erant in eo- dem valetudinario: post illam triennij vexationem apoplexia corripitur, obligatione linguæ loquendi vsu adempto: mittitur ad Nostros, vt pro concione populi preces efflagitent: & exoratum fuisse Deum, solutus primus linguæ nodus, deinde animæ, post sa- cram confessionem peractam, ostendit. Nocturnis vnus quidam diurnisque spectris vsque adeo agita- batur, vt redigeretur ad insaniam. Cum multa ex- pertus esset frustra, ad nos venit inops consilij. Per- suasum est homini, vt purgaret animam confes- sione: datum consilium accipienti remedium fuit. Ma- ter sanitatem filię duplici morbo laborantis anxie quærebat: quicquid adhiberet, nihil proficiebat. tentanti omnia occurrit, vt consuleret Nostros: eo- rum suasu piacularem aquam implorata sanctissima

Triade offert filia hauriendam : eadem nocte conualuit : ad nos gratans mane accurrit , factum narrat . laborabat & ipsa , altero ex ijs morbis , quibus & filia , de quo antea reticuerat , pudore victa simili vsa medicamine , similiter sanata est . Scholæ , ex quo duabus classibus tertia accessit , meliore sunt loco : auditores enim & plures , & maturiores , quam annis superioribus . Puer , cum vt diebus vetitis vesceretur carnibus : alij , vt abstinerent a salutatione Angelica , ab infestis parentibus , nullis nec minis , nec blanditijs cogi possent , perstantes in constantia , parentes , ille ad eandem abstinentiam , hi vero , vt per eorum preces Mariæ matri commendatos se esse cuperent , impulerunt . Magnam spem concepere Brunenses ex Sodalitio Parthenio : nec temere . eminet in quibusdam inusitatus ardor pietatis , flagransque studium tum suæ , tum alienæ salutis . & iam ex eo aliqui Societatem meditantur : quam hoc anno auxit Bruna socijs tredecim : e quibus vnus annum agens duodeuicesimum , magnum præbuit constantiæ argumentum . Constituerat iamdiu de societate nobiscum ineunda : nec vero parentis sermo fecit vquam , vt eum pigeret antea consilij : nec litteræ postmodum , vt facti paniteret . Excursiones susceptæ , & peregrinationes , de more nostro , per multæ : non paruo fructu . ad confessionem , ad iurandi , numinisque verbo violandi detestationem , ad Eucharistiæ Catholico ritu perceptionem complures impulsæ : atque ex postremo hoc cætu mulier centesimum tertium annum ingressa . Et quidem  
his

his temporibus spectata saepe Nostrorum, in periculis suscipiendis magnitudo animi, & in laboribus perpetiendis patientia: nihil enim frangebat Deo subnixos, & a pietate hominum non deerant interdum non modica solatia. excepti nonnumquam ab ignotis, tanto cum honore, ut modestia præstari debuerit in eo recusando.

# MISSIO VRATISLAVIENSIS & Furstenfellenfis.

**D**VO VRATISLAVIÆ morantur Sacerdotes, cum Laicis duobus: Dux iam in locis conciones habentur: in principe templo una, altera, hoc anno, inuitissimis hæreticis instituta, in Monasterio Sancti Vincentij, rogatu Abbatis. Igitur aduersarij vanum timorem tumultus excitare: Vbi nihil procedit, ne ad nos ventitent, cum suis agere: hoc etiam irritum fuit: nam pro templi angustijs magna frequentia, & confitentes non pauci. Exeunte verno ieiunio numerati nouem vltra centum: abiecerunt hæresim quinquagintaquattuor: quos inter, viri magna auctoritate, & generis claritudine, duo: In quadam Paræcia, hæreticorum cantus, qui irrepserant, ritusque correcti. Vel a duodecim passuum millibus confessionis ergo ad nos confluent multi, qui, inter hæreticos cum viuunt, hisce præsidijs destituuntur: compressæ Nostrorum opera inimicitie nonnullæ.

IN FURSTENFELLENSI Sacer-

dos noster, cum socio, ut proxime scriptum, ciues, ab hæretico audiendo, qui in propinquo pago spargebat zizania, deterruit: primum virum, penes quem iudicatus in hac vrbe, conuertit: sed cis paucos dies emoritur: nec abest suspicio veneni: cum enim noctu, clamoris excitati, pro officio, sedandi, in aedes quasdam perrexisset, vnde accidebat sonus, & antequam discederet, humanitatis specie, more gentis, oblatum poculum ebibisset, repente, acri velut telo confixus, male habuit, & vnum fere intra diem, sua morte, an alieno scelere, decessit. Eodem in munere ei successit alter, ductuque nostri Sacerdotis eandem inijt salutis viam: & ipse quoque, eodem quo prior stratagemate, duobus vulneribus acceptis, vitam ægre retinuit. Ceterum, vbi noster huc venit, vix tres reperit Catholico more communicantes: Catholicos omnino paucissimos: nunc, laborando, agendo, instando, tantum profecit, Dei beneficio, ut sub Pascha trecenti trigintaduo in Paræcia sacram Eucharistiam rite perceperint. Senatores certe omnes, si vnum modo excipias, ad saniora traducti: his persuasum, ut priusquam veniant in consilium, intersint vna quotidie rei diuinæ: certo Sacerdoti eam ad rem pecunia decreta. Sacra pro defunctis, itemque in Aduentu Domini, in honorem Matris Virginis (Rorate appellant) quæ negligentia olim, seu contemptu aboluerant, restituta. Et conati sunt, tum hæreticus ille declamator, singulorum domos obeundo, tum alii, conuiuijs plebem deleniendo, litterasque frequenter ad

Sere-

Serenissimum Principem, modo octodecim obsignatas signis, modo nouem & quadraginta (quibus ille alta dissimulatione nihil respondit) mittendo, turbare tam felicem successum. Sed res contra fuit: pertinaces enim inclusi in carcerem (etsi ij postea omnes benignitate Catholici Senatus dimissi) vel fuga sibi salutem, vel mutatione vitæ quaesierunt: hac quidem ratione, non pauci ad confessionem a Sacerdote nostro adducti. Sed & in vicinis oppidis idem laborauit. Sacerdotes officij commonuit, paganis sexcentis, quos nulla antea infregerant pæna, eam ob rem instituta concione, persuasit, vt ne in susceptione dominici corporis discedendum sibi a Catholicis putarent.

## VARALLIENSIS ET SCELLIENSIS in Hungariam Missiones.

**D**VAE IN HUNGARIAM sequuntur missiones: ad ea opinor oppida, quæ superiore anno assignata Viennensi Collegio diximus, cum Prapositura Turocsiensi. Varallia & Scellia nominantur. Et Varallia quidem Societas, vix vlla reperit vestigia Catholicae pietatis. Confecti quidam senectute, repetitis temporibus, quasi per somnium, narrantes audiebantur consuetudines nonnullas, antiquas, vt vocabant, religionis: incedentes nempe supplicationes per abruptos montes, & arduos: certis in locis stationes fixas: congregationem fuisse Christi corporis: sodales certis diebus sacro affuisse: singu-

lis septimanis, accensis facibus, comitari solitos venerabile ferculū, cum iret per Cameterium: eademque carimonia, cum deferretur ad infirmos. Tantarum rerum, vix in paucis, memoria manebat. Ea nunc Nostri opera reuocantur. Et iam senes illi iterum sibi nati videntur, cum recentia componunt cum veteribus, eaque, quæ in extrema vident atate, cum ijs, quæ viderunt in prima, consentire recordantur. Igitur multorum fit conuersio: & quod ad rem magnopere pertinet, præcipue sacerdotum. Et latantur Catholici, fremantibus hæreticis, qui se Iesuitis impares esse profitentur. Ceterum oppidum cum tribus pagis recepit fidem: itaque Paschalibus ferijs ex horum numero mille cōfessi rite communicarunt. Vna est omnium opinio, si Societas, quod incipit, facere pergat, breui totum Comitatum ad Catholicos perducituram. Et iam, quod nostri instituti est, Scholæ auidissime expetuntur. Excurrit vnus sub Epiphaniarum festum in oppidum Toparchæ cuiusdam excellenti pietate, qui olim educatus inter conuictores Viennæ: uxorem hic habebat sterilem, nec satis firmam in Fide, cum vesceretur cibis illicitis. Persuadet mulieri Noster, vt si liberos velit, habeat hunc saltem honorem Virgini, vt a carnibus sabbato abstineat: diuinam illi opem sub tanto patrocinio assuturam: fidei respondit euentus. Vno partu geminos marcem & fceminam enixa: & agnoscens diuini beneficium vterque coniux, aureæ casulæ, calicisque donum miro artificio, Deipara, quæ colitur in nostro templo ex voto dedit.

AT SCCELLIAE Noſtrorum labor in eo  
 primum poſitus, vt Hungaricam linguam addiſce-  
 rent, cuius non adeo multos peritos habemus: iſque  
 ita proceſſit, vt vel publice pro concione audienti-  
 bus ſatiſfaciant. Eſt autem Scellienſium populus,  
 vt deprauatior in Fide, ita correctu difficili-  
 or: ad concionem tamen cupide confluunt, & iam hæreti-  
 cos auerſantur. Nobilis matrona, ſeſſa iam ætate,  
 cum viſta precibus filij veniſſet ad concionem, atque  
 incidiſſet in locum de veneratione Sanctorum, cre-  
 didit quod audiebat, propter quod etiam de pecca-  
 tis confeſſa eſt. Altei i octogenaria idem a Deo con-  
 ceſſum: quod ei iucundum adeo fuit, vt diuinum præ-  
 dicet munus, quo ſe in exitu vitæ reuocatam ab in-  
 ferorum limine proſitetur. Catholicus quidam ſe-  
 nex, quem inter ac Sacerdotem nullum erat com-  
 mercium linguæ, tanto ſtudio confeſſionis exarſit,  
 vt per interpretem exequeretur: reliqui, etſi du-  
 dum corroborati in hæreſi ( quod proximum eſt, vt  
 ab ea demoueantur ) vacillant. Sexaginta iam con-  
 feſſi. Hæreticorum conciuncula e templo ſublata.  
 Doctrina Chriſtiana traditur cum fructu: ea, ſi aliud  
 quicquam, in his locis maxime neceſſaria. Certe,  
 vno in pago reperti homines ita rudes, vt Crucis  
 ſignum formare non noſſent. Harum rerum ſane  
 in hoc regno ita percrebuit, vt vniuerſa Nobilitas  
 Collegium exoptet, vbi filij erudiantur. Nitrien-  
 ſium quidem Comitatus, qui olim nobis ita erat in-  
 ſenſus, vt vel Caſari pernegarent tributa ſolutu-  
 ros, niſi e regno eſſemus exacti, nunc, Deo iuuan-



te, ita permotus est, ut vir quidam nobilis asseuerarit, incolarum esse ter millia, qui omnes, si Collegium excitetur, suam operam studiose polliceantur. Impulit in hanc sententiam Nitrienses, Comitatum reliquorum in hoc regno consensus, qui omnes litteris ad eos missis præclarum testimonium de Societate dederunt. Misit ad eosdem litteras Cæsar, quibus nos amantissime commendabat: quibus, actum cum Nitriensibus, ut pagos illos, qui nobis subijciuntur, paganosque omnes a militum tuerentur incursum: minitantes etiam, nisi libenter id fieret, vi armisque prohibituos.

# G E R M A N I A S V P E R I O R.



**AGUNT** in Prouincia Superioris Germaniæ decem domicilijs de Societate ducenti quadraginta vnus: Ingolstadij vndequinquaginta: Monachij viginti octo: vno minus Dillingæ: Augustæ viginti: Oeniponti Lucernæque octoni deni: quaterni deni Hala, & Friburgi: Landspergæ triginta septem: septem Ratisbonæ. Quinque extincti morte: Viginti in Societatem recepti.

## COLLEGIVM INGOLSTADIENSE.

**I**NGOLSTADII duobus locis Nostri concionantur: in æde Sancti Mauritiij, & in aula gymnasij: in pago item, dominicis festisque diebus: eo videlicet fructu, qui e meliore multorum vita, & e numero pœnitentium colligi potest: a nostris enim Sacerdotibus quinquies mille ducentæ confessiones, e quibus, a prima ætate, septuagintâ, circiter exceptæ: eorundem opera quindecim Ecclesiæ restituti. Desperati aliquot, & destinata morte, melius sperare iussi: duo maxime, quorum alter ferro sibi hauserat latus, alter se præcipitauerat in Danubium, vnde a piscatoribus extractus. Doctrina Christiana, quæ quinque pagis traditur, felices successus

cessus habet, feliciores urbana Catechesis, ad quam publici ludorum magistri suo quisque ventitant cum grege: hoc ut libentius facilius, aucti stipendio. Spiritualibus exercitijs nouem praeculti: septem adsciti in Societatem: aliquorum tentata perseverantia illustrior fuit: vnius praesertim Franconis e veteri prosapia: affectabat hic iamdiu nostrum ordinem, verebatur, ne sui si admonerentur, moram voto afferrent: igitur clam fratre, quo conuictore & condiscipulo utebatur, Landspergam contendit: atque ut ne assequi frater eum posset, deuio itinere quem & persequentem fefellit: missi deinceps e patria viri duo nobiles, ipsius repetendi: accepti sunt, perhumaniter a Patre Rectore, dimissique re infecta: accessit in cumulum, aduentus tertij fratris natu maximi, qui etsi primo impetu grauis, exitu vanus apparuit.

# COLLEGIVM DILINGANVM.

**Q**VI IN VRBE pagisque cum Ecclesia reconciliati; fuere supra triginta. Hereticae superstitiosaeque scripta abiecta, & exusta: multi a spectris animique angoribus liberati: discordiae graues, & ex ijs, quae dicebantur inductae veneficijs, sedatae: simulacrum diuini agni in consecrata cera, amuletum pluribus fuit. Sodales Parthenij vetus retinent institutum pietatis. Sacris meditationibus informati plus viginti. Ex his initijs, aliqui ad varios Religiosorum ordines, sex ad nostrum progressi.

si. Etsi Religiosi etiam ad quinquaginta, qui in con-  
 victorum contubernio studiorum causa versantur,  
 iisdem commentationibus instructi. Solent hi, ubi  
 ad suos reuertuntur, & æstimatione, & usu, ma-  
 gno in pretio esse: hoc certe anno, ex alumnis nostræ  
 disciplinæ tres Abbates electi. Hæc fere domi. In  
 vicino virginum cænobio omnium confessionibus au-  
 res datæ: ad easdem fere menstruæ exhortationes  
 habitæ, cum fructu. Regulus quidam magnæ di-  
 gnationis, cum confessionis causa Nostros euocas-  
 set, cum multa in eius cohorte familiaque ad Dei  
 gloriam gesta, tum illud, quod concubinæ Sacerdo-  
 tum ex tota eius ditione exactæ. Reditum Eluan-  
 gam: itum Gamundiam, Gunsburgumque: nomina  
 sunt oppidorum: in quibus omnibus, ut in pagis  
 etiam multis, ac Monasterijs, utiliter, & strenue la-  
 boratum. Accitus etiam vnus a viro principe, ad  
 ciuitatem Luthero corruptam, Erat ipse Catholi-  
 cus cum vxore Lutherana: quæ & cupiebat com-  
 mittere Nostrum cum doctore delirantium: Super-  
 intendentem appellant: a quo cum actretatum cer-  
 tamen, alius Prædicans (& hoc est nomen officij)  
 verbis obtereret, & ipse quoque pronocatus esset,  
 excusato morbo, scriptisque capiibus controuersis,  
 risu magis, quam oratione eijciendis, prodidit vani-  
 tatem, & inscitiam suam.

142    P R O V I N C I A  
COLLEGIVM MONACHIENSE  
Et Ratisbonense.

**T**RIBVS diuersis in locis conciones a No-  
stris habentur diebus festis : tribusque item  
in alijs fructuose explicatur Catechismus : qui pec-  
catorum sarcinam apud nos deposuerunt , sexdecim  
millia numerantur : ea replicarunt vel a prima pue-  
ritia , quadringenti triginta tres : atque ex his alij  
obscænis visis , terroribus alij nullam quietem animo  
dantibus , admonentibus alij somnijs , ad hoc fa-  
ciendum adducti . Quattuor virgines in nostro tem-  
plo confessionem obire solitæ suscepto Sanctæ Clara  
instituto se Deo manciparunt : agris & afflictis ho-  
minibus cura diligens impensa : mirabilem consecra-  
tæ ceræ opem sensere permulti : manus violentæ a  
quorundam ceruicibus abstractæ : de demonum præ-  
stigijs edocti nonnulli : operæ erit inserere vnius  
exemplum . Vir erat pietati in speciem deditus huic  
nocte quadam oranti offert se ignota diaboli effigies ,  
difficilem præcipit longamque formulam precatio-  
num Deo acceptissimam : vt singulis scilicet nocti-  
bus , nudato corpore , genuflexus , passisque mani-  
bus , psalterium totum exequeretur : facienti impe-  
rata , defatigatione credo , & precum longitudine ,  
subijt dubitatio , num laterent insidiæ : refert se ea-  
dem imago , præceptum firmat futuro miraculo : po-  
ne ouum , inquit , in ara diebus sabbati , postridie  
auro radiabit : sed cum ille , an gloriam querens , an  
consilium , rem cum alijs communicasset , persuasum  
est

est homini, ut ad nos referret: a quibus cum didicisset inimici fraudes, purgassetque conscientiam, omni molestia liberatur. Eorundemque opera simultates variae sublatae: male acquisita bene redita: mulierculæ quædam ad honestiorem vitam reductæ: dissidentes a fidelium cætu septuagintaquatuor reconciliati: libelli hæretici magiciq. combusti. De scholis hoc dici potest, siue auditorum spectes numerum, siue nobilitatem, siue diligentiam, siue denique pietatem, florentiores numquam antea fuisse. Excellunt conuictores e Collegio Sancti Michaelis, & qui e Sodalitio Virginis. Et huic quidem Sodalitio, quo sollemnis Eucharistiæ supplicatio conspiciatur illustriore apparatu, Gulielmus Dux serenissimus, vexilla duo, cū sacra veste auro argentoque intertexta magno pretio comparauit: huius porro Ducis tam magna erga nos beneuolentia, ut ampliora beneficia quotidie existant. Sileantur itiones crebrae in Collegium, templumque: nuper, ut liberaret suspicionem Serenissimam matrem, qua eam asperserant fidei sermones hominum maleuolorum, quas litteras dedit? quanta significatione voluntatis? Has tu, inquit, litteras, mater optima, illis obtrudas licet, qui audebunt Iesuitis maledicere: conuicescent. Habuit fidem filio mater, & placationis argumentum in usum sacrae suppellectilis ducentos florenos Collegio misit. Illustrissimus etiam Princeps Ferdinandus Ducis Gulielmi frater, præter ea, quæ confert in sacellum, quod extruitur in templo, suam liberalitatem sumptuosius muneribus ostendit. Redeo ad Sodalitium Virgi.

*Virginis. Sodalis quidam; cum in se inquirendi, quid cogitasset, dixisset, egisset, omisisset, adhibito studio recognosceret, obsecra- etque reginam Angelorum, ut omnia sibi fas esset peccata consiteri, ne vno quidem prætermisso: ecce tibi, e sublimi, ante faciem orantis pagella decidit, candore eximio, quæ minutis quidem litterulis, sed elaboratis, quoddam illius peccatum expresserant: hoc addito, si illud aperiret pieque Rosarium recitaret in honorem Deiparæ, bene secum actum iri: auxit miraculum, quod cum sodalis alter eius æqualis, parens, parochus aliique conarentur, numquam chirographum illud intelligere potuerunt.*

*IAM DE RATISBONENSI Collegio (ita enim dicetur in posterum, quæ hætenus missio Monachiensis) pauca reponantur. Eorum, qui Sacerdotem nostrum in templo maximo audiunt concionantem, numerus non exiguus: fructus spe, quam re ingentior. Obstat enim multis vitiosa verecundia. Et est hæreticus, qui affirmet intra triennium magnam hic morum mutationem secuturam: adhuc quidem, hæreseos vinculo sex, peccatorum, sub Pascha, soluti amplius ducenti. Apud illustrissimum Lantgraviū, qui nostros vocarat hebdomada sancta, ad Catholicam religionem redire plus minus ducenti quinquaginta. Ceterum, cum filij tres Gulielmi Ducis, Philippus Episcopus Ratisbonensis, Ferdinandus, & Carolus Salisburgum mitterentur, eis, rogatu parentis, comites additi e Nostri duo, & quasi rectores pueritia dati: etsi*  
post



post paulo agrotantibus illis omnibus, Carolus non dum octauum egressus annum immatura morte decessit. Hic dum Nostri versantur, consilia quoque curasque in ciuium salutem verterunt: confessos audierunt quadringentos quinquaginta: e quibus viri illustres amplissima dignitate complusculi: ex eodemque numero, omnis æui peccata commemorarunt septem & triginta. Mulier, cum tertium iam infelicitè peperisset, idemque timeret vtero quem ferebat, vocem audisse dicitur confessionem iubentis: ei cum obedisset, peperit sine noxa: denique ex errore Fidei reducti vigintiquattuor.

## COLLEGIVM AVGVSTANVM.

CONCIONES, quæ duobus in vrbe templis haberi solitæ, vtilissimæ fuerunt, & tum populo tum Episcopo ipsi gratissimæ: quamquam Episcopi pluribus etiam in rebus enituit erga nos beneuolentia: is enim, vt omittam dies ceteros nobis sollemnes, kalendis Ianuarijs, quo die anniuersaria apud nos celebritas causa indulgentiæ, templum nostrum inuisit, ibique sacrificium Deo obtulit, dein Collegium, vbi, exceptus oratione Latina, ad quam ipse diserte respondit, lautum Nostrijs epulum dedit: tum vero concioni pomeridiana voluit interesse: postquam Sacerdoti descendenti e suggestu dexteram porrexit indicem perceptæ voluptatis: quæ omnia magno nobis ornamento, & rei Catholicæ vsui fuere: extincti enim sermunculi hominum, qui nescio quæ

de Episcopo & Iesuitis falso credita vaticinabantur: sic vt aperte nunc prædicent antistitem amplecti Fidem Iesuitarum: quod & accipienti, quæ eius est humanitas & religio, iucundissimum fuit. Ceterum per Nostros ad Ecclesiæ sinum se receperunt tres & quadraginta: in his vnus euangelici verbi minister, cuius, vt inter suos, magna fama eruditionis: peccata, eluerunt salutari Sacramento, ne quid dicam de alijs anni temporibus, circa Paschales ferias, quinquaginta sex præter mille & ducentos. In Monte Sancto, nonaginta: Sacri agni cerei vis, auertendis incantationibus, monstrosisque imaginibus, & curis animo infestis, crebro animaduersa: iniqui contractus correcti: pecunia reddita iniuste possessa: e duorum Dynastarum ditionibus Sacerdotum pellices expulsæ: excitati ritus p̃j, qui modo sepulti: inuenta matrona, quæ nouem ipsos dies interiore cilicio, ieiunio, flagellisque in corpus suum desauit, vt Deus miseretur cuiusdam animæ, quam flagitiorum scditas faciebat miserrimam: illustres femina tres ita per totam Quadragesimam se pietati dedit, vt quotidie exposita particula historiæ de Christi Domini cruciatu, in cuius meditatione semihora ponebatur, suam quæque familiam ad eandem formauerint disciplinam. Suscepta etiam sollemnis peregrinatio ad Montem Sanctum notabili celebritate, ac frequentia: prælatis suis cuique ordini insignibus: magna cauillatorum, qui se ad spectandum effuderant, offensa. Vinctis Nostrorum industria sæpenumero salutaris fuit. Infamis erat lacro quæ

in quaestione de triginta septem homicidijs confessus, addiderat templorum direptioni adiuuasse sacrilegas manus, nec absuisse miracula: cum iniraturus noctu ædem, vndique volitantium strepitu saxorum arceretur: & alio tempore, sacrosanctam Eucharistiam surrepturus, ob flammam e calo, tabernaculum iuxta, ad mirantis pedes delapsam, tactu abstinerit. captus hic tandem Augustæ, cum vxore malefactorum conscia & particeps, cum apud Sacerdotem nostrum vterque esset confessus, mirum quam acerba tulerit, cum verba tractus flammanti forcipe peruelleretur, & quam forti animo: vir inter ferri morsus dolorumque, intendens cogitationem in cruciatus, qui sibi apud inferos debiti fuissent, identidem repetebat, eos, quibus tunc torquebatur, contemnendas omnino, ac perleues videri: Sacerdotem intercedere ne a se discederet, orabat: ad extremum, vxore extincta aquis, ipse in rotam ætæ, eiusque radijs districtus (tormenti genere horrendo) per tres horas, tanta constantia, vt spectantibus in misericordiam versis, lacerato tandem corpore, resti ad rotam suspensus, animam efflaret. Hæc inter xenodochium minime neglectum: excepta etiam in loco lurido confessio multorum. Sancte pieque decessit matrona perillustis, & de nobis optime merita, cui ante obitum, vt ipsa retulit, visa imago Mariæ Virginis (hanc viuens colebat enixe.) ad feliciorē vitam inuitantis. De scholis hæc pauca: auditores nec pauci, & plerique nobiles: eorum exercitationes accuratæ, & frequentes: & ap-

paret magistrorum labor: piorum liberalitas erga nos magna, qua & ære alieno liberati sumus, & auctum sacrum instrumentum, Collegioque fundus adiunctus: is fuit ad vsum necessarius: cum enim interdum pestilitatis metu, motuque rerum, fuerit Nostris migrandum vrbe, videbatur prospiciendus suburbanus locus, in quem tuto concederent: itaque Fribergæ (abest Augusta mille passibus) parte fundi a Fuggeris donata, parte coempta, mille etiam aureis aliunde collatis, templum magnifico apparatu primo lapide in fundamenta coniecto, edificari cæpit mense Maio, sextoque idus Septembris, beata Virgini nascenti dicatum.

## COLLEGIUM OENIPONTANVM.

**M**ILLE sexcenti confessi, de vniuersa vita tercentum triginta quattuor. Ter quadragenarum horarum obita comprecatio, mira dispositione ac pietate accedentium: doctrinæ Christianæ explicatio non ad vsum modo, sed etiam ad speciem insignis: excursio in pagos propinquos tum vtilitatæ seruijt paganorum, tum ornatui templorum: veste videlicet sacra vel aucta, vel refecta: vndecim abiurarunt hæresim, multo plures in Fide roborati: libri hæretici in flammæ coniecti. Sacrarum Cænobium virginum, aliquot milliaribus Oeniponto distans, ipsarum rogatu a Nostris aditum, eaque adiuta, vt sanctius ac reuerentius numini famulentur. Eodem tempore multorum auditæ confessiones, & fere

fere vitæ vniuersæ. Discipulorum religio viruit hoc etiam anno, & quodam flore virtutis exarsit. Vnus ex ijs, cum esset morti proximus, orabat patrem, quem transuersum agebat illecebra peccandi, daret hoc sibi nihil amplius petituro, corrigeret mores: non futuram, si cum hac spe decessisset, mortem acerbam: hoc cum pollicitus esset pater, tanta filium voluptate affecit, vt paucis post diebus, quasi iam pater parentis sui, quem pietati genuerat, summa cum voluptate moreretur. Alteri ita carus amor pudicitie, vt ne libidinum vapore afflaretur, gliscentem illum, argente hieme, fontana aqua perfrigida, magnus Francisci æmulator, extinxerit. Serenissimi Archiducis hoc etiam anno erga nos eluxit beneuolentia: æs nempe alienum nostrum dissoluit: domus pauperum scholasticorum ab eo superiore anno coempta, hoc anno piorum hominum ope excitata a fundamentis.

## HALENSE COLLEGIVM.

**T**AM FREQUENTI multarum rerum occurſu turbantur Halæ studia Noſtrorum, vt exiguitatem fructuum voluntatis magnitudo defendat. Et tamen quaſita occasio laborandi: con- ciones habitæ in hoſpitali domo, alijsque in locis, & in templo noſtro: vbi & elementa Fidei explicata non omnino inutiliter. Scholæ nonnihil auctæ: ad- iuuit Sanctæ Catherinæ conuictorum domus, Sere- niſſimæ Reginæ pietatis argumentum: in qua nunc,

ut his initijs, viginti sex adolescentes, plerique nobiles, omnes ingenui ac liberaliter educati: praest regimini Sacerdos externus, a quo adhibentur Nostri in consilium, ex praescripto Reginae. Iaciebantur, a nescio quo, inter concionandum ad populum occulta semina corruptae doctrinae: admonitus primum uti desisteret ab incepto, cum nihilo minus pertenderet, & e suggestu queribundus tantum nominantem digitum intenderet in Nostros, ne prauitas docentis in perniciem erumperet audientium, Archiducis Ferdinandi iussu solum vertit. Ceterum Pater Christophorus Zieglerius excessit ex vita: quem anno ante quaedam ferunt diligenter conscripsisse, ut ea sibi in extremo certamine suggererentur.

## COLLEGIVM LVCERNENSE.

**A**D RATIONEM nostri Patris Ignatii duodecim exerciti: ex his tres ordinis senatorij: quorum primarij Duces duo aduersus haeticos Gallicae expeditionis, presbyteri sex, diaconi duo, quorum aliqui varias Religiosorum familias ingressi. Concionum fructum ex eo aduerteris, quod panem calistem toto anno acceperunt in aede nostra supra decem millia centum sexaginta octo: ctsi in festo Paschae sua quisque in Paroecia de more communicauit: peccata quae vniquam se admittere meminuerant, exposuerunt trecenti vndequadraginta: miseri quidam homines quos veterator ad desperationem abiecerat, ut etiam de extremis secum agitant,

tarent, ad veniæ spem ac vitæ melioris erecti: sic  
 vñ Nostorum industria videatur afflictorum esse  
 perfugium: hæc fama cum impleffet aures cuiusdam  
 virginum antistitæ, extra Helvetiæ fines, tridui iti-  
 nere ad Nostros accessit, a quibus accepit, quæ vti-  
 lia sibi virginumque institutioni viderentur. Lites  
 direptæ: superstitiones sublata: nota magica ar-  
 tis ambusta: pecunia reddita, quæ non retinebatur  
 iusto titulo: a turpi pellicatu aliquot abstractæ: e Fi-  
 dei naufragio erepti triginta: multo plures sediti  
 fluctuantes: adiuti aliquot in patibulo, in lectuloque  
 multi morientes: hoc in genere illud memorandum,  
 quod adolescens vnus e nostris auditoribus, ab ipsa  
 statim confessione, leuatus morbo, qui vitam adi-  
 mebat, mirante muliere quæ assidebat egroto, in-  
 columis surrexit. Octavius Parauicius Alexan-  
 drinus Episcopus idemque Nuntius Apostolicus ma-  
 iora erga nos præbet in dies humanitatis argumen-  
 ta, nec minora erga Deum pietatis. Feria quinta  
 maioris hebdomadæ simul sacris operatus est in tem-  
 plo nostro, tredecim conquisitis hominibus e face  
 plebis pedes lauit, eosdemque, non nisi exceptos  
 conuiuio, donatosque pecunia, dimisit. Secunda  
 Dominica Quadragesimæ ab illo ipso iacta fundamen-  
 ta nouo templo extruendo: magna gratulatione læ-  
 titiæque ciuitatis, & commendatione Fundatoris,  
 e Pbifferorum familia, cuius laudes carmine cele-  
 brata: in precibus ad Deum fundendis magnus ci-  
 uium ardor: faciem præfert vnus Prætorum com-  
 memorabili exemplo. Acciti a Curionibus Nostri



in vicinos pagos ad habendas conciones confession-  
 nesque audiendas: in quodam Monasterio virginum  
 disciplina restituta: in alio quodam pago inclyti no-  
 minis, Sancti Marcelli Pontificis optimi Marty-  
 risque fortissimi casula miraculorum effectrix, indi-  
 ta a Sacerdote nostro, magno populorum concursu,  
 in arcam ligneam inauratam, quam Nuntius Apo-  
 stolicus, ut maior eius esset veneratio, curauit fa-  
 ciendam. Badam etiam vnus profectus, in itinere  
 flexit ad virginum cœnobium rogante Præposito: au-  
 diit illas, & alios præterea quadraginta duos confi-  
 tentes: duos ad Ecclesiam adiunxit. Basile pecca-  
 torum nexibus absoluti centum octoginta. Ex alijs  
 excursionibus similes fructus, integris plerumque  
 Pagis sese effundentibus ad Nostros excipiendum.  
 Sed eminet inter omnes, profectio ad oppidum non  
 procul vrbe Basilea, nomine Lauffen. Est ipsum,  
 iam inde ab eo tempore quo Basilea se ab Romana  
 Ecclesia indignissime auellit, hæretici corruptum:  
 et si cum aliquot pagis mansit in ditione Episcopi:  
 hic, ipso rogante Basileensi Episcopo, Nuntioque  
 Apostolico perutiliter Nostri versantur. Et iam eo  
 in oppido sexque pagis finitimis magnam consec-  
 tam accepimus mutationem animorum: restituta  
 templa, instauratas aras, reip̃ diuinam tam longo  
 interuallo iterum celebrari captam. Sed harum re-  
 rum exploratam integramque perscriptionem, quan-  
 do nunc maxime opus feruet, conuenit ad alterius  
 anni litteras referuari.

## COLLEGIVM FRIBVRGENSE.

**Q**UANDO propria pręgrauant, communię prętermittantur. E Geldria vnus longissimo itinere ad nos venit, vt liberaretur stimulis conscientię: res successit ex sententia. Hoc mirabile. Mulier non ita pridem per Nostros e turpitudinis & hęreseos cano emersa, cum sola exisset ex vrbe, a quodam, quem effugere non potuit vestigijs insistentem, sollicitabatur ad flagitium: exorat illa tantulum spatij, dum e silua proxima referat gradum: huc se męsta coniicit, flexisque genibus suspiciens calum, non sine lacrimis Deum precatur, beatamque Virginem, vt ne se deserat: tum, quasi sensisset auditas preces, alacriore animo egreditur: & sequitur quidem impudicus, sed lento passu, altoque silentio, similis pauenti: vbi tandem mulier se in tutum perduxit, victrix exclamat. At, ille ego te, inquit, non timui, sed adolescentem, qui tecum in via colloquebatur: persuasit illa sibi obiectam homini speciem custodis Angeli, quem cultum antea, in posterum statuit colere diligentius. Sequitur aliud in alio genere. Bernę virgo erat Catholicis parentibus: huic Musculus non ignobilis Calvinista hęresim suadere conatus est: frustra: nunquam enim Sabbatis destitit a percurrendo Rosario, vt haberet illum honorem Deiparę Virgini: hoc dum facit aliquando, perturbari, anzi animo, ac diuexari cępit: igitur postero die, conducto equo, Friburgum iter intendit: nec caruit insidiante: iter illam excus-

sam

sam equo cacodemon afflixit ad terram, exhortans ad reditum: illa tenax propositi ire pergit: dum tandem superatis hoste viaque ad Nostros se sistit cum Deo reconciliandam. Scholasticorum, qui habentur quattuor classibus, tantus fulgor pietatis est, ut cluceat Catholicis exemplo, vrat hæreticos invidia. Et cupiunt quidem corui nidum figere in loco non adeo remoto, ubi pullos excludant: sed indices malorum ouorum sobolem verentur: & iam, frementibus licet aduersarijs, augescunt schola, tectumque impositum nouo Collegio, quod superiore anno institutum.

## DOMVS PROBATIONIS

Landspergæ.

**Q**VI HIC AD Societatem formantur, nihil sibi relinquunt, quantum quidem homini licet, de priuatis affectibus: parentum etiam, si quidem aduersetur honori diuino, amore neglecto. Vnus ad patrem qui cum missis literis nuntijsque abducere conabatur, ita rescripsit, ut ei vel necessitatem tacendi imposuerit, vel iterum scribendi perrecundiam. Alterius pater, ad filium grauem & piam composuit epistolam, cuius, quadam in parte, sententia in hunc modum fuit. Nimium quantum debes, fili optime, bonorum auctori Deo, qui te, a puero, equorum exercitationem atque armorum speciem secularis militie vehementius quam cau-

rius

tius appetentem vocauit ad sacram militiam suam;  
 in qua gloriam consequi possis sine fine mansuram:  
 Et inclaruisses fortasse militari fama in vita priore;  
 sed, quam breue ad tempus, quanto periculo quaerentis,  
 quanto possidentis metu? Ego quidem mirari satis non possum illorum amentiam; qui virere sinunt in cordibus suis amorem rerum humanarum;  
 qui exaruerit in semetipso. Optimam tu partem optasti, cum disruptis vinculis euolasti ad Christi vexillum: quin & primo aditu durus videbitur inexperto labor, & occurreret cogitanti longum tempus,  
 ad quod iaculaberis vitam: sed nec difficilis erit ille, quem cum latitia feres: nec illud longum, quo peremnitatis atquiritur: simulque aderit tibi, qui dixit: Iugum meum suauis est, & onus meum leue: facietque ut computrescat iugum a facie olei, & onus tecum ipse portabit. Certè, istius, quam quidam seruitutem appellant, maior erit iucunditas, quam illius cuiusdam, quæ percipitur a cunctis, falso nomine libertatis. Quod si prosperum tibi in ista nauigatione cursum caelestis aura indulserit; unum tamen omni prouisione mentis scopulum deuota: ne plus iusto placeas tibi: ad hoc saxum nonnulli allisu puppi naufragium fecerunt in portu. Recte Seneca: Facile contemnit omnia, qui ad contemptum sui peruenit. Ex his paucis qualis reliqua fuerit Epistola, coniectare licet. Ceterum duo visa oblata sunt. Vni Nouitiorum, æque memoranda, dormienti, & vigili. Dormienti, cum eum importunus maior oppressisset, Christus apparuit;

duas coronas e sentibus, & alteram quidem, horridioribus ferens: quam is, qui hoc videbat, data optione cum elegisset, narrauit se postmodum sermone Domini visoque admirabiliter recreatum: at contra vigilanti, cum in hortum penitioiorem secessisset, malus demon imaginem referens Patris Ministri: a quo atrociter increpitus ac perterritus est: sed cum eodem pane momento temporis attollens oculos aspexisset Patrem Ministrum e specula prospectantem in hortum, intelligens diaboli fallacias animum erexit. Sed & tyrones ipsi, suscipiunt partes, si quando hac eis cura demandatur, tradendi urbanis pueris paganisque initiamenta Christiana: nec negligitur munus confessionis: pacificationis, multorum ad Christum conuersionis, & ciues agnoscunt laborem, & adiuuant tollata ope laborantes. Inuentus vnus ceterorum dissimilis, qui latrocinio gaudebat. Hic enim, vt est confessus in tormentis, nocte illa, quæ consecuta est primum diem Pentecostes, per fenestram demittens se in eadem nostram, adortus spoliare geminas aras ab utroque latere templi, crucemque e crystallo affabre factam, in qua Christi imago ex argento inaurato, itemque candelabrum, ex eadem materia, cruci respondens corripere ausus, in saccum coniecit, quem habebat cingulo appensum: cum venisset ad sacrum pegma Eucharistiæ asseruandæ, quod moliebatur, tantus eum terror inuasit, vt horam amplius horrore defixus steterit in eodem vestigio: tandem recepto utcumque animo, caepit fugam,

etiam

etiam tunc attonitus, eorum quæ relinqueret, eorum quæ secum anferret, ignarus, redit domum nocte intempesta, incertum an magis gaudens præda, an mærens conscientia : qua impulsus, ut ne agnoscerentur res furtivæ, crucem confringere aggressus sacrilega manu, quam statim cruentatam vidit sine vestigio vulneris. Hæc ille, ut dixi, in quæstionibus. At nos pleraque recuperavimus Dei beneficio, & comminutæ Crucis partes  
 priorum liberalitate in  
 integrum restituta.

# P R O V I N C I A R H E N A N A.



**C**APITA in vniuersum censentur vndetriginta super trecenta: vnus tantum imminuit numerum: auxere septem & viginti.

## COLLEGIVM COLONIENSE.

**N**E EXCURRERENT Nostrilongius ( triginta septem Colonia versantur ) obstitērunt arma circumsonantia: eo magis eniuit virtus collecta. Femine fluxa fidei, & proiecta pudicitiae, non paucae siue acta furijs, siue angore conscientiae, per ferrum, restem, flumen vita se eijcere cogitantes, ad meliorem mentem reductae: pacificati permulti: diuinis commentationibus perpoliti non pauci: multo plures antea acta vitae criminibus expiati: vt in rebus turbidis, caelestis irae placamina instituta, adiunxit pios conatus Octavius Episcopus Calatinus Nuntius Apostolicus & opera simul & exemplo: Sacrificauit saepe in nostro templo, nec Eucharistiae modo Sacramentum, sed Confirmationis etiam pluribus impertijt: ad decem locos, quibus explicabatur Catechesis, accessit Paroecia beati Petri, & gymnasium sanctorum Apostolorum, vt tota ferme vrbs addiscentium Christianae legis iñitia, & cantantium vocibus sonet: & ea mune-



rts functio sit iam omnibus gratissima : etsi tam lati  
 successus dolorem non dissimulauit diabolus : ipse  
 quoque suos excitauit pseudocatechistas , vt libros  
 & venenum spargerent in vulgus . Sed mendacium ,  
 licet subita capiat incrementa , non diu valet : a-  
 gnitum malum Nostorum industria , iuxtaque de-  
 pulsum est : cailium praua docentium Senatusconsul-  
 to sancitum . Visitati interim qui erant in carcere :  
 non nemo e vinculis noxaeque exemptus : nec defuit  
 vir insignis virtute bellica , qui ab hæreticis armis  
 dolisque ad Catholicam veritatem militiamque se  
 conuertit : pauperes non neglecti : qui inopia pressi ,  
 morboque , in compitis iacebant , ad valetudinaria  
 adducti , refectique : adiuti eodem studio agroti , &  
 domi suæ morientes : mulier vna clara magis quam  
 proba , cuius causa nobiles inter familias duas gra-  
 ue odium & vetus , cum ex dolore corporis mor-  
 tem timeret , Sacerdotem accersit , solatiij quaren-  
 di magis , quam auxiliij : sed repetitus sermo in cu-  
 ram & cupidinem auxiliij adduxit : igitur consuluit  
 animæ saluti confessione , testamento : quo magnam  
 vim pecuniæ legauit pauperibus : pacatisque familijs  
 in pace quieuit . Matrona quadam ex earum numero  
 qua apud Nostros pietati seruiunt , hæreticum ho-  
 minem cum audisset loquentem cum viro , & iactan-  
 tem in Calices probra pati non posset , sapienter ad-  
 monuit , parceret maledictis , alioqui per iugulum  
 rediturus : contempta tum quidem est , sed nocte se-  
 quenti cognosci potuit vera dixisse : correpta illius  
 proles fontico morbo : remedium a multis frustra  
 queri-

quæritur: it hæretici vxor ad Catholicam illam matronam: hæc suadet vt puero salutem a beato Cornelio exposcat: cuius potestas in simili morbo sapius spectata: quæ est hominum peruicacia, ne sic quidem non ridentur dicta salutaria: eo magis puer luerè pergit perfidiam patientum: dum tandem vtuntur dato consilio: & voti compotes, reddita filio salute corporis, ipsi etiam salutem animi, Catholicam amplexi religionem cum omni familia, receperunt: præter hos vnus & viginti: Nostrorum quidem opera: sed in huius Societatem muneris intulit se Parthenium Sodalitium: adolescentes in eo ducenti quinquaginta: e quibus nouem in varijs Religiosorum ordinibus quattuor in nostro, se Deo consecrarunt: tantaque sunt omnes pietate, vt consolentur siue difficultatem temporum, siue paucitatem auditorum. Ceterum cognita est diuina in Nostros providentia: quando in summa annonæ caritate, Rhe-  
no videlicet in seffo, clausisque subsidijs, piorum liberalitate, suppeditauit frumentum. Sed & Serenissimi Archiepiscopi munificentia auxit rem familiarem, & vectigal domesticum.

## COMMORATIO CASTRENSIS.

**B**ONNA vrbs est ad ripam Rheni, effuso olim fortissimorum militum, & sanctissimorum Christi martyrum Thebaorum sanguine, nuper etiam, non ita multis ab hinc annis, accepta clade insignis, neque tamen vt sibi caueret satis edocta.

Videli-

Videlicet ineunte anno, cum præsidium militum dimisisset fiducia pacis, latrones excitauit occasione intentos, ut ad prædam inhiarent: nec desuere in vrbe participes sceleris & conscij. Igitur Decembri mense, qua Rhenus præterfluit, vi pulueris tormentarij, procumbente porta, sub tertiam vigiliam noctis, magno impetu terroreque iniecto ciuibus, vrbe potiuntur: erat in capta parte vrbis Sacerdos noster procurator rei Catholicæ: is cum exaudiret clamorem hostium, & sonitum flammæ, ignarus facti domi se continebat, opperientis mortem, ad eamque se comparans effusis precibus: hac internuntiatur urbem ab hostibus teneri: tum vero a desperatione anima sumpto, crepidatus, uti erat, festinatione, seu inopia consilij, domo se proripit, defensusque tenebris, cum vasta omnia & sola vidisset, reperto aditu quem hostes moliti fuerant, via, ut erat tempus anni, deterrima, euadit: cum interea a victoribus tota vrbe volitantibus nulli nec crudelitati nec auaritiæ parceretur. Et erat iam Bonnia, ad prædandum subinde in vicina loca erumpentium, arx sceleratorum, castellum latrocinij, prædæ receptaculum: nec ita sunt diu dominati. Etenim præsul Agrippinensium subnixus Catholico rege exercitum confecit, illustrissimoque principi Carolo Croio Arsebitani Ducis filio & regis Legato commendauit: ipse autem cum Vere appetente sicarios obsidere omnique comœatu prohibere insitisset, mira arte belli eo rem deduxit, ut ad deditionem compulerit. Autumno adulto, Ceterum

vigente obsidione ad militares animos in officio continendos, accersire placuit Sacerdotem vnum e Nostreis, non irritum consilio: peccata impedita, iurisiurandi consuetudo, & lasciuiæ sublata, impura mulierculæ exactæ, aut iusto matrimonio locatæ, ægroti, sauci, capitali supplicio afficiendi pro viribus adiuti, tribunorum iræ sedatæ, pacatque nonnulli: ut vnius industria magnum militibus fere omnibus momentum attulerit ad salutem animarum.

### COLLEGIVM TREVIRENSE.

**T**REVIRENSE Collegium, ut alias memorauimus, bipertitum est: veteranos habet duodetriginta, tyrones viginti sex: cum vicina circum turbarent loca, pestilentia & armorum metu, discipulorum numerus auctus, nongenti amplius numerantur, magna omnes ad pietatem indole præstantes: ex his multi in varias Religiosorum familias, duo in nostram post confectum Philosophiæ curriculum adscripti. Mirus fructus e concionibus, & e reliquis muneribus nostræ Societatis. In cœnobij. sacrarum Virginum effectum est aliquid ad Dei gloriam, actumque, magno quamquam labore, ut res in commune conferrent, quas veluti proprias quæque habebant. Viri complures diuinis meditationibus exerciti: prauarum opinionum stirpes ex aliquorum animis euulsæ: ex his vnus Melanchthoni operam dederat per triennium, venit in certamen, & victus est a Nostro, periturus utique, nisi  
victus

victus fuisset: multi præterea dubia fide nutantes, ad constantiam erecti. Et sicut in corporibus agris nihil quod nociturum est medici relinquunt, sic per Nostros quicquid librorum obstabat Catholica religioni exustum. Mitto libidines vltionum repressas, restitutam concordiam, vel post homicidium, eruditos curiones ad sua munera rectius obeunda, confirmatas nuptias vacillantes, maledicorum linguas in Deum & Calites coercitas, ad integritatem vitæ & sanctimoniam non paucos institutos. Magna in hac vrbe copia sagarum, quibus, vt morigerentur demoni amasio, quidlibet agere & pati non turpe videtur: hæc fruges excantare, fascinare pecora, insanabiles morbos immittere mortalibus creduntur: vnum tantum aduersus earum carmina remedium, piacularia Catholicorum: quod, hoc quoque anno, vt & alias sæpe, probatum est. Treuerensis quidam magna vir auctoritate, & opulentia, cum vna ex his mulieribus, vt est singulari humanitate in omnes, cum imprudens colloquitur, contaminato illius spiritu ita afflatus est, vt, assidua verminatione cerebri æstuantis, doloris magnitudinem capere non posset, etiam deformiter ore distorto: aditur a Nostri officij causa, admonetur remedij salutaris a Deo exposcendi, paret monentiibus, redditurque integritas vultui, & corpori salus. Idem cum pro magnitudine potestatis exercet pænas talium anicularum, earum dolis appetitus est, Offerebat illi mulier rustica nescio quid ouorum, excipit pileo pedisequus, quem cum, illis repositis,

tis, imponit capiti, usque adeo vexari cepit dolore, ut panem desiperet: confugit nescius quid ageret in adem sacram, incensum caput immergit in vas promptum aquæ lustralis, conualescit: maga comprehensa in questione dixit ova sic fuisse venenata, ut gustantibus interitum, extuberationem tangentibus essent paritura. Mulier egens cum deploraret apud alteram, quam incommodo marito uteretur, cepit ab ea panem exporrectum e sporta: eo vesci incipientem bono animo altera esse iubet, nempe morigerum virum affuturum: & fortasse incubum intelligebat: vix abierat venefica, cum misera offundi caligine, & desperatione agi, ut aliud nihil, nisi vitæ exitum cogitaret: accurrit ad Nostros, ce-reum agnum eorum admonitu adalligat collo, alijsq. vitur remedijs ecclesiasticis, paucis post diebus, omni sollicitudine liberatur: eadem ratio alterius, quæ per tres annos damoni denupserat, exoluenda fuit. Sed & puer iusculum sorbens, cum datus ei esset a muliere panis, neque, a matre licet admonitus, impressisset signum Crucis antequam deuoreret, tantula moræ impatiens, incredibili cruciatu conuellitur: miserata mater filij vicem ad nos aduolat, & solius aquæ salutaris poculo dolorem illius fugat: puer alter annorum octo cum octies ad eam officinam corruptelarum omnis generis birco peruectus esset, omnium flagitiorum quæ ibi perpetrarentur enarrator, exorcisatus a Nostreis, extraque omne periculum positus est: fructus etiam non parvus fuit in mulieribus damnatis veneficijs, antequam deduc-

dedacerentur ad rogum, ad pœnitentiam adducendis. Domicilia non pauca, tum priuata, tum publica, liberata demonum spectris, & terriculis nocturnis: excursum in oppidulum ad ripam Mosellæ, sub ferias Paschæ: hæresim abiecerunt homines sexaginta: vir monopolium frumentarium exercens erat causa magnæ caritatis: huic Sacerdos auctor fuit, vt produceret quod habebat venale: laxata est annona, & ipse duplicem vtilitatem cepit diuino consilio: nam & auctus opibus aduentitijs, & eius rura intacta militibus, quo tempore cetera fere omnia eorum direptioni exponebantur.

## COLLEGIVM MOGVNTINVM.

**H**IC E NOSTRIS versati tres & quinquaginta, & cum plurimi, sexaginta, incolumi omnes valetudine. Magna consitentium multitudo, sed Iubilei tempore multis ex omni vicinia affluentibus, omnino tanta, quantam his triginta annis Nostri non meminerunt. Id eo mirandum magis, quod, haud procul imminente hoste, omnia armis strebebant. Sub idem tempus in finitimos pagos vtiliter excursum: magnum ad pietatem incitamentum asserunt discipuli, in templo, cum sit res diuina, consecratam hostiam flexis genibus venerantes, præter præsentem morem & consuetudinem regionis. respexerunt Catholicam veritatem homines duo & viginti: his aggregarunt se mulieres duæ, ab vltima vsque Germania, id vt præstarent, vltro



profecta : sed & virgo agrotata, cum sanitate mentis corporis quoque recepit : transfuga reuertit ad ordinem quem deseruerat. cum in concione hortaretur Noster, vt conferretur aliquid curæ in publicum valetudinarium, auditores ita permouit, vt nouem ex his, quos inter vir & vxor loci senatorij, agrotos inuiserint, vt ijs ministrarent : idem vna aut altera concione cætum virginum ad eximium amorem diuini cultus erexit. Catechismus ingenti multorum bono explicatur in vrbe, forisque : & in vrbe quidem ad loca sueta, addita etiam duo, tam multis accurrentibus, vt speciem præferant iustæ concionis : at foris eo maior discipulorum vtilitas, quo minor olim docentium copia : cum explicatione doctrinæ Christianæ coniungitur institutio vitæ. Grex a pastore dissidebat odio pertinaci : reductum est in gratiam, vbi curio orantibus Nostri pacatus ipse curiales placauit : in vrbe deinde, in militibus instruendis formandisque, adiuuandis agrotis in nosocomio, opera præclare posita : illud ad memoriam insigne. Vnum e Rheni littore, vbi iacebat morbo affectus in squalore ac sordibus propter cadauer amici, qui proxima nocte expirauerat, brachijs sublatum Nostri intulerunt valetudinario, ciuitate spectante. Itantium ad nostras scholas probitas mentis, discendi que diligentia, iuxta admirabilis : multi Religiosorum familias affectant : deditere se nobis duo, atque ex his alter hæreticis parentibus : nec desunt ex eo numero, qui a turpissimo scelere deterruerunt homines contaminatissimos. Sodalitas Dei Matris viret vigetque :

getque : Sodalium maxime apparuit pietas, cum in Bacchanaliorum licentia, instructo agmine, per urbem mediam processerunt ad Crucem suburbanam, inclytam miraculo, & post Sacrum celebratum sollemniter, eodem ordine redierunt, vnde discesserant. Dolent interea magistelli Heidelbergenses : & videntes labi suam disciplinam, refugiunt congressionem Iesuitarum, in Romanum Pontificem euomentes maledicta : hoc magis Nostri thesibus publice positis audientium animos ab insipienti secta auertere conantur.

## COLLEGIUM HERBIPOLITANVM.

**S**OCII duodequingenta. Sacerdos vnus vita functus, magno relicto illis desiderio, qui viuentis studio fruebantur : eius iacturam (quod rarum in his locis) compensauere quinque : in vrbe reconciliati cum Ecclesia sexaginta : extra urbem sexcenti : in his vir nobilis, magnaue, apud antistitem, & reliquos principes, gratia : puella exultum abire maluit, quam cum heretico coniungi : adolescens alumnus nostræ discipline Christiana vsurpabat mysteria, ignarus parentes sibi fuisse anabaptistas : eius rei certior factus a patruo, baptismum suscepit in nostro templo. Diuina frequentantium Sacramenta non exiguus numerus : præluceat omnibus exemplo generosus Comes Rodolphus ab Helfenstein assidua perceptione dominici corporis. Elementorum Fidei tradendorum consuetudo domiso.

risque nihil intermittitur, nec contemnunt Nostri reliqua officia pietatis: per quoddam oppidum transeuntes exportauerunt mortuam puellam ad sepulcrum, cum Parochus neminem haberet, qui eam efferret: ipsumque postea adiungerunt in officio faciundo: peragratur enim diœcesis rogatu Episcopi: apparuit opera præcipue in mulieribus, quarum animus obfirmatior, conuertendis ad rectam fidem. Geroltsbouium itum semel atque iterum: resipuerunt fere trecentæ. Hinc discessit Sacerdos Dondersdorsium (oppidum hoc Catholicam religionem biennio ante suscepit) firmanit oppidanos carentes parocho, instruxitque Ecclesiæ Sacramentis. Fuit locus, ubi mariti, pertinaces uxores, nisi Ecclesiæ reconciliarentur, liberos, nisi aperirent peccata Sacerdotibus, adibus excluderunt. Mursstadienses, iam inde, a patrum memoria, Lutheri veneno fuerunt infecti: ex his cum paucos in exilium egisset præsul, quod studerent rebus nouis, ad ceteros adiuuandos Sacerdotem accersitis cum adduxisset omnes ad obsequium Principis, tenerioribus Confirmationis, grandioribus persuasit sacramentum Confessionis. Præter hanc proninciam alia item obita, cultu in primis horrida, septuaginta amplius pagos complectitur, abbati quidem parens Catholico, sed vtens ministris corruptoribus: etsi in hoc quoque opere & abbatis ipsius & cœnobarum aliquorum desudauit industria: reuocata alicubi consuetudo consecrandorum luminum postridie Kalendas Februarias: alibi restitutus vsus Litaniarum. Ceterum  
antistes

antistes Herbipolitanus, quo Philosophia Theologiaque tradatur a Nostreis animo liberiore, & rectigat annum aureorum millenorum decreto firman: ipseque identidem in nos se humanum, & munificum præbet: sed & magno ardet studio pietatis: clerum purgat: meretriculas ne cum clericis misceantur, eijcit ex urbe, persrepente pelui, immundatum in eas sordium concessio iactu. E iuuentute quæ nobis dat operam, octo monasticam vitam ingressi.

## SPIRENSE COLLEGIVM.

**S**PIRÆ septemdecim. Vanam eiecere opinionem, quam de religione imbibebant, homines triginta quinque. Vnius conuersionem quoniam plus habuit difficultatis, & spondet utilitatis, breuiter perstringam. Fuit is Ioannes Pistorius, excullo vir ingenio, & disciplinis fere omnibus pereruditus: magna tum apud multos auctoritate, tum gratia apud Marchionem Durlacensem, stirpe Badensium. Lutherum a pueritia sequebatur patrio instituto: eius leuitatem cum pensitat diligentius, contemnit: transfert se ad Caluini dolos astu magis rektos: sed eum Deus ad se vocabat: incidit in vnum e Nostreis, euocatum a quodam Principe: communi utebantur diuersorio: & instituitur disputatio de religione: ea cum feruet, profert Pistorius locum beati Augustini: docetur a Nostro quomodo intelligendus, & qua trutina expendendi sancti patres: ex eo tempore multus ille in Catholicorum doctorum mo-

numen-

numentis, incerta consilia voluendo: quoniam & pa-  
rum uirium falsitas habet, & veritatis lux præstin-  
guebat infirmitatem oculorum: erat videlicet opus  
magistro, siue quod doceri vult Deus hominem ab  
homine, siue quod viua vox lectione efficacior. igitur  
biennio post, in alium incidit, cum quo biduum (idem  
enim iter vterque faciebat) interrogando, & respon-  
dendo consumpsit: nam (vt est sanctius & reueren-  
tius de diuinis mysterijs credere quam scire) occur-  
rebat semper quod quæreretur, & laqueos dubitatio-  
num implicabat: sed tamen & ex ea colloquutione, &  
e missis postea persæpe litteris vltro citroque, nuta-  
re incepit, atque in Principis mensa cum esset, ab  
escis illicitis abstinere: quod erat omnibus mirum:  
denique, obstrepente licet segregum turba, apud  
Nostros sanctissimo die Pentecostes, pleno pectore,  
conuertit incensam linguam ad vitæ prioris detesta-  
tionem, & ad laudes Dei. Eius porro tanta vis est  
in disputando, tantaque in Fide constantia, vt cum  
hæreticis quamlibet magni nominis persæpe veniens  
in concertationem, nihil defendat quod non probet,  
nihil oppugnet quod non euerat: idem liberos ad  
scholas Societatis in Sequanos misit: & quo pro-  
pius absit a Nostreis, vicinum in oppidum Catholi-  
corum, cum familia commigrauit. Et iam bonus Fi-  
dei assertor scribit libros, quibus edendis rabularum  
mendacia refellat. Certe Princeps quidam, ex ea-  
dem Badensium origine, vt ab hoc vidit euictos suos  
corruptores Euangelij, eum statuit cum Smidelino  
magno clamatore hæreticorum committere: vter  
vicerit

vicerit illius sententiam secuturus: & bene sperat  
Pistorius, si stetur promissis. Veritas enim vincere  
non potest. Saxo quidam miles rediens e Gallia, re  
male gesta, frigore & fame enectus, in nobilis Ca-  
tholici domum diuertit: hic cum agit animam, Lu-  
theranum ministrum acciri iubet: hospes pius &  
prudens adducit unum e Nostris: qui ementitus ha-  
bitu, eo paulatim agrum molli sermone deduxit, ut  
Catholico ritu perciperet Sacramenta, paulo ante-  
quam moreretur. Magnum præterea adiumentum  
attulere socij beneficis, siue cum desperatione ia-  
ctantur, siue, ut pœnas dent maleficij, cum conij-  
ciuntur in ignem. In peruigilio Sanctissimæ Trini-  
tatis undecim, partim pueri, partim adulti, in tem-  
plo nostro sollempni carimonia baptizati. Sequenti  
feria quinta Eucharistiæ sacra puellæ discentes do-  
ctrinam Christianam, inumbratæ viridantibus ser-  
tis, cereos manu gestantes, præiuere sacrosancto  
ferculo, magnifica pompa. Hæc Spira. Nam de ex-  
cursionibus, & de Congregatione Deiparæ Virgi-  
nis, quæ repeti possent cum superioribus annis com-  
munia, quia notiora sunt, minus indigent stylo.

COLLEGIVM FVL DENSE.

COLLEGÆ undetriginta. Scholæ non au-  
tæ illæ quidem numero, sed ventitantium  
virtute: multi eorum darent se in Societatem, ni  
votis parentes obsisterent, a Catholica religione  
abhorrentes: vnus quidem viginti quattuor ratio-  
nes



nes scripto edidit, quibus se ad Societatem impelli testabatur, easque Sacerdoti nostro obtulit, tamquam obsides animi sui: it deinde in patriam: consilium aperit surdis parentibus: paulo post correptus morbo, ad eum qui voluntatem remuneratur pro facto, ut confidimus, euolauit: nec defuerunt tamen, qui, ut Deo famularentur, in cœnobis se receperunt: reliqui in Ecclesiasticis ritibus constantes, vel in propinquorum nobilium mensis ad vetitos cibos adigi non possunt, sed & puer in Quadragesima abstinentie ita tenax, ut cum egrotaret grauiter, abnucrit iusculum quod porrigebatur, odore carniū obiecto. aliud quiddam accidit iuueni urbano: dederat hic operam Nostris in pueritia: Catholicam pietatem per transennam tantum aspexerat: discedit grandior a schola, ad Lutherum se tota mente conuertit: mox incidit in morbum, qui abstulit vitam: tum vero meliora respectans expetit Nostrorum congressum: ac primo quidem vni laico vix aditus permittitur: redit mox idem cum Sacerdote: sed neuter admittitur: & æger non verbis modo, a suis, sed etiam verberibus male acceptus moritur, salutari proposito ad exitum non adducto. Etenim plerique Fuldensium ita sunt Nostris, quippe Catholicæ religionis instauratoribus insensi, ut non pauci, ne ab illis adiuentur in extrema necessitate, malint more pecudum animam exhalare: quod siqui rebus non fluemibus ad voluntatem (ut sæpe vexatio dat intellectum) Nostrorum auxilio consilioque vtuntur, ridentur ut mente capti. Ex his non nemo decessit



cessit Catholico instructu . Et affirmavit Deus in  
 vno, quasi miraculo , minime errantem fidem: attri-  
 to erat iuuenis corpore e graui lapsu, vsu vocis amif-  
 so : eius pater ad nos pergit opem preccationum ex-  
 poscens: vociferari interea vicini, contumelijs mi-  
 serum & conuicijs proscindere, esse videlicet con-  
 stringendum, nullum signum sani hominis haben-  
 tem: pertendit ille nihilominus fretus diuino Spiritu,  
 quo incitabatur: bonum animum habere iubent  
 Nostri, deque filio nihil metueret: & fusas Deo pre-  
 ces acceptas fuisse, consecuta paulo post agri incol-  
 umitas declarauit: sic obstructa ora maledicentium,  
 & grates ab homine Deo actæ. Elementa Christia-  
 ne doctrine, insigni modulatione ( ea est illecebra  
 multorum ) traduntur faciliore iam progressu, &  
 successu meliore. Ea interdum Hebræi, si quando  
 incidunt, non aspernantur: fremuerunt sane hære-  
 tici principio, sed nunc tandem, tadio an pudore,  
 quiescunt: etsi mulier quadam non fores modo do-  
 mus, sed & fenestras omnes obserare perhibetur,  
 ne ipsius aures puerorum cantionibus verberentur.  
 festinum illud, Pistor stomachans ad vocem can-  
 tantium, aliquos ex ijs verberauerat: non multo  
 post, pœnitens facti, domum suam euocato cœtu  
 puerili, candidos panes recentes singulis dedit: adeo,  
 si ex ijs quæ nunc sunt, par est quid futurum sit in  
 posterum coniectare, considerare licet, ex hac pue-  
 rorum institutione, aliam aliquando ciuitatis spe-  
 ciem, & ciuium mentem futuram. Itum etiam in  
 pagos, eodem consilio, & lustrati sunt amplius vi-  
 ginti

ginti quattuor, eodem euentu: distributi Catechismi Rosariaque, viri cuiusdam nobilis liberalitate. Nunc alia videamus. Saxo iuuenis magna generis claritudine, a matre vidua buc erat missus, vt fratrem iam Catholicum ad Lutherum abduceret. Sed ex ea pugna Catholicus victor discessit, haeretico fratre ad Ecclesiam matrem conuerso. Suffraganeus Moguntini Episcopi cum buc iter faceret, magnam puerorum adulatorumque multitudinem in aede nostra sacro Chrismate confirmauit: res Collegij aucta piorum munificentia suburbano coempto: adiunxit maxime Abbas fundator, secundum hunc generosus dominus Ioannes Eustachius a Vesterbach, a quo magna iamdiu multaue extiterunt in Societatem beneuolentiae argumenta.

### COLLEGIVM HEILIGENSTADIENSE.

**E** S E P T E M D E C I M qui Heiligenstadij moratur, duo Erfurtum in Turingiam, totidem Hildesum in Saxoniam missi: vtriusque missionis capita rebus Collegij subnectentur. Igitur Heiligenstadij magnum spectaculum supplicantium, in nocte Parasceues, ad illustre Domini sepulcrum: Iubileum ferijs Pentecostes plurimorum aduentu, & confitentium multitudine celebratum. instituta alia supplicatio per aliquot dies ad statua templa, eius procuratio nostris demandata: visum: vt in principijs virgines vetere exemplo incederent: ea res haeticis primo die sermonem dedit, sprekerunt ducenta: postero die,

die, quasi iam non ageretur titulus religionis, sed uirginitatis ( neque enim admittebantur, nisi quæ interrogando virgines esse reperirentur, & ex hæresicis etiam nata se prioribus aggregabant ) numerata quingenta . ibant omnes redimita sertis, Rosaria manu ferentes, agmine pulcherrimo : & inundauit templum tanta hominum multitudo, vt eo non caperentur. e fidei naufragio ad portum se retulere sedecim, in his adolescentes duo, magna indole animi, & ingenij. Miles hinc in Galliam abiturus, non extulit pedem e porta, nisi præmunitus Ecclesia sacramentis. Et iuuenis vnus alioqui ferox atate, cum in Rauracis succubisset, ministrum hæreticum ad se accedentem, fortiter eiecit, quod fixum haberet in animo Catholice mori: redierunt alij arumnis confecti, mortiq. proximi, & omnes Christiano sine vitam clausurunt: & quia oleo sacro inungendi corpora moribundorum lex antiqua iamdiu exoleuerat, eius vis cōprobata miraculo, tribus prope a funere receptis. Suffraganeus Moguntinus hic etiam impertiuit multis Confirmationis sacramentum: illustrauit cærimoniam vrbis Prouinciæq. præfectus, vir nobilitate iuxta doctrinaq. excellens: is, quod natus inter hæreticos hoc bono caruerat, cum vxore, liberis, in magna procerum frequentia, obtulit se Episcopo sacro Chrismate imbuendum. Exequar nunc quiddam admirabile. Puella Catholica, sed negligens, præ suis æqualibus, vani iurisiurandi, ad ceteram peruersitatem addiderat, vt Eucharistiam ferijs Paschalibus perciperet non ieiuna: Postridie in eam sagarum potentia incu-

incubuit: igitur conflitabatur, doloribus acerrimis, membris omnibus capta, trunco, quam homini similior: epilepsia horis singulis officis deciesue corripiebatur: abripiebatur interim inuisis manibus per domus abdita, nunc in summam, nunc in imam partem, nunc foras in atrium: diuq. quasita modo interclusa voce pendens ex arbore, modo obtorto collo, & pane elisis faucibus, suspensa in tigno, saxo super pectus imposito, morti proxima reperiebatur: post menses aliquot eius pater opem nostram implorat: iuncta cū precibus ieiunia: Christi imaginem puella inspicere iussa, appēsa: eiusdem collo cerea imago agni caelestis irrita videlicet omnia: abdebat se tantisper callidus nocendi; dum resumptis viribus valentior appare-  
ret: ergo lustralem aquam in terram projicere, Christi imaginem discerpere, Sanctorum reliquias e pectore dinellere, earum thecas post aliquot dies ludibrii causa vel inanes reddere, vel repletas sordibus, ad extremum deinde ipsas reliquias: omnibus modis vitiorum insultabat: vnum supererat experimentum, ut deferretur ad vicinum montem, iam inde a Carolo Magno, Saxoniae populis religiosissimum: quod contra hostium incursus, caelestem ibi opem imperator optimus expertus esset: huc delata semel atque iterum publico sumptu: nec vana spes: omni vi victa beneficii, sanitati puella reddita est, auctaque religio sacri montis. Simili alienatione mentis per idem tempus in pago Lutherano rusticus laborabat, ex dolore videlicet corporis in furorem versus: illico opinio fuit a demone hominem obsideri: aduocan-

tur ministri, nihil agunt : tandem vir nobilis, in cuius ditione res gerebatur, miseratus rusticum, abscedere iussis Prædicantibus, hoc opus est, inquit, Iesuitarum. accersuntur Nostri, hac lege, ut ne tentetur curatio intra parietes templi, quod ipse profanauerat : verebatur nempe ne iterum Catholico more consecraretur : Noster, ut venit in pagum, comperit hominem non dæmonis arte, sed doloris immanitate torqueri : eum consolatur, hortaturque ad patientiam : quin & remedia pellendo morbo præscribit : ijs dum utitur æger, conualescit : nec ei quicquam iam grauius est, quam quod per pagi illius magistratus ad Catholicam religionem accedere non licet. Initia Christianæ legis exposita per pagos adiacentes, certatumque cum prauitate hæreticorum. Quodam in pago explicaturus Noster Catechismum, cum de more ordiretur a signo Crucis, ea res, propter insolentiam, tanto omnibus deridiculo fuit, ut circumfusa corona risum tolleret : hoc magis Noster facti causam aperit, ostenditque diaboli fraudem monumenta Crucis oblitterare cupientis : tantumque assiduitate profecit, ac diligentia, ut iam pauci sint pueri, qui conformationem Crucis, orationem dominicam, & salutationem Angelicam ignorent : & magna spes obtentat fore, ut pagani fere omnes conuertant se ad veritatem, a vanitate doctrinæ. Discipulorum rara virtutis & pudiciæ exempla : vnus ab se procacem mulierem pugnis abegit. egit alter cū matre, ut impudicam feminā domo prohiberet : reliqua taceantur.

## E R F V R T I C O M M O R A T I O .

**R**ECTE DICTVM, difficilius conuerti  
 mortalium animos, quam peruerti: adiunat  
 procliuitatem naturæ illecebra consuetudinis: ita  
 spissum est negotium Erfurti homines ad Christum  
 reducere: sed non inutile omnino: nulla lux effluit  
 festa, quin aliqui communicent: Iubilei beneficio  
 uti voluere centum. die Cinerum, esu Angeli-  
 ci panis, ad ieiunium quadraginta dierum compara-  
 runt se omnino decem: octo repulerunt errorem pra-  
 uarum opinionum, atque in his ludi magister: per-  
 nicioſa coniugum dissidia sublata. Cum autem miri-  
 fico Catholicorum studio, Sacerdos noster in aede pri-  
 maria, & in orba quadam paræcia verba facit, so-  
 ciusque in eodem versatur munere per pagos pro-  
 pinquos, admonetur Senatus a vicinis principibus  
 (hi sunt Lutherani omnes) caueat diligenter, ne  
 foueat in sinu angues, eijciat quamprimum Iesui-  
 tas, ne magis obsint, quo diutius commorantur.  
 ad ea Senatus, res suas sibi curæ esse, nec quic-  
 quam timeri periculi ab illis, in quorum vita ni-  
 hil vñquam repererit, quod reprehendat. Magna  
 hic ministrorum inter se dissidentium varietas: eam  
 Senatus vt tollat, edicto cauit, vt redeant in con-  
 cordiam, graui pœna in eum statuta, qui primus  
 aliquem conuicio laceſſat.

## MISSIO HILDESIENSIS.

**H**ILDESIVM inter magnæ Germaniæ  
 vrbes non postrema numeratur, veterc Epi-  
 scopio insignis. anno huius seculi vigesimo primo  
 armis ferroque vastata, octo oppida, arces duas &  
 viginti, pagos amisit circiter mille: ex his locis om-  
 nibus iamdiu exulat Catholica religio: ipsa quoque  
 vrbs, etsi paulo tardius, in Lutherum inclinavit.  
 Ex eo tempore profanata temola, claustra pudicitia  
 effracta, omnia iura diuina humanaque peruersa.  
 Clerus tantum adis maximæ mansit intactus; hic  
 etsi multa pertulit ab hæreticis, Cæsaris tamen au-  
 thoritate defensus est: donec tandem illustrissimum  
 Bauariæ Principem Herneſtum moderatorem asci-  
 uit: hinc paulisper hæreticorum repressa licentia.  
 Concionatore Catholico utebantur clerici, viro in-  
 tegerrimo, & erudito: is cum fractus laboribus  
 oraret vacationem muneris, euocatus est ad ferias  
 natalitias presbyter Societatis: hunc, tantum abest,  
 vt confecto negotio dimiserint, de Collegio instituen-  
 do cogitarunt. Ea dum tenet consultatio, Noster  
 omnium, qua par est diligentia, seruire commodis  
 studet. auditur attente: & principio quidem lauda-  
 batur etiam ab hæreticis: sed cum ipsorum postea  
 Cathedra pestilentia defereretur ab auditorio, ad con-  
 uicia conuersi, solita videlicet arma, eum Antichri-  
 stum dicere, & probris omnibus lacerare. Sed is ta-  
 men exequitur munia Societatis, non omnino sine



fructu: aliquot in rectam viam adduxit: excun-  
tibus sollemne viaticum, & sacrosanctam unctionem  
naniter impertijt: nec parua spes est, vt ope beatif-  
simæ Virginis in cuius patrocinio olim diœcesis Hil-  
desiensis, aperiatur ostium ad interiorem Saxoniam.  
& excurrit aliquando Noster ad diuersa Virginum  
cænobia: si quod forte illis in medio nationis prauæ  
posset auxilium asserre: inuenit plerasque, etsi a  
Lutheri sectatoribus regantur, in recta fide perstan-  
tes: hoc in itinere, comperit quiddam auditu me-  
morabile. vno in cænobio virgo quædam, intempe-  
rantia linguæ, Catholicorum crudelitatem, & ritus  
irridere, præcipue preces pro defunctis, ignem-  
que purgantem: ad singula pæne verba imprecari a  
calo fulmen illis, qui ista suaderent: castigabatur  
interea verbis ab antiistita, alijsque: sed muliebris  
peruicacia obsurduerat: nec diu dilata ultio: illuxit  
dies illi vltimus: & prædixit ipsa, timore insolito,  
animo præsagiente: tertia hora post meridiem in-  
gens cooritur tempestas, cum fulgure tonitruque:  
eius metu virgines pariter ad templum concessere:  
ibat & misera omnium postrema: sed cum esset in  
Odei limine, in omnium conspectu caelesti fulmine  
interempta est, afflato ornamento omni monastico,  
plurimaque fuligine circa eius faciem aspersa: vt  
quod imprecata erat Catholicis, in caput ipsius  
verteretur.

## M O L S E M I E N S E E T

Confluentinum Collegia.

**I**N M O L S E M I E N S I Collegio sunt e  
Nostris vnus & viginti, Catholicis perfugio,  
& solatio in rebus aduersis. Inbileum Pontificium  
magno totius Alsatiae conuentu fructuque celebra-  
tum. itum quoque, vt hoc bonum communicaretur  
cum pluribus, in oppida vicina. Et quidem Offem-  
burgum (paret hoc Casari & religionem retinet aui-  
tam) affluxere hominum quattuor millia. hic per-  
inde, vt alijs multis in oppidis, instituta supplicatio  
ad sanctiora templa, cœtu plurimo, ornatuque insi-  
gni. De hostibus, qui in Alsatiam irruperant su-  
periore anno, etsi scriptum est proxime, non erit  
absurdum quiddam reponere, quod vim habuit mi-  
raculi. Eos inter, quos iuxta hospites hostesque ex-  
perta est Alsatia, equitum alæ erat præfectus, ho-  
mo Germanus, e Lutheri disciplina: is sua cum tur-  
ma, quacumque ingrederetur, sacras vastabat æ-  
des, non secus ac Superis bello indicto: & fuit, cum  
quodam in templo, euerfis altaribus, deleteris deie-  
ctisque imaginibus Calitum, sacrilega manu, equo-  
rum stabula collocari iussit, quin & humari cada-  
uer equi, vt adderet cumulum sceleri: sed sensit  
deinde ultorem Deum. biduo post, quotquot in eius  
turma erant equi, caelesti afflati sidere ad vnum in-  
teriere. Hoc vbi vidit vnus e militibus adolescens  
nobilis, qui nobis olim dederat operam, tyrocinio  
se abruptit tam infandæ militiæ.

IN CONFLVENTINO vndeiginti.  
*Antistes Treuirensis fundator auxit veltigal annuum : domicilium ad vsus nostros accommodum aedificat , iam primo lapide in eius fundamenta rite deiecto . sed & Iulia Montiumque Dux , pro cetera erga Societatem benivolentia , cum hac iter haberet , cum vxore , Collegium nostrum sua praesentia honestauit , exceptusque a discipulis nostris , suauis symphonia , & carmine non ineleganti . data ab eisdem fabula , hoc maiore laude actorum , quo celerius fuit properanda . Iuliacensis Princeps ad balneas proficiscens euocauit vnum e Nostreis , quem haberet a concionibus : ex eoque effectum , vt inter lauacra corporis abstergerint multorum animi sordes prauarum opinionum . In vrbe porro ipsa multis spiritualibus exercitationibus exculti . Sacrae Confessionis , Communionisque vsus frequentior : matrimonia incesta distracta . mulier ab amore adulteri ad maritum , altera a demonis consuetudine ad Ecclesiam reducta . Super hanc detestati vanitatem haeresum vndeiginti : adiuti pauperes , rei que nocentes , & moribundi . Obita est voluntate Praesidis extrema diæcesis , propter finitima contagia propior periculo . magnus fructus : maior haud dubie , nisi interuenisset belli calamitas . vbi ea detonuerit , iniecta incolis a Deo cupiditas , & a Nostreis spes ostensa , longioris commorationis .*

## COLLEGIVM MONASTERIENSE.

**M**ONASTERIVM, vrbs est veteris Saxoniæ mediterranea. Minugardenorda olim, seu Mingroda, cui, Carolus Magnus Vestphalis domitis, Christoque adiunctis, Lugderum præfecit, virum integerrimum: eam ob causam æde exstructa. processu temporis ab Hermanno Episcopo inædificatum ibi monasterium, templumque Deiparæ sacrum: vnde & cognomentum vrbi, & conuenarum frequentia. Vrbs porro ipsa maiestate Cleri, dignitate magistratuum, opulentia ciuium, priuatorum ædificiorum publicorumque magnificentia, percelebris: calum saluberrimum, solum fertile: propterque opportunitatem finitima Frisia, & vicinas oras Balbici maris, multis commeantibus, magna comitas incolarum, morumque elegantia. Sed huc quoque peruasit procella anabaptistarum, ab anno huius sæculi vigesimo tertio: nec defuit qui inuaderet dominationem: sed hæc aliquando excussa Præsidis ductu: & Clerus resitutus: religio tamen non erat pura a Lutheri veneno: dum tandem vir æternæ memoriæ Godefridus a Rasfeld Monasteriensis Decanus, diuino instinctu, duodecim millia tallerorum (etsi proximis litteris acceperam, reddideramque numero paulo maiore) reliquit Collegio fundando: ac de Canonorum assensu, immissi sumus in possessionem, Februario ineunte: constituti annui redditus aureorum millenum: ad instruendam domum pecunia seposita. sequenti Autumno, cum

resedisset paululum pestis, initia docendi facta, senas classes addicentibus publicis magistris. Et missa erant dudum per diocesim ex omni disciplinarum genere theorematum, cum indice librorum explicandorum, certo die indicto: is cum venit, matutinis horis celebratum Sacrum in templo maximo, suavisimo organorum musicorumque concentu: a quo itum in gymnasium vetus ornatum peripetasinatis. Vbi cum Rhetoricæ magister habuisset orationem dignam expectatione, consecuta concertatio de rebus Theologicis. postridie, cum audita esset oratio Græca, Latinumque carmen incredibili voluptate: disceptatum est de rebus ad politiores litteras pertinentibus, more dialectico. Utroque die iuvenes, Collegij Germanici Romani olim alumni, magnum ingenij specimen & doctrinæ dederunt: ab his prolusionibus dedere in scholas nomina adolēcentes omnino sexcenti, duplicaturi numerum, nisi obssisteret metus pestilentie: docili omnes ingenio, propensoque ad pietatem: ut eorum indole maxime deleberetur Clerus, spemque in ijs reponat futuri Seminarii: quin etiam domum laxiorem & opportuniorem attribuit, quo Scholæ propediem transferentur. Ceterum non parva utilitas civibus, ad rectam religionem, vitamque adducendis. Auxit latitiam iuvenis Saxo, qui cum ex alio quodam oppido huc accessisset periculi faciendi de Nostrorum doctrina, victus quidem, sed melior discessit: multa etiam inuēta in ritus Catholicos, ab ijs aliena, Nostrorum studio sublata.

## SEDES PADERBORNENSIS.

**D**OMINICIS festisque diebus pomeridiana habetur concio, & Catecheseos schola, in ade maxima, fructu non pœnitendo: nam etsi hæreticus blatero, etiam nunc in loco publico, peruenit plebem, ac propterea ad Nostros accedunt minus multi, accedunt tamen nonnulli: accessuri plures, nisi inanes rumusculos, & irrisum vulgi vererentur. aliquot ex ijs imbuti ad Catholicam doctrinam: ex eoque factum, vt expelleret mulier dæmonem, quem iamdiu infestum habebat. nec defuere, qui miserunt ad nos libros auctores falsorum dogmatum igne cremandos. Qui munierunt se Sacramentis Ecclesiasticis in templo nostro, vt nunc quidem res est, non paruus numerus: censa capita septingenta quinquaginta. Aditum etiam vicinum oppidum, adiutumque concionibus, & disciplina Christiana. Ceterum ad emendationem morum nimium quantum valent iuuenes eruditi Romæ in Collegio Pontificio: eorum amor virtutis, & castitatis, conspectus præ ceteris: beneuolentia erga nos tanto illustrior, quanto alij plures insensi. eisi illis præsentibus maledici iam quiescunt. Duobus in locis quam displiceat Deo hominum negligentia in diebus festis colendis, admirabili ostensum exemplo. die beati Laurentij, quodam in oppido, sub terra vnus argillam eruere aggressus, ruentis pondere obrutus est. at die Apostolorum Petri & Pauli, cum homines magno numero ad vicinos agros exissent, causa

*causa operis, pagus eorum fere totus exorto incendio, ita subito deflagrauit, vt ante cognouerint redactas domos in cinerem, quam a flamma correptas. Et excitari poterant his admonitis, nisi essent sine sensu: nempe spes fere omnis in iuuentute, quæ a nobis instituitur, præcipue in Parthenio Sodalitio: eius virtus quotidie illustrior: ex eo vnus in Societatem nostram adlectus: etsi aucti quoque Nostri, pia amicorum liberalitate, vicina domo, cum antea habitarent satis anguste.*



# P R O V I N C I A B E L G I C A .



**C**ONSTITIT vniuersa Prouincia socijs ducentis septuaginta vno. Ex ijs Louanij fuere viginti quatuor, Tornaci & Leodij triceni octoni, vno minus Duaci, Audomari vndetriginta, Antuerpia nouemdecim, Bruggis Iprisque vndeni, Traiecti duodeniginti, Contraci duodecim, in missione Valencenensi sex, in Montensi quinque, septem in Gandanensi, in Castrensi quindecim, Bruxellis Sacerdos cum socijs duobus. Præter hos omnes, Pater Prouincialis cum altero Sacerdote & socio scholastico. In Societatem cooptati non minus triginta: e quibus septem missi Romam, tres in Germaniam: sed ex his in itinere ab hæreticis comprehensi duo, interfecitque: super eos, alij tres mortem obiere.

## COLLEGIVM LOVANIENSE.

**I**N SPIRITUALIBVS exercitijs tradendis, visendis xenodochijs, publicisque custodijs, reconciliandis dissidentibus, rudibus edocendis, de more laboratum. Tres a perversa opinione deducti. De ijs, qui se Nostris instituendos in spiritu dederunt, hæc duo collocabuntur. Ad virginem arreperat insidiator pudicitie: cum lacrimis certa-

ret illa, & clamoribus, nec proficeret quicquam, subito percussa ianua, quasi a quærente ingressum (qui tamen nullus comp.uit) impudicum auertit, & Virginem seruauit. Quidam intempesta nocte, incertum qua ratione admonitus, hominem inopem agrumque iuit quæsitum, prope pagum, in siluam, repertumque ad Sacerdotem proximum adduxit, eique ad extremum usque spiritum omne caritatis officium præstitit. Gymnasium & Deiparæ Sodalitium, multis licet aduersantibus, quotidiana capiunt incrementa.

## DOMVS PROBATIONIS

Tornacensis.

**I**NSIGNIS pietas vnius, qui Societatem hoc anno complexus, spectata est: tum aliquot ante annis, cum famulatus est illustri viro, in aula, ut eum adduceret ad nostros instruendum in vita, quem & adiuuerunt in morte: tum etiam apud hæreticos captiuitate trimestri: a quibus varie tentatus, tandem incolumis dimissus. Formati sunt ad Nouitiatus morem Coadiutores ex varijs Collegijs (& pleriq. veterani) fere vigintiquattuor. Doctrinâ Christiana exposita a tyronibus, ubi pueri puellaq. erudiuntur, in vrbe separatim: hac ratione mulieres nonnullæ meliorem vitam exorsæ hæreticorū aliquot filie de parentibus triumphant: ijs interdictū a magistratu, ne filias ad Catholicum catechismum arceant accessu. Vna renitenti parenti Deo quam hominibus

nibus obedire bonum esse respondit, nec ultimum recusaturam supplicium, dum Catholica moreretur. Sex præterea cænobium virginum ingressæ. Habentur etiam conciones in vrbe pagisque a veteranis sacerdotibus: cæres grata approbataque Episcopo, cuius magna erga nos beneuolentia: vincti agrotique adiuti. vnus ex his nauta hæresim triginta annorum eiurauit sine vitæ propinquo. Mulieres aliquot, ex infami vitæ & solitudinibus anxia, ereptæ. Apud milites etiam positus labor. Religiosæ familia perfuga ad Christi castra reductus. Exacturos domo pellicem pollicii duo. Quinque aut sex Galliam Angliamque peruagati, restituti in fidem, quam deseruerant. Nouem commentationibus rerum diuinarum instructi.

### COLLEGIVM AV DOMARENSE.

**H**IC AD Humanitatem informantur per totam provinciam mittendi magistri. Discipuli ad nos ventitant circiter sexcenti. e lectissimis constat Congregatio: ex eo numero segregati ad Dei famulatum viginti: nec ingrata numini adolescentium religio: sine vllius noxa scholæ collapsæ: hinc afflictæ res nostra domestica: & si sacra aucta non mediocriter, mille septingentorum florenorum impensa. Generales confessiones, vt de reliquis taceam Sacerdotibus, ab vno exceptæ sexaginta: consecuta morum emendatio. Vir de extremis secum agitans, admonente vno de Nostreis, consilium moriendi abiiecit, & gladium

gladium quem parauerat. Alter morore contabescens, & infirmitate corporis, post confessionem conualuit. Mulier quam prodigenia mariti ad continuam tristitiam, demonis versutia, ferrum, restem, præcipitium, subinde ostentantis, ad desperationem adegerat, eodem remedio liberata. e diuturnis fluctibus prauarum opinionum vir nobilis ad Catholicos emerfit. idem fecerunt alij duo. Ex his alterum, Scotum hominem adolescentem, rumor est eius rei causa in vincula coniectum. Explanatur in pagis doctrina Christiana. Ea cum hiemis asperitate fuisset intermissa, renocata est, incredibili studio paganorum, Vere appetente.

### COLLEGIVM DVACENSE.

**C**ONCESSIT e vita frater vnus rei domesticæ administer, cuius virtutes permultos annos quibus in Societate vixit, habuerunt spatium exemplorum: præcipue obedientia, in qua excelluit. Captum consilium, vt post Philosophicum curriculum, docturi Philosophiam, aut ad Theologiam promouendi, domesticis exercitationibus perducantur ad perfectiorem scientiam, & addiscant Mathematicam, hoc anno impleri cæptum. Super conaciones iam vsu receptas, viginti ferme locis in vrbe forisque explicatus Catechismus: & ad idem præstandum nonnulli curiones inducti. Qui domi nostræ excoluerunt animam meditationibus pijs, toto anno assidui fuere: in eorum vtilitatem qui nosocomijs carere

cereve attinebantur, aliquid effectum. Et mulieres aliquot obstinata, paulo antequam expirarent, ad penitentiam adductae inter multos gratia recollecta: in his quidam immodicus lingua, crebro sermone magistrum lacerabat: ad quem venit gratia confessionis. Mulier quaedam venenum diluerat in remedium calamitatum: cum haurire parat, impelli visa a tergo, ea vi, ut excideret manu mortiferum poculum, quod ori admoherat: tum vero mentem ad meliora composuit: mulieres a turpi mercatura, a pellicatu, ab incestu etiam, abstractae nonnullae: illiciti contractus rescissi: in duobus virginum coenobijs effectum, ut eluceat exemplum religionis. Domum viri nobilis ex occasione Nostri frequentabant, interea ibi omnia tranquilla: ubi nulla fuit causa adeundi, res turbidae a daemonum terriculis: ite trepida ad Collegium materfamilias, vniue Sacerdoti. Vestro, inquit, discessu pacem abstulistis: infestamur a demone: persuasit ille totius familiae confessionem, frequentem Crucis usurpationem, et aquae lustralis: pax reddita. Mulier una ex ijs quae celebrant nostrum templum, impurum hominem a quo pelliciebatur ad flagitium, eo percussit fulmine verborum, ut supplex ille ad pedes accideret, veniam petens. magna piorum erga Nostros liberalitas, ut cum vectigal domesticum vix quindécim sustentandis sufficiat, alantur ad quadraginta: huc pertinet sacrum instrumentum auctum, ab illustri matrona, mille florenorum aestimatione. ad scholas ventitant adolescentes circiter nongenti: ex his nobiles multi: tanta existimatio disciplinae, ut eius causa

causa vel e Gallia conuenerint . Ceterum ipsi iuue-  
 nes constantes, nullis nec cohortationibus, nec pro-  
 missis, ad aliorum gymnasium adducuntur: & inuen-  
 tus non nemo, qui parenti rescripserit, priusquam  
 Nostros relinquat, multam se salutem dicturum stu-  
 dio litterarum. Philophicæ theses, magno apparatu,  
 confessuque Cameracensis, Atrebatensis, Tornacen-  
 sis antistitum, & aliorum nobilium, quater defensæ:  
 reuerendus Abbas sancti Kedaſti sic delectatus  
 est vnius fratris e Nostris eruditione, & modestia,  
 vt magno se honore affectum fuisse diceret, quod es-  
 set inuitatus, & ad ædificationem templi quadringen-  
 tos florenos liberaliter conferret. Ceterum spectata  
 pietas iuuentutis, cum & proſecuti Eucharistiam  
 anniuersario ritu, pompa magnifica: & indulgentia  
 plenaria consequendæ, adierunt templa, præferentes  
 vexillum Crucis instructo agmine magistris comi-  
 tantibus: habuit vtrumq. incundam admirationem.  
 E plurimis, qui Societatem deposcebant, octodecim  
 admissi. Schola Theologica, iam ab ipsius Collegij  
 initijs instituta, hoc anno noua discipulorum accessio-  
 ne, & docendi forma, melior effecta. Subleuati, vt  
 alias, iuuenes studiosi, quos adiuuare eorum paren-  
 tes vel propter hæresim nolunt, vel propter ino-  
 piam non possunt. Studium instruendi rudiores ad-  
 res Fidei a nostris discipulis non intermittitur. Et  
 gaudius est vir nobilis cum in duos incidit, quorum  
 alter oues agebat, altero opilionem docente.

COLLEGIUM ANTVERPIENSE.

**V**ERNI ieiunij singulis diebus conciones habita duobus locis: persuasum optimatibus, ut lupanaria clauderentur, vel in extremam urbem amandarentur. duæ induerunt castiorem mentem. septem a lenonibus diuulsæ aleatorum, mimorum, circulatorum collunies ciecta: sedata inter multos, & patrem inter & filium, dissidia. Vnus persecutionem vulneris, alter actionem litis, rogati a Nostris, abiecerunt eum a se honorem Societati habitum diffidentes. Vno e Nostris deprecante, septem hominibus capitalis pœna remissa: quinque, restit, pœne obliſo collo, e manibus detracta. Renuntiavit quidam Ecclesiastico beneficio, quod non satis bona fide obtinebat. Decem infantibus baptisumus, negatus licet dilatus ve callide a parentibus, opportunè tributus. ab hæresi se receperunt fere centum. ex horum numero vnus, in proximum suis adibus templum, pedem numquam penetraverat: vbi primum Nostrum ingressus, curiose lustravit oculis omnia, sic mutatus est animus, ut auctor & dux fuerit vniuersæ familiæ ad fidem Catholicam capeſſendam. Malier in hæreticum maritum consenserat, eo consilio, ut ipsum Ecclesiæ restitueret, felici euentu: sic prorsus, ut vir moriens, prolem quam ex ea suscepserat, ex asse instituerit heredem: alijs liberis, hanc ob causam, quod obstinati essent in hæresi, silentio transmissis. Vna item mulier, atque altera, flagitiosæ cupidinem vitæ obtendentes hære-

N

seos



seos velo, angebantur stimulis conscientiae, adeo, ut vitam peritae, crebra hac sectione venarum, illa sumptione veneni festinarent mortem: utrique Dei misericordia melius est factum. Virgo, cum durius a suis tractaretur, ut eos vicissim afficeret aliqua molestia, descivit in religionis negligentiam, sic tamen, ut servaret pudicitiam: hanc quoque Deus respexit. Virgo altera a pio curione sic erat instituta, ut ne inficeret quidem animum sub turpis cogitatio: iam proinde secura, cum in multorum se familiaritatem immersisset, absorbebatur vorrice: pudori tantum parcebat, pudoris metu. Caluini libris inharebat interdum, noctu inuigilabat: igitur contemptu magis, quam obliuione, abolito voto castitatis quo tenebatur obstricta, maritum quarit, & inuenit: atque, ut mos est ijs, qui non oblitescere flammæ existenti, sic incensa est amore nuptiarum, ut raperet potius virum ad Sacerdotem non ferens moram, quam duceretur ipsa: ad dictam diem uterque coniux se sistit: cum in concipienda, ut fit, stipulatione, interrogaretur sponsa, non diuidit labra, tacet, mirantibus cunctis, in tam cupido pectore, oris silentium, nisi forte letitia inundante: instant, ut respondeat, nihilo minus elinguis: conscientia primum, max divina ultio clauserat vocem: neque adeo per integrum mensem mittere ullam potuit, nisi post renouatum votum castitatis. ea re comperta, sponsus pernicax iræ, ruere ad terrorem & minas, se se demoni deuonere. Sed eius quoque animum Deus ita mitigauit, ut Nostri coram diabolo eurreret,

raret, gratulansque virginem prosequeretur, cum in sacrarum penetrale virginum se inclusit, ut Christo animarum sponso liberius deseruiret. Ceterum de liberatis agrotatione corporibus, agritudine animis, nocturnisque fugatis lemuribus, quia communia, fileantur. Confessionum generalium, ut in vrbe receptrice olim haresum, vsus & fructus quam maximus. Vnus de Nostreis obliquo trecenas excepit, ut fiat de ceteris totoque anno coniectura. Sacerdos vnus externus Societatem nostram allatrās, luxu perditus, exulare iussus, exuta persona ad hæreticorum lustra se consulit, illegitimis nuptiis sacrilegio contractis. Vnius e Nostreis Sacerdotis sacerorum primitiæ, magnum spectaculum præbuerunt: longæus ipsius pater sacrum apparatus omnem altari, Sacerdoti, sacrificio, obtulit, opere magnifico: dein e filij manibus, ipse cum coniuge, familia, cognatione, longo amicorum agmine, diuinum epulum cepit: eoque die cum famulo apud nos pransus in Collegio, sumptuosum conuiuium in diem posterum reservauit. Sacra hebdomada spectatissima fuit supplicatio. Viri duodecim supra centum, in seipsos verberibus sæuientes, ex ade nostra dimissi, ad eamque reuersi: addidere speciem viginti quattuor adolescentes e schola Angelico ornatu, sanctissimæ Crucis mysteria, seu lumina præferentes: nec deerat musicus concentus. Crux ingens portabatur a nationis Italicæ magistratibus, Consules appellant: cereorum numerus, decem duodecimve pondo, instar quadræ, pia videlicet pom-

pa, & splendida. Magnum Episcopi erga nos studium: Sacra fecit in templo nostro frequenter, saepe diuinas epulas, sacros ordines semel atque iterum impertijt: nec minor humanitas Apostolici Nuntiij: apud Nostros diuersari voluit, omni familia in alias ades dimissa. Parthenia Sodalitatis mira religio, enituit proxime octiduana comprecatione apud Episcopium, cum seruatis horarum vicibus, alij alijs succederent. quod etiam, semel hoc anno, eadem cerimonia, in nostro factum est templo.

### COLLEGIVM LEODIENSE.

**E**ST HIC eorum Seminarium, qui explicatis officijs hominis Christiani informantur ad confessiones excipiendas: & ad varia munia Societatis, Proministri nomine, paulatim exercentur. Obijt Pater Franciscus Vafreus Anglicus, aliquot annis in Societate versatus, sine vlla querela. Quae extremo anno proximo caepa erat appendix templi, hoc anno ad fastigium perducta. addita donaria multa, nec vilia. Sacra obeuntium mysteria maior multitudo, quam pro numero Sacerdotum. Vnus ex his, ne omnes persequar, audiuit confitentes de totius vitae culpis minimum sexaginta. Mulier, ob sacrilegia, occultaque flagitia, mortem sibi consciscere, eiusque causam litterate perscriptam, relinquere statuerat, non sine infamia multorum: Sacerdos vnus e Nostreis rem subodoratus, remouit illam a sententia, & ad meliora conuertit, simile  
exem-

exemplum viri cuiusdam, qui inclinans ad hæresim, per scelerum abrupta ad magicas cantiones, & veneficia, demum ad familiaritatem dæmonis descenderat. & agnoscebat interdum magnitudinem culpæ, sed minaci vultu diabolus pœnitentiam dissuadebat, ostentabat potius laqueum, miseriarum remedium; & finem: adimebat vires, vt Crucis signum reformare non posset: cum occurrisset vni e Nostreis, recepto, vt potuit, spiritu, contentaque voce: Mi pater, inquit, hi sunt hæreseos fructus. tum, erumpentibus lacrimis: At tu ne desere hominem, cui nec viuere libet, nec mori licet cum Dei offensa. audiuit illum Sacerdos, simulque peccatorum, & diaboli vinculis exoluit. Exceptæ confessiones virorum, qui in Cœnobio se Deo consecrârunt, vniuersorum, vniuersa: magna hinc illorum vtilitas. & in Societatem benevolentia, cui prius erant insensi. Adiuncti etiam, quibus maleficiorum turpitudine fuit morte luenda. Vnus ex ijs, hæsitans in Fide, vt erat dicacior natura, & ne inter seria quidem risu satis temperans, victus Sacerdotis nostri perseverantia manus dedit, concubinam, quæ in eodem erat carcere, ad emendatiorem vitam accendit. ipse postridie, Sacris Christianis instructus, exultans gaudio, vt suspicionem afferret multis amentitiæ, admonens obuios in itinere, vt vel suo exemplo abstinerent a muliercularum consuetudine, Deoque gratias agens, qui ab se facinorosum hominem non reieciisset, ita fortiter diem extremum impleuit, vt in admirationem verterit misericordia. alte.

ri cum ex Senatusconsulto, dextera primum, dein caput, lentis ictibus præcidendum esset, ad singula vulnera visum sibi ex intimis visceribus pugionem eximi fatebatur: adhorrantibus, ut equo animo supplicium ferret, inmo & libenti, inquit, quod aditum aperit ad æternam vitam: alius, prouecta iam senectute, equo rehebatur ad patibulum, incidit forte in hominem, in quem maxime peccauerat, desilit statim, ei se ad pedes abijcit, multisque cum lacrimis, & miserabili eiulatu, ut det veniam petit: tum animaduertens vdos oculos deducientium: Istis, inquit, fletibus, non miseram meam mortem prosequimini, sed indecoram vitam. Fratres germani duo, affines eiusdem culpæ, agebantur ad panam, ea animi magnitudine, ut ipsi carnifici admirationi iuxta & miserationi essent. Centenas habere optabant vitas, ut omnes impenderent Deo, quem toties offenderant: orabantque exactorem supplicij, ut, cum eos intelligeret altissimo Dei timore defixos, mortem afferret. nempe publice sic interfecti, omnibus, viuendi exemplo, moriendi documento fuere. Paria aliquot non virorum modo, sed & familiarum reconciliata, & imminentes cades auersa. Catechismus duodecim fere locis explicatus in vrbe cum fructu. Scholæ suum obtinent. discipuli fere sexcenti. dederunt actionem elegantem & illustrem, magna serenissimi Principis voluptate. Ad eorum exemplum Sodalitas maior etiam instituta, virorum flore & nobilitate non infrequens. sunt & qui tertiam Latine nescientibus exposcant.

## MISSIONES IN ALIQUOT OPPIDA

Leodienſis diœceſeos.

**G**ASCICA oppidum eſt ad Moſam, magna iam pridem opinionum, morumq. prauitate. Huc Herneſti illuſtriſſimi principis rogatu miſſi Sacerdotes duo, rem tentarunt cū ſpe proſectus melioris. Exorſi a teneriore atate, tripartitam puerorū multitudinem, quotidie certis horis erudierunt; noua res viſa, & accepta primoribus, qui numquā non aderant. Ea cauſa fuit, cur ſolum verteret ludi magiſter: honeſtarum hic profeſſionem artium malis moribus corruperat. Sub Chriſti anaftaſim plus duo hominum millia Sacramentis ſe expiarunt; emendauerunt hæreſim nonnulli, plures vitam turpiorem. Vetus defertor cænobiſ (aberat iam annum duodecimum) fidem dedit rediturum, vnde diſceſſerat. Datis opera vt cæmeterium profanatum per annos amplius viginti, & Conſirmationis Sacramentum, quod ignotum antea erat, ex neglecto in integrum reſtiterentur. actum de mortuis, Catholico ritu, qui iam exoleuerat, ſepeliendis. Ita prætorio editto cautum, ne quis curionum iniuſſu ſacræ terræ mandetur. meridianus campana pulſus, admonitor precum ad memoriam Chriſti crucifixi, poſtliminio reuocatus. Libelli iuuenum, inanes & inuiles, cum bonis mutati: altaria conſecta ſitu ac ſordibus, elegantibus picturis inſtaurata. Extrema Vnctio, cuius uſus pene abierat, reducta. Rogationum diebus (hæc quoque res ex longo interuallo deſueta erat) maxima populi frequentia

quentia supplicatum, ternisque concionibus disputa-  
 tum de inuocatione Sanctorum. Festo die Christi  
 ascendentis, cuius carimonia datum erat intermissa,  
 quinquaginta caelesti pane refecti. De Missa sacri-  
 ficio, de Indulgentijs, de Romani Pontificis auctori-  
 tate, serio & frequenter pro suggestu tractatum, ut  
 iam frequententur templa, ad sollemnia Pontecosles,  
 consequenda indulgentia, communicarint centum  
 quinquaginta, Pontificium denique nomen magnam  
 habeat venerationem. Rosariorum ingenti numero,  
 in omne hominum genus, promiscue distributo, reui-  
 xit orandi formula, qua videbatur extincta. Magnè  
 deinde spectaculi fuit insigni apparatu illustris Eu-  
 charistiae pompa: diuites admoniti non pepercerunt  
 impensa: faces praelatae plurimae, per conuestitas ta-  
 petibus vias, distinctas aris & argento: splendorem  
 auxit magistratuum cultus, armatorum intessus,  
 strepitus tormentorum bellicorum, Musicorum  
 concentus: actiuncula in primis de sacra Eucharis-  
 tiae auctoritate, a pueris non pueriliter data. Ea Ga-  
 scica videntur iacta semina pietatis. Adierunt &  
 vicinum oppidulum, curaruntque, ut Sacramentum  
 Confirmationis impartiretur hominibus quingentis:  
 populus concionibus edoctus, bonus institutor (is est  
 sacerdotio praeditus) iuuentuti praefectus. Cum duce-  
 retur quidam ad supplicium, Nostris deducuntibus,  
 magnam significationem dedit in Deum eximia vo-  
 luntatis. Visus est dignus, cui poena grauissima (erat  
 agendus in rotam) cum miliore mutaretur: corpus-  
 que donatum ecclesiastica sepultura. Igitur bimestris  
 fuit



fuit missio, nec inutilis: sub finem anni repeti, & longius protrahi placuit. sub ferias natalitias centum communicarunt. persuasum multis, ut ne Sabbato contra ius fasque carnibus vescantur: ut festis diebus, integro sacrificio Missæ, usque ad missionem intersint: alioqui a consecratione statim pane omnes labebantur: nonnullis, ut castitatem anteponant matrimonio: pauperibus denique, ægrotisque, in carcere, & nosocomio, de more consultum. Hæ eorum officia sic, vel ipsis aduersarijs, probata sunt, ut vel inuiti nostrum institutum laudare cogantur. Et certe, paulo ante Nostrorum aduentum, longe lateque excitato tumultu, ex hoc oppido Catholici erant eijciendi: eorum presentia motum omnem sedauit. in adolescentibus instruendis, non ita docilibus, magnus labor: & Christi nascentis historiæ publice egerunt omnibus approbantibus. Has ob res utilis huic populo fuit Nostrorum commoratio, & discessus inuicundus.

## COLLEGIVM BRVGENSE.

**EX AVLA** Serenissimi Parmensis, vicinisque circa præsijs militaribus, in quibus informandis Nostrî Galli, Germani, Angli, Itali, Hispanique elaborarunt, magnus animorum fructus. a scelere plurimi, ab hæresi reuocati non pauci. Sacramenta in nostro templo obeuntur a multis. peccatorum sarcinam vniuersæ vitæ per confessionem deposuere triginta. concio celebris in ade maxima

eadem

eademque perutilis fuit . fugitium argentum retra-  
ctum ad dominos . pietatis studium in multorum pe-  
titoribus excitatum . ad virgines Deo sacras exhor-  
tationes habita, duobus locis , non mediocri emolu-  
mento . Catechismi explicatio , prima Dominica  
Adventus , admirabili antistitis , publicique magi-  
stratus studio , instituta est , in eos qui adire negligere-  
rent pœna indicta . Dei matris Congregatio facta  
nunc maior discipulorum multitudine , & , dato vno  
atque altero ingeniorum specimine , frequenti in co-  
rona virorum principum , illustrior . Insigne in san-  
ctiore hebdomada adornatum a Nostri Domini se-  
pulcrum , quo ipsemet Dux Serenissimus , & omnis  
Nobilitas venerabunda confluit . quadringentis  
floreus constitit amicorum impensa . Scholis nostris  
favetur ab urbis magistratu : ab eo , in apparatus  
scenæ , cum danda esset comœdia , tributis floreni cen-  
tum : ducenti deinde cum quarta gymnasio classis  
fuiſſet addita . aucta præterea res domestica flore-  
nis mille , sacra trecentis . His rebus adeo lætis a-  
ſperſit aliquid moleſtiæ , cum incidisset frater vnus  
e Nostri in hostium manus , ab ijsque fuiſſet ad  
castra perductus : quamquam eius spectata omni-  
bus fuit , & in agendo modestia , & in responden-  
do prudentia : sed cum brevi duorum militum per-  
mutatione fuiſſet redditus , eo maior fuit gratulatio ,  
quo ipse propior periculo videbatur .

COLLEGIVM TRAIECTENSE.

**E** CONCIONVM semente diuersis in locis multiplex messis. præter insignem in militibus vitæ mutationem, Confessiones generales auditæ amplius centum. aduocamur cetatim a moribundis, mortem hac ratione auiore animo laturis. inuisitur carcer, non sine lucro: nosocomium non sine pericula: sed, Deo protegente, abest damnum, & præponderat fructus. Anicula quædam, narrat se, ubi primum confiteri constituit, renum dolore liberatam: ad recuperatam valetudinem corporis, etiam animæ adiecit: filiam deinde magno natu, & mulieres nonnullas, ad idem faciendum adduxit. Mulierculæ sex a meretricio abductæ. Sodalitas Virginis sanctissimæ viris & virtutibus in dies augefcit. Ex hac miles quidam Italus, cum ob nescio quod maleficium, actus esset in furcam, & carnifex suum officium fecisset, recedentibus omnibus, cecidit fune dirupto. cum accursus esset, & comperit superesse aliquid in corpore spiritus, in recreanda defectione laboratum est amplius hora; donec tandem reddita miranti mens, mox etiam vita donata: haud dubie Deiparæ beneficio, quam in mira semper habuit obseruantia.

MISSIO AQVISGRANENSIS.

**A**NTE ANNOS octo duo e nostris Sacerdotibus Aquisgrani versabantur, magna  
Catho.

Catholicorum utilitate, maiore hæreticorum invidia. Sed & ipsi, & eorum hospes, primaria Ecclesia beata Virginis Decanus, exire coacti. hinc in præceptis rueret honorum fides, & multorum perfidia valescere. Visum Nostris, ut in re desperata, tentare ecquid fieri posset, nomine excursionis. Ierunt Sacerdotes duo. Concionibus Catholicorum animi erecti. sed repente, ut latos successus sæpe, etiam amici, agris oculis intuentur, cum omne concionantibus negatum esset templum, exorari se passus est a quibusdam Catholicis Cænobiarcha Augustinianus, ut id in suo fieri liceret. tum primores civitatis ab illustrissimo Iulie Duce impetrarunt Nostris commodato sacram ædem, quæ ad eum pertinebat iure patronatus: missisque ad Praepositum Prouincialem litteris obtinuerunt aliquot mensium commorationem. mirum deinde quibus officiis studiisque Nostros prosequantur. Et si hoc quoque, quibus non debebat, an quia ubi antequam dignatio, eorum etiam, quibus fauimus, emulationem parit? nonnullam mouit inuidiam. Opportune vero cecidit, ut quo die Nostri in ædem illam Sancto Foliano sacram sunt inducti, eo die, Calvinista, operosum templum, quod instruxerant, habenda concione, cogendaque multitudine inaugurare statuerent: sed abiecerunt animos, cum plurimi conuenissent ad Nostros, ipsique fuissent ne conuenticulum agitarent ullum, Senatusconsulto prohibiti. Hinc Catholicorum scholæ lustrata, distributi Catechismi. præmia diligentioribus constituta. Certi  
præsi-

præfiniti pueris dies ad Christiana elementa perdiscenda: ab eoque opere complures, nec muneribus abducti, nec minis deterriti, quamquam & confluant grandiores permulti, nunc tandem quæ vita sit Christianorum, quæ disciplina, pernoscere gratulantes. Vix credibilis omnium diligentia, eam auxit duplex Sodalitium Virginis, maiorum (in eo iam septuaginta viri lectissimi) minorumque: hi quadraginta censentur: congregantur dominicis festisque diebus ad sacras colloquutiones, precesque pomeridianas Deo persoluentes, emulantur mulieres similem pietatem, & patrocinium Regina Angelorum sibi deposcunt, recitando Rosario: quin etiam sub initium cuiusque mensis, rite communicant, ab hæresi reuocati septem: non parvus numerus in ea urbe, ubi hæretici dominantur, fenebres contractus aboliti, libri hæreticorum exusti: occlusum iter peccatis, ne incubarent mortalium animis, & imperatus egressus, magna vis sacrarum hostiarum, quæ asseruabantur loco minus decenti, dispensata rauerunt. in feriis beati Laurentij, cuius in hac urbe visitur templum, actum frequenti concione de honore reliquijs Sanctorum habendo: assensum populi demonstravit, venerantium, & Rosarijs libellisque attingere cupientium, quod venerabantur, accursus. Cum vocati essent Nostri, in Catholici domum, viri nobilis, ad diem certum, cum hæreticis ineunda disputationi, non neglexerunt. Sed cum multa cauillati essent aduersarij, Nostri satagentibus, ita frigere cœperunt, ut deridiculo essent. Igitur

zur plerique ciues Societatem amant, fœuentque;  
dataque ad Nuntium Apostolicum epistola, vehe-  
menter urgent, vt hic Collegium statuere liceat, fu-  
turum multorum salutis.

## IPRENSE ET CORTRACENSE Collegia cum Sede Gandauensi,

**I**PRIS, temporum difficultas ciuium erga nos libe-  
ralitatem fecit illustriorem. nempe edificari cœ-  
ptum est templum, & maiore ex parte perfectum.  
Prioratus, quem Gregorius tertiusdecimus Ponti-  
fex maximus collegio addixerat, obtigit nobis hoc  
anno. Is etiam permagno fuit teuamento. quarta  
classis ad scholâs accessit: in quibus iuuentus, cisi  
exigua propter belli tumultus, dedit in scena speci-  
men ingenij non paruum: representata est Samaria  
fames, incredibili cum plausu: ex eo numero non-  
nulli, vt Christum vocantem sequerentur, arctio-  
rem viam ingressi. Exercitijs spirituatibus aliquos  
formati: ex duobus cœnobijs, collatis rebus in com-  
mune, exturbatum ius proprietatis: Totius vite con-  
fessiones plurimæ exceptæ. multa dominis restituta.  
doctrina Christiana prisco more pueris tradita, in no-  
socomijs, & carcere, multorum necessitudini sub-  
uentum. quidam certus relinquenda vitæ, alter in  
cuius corpore malus demon inasserat notas, melius  
sibi consulere iussi. mulier furiosa & venefica a dia-  
boli spectris & insidijs liberata. complurimum dissidia  
recon-

reconciliata. hæresim detestati non pauci. libri hæretici inflammati. miles externus, cuius mores ita peregrinabantur in religione Christiana, ut ne Sacramentorum quidem nomen umquam fando accipisset, morti cum esset proximus, auditus, adiutusque ut Catholice vitam finiret. Virgines quædam præsidio agni celestis in consecrata cera procacitatem militum vicisse perhibentur. alij, quas res abdididerant seposuerantve cum munimine eiusdem agni, eas integras repererunt, cum reliquas, lares (ut vocant) domestici, militibus ostenderent, ut diriperentur. In vicinis etiam oppidis frugifer fuit nostrorum labor. Furnis (maritimi est oppidi nom.) tempore sacri Aduentus, & Quadragesima, quoddiana conciones habita: itaque correcti & reformati mores hominum longa consuetudine corrupti deprauatique, ut is stimulus fuerit omnibus, ad Collegium Societatis communi consensu efflagitandum.

**CORTRACI** scholæ augentur discipulorum numero, & illustrantur profectu. Expositus in scena apparatusissima Sanctæ Cæcilie triumphus, heroico versu, splendidisque sententijs: datus plausus actoribus iuxta, poetæque frequentissimo theatro. e concionibus doctrinaque Christiana fructuum libertas, quæ annis superioribus. odia multorum repressa. fluctuantes in fide, & in vocatione firmati. vnus a voluntaria cade prohibitus. egroti vinctique, & stationarij etiam milites, adiuti pro munere & consuetudine Societatis. Vterque cætus sub patrocini-



nio Mariæ Virginis, magnos profectus habet. Et  
maiorum quidem, ciuibus, minorum vero, condiscipu-  
lis, præluceat exemplo.

G A N D A V I consilientium numerus maior  
quam alijs annis: reliqua vsitata: retinet magistratus  
suum erga nos liberalitatem, ac beneuolentiam: nunc  
sacrarium ad ædis nostræ usum magnis sumptibus  
accommodat. Episcopus, biduo antequam moreretur,  
Monasterij cuiusdam prouentus nobis attribuit: tran-  
quillioribus rebus trecenti aurei sperantur. Vir no-  
bilis futuro Collegio assignauit duodecim agri iuge-  
ra. alij alia beneficia parturiunt.

## MISSIONES VALENCENENSIS & Bruxellensis cum sede Montensi.

V A L E N C E N E N S I S crimina vel a prima  
pueritia aperuerunt homines circiter trigin-  
ta: amplius ducenti, quot Kalendis, sacrosancta  
obcunt mysteria. in nosocomio non intermittitur mu-  
nus singulis mensibus audiendi Confessiones. festis  
diebus Catechismus explicatur a duobus magno fru-  
ctu. iisdem diebus & Quadragesima habita concio-  
nes perpetuo concursu nobilium. Vnus e Nostis fre-  
quens excurrit in pagos, ut vno die, duobus tri-  
busve in locis, habere debuerit concionem. sic ex-  
citata, non expleta cupiditas paganorum, in tanta  
operariorum inopia, abundante messe. Et in vno  
quidem pago, ubi per integrum septennium nulla  
concio

concio fuerat audita, simul concionabundum videre, non pepercerunt lacrimis occupati animi praesentis letitia. complures in amicitiam restituti: atque in his, fratres gemini duo, qui domum veluti in factione distraxerant. optimatum praecipua erga nos benivolentia. Nunc acceptum de extruendo Collegio, decretoque publico statutum, ut quaeratur locus opportunus, & instruatur suppellex: assignantur vina aureorum millia in annos singulos. spes amplior ostenditur, fulvi aliquot, qui in Fide vacillabant: erecti qui ruebant: adiuti morientes magno eorum bono, & solatio superstitum, simile sibi auxilium votis omnibus optantium, ubi supremum diem explerent.

IN MONTENSI Sede non inuulsi pro numero labor. Catechesis, quae antea publica auctoritate, locoque, tradebatur a Theologiae candidato, nunc ab Ecclesiastico civilique magistratu nobis demandata est. excitavit nostra ratio docendi multorum amorem. Templum quo commodato utimur, hoc tandem anno, nostris flagitantibus, consecratum. actum intra ciuitatem cum vno improbo, extra cum aegrot (erat hic parochus, aberatque sex milliaribus, & Nostros euocarat) ut recte ille viveret, hic pie moreretur.

BRUXELLAE vrbs est loco, & foro quod ibi agitur, illustris. eo e varijs Collegijs, cum ad transigendas causas (ut fit) mitterentur multi, consultius visum est statuere Procuratorem, qui cum fratre vno vel altero prouincialia negotia tractaret. non neglexit is eadem opera, salutem proximorum.

confessiones generales excepit amplius centum quinquaginta, odia reslinxit, habuit non raro conciones ad cœnobia multis dux fuit, & auctor, ad vitæ emendationem. his studijs incitatus serenissimus Parmensis de instituendo Collegio cœpit cogitare: & aliquid erat effectum, nisi a dæmone, per quosdam, fuisset obiecta mora. Dux interea assignauit secenos florenos Brabanticos, donec Collegium stabiliatur: & apparatus paulatim sacra supellex, & domestica, vt iam satis esse possit sex sociorum commorationi: nunc sacello vtuntur Sancti Antonij, in ade beatissimæ Virginis in Sabulone. e Confessionibus consecutus hic fructus, quod virgines aliquot viduæque, in quibus femina illustrissima e stirpe regum Hungariæ, pietatem toto animo complexæ. Hibernus adolescens cuiusdam desertor cœnobij, oppressus a dæmone, adductus cum esset ad nostrum Sacerdotem, inflato collo, ardentibus oculis, Non credo, inquit, in Deum. at Noster, incussa alapa, Non credis in Deum nebulo? Hæc vox cumictu, reddidit mentem homini, vt fertur, & diabolum excussit. addidit enim statim ille castigatus, Credo Pater, credo: & liberatus est.

### M I S S I O C A S T R E N S I S.

**Q**UO TEMPORE Alexander Farnesius Serenissimus Parmæ Dux, & Belgicæ oræ Præfectus, naualem expeditionem parabat, cum præclare intelligeret, exercituum fiduciam esse numinis obseruantiam, septem Sacerdotes e Nostris cum

cum vno laico a Patre Provinciali per litteras obtinuit: ita felicibus initijs, vt aucto labore, laborantes ad vigintiquattuor excrescerent. his omnibus, vt ne essent oneri militibus, necessaria ab ipso suppeditabantur. Igitur, dum contrahuntur copie, Bruggis fuere: cum deinde circum littora Oceani diffusa essent legiones, vt nauigaret bellum, classe instructa, diuisi sunt per nationes, sacris operaturi, mundissimo apparatu, intendendæ militum reuerentiæ. & certe, mirum est, vt mutati animi fere omnium: nulla apud eos furta, nulla latrocinia: frigus, famem, inopiam libenti animo ferre: munia diligenter implere, audire Præpositos, vt ijs essent volutpati, admirationi hostibus, ostentatione pinguioris fortunæ ad defectionem frustra sollicitantibus. Gnarrum id Principibus aureo vellere insignitis, nec rem ipsam tacentibus. Et quamquam hic quoque non defuit obtrectatio vmbra recte factorum, eam tamen lux clavior discussit: & consolata est Nostros beneuolentia militum, non solum conscientia: assiduitas laborum adegit vnum e Nostris ad mortem: eiusque exequiarum officium, omni obsequio, debita, vt dicebant, pietatis, milites implerunt. Iam quæ fuerit disciplina castrorum a Nostris introducta, docuere leges in Dei numen, nomenve Calitum iureiurando, execrandove vsurpantes, in prouocantes ad singulare certamen, in ventri gulæve deictos, sponte militum inducæ: duobus incontinens lingua, ad aliorum exemplum, ardenti ferro traicæ. pellices lupæque eiecæ. muliercula cum fetum

edidisset, extra humanam carnem, similem talpæ,  
 multis argumento fuit ad bene viuendum. matrimo-  
 nia aliquorum legitima coniuncta, non legitima cor-  
 recta. nec minus laboratum in formanda iuuentute,  
 quæ sequitur castra. sed res interuenit, ad declara-  
 dum amorem erga nos militum, opportuna. Sacer-  
 dos vnus dabat operam duabus Gallorum legioni-  
 bus, in vna statione coniunctis: cum diuersis in lo-  
 cis esset hiemandum, vtraque illum deposcebat: ora-  
 ta erat inter ductores contentio: alter nobilitate ni-  
 tebatur, alter suis meritis in rempublicam: res de-  
 lata ad Ducem Parmensium: hic prudenti consilio  
 Sacerdotem alium impetrauit a Prouinciali, vt neu-  
 tra legio alteri inuideret. fortis erat omnino exerci-  
 tus, ac pius, vt quidlibet sperare posses. Deo ali-  
 ter visum. Secuta est obsidio Bergensis, & similis  
 industria Nostrorum. Quin & cum res diuina fie-  
 ret sub pellibus, pluresque exclusi, frigorief-  
 sent & vento obnoxij, collectis florenis  
 mille, Sacellum plicatile e tela af-  
 fabre factum est, capax plu-  
 rimorum: quod facile  
 circumfertur sa-  
 crofaciun-  
 do.

# PROVINCIA FRANCIA.



VAE IN VNIVERSVM

de hac Prouincia scribenda erant. propter difficultatem credo temporum, non fuerunt transmissa: nec fuit tantum vacui temporis, ut ea colligerem. Venio ad eius Domicilia.

D. O M V S P R O F E S S A  
Parisiensis.

**M**AGNA Parisiensium fuit significatio pietatis, hoc anno, in diebus maioris ieiunii, cum potestatem indulgentiae consequenda fecisset in speciem Iubilei Pontifex maximus, ut grates victori Deo agerentur. Quindecim dierum spatio incredibilis paenitentium frequentia fuit. Hinc illa. restitutiones aris factae complures: in his una aureorum sexcentorum redditus Ecclesiastici, quod male possiderentur, sponte reiecti. flagitiosa muliercule frugi facta: sed & proprie euenisse nonnullis. Mulieres duae quibus imponebat demon transfigurans se. in Angelum lucis, vix tandem magno ipsarum bono, dedoctae, adiuta alia firmataeque, ut quamlibet magna opulentia, cuius spes offerebatur, aestimarent pluris pudicitiam: quaedam ut liberarentur angaribus conscientiae, gl' adulterio multi, &

animorum salutem. Celebrrioribus diebus, sedecim excipientibus confessiones, ad diuinæ epulas accesserunt milleni duceni. id adeo gratum urbi, ut & parochi non raro, & gymnasiarchæ duo Nostrorum opera vii voluerint ad suos audiendos. de tota vitz confessi ducenti viginti. & fuit post confessionem qui professus est magno se sollicitudinum æstu leuatum. Vocatus vnus e Nostris ad ægrotum, iam vicina morte, pressis oculis, & spiritu, supremos reddentem anhelitus offendit: litanias recitat, aquam lustralem aspergit, Crucem fronti adinouet moribundo, inclamat hominem nominatim, admonet vt inuocet cognominem Sanctum: tum ille, Iesum appellans, Antoniumque tutelarem, expergitur: & cum animæ suæ & familiæ quæ erant necessaria prouidisset, obdormiit. cum altero qui abstinentia vitam finire decreuerat, iamque aberat proxime a morte, acrioribus verbis fuit agendum, vt resipisceret, munireturque Sacramentis, antequam animam efflaret. alium Deus ipse, ostensis ultatricibus flammis, & Celitum gaudijs adduxit ad penitentiam. Patronum quidam sibi e beatorum cœtu Augustinum adoptauerat: ei tale oblatum est somnium. Tamquam inuitatus comparabat se ad celebritatem conuiuij, cum aliquot alijs, qui præcesserant: interea virum videt venerabili specie, qui eum senocans, hæc iterabat. Transite vana, Transite vana: tum conuersus ad alios: & hic, inquit, statuit inseruire Deo. hoc viso mirifice recreatus, & confirmatus est. Catechismus explicatus in



urbē multis locis, factum maxime laudantibus, qui ante vituperabant. nec minor utilitas ex utraque Sodalitate in nostris scholis, Conuictorum videlicet, externorumque, sub tutela Mariae Virginis: ex utraq. iuvenes in spem Religiosarum familiarum adolescunt: eorum preces requirunt saepe Parisienses molestiarum lenamento. Matrona nobilis, & cum semper faceret abortum, misere fecunda, cum illis se commendaret, postera die feliciter enixa est. Regina dominicum sepulcrum in templo nostro cum vidisset, audissetque de Sacello sodalium, libenter illud inuisit, eorumque studia amplissime collaudauit. & vero, honesto homines loco ordineque senatorio inter eos adscripti. Conuictorum numerus auctus: ducenti octoginta numerantur: magna enim opinio nostrorum doctorum, nostraeque disciplina, ut occupatis locis interioribus, in aëra mansitent multi, exclusi scholarum angustiis: respectantes alij discedant, & se ipsi increpantes, quod non maturius accesserint. reliquorum moderatores gymnastorum, & magistri plerique, praedicant institutum nostrum, publicisque Nostrorum disputationibus intersunt: itaque fauent, ut conciliarint nobis nonnullorum studia, qui antea aduersabantur: & hi quoque liberos expetunt in conuictum admitti. neque abest utilitas. non nemo ex errorum tenebris emerfit, Religiosorum habitum inducere non pauci. omnium ad pietatem eximius ardor. agrotabat ex illis vnus iam exhaustis viribus, ac voce deficiente: igitur suprema vinctio fuit adhibenda. ab ea sta-

tim

Vim recipere animum, & circumstantes cepit agnoscere: tum de Sacerdote nostro quæsiuit, an videret lucem: affirmanti, non communem, inquit, hanc lucem intelligo, sed Angeli, qui videndum se dedit oculis meis. Numquam vobis, Patres, parem referam gratiam, qui me ita insituitis. ex vnius virtute iudicium de reliquis fieri potest. absolvam de hoc Collegio breui narratione. Tolosa Burdegalam ibat vnus e Nostreis socio milite. oppidum in quod diuerterant, ab hæreticis noctu capitur, cum omnia igne ferroque vastarentur, miles exiens domo statim ab obitu confoditur. At Noster postico egressus Patrem Ignatium suppliciter vocâs in vota, etiam si disploderentur in ipsum scelopi quàm plurimi, admirabiliter seruatus est.

### COLLEGIVM MVSSIPONTANVM.

**SOCII SEXAGINTA.** pro duobus mortuis submissi a Deo septem. Philosophi ex his quattuor, duo Theologiae studijs initiati. atque ex eorum numero Scotus vnus e Seminario, qui cum in patriam profectus esset ad expedienda negotia, ab hæreticis captus in itinere pecunia se redemit. Vt in bellorum motu, metuque pestis, discipuli non pauci: nempe octingenti. excitati præmijs, publicisque actionibus: vt Hierosolymorum expugnationis hæc enim tantam commouit expectationem, & excitauit multitudinem, vt effractis Collegij valuis Dux ipse per custodes corporis sui tumultuantes prohibuerit ingres-

ingressu. Fuit etiam celebrer dies & festus, cum  
 poetico artificio & ingenio certarunt discipuli, car-  
 minibus propositis, & ænigmatis dissoluendis: quo  
 etiam die Dux spectator & arbiter, cum tribus li-  
 beris, duobusque Vademontanis adolescentibus,  
 apud nos pransus, & duodeuiginti idiomatum varie-  
 tate, quæ inter prandendum audierat, delectatus  
 est. Suppeditauit impensam Episcopus Metensis:  
 cuius magna erga nos liberalitas, & pietas erga  
 Deum. quippe reditus nostros annuos firmavit, au-  
 xitque: & instituit diæcesi suæ Seminarium: in quo  
 nunc quidem triginta, paulo post sexaginta dicuntur  
 futuri: idem operam dedit, vt Collegium distrahen-  
 te pestilentia, doctrina Christiana varia per loca tra-  
 deretur: præcipue in vrbe, quam Nostri cum vti-  
 libus præceptis coniungentes suauitatem cantus, iu-  
 uerant vna oblectaruntque, communi ciuium ap-  
 probatione: idem præstitum in oppidis pagisque:  
 sed & quodam loco restauratum templum celebra-  
 tumque, desolatum antea, & temporum seu homi-  
 num iniuria desertum. mirum in hac distractione  
 quam multa pertulerint Nostri, cum essent intuta om-  
 nia atque infida. Lapsi sæpe in manus hostium, non-  
 numquam inducti: sed diuino eos protegente auxi-  
 lio, semel, etiam cum inter fulgorem gladiatorum, &  
 tormentorum fragorem, effuso cursu se e periculo  
 exemissent, vis aduersariorum citra vltima stetit.  
 & in his tamen fluctibus, octo e profundo haresum  
 extracti: vnus a consilio sibi necis offerendæ.

BITVRIGENSE ET VIRODVNENSE  
Collegia.

**B**ITVRIGIBVS institutum Sodalitium, vt  
 vocant, Pœnitentium, qui ad nos ventitant  
 causa Sacramentorum. ex eo vtilitatis spes magna  
 in ciues plurimos peruentura. Mauri duo corporis  
 animique periculis perquamdiu iactati ad Christianæ  
 religionis portum se appulere, informatique a No-  
 stris, & effusa iucundum ad spectaculum ciuitate,  
 baptizati sunt. Domesticus quidam Collegij famulus  
 discesserat a nobis cum furto: sed, vt sæpe peccati  
 comes est stimulus conscientia, cum consistere ani-  
 mo non posset, misit qui rem ablatam restitueret,  
 quin & ipse postmodum, cum pallenti vultu ac de-  
 misso, ad Nostros redisset, non veniam modo, sed  
 & locum eundem obtinuit domi, quem antea ha-  
 bebat. Instructum etiam in hac vrbe, non paruum  
 præsidium veræ religionis, Cœnobium Capuccino-  
 rum, quos primum exceperunt Nostri de via ses-  
 sor, recrearuntque, non parua eorum letitia, ci-  
 uiumque gratulatione. Discipulorum numerus  
 permagnus. e Nostris obiit frater vnus insignis la-  
 borum patientia: cui phthisis non improvisam mor-  
 tem attulit placidissimo somno quam simillimam.

**D**IFFICILIS ANNVS VIRODVNO  
 fuit, seu quia ciuitas orbata Episcopo, nec quis-  
 quam adhuc in eius locum suffectus: seu quia super  
 tumultum bellicum ingruente peste menstruum in-  
 stitium fuit: adeo cessatum etiam a iuuentute insti-

tuenda: etsi animarum procuratio non omissa. plurimis in templis, nostraque in ade conciones habita, sed infrequentes: nec tamen defuere obeuntes Sacramenta. illustris pietas hoc etiam anno unus mulieris, quæ virili prorsus animo a turpi quæstu viaque præcipiti abductas puellas domi suæ sustentabat, bonisque admonitis ad Nostras adducebat: ut a iactis fundamentis sacrae Confessionis edificarent domum in saxo, nullo turbine quatiendam. etsi ipsa quoque non caruit detractoribus. Sed animæ Christianæ nullum maius solatium, quam testimonium conscientia. nec propterea destitit ab incepto. Fuit et alia mulier nobilis, cuius cupiditatem Deo obsequendi, hominibusque propter Deum benefaciendi, ita Deus ipse complexus est, ut fere nunquam in functione muneris, quod ad Dei honorem hominumque utilitatem pertineat, acquiescat. Tyronum in hac Prouincia numerus maior hoc anno, quam alias umquam, et eorum studium feruentius. in hoc Collegio informantur. Quadraginta fuerunt super decem, qui confecto priore anno tyrocinijs Lutetiam missi: quod, nisi esset res nostræ domi angusta, augendi erant. plerique ex his arctam ingressi viam, quæ ducit ad vitam, abiecto onere diuitiarum, et parentibus inuitis, maluit vnus mendicatio cibo vitare per biennium, quam apud Caluinistam parentem abundare cum periculo vitæ: ponentur nunc breuiter duo, auditu, ut opinor, non iniucunda. Puella erat in vicino pago iam adulta, ita male animo affecta, ut abnuens omnem curationem, nec lin-

guam

giam modo, sed etiam dentes exacuens in quoscumque, per duos menses fuerit vinculis constringenda. ad Nostros in urbem adducta cum esset, sacris precationibus adiuta, resotaeque medicamentis, post decimum diem pene persanata discessit. Mirum etiam fuit sacerdotem unum e Nostreis incidisse in manus haereticorum, quorum immanis in Catholicos bacchabatur insania, ab ijsque, licet pro Iesu a agnitum, impune dimissum.

## NIVERNENSE COLLEGIVM

& Augense.

**A**LUIT NIVERNVM e Nostreis septemdecim. Congregatio sanctissima Virginis mirum in modum adaucta. Excitati civium animi in ferijs nataliis dramate pulcherrimo. Dux Nivernensis locum relaxationi commodum Collegio dedit, promouitque aedificationem pecunia attributa. Festo die beati Ludonici oblatus cereus, insigne foundationis, filio Fundatoris, perhonorifica celebritate. Is cum ansistite, & aliquot optimatibus, eodem die apud nos prandium sumpsit. Proximorum cura non intermissa: ex his mulier, quam mariti desiderio contabescens ludificabatur demon varijs terroribus, Nostrorum consilio, ea sollicitudine fuit & ludificatione liberata.

MAGNO AVGENSIUM quoque bono fuit Patris Visitatoris aduentus. Scholasticorum maximus numerus, ut scamna pro foribus fuerint

rint collocanda. eorum magna ingenij commendatio  
 & probitatis, corruptis moribus, librisque corru-  
 ptoribus bello indicto, illos pro viribus extermi-  
 nant, hos inflammant. perspecta sæpe virtus salu-  
 taris Confessionis, extremaque Vnctionis in mori-  
 bundis. restituti ab vno aurei plus centum sexagin-  
 ta. insane mulieri, item seni cuidam, voluntariam  
 mortem cogitantibus, mens reddita. mulierculæ  
 duæ ab impuro contubernio extractæ. per dies qua-  
 draginta continuos habita concio, & doctrina Chri-  
 stiana pagatim tradita, atque ad eundem morem  
 seruandum parochi diligenter instructi. Sed hæc vi-  
 delicet sollemnia: hoc singulare. Die sacro Virgini  
 conceptæ, matrona quædam e primoribus ciuitatis,  
 cuius filium atrox pituita suffocabat, cum venisset  
 auxilij & consilij causa ad Nostros, eam ob rem  
 communicauit, Sacrum audiit, ceream facem do-  
 nauit Dei Matri: mirabile dictu: domum reuersa fi-  
 lium extra periculum, & fere incolumem offendit.  
 puer præterea octauum annum nondum egressus,  
 cum audisset concionem de sacrosancta Eucharistia,  
 ita inflammatus est amore religionis Catholicæ, vt  
 ab ea nullis nec precibus, nec minis, nec vero ver-  
 beribus potuerit a furente matre demoueri.



# LVGDVNENSIS PROVINCIA.



*NUMERANTVR de Nostreis in octo Collegiis centum nonaginta. In Lugdunensi cum Tyrocinio adnexo quadraginta nouem: In Turnonensi triginta duo: Octodecim in Billo-  
mensi: In Auenionensi vndetrigin-  
ta: In Camberienſi quindecim: In Diuionenſi vigin-  
tinouem: In Dolano vnus & viginti: In Anicienſi,  
quod hoc anno incolæ cæptum, tredecim. Sex vita  
defuncti. Quindecim in Societatem adscripti. Ex his  
Collegiis Reuerendus Pater Laurentius Magius Gal-  
liarum Viſitator quattuor luſtrauit, Lugdunense,  
Camberienſe, Diuionenſe, Dolanum. Turnone Bil-  
lomoque Patres præcipui ad eum venire Lugdu-  
num. Auenio enim iam diu intercluſa: quam ob rem  
de ea nihil ponetur. Ita aduentus ipſius toti fere  
Prouincia, vbi & inſtituit Collegiorum Rectores ali-  
quos, latus atque vtilis fuit.*

## COLLEGIVM LVGDVNENSE.

*IN HOC COLLEGIO multa vtiliter, a Pa-  
tre Magio decreta. Conuiſtorum diſciplina, ra-  
tionesque, a Collegii rationibus ſeiunctæ. Noſtitia-  
tus, præter paucula quadam, diſcretus a Collegio. Ce-  
terum Noſtri in quattuor templis celebrioribus die-  
bus*

bus festis, ac dominicis concionati: Mense Februario quibus diebus ad grates numini agendas pro re-  
lata victoria de perduellibus, per horas quadraginta continens supplicatio fuit, tantus ad eadem no-  
stiam concitatus erat mortalium, quantus vix, um-  
quam antea diebus celeberrimis. Gratiarum actio-  
nem excepit alterum beneficium: ita enim derepen-  
te imminutum est pretium frumenti, ut mirabile vi-  
deretur. Messē dicerēs diuinitus in Galliarum vr-  
bes hieme demissam. Dominus Mandelotius exper-  
tæ virtutis, qui vigesimum iam annum Lugdano pro  
rege prepositus erat, hoc anno excessit: affuit mo-  
rienti ipsius rogatu Pater Emundus Augerius: idem  
in eius funere laudationem habuit, omnium opinio-  
ne mirabilem, & multis fructuosam. Gymnasium  
Conniectorumque contubernium celebratur, ut cum  
maxime. Quadregesima duo e Nostis diuersis in op-  
pidis concionem habuerunt, magno cum hominum  
concurſu, fructuque. Alterum ex his oppidis, Nan-  
tua fuit Geneuæ contermina, de qua etiam proximis  
litteris: ut iam vicini Geneuenses non ita alacres la-  
tique Nantua uolent, & ardentiores in Fide Ca-  
tholicos doctioresque experiantur. Libri hæretico-  
rum combusti multi ab arte incantandi (cuius fre-  
quens usus in Geneuensi) ad Christi gregem tra-  
ducti.

## NOVITIATVS.

**I**N NOVITIATV uersantur uiginti:ij pio-  
rum eleemosyna partim aluntur, partim are, &  
si, ut his temporibus, perexiguo, a reliquis Colle-  
giis contributo. Omnes ueterem exuentes hominem  
dant operam ut quam maxime fingant se ad præscri-  
ptum Societatis. Ad Sancti Claudij peregrinatio su-  
scepta a nonnullis. Quo tempore, cum eorum vnus  
quodam in oppido, attrita veste, ostiatim quæreret  
stipem, in cognatos incidit: hos etiam eleemosynam  
rogat, mutatione vestis uidelicet incognitus: cum  
vox hominem prodidisset, exarsere iracundia illi,  
talem habitum quæstumque indecorum familie ra-  
ti: ita, molliter agunt primum, vt illa exuta veste  
mentem induat in meliorem, altosque spiritus gerat:  
quod si insanire pergat, domum saltem eat: pecu-  
niam equosque offerunt. Nam quæ ista prudentia  
mala ultro accersere, cum bonis abundes? Ad hæc  
paucis Noster. Nihil sibi honestius, aut in animo  
magis, quam sequi Deum: eius amore illum sum-  
psisse habitum, illam vitam expetisse: nec laborare  
si insanus habeatur ab ijs, qui uera sapientiæ gusta-  
tum non habent. Vestras res vobis habetote. mihi  
vnus rerum omnium instar est Christus. Cum hoc  
dicto in hospitalem domum, cognatis frementibus,  
partim etiam admirantibus, cum socijs contendit.  
Alius quidam Parisiensis nobili familia, doctor  
Sorbonicus, Canonicus Sanctæ Mariæ Parisiorum,  
natus annos quinque & triginta, cum loca sancta

Palæstina, Aegyptumque postea, & celeberrimas Turcarum vrbes perlustrasset, ad extremum Romam venit. Hic apud Nostros, eo in Sacello quo humatus est Pater Ioannes Meldonatus, cui Lute-tiæ operam dederat Theologiam docenti, cum sa-crum facit proque eius anima tacitas ad Deum pre-ces effundit, intimos ad verum humanarum contem-ptum, & ad Societatis nostræ petitionem sensit im-pulsus. & egit de ea re cum Patribus: sed de eo-rum consilio eum in Gallias reuerisset, Lugduni tan-dem, a Patre Magio, vt admitteretur impetravit. Nec vero sileri debet acceptum alium optimæ indo-lis adolescentem, quem mater ab ipsa infantia Deo & Societati nostræ consecrarat.

#### COLLEGIVM TURNONENSE.

**S**VVS ETIAM extitit Turnonensi Colle-gio fructus. Dux quidam militum hæreticus, cum hortatu Turnoni Comitis ad nos diuertisset, Catholicus ad eum reuertit. Neglige-bat adolescens, an oblitus erat (quod non in longum duret apud vi-uos memoria mortuorum) mortui socij mandatum: mox cum eius vidisset speciem squalentem, ac tri-stem, & minaciter obiurgantem, tantus pavor tre-morque omnium membrorum hominem cepit, vt ex templo eum rem detulisset ad Nostros, erogata in vsus pauperum pecunia (hoc enim erat mandatum) solueret fidem. Animi magnitudo, quæ apparuit in vidua florentis ætatis non est prætermittenda. In  
buius

huius domum milites, ut omnia licere sibi arbitrantur, meretricem immiserant: hanc illa vicinarum matronarum facta manu correptam capillo, muliebrem animum mirantibus militibus, & indigne ferentibus, domo expulit. maiore eadem animo obstitit homini nefario, a quo pelliciebatur ad stuprum. Alia quædam mulier proximi pagi cum in medias flammæ bacchantis incendiij coniecisset sacratam plangunculam agni celestis, sedato eam igne narravit a se integram magna omnium admiratione repperitam. auxit ea res in plurimis rerum sacrarum venerationem. Mulieres denique tres, quarum diu, aut in perfidia, obstinata mens, aut in recta fide, flecta, communioni fidelium restituta. Albenacum est urbs Dinariensis provincie facile caput: hac cum ipsos quinque & viginti annos Caluicum sustinuisset, a Catholicis recepta est. Huc missus Sacerdos, Catechismi explicatione, scelerum expiatione, frequenti etiam per plateas, ut hæretici audirent vel inuiti, concione, in vicinos pagos excursionem, ita præfecit, ut totam prope urbem, locaque circumiacentia cum Ecclesia reconciliavit. mirum est, quantum illa profecerit ciuitas Sacerdotis commoratione trimestri, quam ægre tulerit ipsius discessum: & redditum quidem orant: sed obstat paucitas operarum. Grauis hoc etiam anno vniuersam provinciam inuasit pestilentia: Nostrique providentiam nuninis, & mortalium beneuolentiam experti. ita a multis ciuitatibus vocabantur. Cum ad vnam se contulissent a portarum custodibus parum amicus sunt ingressu

gressu prohibiti . quod ita acerbe tulit Patronus regius , ut iusta percitus iracundia , cum lacrimis rem illam vaticinaretur ciuibus non paruo constituram . Et nunc etiam , cum consecutus imber cum grandine spem vini illius anni abstulisset , veram fuisse predictionem affirmat . Primarij haeretici Annonensis oppidi certos homines miserunt ad Collegium , qui disciplinam Nostrorum orarent liberis suis : quod cum Pater Rector non grauate spopondisset , ipsimet parentes adierunt , atque inter loquendum ostenderunt , si filij efficerentur Catholici , non iniquo animo laturos .

### BILLOMENSE COLLEGIVM.

**E**TSI IN HOC Collegio Nostri cum varijs incommoditatibus domi forisque toto anno certarunt , publicos tamen fructus priuatosque retulerunt expectatione maiores . Cum vnum e professoribus , ciuitate adhuc incolumi , oppressisset pestis ita seua atque atrox , ut praecisa spe salutis seorsum ei tumulus , omniaque necessaria funeri comparata essent : tantum apud Deum beatamque Virginem , quae Anicij colitur , potuerunt , a Nostreis exterisque vota pro eius valetudine suscepta , ut tertio denique mense praeter omnium opinionem conualluerit . mirum hoc , iuxtaque illud : Nostrorum nemini , qui cum eo sunt diu familiariterque versati , contagionem nocuisse . Igitur huic vita producta , quo augeretur laborum praemium , & spatium laborandi :

randi: est enim iuuenis: alteri, qui multis iam annis  
 processerat, erepta. Erat is Pater Ioannes Belme-  
 sius multiplici vir eruditione, linguarumque peri-  
 tia, & , quæ utilior multo est scientia, sui contem-  
 ptione insignis. eximia semper veneratione sacro-  
 sanctam Eucharistiam prosecutus: quod & supremo  
 tempore ostendit. tantus enim fuit pietatis sensus,  
 itaque animum penetravit ( habent hoc diuinæ con-  
 solationes, vt vbi semel perrupere, difficile preman-  
 tur ) vt lacrimas tenere non posset. media nocte,  
 ea quæ vltimum diem præcessit, Eamus, ingeminat,  
 eamus. quo Pater? excipit qui agro assidebat. San-  
 ctum, inquit, Baptistam & Virginem beatissimam  
 video. vtrumque miro honore semper coluit. inter-  
 rogatus iterum ab eodem, non exaudiente, seu dis-  
 simulante, eadem respondit: nec multo post, sini-  
 strum brachium indignans retorsit. Cur id ageret,  
 rogatus, aut quid esset, respondit, esse diabolum. po-  
 stero die, cum oblatum in seculum abnueret gestu,  
 quasi minime necessarium, vt admonitus est obe-  
 dientie, obduxit illico quantulum potuit: vt fere in  
 pulcherrimæ illius virtutis, cuius fuit viuens quam  
 maxime tenax, significatione, spiritum daret. In  
 externos, etsi pestilentia bis clausit gymnasium, nec  
 exigua, nec inutilis opera collocata. Opima Sacer-  
 dotum beneficia, quæ a laicis obtinebantur, No-  
 strorum suasu relicta. Matrimonium clandestinum  
 ex præcepto Tridentinæ synodi rite celebratum. ce-  
 lebratum item alterum, pacatumque, quod turba-  
 nerant controuersie. Spectatus labor in persan-  
 dis



dis hæreticis. Et in vno quidem oppido quinquaginta homines de sententia detruserat Sacerdos, idemque alijs ducentis idem persuaferant: nec spes sublatâ futuri euentus: etsi nunc mora quadam oblata. Quidam in sanctiore ipsa hebdomada, cum tribus confossus vulneribus, eorum dolorem acceptaque iniuriæ ferre non posset, sic vt in remedia posceret gladium, inductus est paulatim a Sacerdote, vt veniam a Deo peteret, & inimico daret: Præua quadam consuetudo, quæ in Confessionem irrepserat, beneficio concionum correctâ. Persuasum aliquibus, vt non in posterum modo ab usura abstinerent, sed etiam, vt male parta restituerent. Eorum vnus, quicquid habebat opum senori ferebat acceptum. Alter ad viginti aureorum millia reddenda perductus. Atroces inimicitia restinctæ. Eam vnus ob causam, summa sui cum voluptate, populique gratulatione, suscepit publice sacrosancta mysteria, quibus iam diu caruerat, cum remisisset inimicis offensam. Parauerat quidam uxori venenum, sic illam oderat: sed cum vno e Nostreis congressus, veneno abiecto, odium cum amore mutauit. Actum cum virginibus multis, vt Deo, cui se consecrarunt, diligentius famulentur.

### CAMBERIENSE COLLEGIVM.

**Q**UAE CAMBERII hoc anno gesta, sic habent. Conciones Quadragesima magna ciuium

uium vtilitate a Sacerdote nostro in templo Dominicanorum habitæ. Viri quidam reconciliati cum vxoribus, a quibus diffidebant. Carcer concionando, triremes confessiones audiendo, capitis damnati ad summum supplicium prosequendo, adiuti. æs alienum nostrum beneficentia cuiusdam viri nobilis dissolutum magna ex parte. Decessit vnus e socijs non leui nostro cum damno, & externorum merore, quem lacrimis testabantur. Ceterum ex hoc Collegio Sacerdotes tres missi in varia loca, excitandis concione multorum animis a Cineribus ad Pascha, non paruos fructus reportarunt. Ex his vnus fuit Pater Petrus Pepinus, qui cum Granopoli (ea est Acusiorum colonia Narbonensis Gallia nobilissima) concionibus vitæque non minus se bonum virum quam doctum ecclesiasten probasset, eaque ratione ad admirationem omnes, ad frugem meliorem multos adduxisset, sub Pascha defunctus, laborum quos pro Christo in Societate susceperat, recentium veterumque præmium tulit. Decumbenti homini affuerunt quique nobilissimi, eumque omni humana ope subleuandum curarunt: cum viciisset morbus, mortem ipsius, tum luctus ciuitatis funere amplissimo, tum Sacellum, ad quod pro eius anima constitutum Sacrum quot hebdomadis, insignem fecerunt.

# DIVIONENSE ET DOLANVM

## Collegia.

**I**N DIVIONENSI Collegio domestica inopia, materia Nostris fuit, lato quoque animo, non tantum aequo, exercendæ patientiæ, & fraternæ caritatis. Discipulorum numerus, quem duorum annorum pestis, famis, bellique calamitas imminuerat, fere in integrum restitutus. Ita declamationes, disputationes, ceteraque litterariæ exercitationes habitæ multæ. eaque nobilitata sæpius ab illustrissimo Principe Carolo Duce Meinæo Burgundiæ Prorogæ, & a Senatu frequenti. Domi forisq. non improspere laboratum. Octo missi ad Tyrocinium optimæ spei adolescentes, è quibus duo, ut assolèti, a propinquis, & quibusdam illorum hæreticis, per annum integrum, graviter frustra tentati. Et certe experimur, quod dixerunt Patres nostri initio nascentis Collegij, ad res diuinas esse hanc iuuentutem natura propensam. Pueruli multi parentes senes a cibis vetitis exemplo reuocarunt. ydem agros ad Dei opem, sanctæque Ecclesiæ remedia deprecanda, verbo permouerunt: & redente sanitate, non sine fructu. Quidam genitorem gravitate morbi, & quod sæpe accidit, pharmacorum copia confectum, iamque damnatum iudicio medicorum, piacularis aquæ (quod sanequam mirum fuit) aspergine curauit. alij sex eiusdem beneficio aqua, sacraque Confessionis, & caelestis agni particula, agrotationem depulere morti proximam:

suus

suus quoque confessionibus, & concionibus, non defuit fructus. hæretici duo redierunt ad Fidem. hæreticus quidam consceleratae mentis, magicæ artis notas Catholico dederat, quibus eum affirmabat victorem inimicorum turpisque voti futurum. hic cum in patriam reditum pararet, noctu a diabolo oppressus, omni festinatione confugit ad Nostros, ut eo se metu liberaret. Datum etiam aliquid auxilij publicis custodijs. In vicinis oppidis, quattuor ab hæresi resipuerunt. Mulier, ex falso rumore, an ex diuturna mariti absentia, eum mortuum suspicata, cum alio nuptias contraxerat, & susceptis liberis, non infecundas multis post annis cum comperisset illum vivere, ex dolore in furorem versa, complures iam menses per vias publicas amenti similis errabat. hæc Nostrorum hortatu ad Curationem adducta, adhibitisque remedijs ad saniolem mentem reducta est. Civitas Divionensis nostræ egestatis subleuanda percupida & publice & priuatim omni nos officiorum genere prosequitur. Ducenti aurei primum a Senatu, a primoribus totidem Collegio dati. E multatitia deinde pecunia ad promouendam adificationem sexcenti. in publicis comitijs referente Carolo Meinæo Duce destinati mille ducenti. Hoc in genere quiddam accidit scitu non iniucundum. Cum enim eluis Divionensis hæresi infectus ad Heluetios profugus obijisset, testamento condito, quo quadringentos aureos relinquebat ministris suis, quos appellabat reformatos: idem Senatus, referente ac rogante fratre mortui, duabus factis partibus, ducentos ex  
ijs

ijs aureos, alijs Religioforum familijs, reliquos Collegio attribuendos censuit: afferebat causam urbano ioco, non abhorreere, a voluntate testatoris. reliquerat quippe illam pecuniam ministris verbi reformatis: at Iesuitas formatos esse magis, quam illos divini verbi ministros.

**I N C O L L E G I O D O L A N O** summa pax domi forisque. Ex officijs Societatis nostrae, in vrbe ipsa, & vicinis etiam oppidis, fructus non paenitendi. Scholæ aucta doctore vno philosophiæ, & discipulorum frequentia. Ad templi iacienda fundamenta, diligentia cuiusdam viri nobilis, quadringenti aurei ex Fisco deprompti. Dolana quadam mulier pietate iuxtaque genere illustris vestem donavit ad Sacelli ornatum quingentorum aurcorum pretio maiorem. alia item dona a civibus oblata. quorum proluxa erga nos benevolentia: ut, quo auctior sit Collegiarum numerus, certent augere Collegij censum.

### **C O L L E G I V M A N I C I A N V M.**

**A N I C I V M** vrbs est Velauniorum primaria, natura loci manuque munita: patrio sermone Pvis (quod Podium interpretantur) dicta, quod in montis dorso posita est. Hic templum Deiparæ Virginis, vbi multa & opulenta visuntur munera, quæ reddentium vota gratam voluntatem, & vim divini numinis ostendunt. Hac in vrbe, iam inde ab anno  
huius

huius seculi septuagesimo, ciues duce & suasore Antonio Senectario Episcopo de Collegio instituendo cogitarunt: & quia persuaserant sibi de nostra voluntate, sedes scholæque Nostris inconsultiis ædificari cæptæ: inciso, pulcherrimis notis ad earum angulos, lesu nomine, argumento Societatis. Et res quidem tentata persæpe, sed in hac difficultate rerum ac temporum ad hunc annum extracta. & iam in opportuniore vrbis loco Collegium publicè extruitur. Scholæ quinque apertæ sexto

idus Nouembres, præuia oratione,

gratulabunda ciuitate, quod

vnus ille dies duodeci-

ginti annorum vo

ta imple-

set.

# P R O V I N C I A

## AQVITANIA.



**D**E AQVITANIA quæ generatim colligi debuerant, incerta: ea existimare ex superioribus vnumquemque, quam me quicquam ponere incompertum, tum melius, tum etiam facilius. Notiora videamus.

### COLLEGIVM TOLOSANVM.

**C**OETVS IYVENVM anno proximo Dei Genitrici consecratus pæne in ipso ortu occidit repentina pestilentia: sunt tamen adhuc in eo præcipua pietate adolescentes ad quinquaginta: auxere eorum decus & numerum viri tres claritudine insigni: quos inter Episcopus Vauensis: qui & eo die panem qui de cælo descendit præbuit pluribus in nostro templo, & cumulanda lætitiæ, apud nos pransus, maiore apparatu versuum, quam epularum: auxit ea res magnopere illius erga nos beneuolentiam. explanari cæptus Catechismus in vrbe, quatuor locis, magna alacritate discentium, nec dispari utilitate. Qui replicata memoria annorum omnium maculas confessione eluerunt, centum amplius dicuntur fuisse. profuit & ijs adhibita cohortatio, qui æs male partum nullo pudore retinebant: inuentus qui aurcos mille fraude ademptos apud se residere



non est passus. nec minor in mulieribus vagæ libidinis exitus fructus: vnus, quo notior erat, nobilior conuersio: alia abducta perinde a flagitio, consilioque partus necandi. Sed dignior laude, ex his qui ventitant ad nostras scholas, adolescens, rara admodum castitatis, & aduersus muliebrem pellaciam inuicta. Neque id solum de nostro gymnasio. Quatuor in varias cœnobarum familias adscripti. Nec vero sua laude mulieres fraudande. Ex ijs quæ celebrant adem nostram, virgines quinque, viduæ septem, se Deo nuncuparunt. Est hic quoque in recollegendo Christi grege laboratum. E Lutheri Caluiniue ritibus nouem extracti. cum libris hæreticorum amorumque non leuior pugna. ab eorum lectione deterriti complures, ad combustionem additi non pauci. Verum huic Collegio cum ceteris communia dissimulentur. nihil dicatur de veteribus oppressis inimicitiarum incendiis, taceatur de reconciliatis animis coniugum affiniumque, prætermittatur de occupatis sceleribus aut auersis: rapit scribentem cogitatio ira numinis inuicti mali, quod in mæsta urbe, etsi labores Nostrorum auxit, clausit scholas. itum propterea ad uicinos egentes auxilii. Quo tempore omnes, ut porrigere se ad plures possent, a Deo defensi: nam & in urbe aures præbitæ consentibus, & extra urbem: uentum sæpe in loca infessa hæreticis, uel lue infecta, citra noxam: ita e quinquaginta socijs (tot enim e Tolosano Collegio censebantur) desideratus nemo: licet ad vnum omnes tentati febre. quin & duo ad Societatem adiuncti.

iuncti. igitur laboratum in oppidis præiacentibus,  
 in vrbe Vaurenſium, & in Teſſoſagum regione  
 propter finitimos hæreticos minus tuta. huc inuita-  
 tu optimi antiſtitis deſtinati octo, incolarum animos  
 litteris moribusque imbuendo, ſeptimeſtre ſpatium  
 poſuere, tanta ciuium approbatione, vt ſponte ad  
 Collegij foundationem intenderint, certo viro tran-  
 ſigendi negotij ad regiam miſſo. interea circumfluen-  
 te iuuentute e vicinis etiam pagis ſcholæ frequen-  
 tes. ter hebdomada explicatus Catechiſmus: habi-  
 tæ conciones diebus feſtis maximo in templo. nec  
 abſuit vtilitas. e militibus duobus, vnus alteri præ-  
 ciſa aure, ſe in fugam conuerterat, nec erat difficile  
 ſaucio, iraque incenſo, fugientem aſſequi pedibus,  
 manuque vlcisci: ſed rexit impetum, iure magis  
 quam armis iniuriam perſequendi conſilium: cau-  
 ſam quærentibus reſpondit, quod audiſſet de concio-  
 natore non eſſe priuatas iniurias priuatorum arbi-  
 trio vindicandas. multi hæreticum venenum e pe-  
 ctore eiecerunt: inter eos matrona illuſtris. pari  
 animo, puellæ, adoleſcentique grandioribus, ſubuen-  
 tum baptiſmate, quo cærebant. Xenodochium in-  
 terniſum ægrotis conſolandiſ, curatumque vt an-  
 nui redditus cum fide adminiſtrarentur: nec deſidera-  
 runt ſubſidium quos carcer detinebat: ſacroſancto  
 ſacrificio Miſſæ, & ſalutari ſermone recreati. La-  
 ſciuioreſ ludi dierum feſtorum in ſacras precatationes  
 conuerſi: muliercularum corruptelæ faceſſere iuſ-  
 ſæ. nec de peccatis modo, ſed & de eorum auctore  
 triumphatum. redibat domum ruſticus vehens  
 plau-

plaustro puerum infantem : incidit in nescio quem non ignobili ornatu : nimirum demonem ex hoc agnoscas : poscit ab rustico filium, ingenti pretio contra promisso : sed pluris fuit amor liberorum . narrat uxori quod acciderat : in medio sermone , adest ille idem , non iam iterans preces & promissa , sed intentans vincla , & mortem : ubi id etiam non proccedit , eum saltem flagitat sibi promitti , quem mulier esset paritura : hoc quoque pernegat paternaturali beneuolentia : uxor interim cum vereretur demonis insidias , rem defert ad parochum , hic ad Episcopum , Episcopus ad Nostros : Nostri expiatis criminibus coniuges muniunt sanctissimo Sacramento , tum armatos particula agni caelestis vetant demoni spondere quicquam , aut cum eo longius colloqui , signo Crucis frequenter obiecto . redit importunus , cum repulsam de liberis ferret , particulam postulas domestica supellestilis : ubi friget , vel herbulam ex horto : donec tandem intra paucos dies fractus abscessit . etenim magna uis Sacramentorum . eorum ut augeatur veneratio , excitata Nostrorum suasu Sodalitas in honorem Christi corporis , non e laicis solum , verum etiam e clericis , maximo fructu . In hoc Nostrorum discessu , accitu Castrensis Episcopi a duobus Sacerdotibus aliquid opis allatum est etiam oppido Lautreco : ubi nunc Episcopi sedes , vrbe videlicet ab haeticis iamdiu occupata . In eo oppido ad populum habitus sermo ante Domini Aduentum diebus sacris : singulis ipso Aduentu ; bis quot hebdomadis Fidei elementa rudiori-

dioribus tradita: instituta frequens disputatio & frugifera de Pœnitentiæ Sacramento, conuenientibus semper Catholicis, cum hæreticis permistis: & iam ex his nonnulli vacillant, & Sanctorum imagines clanculum per interpretem extorquent. cuidam iniecta religio vt sacrum calicem restituat, quem sacrilegio quasitum impie retentabat. multorum denique pacata conscientia. Hic etiam antistes efflagitat Collegium. Ergo his duobus Episcopis studentibus fundando Collegio, Ausciji (nisi quid malus dæmon turbet) prope fundarunt. ea de re quam breuissime expediam. Ausciorum vrbis Augusta olim appellata, in ea Aquitania parte est, quæ Vasconia dicitur: ibi Archiepiscopi domicilium, & antiquum gymnasium nobile. huius procuratorem gymnasii ad nos transferre cupientium Clericorum rogatu, missus est Sacerdos cum laico, vt natu maiores ille, hic minores instituat. Et, Deo fauente, res quidem initio procedit, verum spes maior felicioris progressus. Et extulit se, vt ferme fit, maleuolorum nebula infuscanda luci nuper exorta: sed illa disiecta Sol magis inclaruit: dein maledictum in laudem vertit. igitur opus vrgetur designata area, collataque pecunia templo extruendo: missæque ad Patrem Prouincialem litteræ, vt assensionem exprimat a Reuerendo Patre Generali, non Auscijs modo, sed & Vasconibus, & finitimis Nauarræ oppidis profuturam.

## COLLEGIUM RVTHENENSE

&amp; Mauriacense.

**S**V B. FINEM superioris anni, ut proximis litteris scriptum est, gliscente pestilentia, perfectiones variae varias in partes felices exitus habuere. Procurator Collegij, cum exit ex urbe, euocante negotio domestico, incidit in latrones, a quibus spoliatus est, & duabus impositis plagis semivivus relictus: ut res congruerit cum Evangelio, quod illa hebdomada, nempe duodecima post Pentecosten, legebatur. Concionatus est vnus e Nostis sollempni ieiunio dierum quadraginta: alij item in vicinis locis, frequenter, non sine sensu auditorum. Exposita tribus in locis doctrina Christiana: ad synodum habitae orationes duae. Duo e Nostis Catholicorum castra secuti, duos haeticos vicinos morti ad Fidem adduxerunt. Ceterum auditum est, adolescentem nostrae olim alumnus disciplinae inter haeticos mortuum, ea constantia, ut in recta sententia usque ad vltimum spiritum retinenda contempserit omnia aduersa: alterum maluisse tridui perferre inediam, matre omnem cibum negante, quam improbitatis ministros audire declamantes: duos alios gravi morbo affectos praoptasse mortem inanibus incantamentis promittentium curationem.

DE STATV aut potius casu Mauriacensis Collegij superiore anno memorauimus. Quippe dissipatis scholis, socijs ad propinqua Collegia dilapsis, remanserunt Sacerdotes duo, cum tertio lai-

co : bona pars Collegij a Catholicis militibus occupata : ne aliunde hæreticis pateret aditus diligenter prouisum : interea ab exiguo numero, in salutem animorum & corporum, non exiguis fructus. Ceterum Nostros, septem mensibus, in summa difficultate rerum & temporum, circumuentos fame & peste, incolumes fuisse, habitum pro miraculo : sed istis tandem de causis euocati litteris Patris Visitatoris, amicorum vni rebus Collegij commendatis, ciuibz collacrimantibus, & quoquo modo retinere cupientibus, sub Paschales ferias Ruthenos profecti.

#### BVRDEGALENSE COLLEGIVM.

**A**D NOSTRVM templum confluentium numerus in dies augefcit. aduentant e suburbano multi, & vocamur procul in oppida, causa confessionis. Catholicus ab hæretico duce captus, & accusatus familiaritatis Iesuitarum, & fœderatorum societatis, audacter fassus est Catholicum se esse, de Iesuitis, fœderatisue negauit : sed tamen de Congregatione sanctissimi Sacramenti, in quam dato olim nomine fuisset adscriptus. post hanc egregiam confessionem inditis vinclis coniicitur in fœdam custodiam, nec inanem serpentibus, hic aliquandiu cum fuisset, pridie quam adigeretur ad tormenta, boni Angeli, vt credibile est, instinctu, vinctus licet, & oneratus catenis pragrandibus, ex alto se demittit, perque custodes & excubitores elapsus,

-sus, ad amicum perrepsit: a quo exceptus, solutus-  
que, Burdegalam reuertit: statimque in nostro tem-  
plo grates egit Deo restitutori salutis. In referendis  
hæreticis in album Catholicorum res cessit ex animi  
sententia. magna feminarum religio: nosocomia ad-  
eunt: maritis subripiunt libros magistros improbi-  
tatis, eosque afferunt Nostros ad comburendum:  
indicunt sibi ieiunia, & supplicia corporis: prae-  
toces viros frangunt patientia. hæc communia. illa  
propria. Ancilla quædam mulier, virili proisus ani-  
mo ac liberali, apud nos sacra obiens mysteria, hæ-  
reticos dominos, magno labore & constantia, vt  
idem facerent, induxit. Eiusdem ordinis altera cum  
solicitantem dominum nec ferre vellet, nec vincere  
posset, antidotum pestis, quod domi asseruabatur,  
pro veneno hausit, in remedium ærumna: facti dein-  
de cum pœnituisset, post quattuor dies crudum adhuc  
& innatans stomacho eiecit sine noxa. Mulier la-  
borans vtero cum parere nequiret, a viro cogeba-  
tur & a medico, vt medicamentum acciperet fetui  
exanimando: melioris illa medici consilium secuta  
simulauit haustum: tertio post die offuit Deus vi-  
uam sobolem enitenti, neutro damno. Hæc pauca  
de multis. Aliquorum odia, & quidem matrem  
inter natumque, & duos inter coniuges sepulta. e  
concionibus qui assolet fructus. eum pœnitentium  
multitudo, & restitutiones factæ non parui pretij,  
testantur. hoc in genere res accidit scitu digna: quod  
cum vnus redderet alteri pecuniam, accipere nec  
ne deberet, orta est inter eos contentio: cum & il-



le obtenderet præceptum Sacerdotis, & hic se facturum negaret Sacerdotis iniussu. sequitur factum adolescentis, & eodem prope in genere, virginis, alterum altero illustrius. Filius iurisperiti Societatis nostræ cupidissimus, cum hoc ut sibi permitteretur, fatigasset precibus parentes, illis relictis, ad Nostros profugit. pater illico ad Collegium, filium reposit; frustra: redit a prandio cognatis, amicis, præside suffultus: præcipuoque certamine animi aduersus eum sumpto, nihil aliud agit, quam ut eum confirmet magis in proposito: sub noctem disceditur: postridie redintegratur pugna: libellus supplex Senatui offertur: nec mora: sistitur iuuenis in curia, reque diligenter inspecta, ut per dies quindecim sit apud sequestrem decernitur, constantiæ probandæ: immo vero apud patrem commodius: adolescens, inquit: octo dies præfiniuntur, ut interea & Nostros ad illum; & illi ad Nostros ne claudatur accessus. per illos dies cogitata omnia, factaque, sine effectu: mater precibus & lacrimis, pater minis & verberibus eundem scopulum tundebant: aduocantur consulti, prudentes Theologi, ut quem non poterant acie, agmine obruerent. dat consilium mulier venefica, ut noua omni induatur veste, exuta vetere, ne Iesuitarum veneficia adhærescerent. sed diuina virtus in animo insidebat. mater inops consilij sollemne sacrum pro defunctis curat faciendum, ei filium; & tredecim pauperes pullatos interesse iubet: illa carimonia, an ut parentaret filio, an ut Deo supplicaret, incertum. at pater nihilo segnior  
ad

ad Præsidem, quò plurimum utebatur (eo conuocati fuerant propinqui amicique complures) iuuenem adducit, acerrimisque verbis increpat, ingratum appellat atque impium; qui exuerit obsequium in parentes: & (quoniam erat inexorabilis) sancti prorsus ingenij, & qualibet fera crudeliorem. tyroni nostro surda ad hæc omnia aures: mentem videlicet verus pater implebat. elapso ostiduo iuris iam sui se domo proripit, nec latuit matrem intentam, ac petentem voce, quem gradu non consequitur. hic prudens adolescens, metuens rixæ, domum reuertitur: statimque compingitur in cubiculum, prohibito egressu: hinc porro, incistoditus cum esset, deficiens e fenestra, ad nos adolat: sit tamen, ut suspicax mater pane præuerterit: sed ipsa quoque furore licet amens, Collegium irritis clamoribus, & pulsibus ianuam insectata cum esset; ad extremum, re conclamata, discessit: paucis post diebus, minor germanus frater, cum ad eam accessisset, sit. Et sermone, narrauit alterum quemdam, cuius eadem causa eodem tempore disceptabat, de priore mente deductum. Verum, seu non crediderit factum, seu spreuerit: Cesserit, inquit, iste, deficiat alius quicumque, vel ex ipsis proceribus: mihi, quò plus difficultatis ostenditur, pulchrior erit perseuerantia. Conseruet Deus inueni animum quem dedit. ruunt enim quamuis rectæ mentes, nisi diuina ope fulciantur. Hæc de adolescente. sequitur exemplum virginis admirabile. Adolescentula quædam natione Angla, patria Leilanda, parentes habuit mo-

dicos facultatibus, religione varios, & discordantes. mater ab heresi sub vitæ finem se recepit, pater post uxoris obitum in Catholica fide degeneravit, auctorque idem ex a filie hærescos sectanda: at ipsa lectione Catholici Catechismi & hortatu Sacerdotis, Deo adspirante, aliud agebat: baptismum quem a ministro hæretico infans acceperat, ritu Catholico adulta contexit: ex quo tempore tantum puellæ animo roboris accessit, nulla ut ratione ad hæreticorum sermunculos adduci posset, quos antea non inuita deuorabat: nempe memor vitæ antea placando numini salum intenta, iniecta inerea cupiditas hand dubie a Spiritu sancto, ad auidi Romam, Catholici caput imperij, tot Sanctorum non magis impressam vestigijs, quam sacratam sanguine, ubi peccatorum veniæ spes facilis ostenditur, & aperitur via. Verum, ut in re magna ac difficili, cum seipsa explicare non posset, ne temere quid ageret, de presbytero quodam, & duabus præterea mulieribus, hæretica vna, altera Catholica, exquiri sententiam placuit consilium, modo viaticum ne deesset. hoc neglexerit illa, aut non habuerit, in incerto est. igitur certa discedendi, parentem orat, liceat inuisere auunculum: nec procul aberat in altero oppido: cum exorasset, aliud iter agitans, attonso capillo, fraterna veste, & leuiter immutato nomine, ut pro Ioanna Ioannes diceretur, puerum simulat: hoc habitu, breui traiectu in Hiberniam venit, ut quæ primâ in Galliam Hispaniamve nauigandi facultas esset, ea vteretur, in Italiam proxime

me transmissura. hic dum moratur, emendicato cibo, cum alijs pueris scholas frequentat. post duos menses inuenta commoda occasione, mense Maio Burdegalam appellit, incidit in sacerdotem Hibernum: ab eoque ducitur ad Vestros, et afferrent si quid possent opis adolescenti, quemadmodum & alijs multis, qui verterunt solum, causa religionis. assignatur ei locus in hospitali domo Sancti Iacobi ad nocturnam quietem: suppeditatur diurnus cibus e Collegio: in assiduas propterea procer liberius incumbebat, et omnes mirarentur, sed nihil fictum, diuturnum: abierant duo menses, cum Praefectus hospitij ex eminentiore quam quantum esse soleat in maribus, pectore, id quod erat suspicatus, suspicionem suam affert ad iuniorum, mox etiam ad Rectorem Collegij: hic confestim ad hospitium: tum re comperta, obiurgat vehementer hospitem lacrimantem: & percunctando reperit causam simulationis: neque improbabilem faciebat modestia vultus, & assiduitas sacrarum precum. quaesitum de Ioanna, malitne in caenobio virginum tutius deservire Deo, quam incertum iter capeffere: nihil erat illi optatius: duriores se prae buere primo praesides caenobij, sed acquievere tandem similibus veterum exemplis. collata dos & supellex stipe collectitia: magnaue illius diei celebritas & latitia fuit. quin etiam nunc gratulantur virgines, & grates agunt de novitia, quam veteranae aemulentur. Ceterum rogante Basatensi Episcopo excursus Quadragesima in vicinum oppidum (Montem securum appellant) se-

primū iam annum fuerat in potestate heretico-  
 rum: nunc tandem redierat pactione ad Catholicos  
 oppugnantes: ita non minus docenda Fides, quam  
 hæresis dedocenda. libris hereticorum exustis suffe-  
 cit Catholici: restituti ritus aboliti contemptu. ex  
 hereticis duobus omnia miscentibus, vnus cesserat  
 sponte, expulsus alter, qui remanendo stultitia adie-  
 cerat impudentiam. duorum fratrum inter se dissi-  
 dentium sedata discordia: templum instaurari  
 coeptum: diruerant videlicet heretici  
 obsessi: sic, vt lapides comporta-  
 rentur ad refectionem mu-  
 rorum: ad tormentarij  
 pulueris conse-  
 ctionem  
 mortuorum ossa concrema-  
 rentur.

# PROVINCIA ARAGONIA.

**D**EGUNT IN HVIVS Pro-  
uinciæ, vt de ea seorsum a Sardinia  
dicatur, sedibus nouem, socij vnde-  
trecenti. Valentie in Domo Professa  
vnus & triginta: In Collegio tri-  
ginta octo: Gandie quinque & vi-  
ginti: Casaraugustæ quinquaginta: Nouem Bilbili:  
Totidem Tarracone: Barcinone triginta quattuor:  
Balearibus duodecinginti: Gerundæ viginti sex. Obie-  
runt quinque: Duodecim nobiscum Societatem  
inire.

PROFESSA DOMVS ET COL-  
legium Valentinum.

**D**E VISITANDIS, adiutandisque ijs,  
qui in nosocomio maximo, ergastulone atti-  
nentur, ijs etiam qui in lectulo suo moriuntur, aut in  
patibulo, quæ scribi possent, communem licet modum  
prætergressa, omittantur, quia communia. Congrega-  
tio Spiritus sancti ( celebratur hæc domi nostra ) in-  
dies augefcit numero, & fructu: inter cetera adsciuit  
præclaram illam consuetudinem, singulis hebdoma-  
dis, omnes, qui sunt in carcere inuisendi, opibusque  
leuandi: eamque seruat magna cum admiratione ci-  
uium, & vtilitate victorum: quorum aliqui illius  
auxilio

auxilio soluti. Conciones Quadragesima frequentissimæ fuerunt, magnaue animorum salus consecuta. permouit ea res auditores, ut promouerent templi ædificationem: promissi aurei bis mille quingenti, & iam contribui cæpti. collata præterea multa suppellex, & lauta.

**I N V A L E N T I N O** Collegio ad scholas Theologiæ duas, accessit Casuum conscientia, magno concursu audientium.

**G A N D I E N S E, C A E S A R A V G V -**  
stanum. Bilbilitanum Collegia.

**C O L L E G I V M G A N D I E N S E**, hæc quoque anno, tum vrbi ipsi, tum vicinis etiam oppidis, seu templum spectes, seu gymnasium, visui fuit. Templum porro eximia Ducis liberalitate ædum, dono admirabili, particula sanctissimæ Crucis, quam includi iusserat in cruce e solido argento: Ea a templo maximo ad nostrum delata est supplicatione per celebri, ingentique lætitia totius ciuitatis auxit diei celebritatem magna uis cultorum poematum pro templi foribus affixa. Gemina fere pompa, parique lætitia, multas reliquias Sanctorum in ipsa theca ingentis pretij, Ioannes Ducis frater, eius in nos beneuolentiæ æmulus, curauit perferendas. ex eo maior religio ciuium, atque erga nos obseruantia. Duo, qui per quinquennium facta reconciliatione amicitia dissimulauerant odium, vno e nostris pro-

curan-



curante in gratiam penitus redierunt, simulatione  
discussa. incundum id spectaculum ciuitati fuit. alter  
item abductus a pertinacia persequenda iniuriæ,  
quam ab inimico acceperat: eamque ob causam hic  
ex carcere liberatus, pari sedulitate, vir magna clari-  
tutine generis, ad frugalitatem: & peiore fama  
quam forma mulier vna, atque altera ad amorem  
pudicitie reuertit. Discipulorum numerus magnus:  
ex ijs non pauci liberiori vitæ Religiosi præopta-  
runt.

AUCTVS CAESAR AVGVSTAE  
confessiones excipientium numerus auxit numerum  
confitentium. missi diebus maioris ieiunii quattuor  
Sacerdotes in vrbes huius regni duas, magno com-  
modo illarum: institutum in altera Sodalitium ad-  
uersus lasciuiam iurisiurandi: persuasum optimati-  
bus, vt vicissim diebus singulis carcerem lustrant,  
inopesque reficiant cibo. alijs præterea temporibus  
anni, quattuor alij in varias partes dimissi, acer-  
bissimis odijs dissidentes duo, reconciliati: horum  
alter non multo post generalem Confessionem amisso  
linguæ usu decessit. pacatus vir alius omnino turbu-  
lens oratione nostrorum. quodam in oppido inuen-  
ta medicina tollendo iriurando, vt quicumque  
audierint temere iurantem pueri virique, in Dei  
laudem certatim prorumpentes ruborem incutiant  
homini, & pudorem afferant sacri nominis violan-  
di. Ceterum in vrbe tripartita beatae Virginis So-  
dalitas pietate certat, & Christianis officijs. res  
etiam Collegij vineto aucta, & oliueto.

**BILBILI** adolescentes duo in Societatem  
adsciti.

**DOMVS. PROBATIONIS. TAR-**  
**raconensis & Collegium Bar-**  
**cinonense.**

**C**ONCIONANDI munus in templo ma-  
ximo, quod antea Franciscanorum erat pro-  
prium Dominicanorumque, sponte Cleri & ciuita-  
tis, cum Patribus nostris communicatum: nec sine  
fructu: exceptæ confessiones plurimæ: compressa  
mala iuuerata, & repressa nascentia: muliercu-  
la duæ dissolutæ, ac perditæ, cum ad eadem nostram  
diuino instinctu venissent, se ad bonam frugem re-  
cepere. Archiepiscopus nostris utitur: eorumque  
opera effectum, ut segregati quidam a communione  
Fidelium, sese pastori suo demisse subiicientes, ab  
eoque recepti peramanter, ad Christi septa reuertere-  
rentur.

**BARCINONE** Maria Manriques & De-  
lara Ducum Naiara filia femina spectatissima, &  
antiqui prorsus exempli, fundatrix Collegij, cum  
annorum esset trium & septuaginta, e diuturno mor-  
bo ac difficili, quem sane quam patienter pertulit,  
ad Deum, cuius amore præcipue flagrabat, ut con-  
fidimus, euolauit: reliquit nobis aureos annuos quin-  
gentos, ex aliorum præterea testamentis duo mil-  
lia ad Collegium peruenierunt. His atque talibus  
subsi-

subsidijs domus amplificata, ad hospites, quorum  
visitata hic frequentia nauigandi occasionem expe-  
ctantium, accipiendos. celebrantur scholæ quam ma-  
xime. litterarium certamen obitum magna cum lau-  
de. ingens e concionibus fructus. extracti multi e  
cano vitiorum. adolescentulæ duæ immodicum or-  
natum corporis ad animi transtulerunt, a sæculi æstu  
ad religionis portum appellentes. habitæ conciones  
ad prostitutas, & earum aliquæ ad studium virtutis  
erectæ: prælitum sollemne officium valetudinario,  
carcerique. hinc magna in nos caritas multorum;  
cuius ope effectum, vt ciuiles motus duo sedaren-  
tur, ituri in periculum ciuitatis. nobiles viri duo a  
mutua cade deterriti. ex ijs, quos educat Sodali-  
tium Deiparæ, duo in Societatem nostram nomina  
dedere. Episcopi in nos amor minime vulgaris: eique  
respondemus officijs, quibus possumus. supra alias  
Catechismi explicationes, eò rogante, additæ duæ ad  
confusam plebem videlicet instruendam. instituun-  
tur præterea initiandi sacris, destinatiq; confessio-  
nibus audiendis. per duos menses hoc officium te-  
nuit. obita etiam hæc diœcesis aliæque conterminæ  
notabili cum fructu. Ausetanus antistes suum lu-  
straturus agrum præmisit e Nostris duos ad animos  
præmuniendos: & frugifera tum illa præcurso, tum,  
quæ sequuta est in populofo quodam oppido, bime-  
stris commoratio fuit. Ceterum res accidit omnino  
admiranda. quam paucis exequemur. Turca Cirten-  
sis, cum annorum esset quadraginta captus a Chri-  
stianis, & a præfecto classis regie, Fundatrici no-  
stræ

stra dono datus, decimum iam annum libertate caruerat: cum interea ad Christi fidem aspiceretur voces cohortantium: perductus est & in Collegium, irrito euentu: sed tanta hominis perinacità maiore quadam machina erat perfringenda: igitur nocte quadam aliud agitati obiecta species Christi totum cubiculum fulgore suo illuminantis, & audita vox Christianum fieri iubentis: edicebat ei nomen, precipiebat Sacerdotem, cuius iussui obtemperaret: quem cum ille ab vrbe diceret abesse (& aberat) responsum est postridie rediturum. nec vanum fuisse admonitum, & reditus Sacerdotis, & mutatus Maumetani animus, & eiusdem docilitas ad percipienda Christiana mysteria, & assiduus hominis fletus identidem memorantis illustre visum, ostendit.

### GERVNDENSE COLLEGIVM, & Balearicum.

**G**ERVNDA tres excusiones fructuosa extiterunt. Prima quidem Dortusam Episcopo postulante: hic tradita Christiana doctrina non pueris solum, sed populo vniuerso: conciones deinde habitae tanta approbatione, vt discedentibus Nostriis, sibi a lacrimis non temperarent, reuersionem orantes. Altera in Gerundensem diocesim. Postrema vilissima. Adiunxit voluntatem popularium Nostrorum modestia, qui cum in xenodochium diuerisissent, inde nullis vnquam multorum precibus abduci

abduci, neque ut acciperent munera, vlla ratione adduci potuerunt: igitur & Episcopo, & nobis gratia acta. in vrbe magnus fructus consentientium: viri multi, mulieresque, Religiosorum ordines: ex illis, nouem, Capuccinorum complexi. Cum premere-tur Collegium aere alieno, cogitabat de imminuendo per aliquot annos numero collegarum, scholisque claudendis: is rumor cum percrebuisse, ita percus-sit animos ciuium, ut vltro polliciti sint as alienum nostrum dissoluere: & constituerint annuos redi-tus, quibus decem, duodecimve scholastici susten-tari possint. ergo inchoatum Philosophiæ curricu-lum, cui dant operam vndecim e Nostris, & exter-ni non pauci. gratum id ciuitatis, quæ & viam publi-cam concessit Collegio extruendo, eiusque angustiis dilatandis.

BALEARICI Collegij & Philosophiæ scho-la, cui factum initium, & vetus Humanitatis, ex-cellunt. Die assumptæ Virgini sacro epigrammata discipulorum ad templum maximum delata, affixa-que in Sacello Deiparæ, mirifica gratulatione Episco-pi, & ciuitatis. Ex auditoribus non pauci in varias Religiosorum familias accepti: multi expetunt no-stram, & expectant. Quidam ferocis alias, ac tur-bidi ingenij, cum ab inimico alapam accepisset, ma-xillam alteram obtulit, secutus Christi præceptum, adeo iniuriam non iniquo animo tulit. Coemptæ ædes Collegio extruendo acribus inijs: lætissima quædam femina tria aureorum millia moriens lega-uit: nec deest liberalitas ciuium reliquorum.

## S A R D I N I A.

**S**ARDINIA Aragonia addita numerat locis quinque (accessit enim proxime Alqueriense Collegium) socios quattuor supra centum. Duorum obeuntium vicem explevere decem.

COLLEGIVM SASSARITANVM  
& Caralitanum cum Domo  
Probationis.

**I**N COLLEGIO SASSARITANO cum augeret quotidie cætus Parthenius, cogeminavit. Hinc oblatis Probationis Domui quinque: ex eorum numero theologus Sacerdos vnus, Aeris restitutiones, pauperum victorumque procurationes, morum correctiones, dissidentium pacificationes, vt alijs annis: vna super ceteras, duorum virorum nobilium huius regni facile principum. Templi, Collegijque edificatio procedit impensis hominum piorum. excursum in multa loca non inutiliter. Alquerium maxime: vbi multi vtriusque sexus, & inter se, & cum Deo in gratiam rediere.

**S**UB INITIVM anni cum Caralitanus antistes venisset ad urbem, exceptus a ciuibus ipso ingressu perhonorifice pulcherrimo dramate, & ad  
capita

capita viarum fere omnium, varijs carminibus, singulari artificio atque ingenio vnus e Nostreis. Episcopus porro ipse Nostrorum opera libentissime utitur ad vtilitatem animarum. eorum concionandirationem de fructu magis, quam de plausu laborantium vehementer probat: cum illis egit, vt ter hebdomada in templo maximò parochis, clericisque explicarent quæstiones de officijs Christianis, in suburbana oppida excurrerent: & fuit vtrumque consilium quamplurimis salutare. aliquorum odia sepulta: quamquam in vrbe, patris, & filij, vtriusque dynasta reconciliatio eo admirabilior fuit, & iucundior, quo erat difficilior, & perniciosior meuebatur futura. Caralitani studium amulatur Episcopus Vsellensis Carmelita, quo nihil fieri potest nostri amantius: ad diocesanam synodum duos e nostris Sacerdotes euocauit, & ab altero orationem haberi voluit. Collegium nostrum, quantum quidem pro suarum tenuitate facultatum potest, adiuvare non desinit: cui etiam vasa aliquot argentea, resque alias donauit, ingenti significatione caritatis: similem experti sumus aliorum humanitatem, eorum præcipue, qui Nouitium vnum mortuum hoc anno, cognatione attingebant. Iam de pauperibus, de custodijs, de ægrotantibus communia silcantur: quamquam hoc postremum tale est, vt procuratores xenodochij grauissimam sibi fore testentur illam procuracionem, nisi a nostris adiuuentur.

CETERVM CARALITANA  
vrbs, vt dictam est paulo ante de Sassaritana, quinque  
R.                      adole-



adoleſcentibus auxit Societatem : ex his vnus magnis opibus, ita habuit matrem viduam, cui erat vnicus, aſſentientem conſilio, vt ad nos ſit ingreſſus, ab ea primum aditu, ianuæque patefacta : & collaudauit enim illa filium, impulitque, ipſique a noſtris introitum impetravit. eſt autem hic Domus Probationis tribus ante annis a tyronibus habitari cæpta: vbi & veterani aliqui tertium annum explent. Eſt & aliquis Domui prouentus, quem auctiorem propediem ſperamus fore. Nonnulla item deriuatur vtilitas in proximos, propter amplitudinem vrbs magnam partem a Collegio remota.

IN ECCLESIENSI Collegio inſtituuntur pueri, Caralim deinde, quæ vrbs eſt proxima, ad grauiora ſtudia tranſmittendi.

### ALQVERIENSE COLLEGIVM.

**A**LQVERIVM vna eſt e maritimis Sardinie vrribus, ſalubri calo, ſeraci ſolo, recipiendis nauibus opportuna, proptereaque, negotiatorum Hispanienſium Ligurumque in primis nobilitata frequentia. Hic magna olim virorum nobilitas, & copia : nunc vaſtauit fere omnia peſtilentia aliunde inueſta : & redire cæperunt incolæ quinquennio ante : ſed, quo ſit res loco meliore, Episcopus Noſtros accerſit : ierunt menſe Iunio, nec contemnendis omnino ſecundis certe mitis : perducti ab antiſite frequentiffimo comitatu ad templum, vbi, poſt ſollemne Sacrum decantatum a Canonicis, ſermonem habuit  
ad

ad populum Pater, qui gerit vices Prouincialis, expo-  
 suitque institutum Societatis: deinde orationem La-  
 tinam is, qui erat eruditurus adolescentes: hi statim  
 cōuenere octoginta. data paulo post tragicocomædia,  
 non solum cum voluptate spectatorum, sed etiam cum  
 fructu: aliqui enim, atque in his mulier, fêto exem-  
 plo aliorum, qui dabant pœnas impietatis suæ, sa-  
 pientiores vere esse didicerunt. e schola statim pullu-  
 lauit Congregatio sanctissimæ Dei Matris, atque in  
 Romanam inferi exoptat. In ciuitate ipsa mirabilis  
 fructus e concionibus: pacati animi: mores  
 emendati: adiuti pauperes: Sodalitium  
 sacrosanctæ Eucharistiæ, quod pes-  
 sum ierat, erectum. Hæc non  
 parua sunt, vt hisce prin-  
 cipijs: sed speran-  
 tur deinceps  
 maiora.

# P R O V I N C I A T O L E T A N A .



**T**OLETANA Prouincia diuisa  
est omnis in Domicilia quattuordecim,  
continet socios quingentos : in  
Toletana Professorum Domo quadraginta septem : In Collegio Madridiano septem & sexaginta : In  
Complutensi cum annexis Residentijs quindecim supra centum : In Murciano quadragintaquattuor : In Placentino tres & triginta : In Carauacensi viginti : In Huelensi septemdecim : In Ocaniensi viginti-  
quattuor : In Bellomontensi duodeviginti : In Concheni quindecim : In Talabryensi vnde viginti : In  
Toletano tredecim : Totidem in Securitano : In Domino Probationis Villaregiensi quinquagintaquattuor . Tredecim e vita migrarunt . Ad Societatem  
venerunt viginti duo .

## T O L E T A N A P R O F E S S O R V M Domus & Collegium Madridianum.

**S**ACRAM supellectilem auxit vir nobilitate ac religione excellens Canonicus Ecclesie Toletane aureis quadringentis : eleganti insuper veste, vasisque argenteis, quibus ad rem diuinam utebatur, testamento relictis . Pium Sodalitium , e Sacerdotibus multis, virisque nobilibus , captiuorum  
subsi.

*subsidio institutum : aris alieni facta sæpius restitutio: concubinas amandauere nonnulli: nec defæcere qui toto anno confluerent in templum verberibus corpori castigando. Missi de more extra urbem Sacerdotes decem, redieruntque totius vitæ confessionibus pluribus exceptis. Quodam in oppido, feria quinta maioris hebdomadæ, viri principes vetus odium osculo sinierunt. sed & femina primaria mariti, & pater filij, eadem intersectoribus remiserrunt: domus quædam officina turpitudinum claustra: pellices exactæ: aliæque præstitæ, quæ & me tacente intelligi possunt.*

*MADRIDII conciones habitæ continenter a quattuor e Nostriis pluribus in templis: nec raro ad Regem, sororemque eius Augustam seorsum. auctæ scholæ discipulis centum, vt iam sexcenti classibus pæne non capiantur: magnus omnium progressus: sed, qui e Sodalitio Parthenio, antecellunt: reuertit ad suos dominos pecunia, quam fraudus interuerterat: femina aliquot: e cæno libidinum emersæ. Missus quoddam in oppidum Sacerdos, strenuam in extirpandis vitijs, inferendis virtutibus, operam nauauit. Congregationem Deiparæ instituit addita lege mensuræ communionis: tanta hominum frequentia, vt, in oppido non ita magno, quingenti numerentur. Idem ad vicinum aliud euocatus, dissidia publica, rixarum semina, compescuit. Ceterum & Collegio addita Cænatio per ampla mille aureorum impensa: & vberes piorum liberalitate elemosynæ suppoditantur.*

COLLEGIUM COMPLUTENSE  
& Murcianum.

**I**N COMPLUTENSI tres morte amissi, admissi tredecim in Societatem: atque ex ijs undecim adolescentes, pereruditi litteris, & maxima expectationis. Missi in Indiis ad Occidentem tres, unus ad Orientem. Diebus maioris ieiunii se in ad nostram diuerberarunt ad octingentos: in meditationibus exercitiis sexaginta, plures futuri nisi locorum angustiis exclusi fuissent. Diebus dominicis refecerunt Nostri corpora eorum, qui erant in carcere, cibo, animasque doctrina. In vicinos pagos fructuose viginti excurrerunt. Prædium cui a Iesu de monte nomen est, cisterna auctum, horto, multisque cubiculis, ut per æstatem in eo rusticari ad septuaginta non incommode possint.

**I**N MURCIANO Sanctorum ossa sunt collocata per celebri pompâ frequentique, quam infulatus claudibat Carthaginensis antistes. auxere letitiam ingentem adolescentes dialogo perelegantibus carminaque Hebraica, Græca, Latina, Hispanica, in templi parietibus affixa. Generali Confessione expiarunt animum trecenti: nonnulli genere iuxta & scelere nobiles ad optimam frugem conuersi: quidam colaphi in foro accepti iniuriam percussori remisit. Nostrorum rogatu, germani fratres duo, inter quos iræ olim implacabiles, in gratiam redierunt: propinqui item duo, cum mutuis accensi odijs, quæ inter  
proxi-

proximos solent esse acerrima, vterque alterum homicidij inculpasset, retractatis criminibus, & reconciliata amicitia, damnationem capitis euaserunt. plannus quidam cum imposuisset sodali suo atrocitatem criminis, damnatumque pœnam sequi oporteret, vt igne cremaretur: de Nostrorum consilio adductus est ad accusationem in iudicio reuocandam: quamobrem patefacta lux veritatis: magnoque ciuitatis gaudio, disiecta calumnia nube, innocens liberatus. Numerus sodalium beatissimæ Virginis, & studiosorum indies augetur: nec defuerunt ex ijs, qui expetierunt Societatem, relictisque humanis rebus, ad diuinum obsequium in cœnobîa properarunt.

## COLLEGIVM PLACENTINVM & Bellomontense.

**P**LACENTINÆ in gymnasio discipuli trecenti. Placentinus antistes, præsulque Curiensis, erga nos valde affecti. Vtriusque diœcesim sex nostri Sacerdotes pro tempore lustrarunt: quæ ab illis gesta, etsi multa magnaque, quoniam tamen sueta & communia, sileantur.

EX BELLOMONTENSI Collegio, post Philosophiæ Curriculum, ad Iaponios vnus, ad Mexicanam Prouinciã tres, summa ipsorum voluntate profecti. Discipuli omnino sexcenti. Decima eorum pars se Deo consecrauit: ex his duo in

nostrum ordinem adlecti. Vltimo damnandus supplicio, etsi iam diu, ut ne perciperet salutis sacramenta, in recusando perstabat, victus oratione Nostrorum, & alacri animo fecit quod negabat, & forti pertulit quod debebat. Cum duo e Nostris de more peregrinantes, opportune, ut in quosque incidere, ad expiationem peccatorum hortarentur, deterruerunt duos a cogitatione homicidij, ad quod una iter intenderant. Fundatrix auxilij templi instrumentum cruce, acerra, lipsanotica, ex argento, alijsque rebus ingentis pretij.

## CONCHENSE COLLEGIUM

& reliqua.

**C**ONCHAE viri primarij ad amicitiam reducti: reddita veris dominis aureorum duo millia: muliercula sex quæstum corporis cum matrimonio mutarunt.

**TALABRICAE** discipulorum confitentiumque numerus auctus.

**IN OCANIENSI**, Huetensi, Toletanoque Collegijs idem. In Ocaniensi hoc amplius, propter Sodalitatem, in qua iam censentur centum & quinquaginta.

**IN HVETENSI** mira omnium letitia pacificati viri nobiles: quod saepe alias tentatum erat a multis, maiore conatu, quam effectu. Vi concionum a contubernio pellicum nonnulli ad meliorem vitam traducti.

I N



IN TOLETANO. *supra quadringentos erudiuntur discipuli quinquaginta: omnium pietatem admiratur ciuitas, eorum magis (non pauci fuerunt) qui Religiosum viuendi institutum sunt amplexi.*

VILLAREGII femina erat multis illecebra peccandi: hæc cum admonitu Nostorum emendasset vitam, primum bonis gaudio, mox cum Christiana cum morte commutasset, admirationi omnibus fuit.

IN CARAVACENSIS Securitanoque, eadem pene, quæ in alijs. Sed in Caruacensi, quoniam obiit virgo, quæ apud nos Sacramenta frequentabat commemorabili exemplo, de ea, quod incundum erit auditu, aliquid attexam. mirum enim est quibus eam artibus, & sutelis oppugnarit diabolus. primum quidem vt terrorem inijceret, serpentem terribilissimum induebat, dein canem: ad postremum obtulit se humana specie veste ad talos demissa: eamque a frequentia precum, & Sacramentorum, vehementer dehortatus, saltem vt a Nostis abstinere, admonuit: alterum enim se Sacerdotem daturum magis idoneum. persæpe eius vocem clarissime exaudiebat. Cur tenerum corpusculum inedia conficis, & vigilia: cur atteritur flagris & cilicio interiore? frustra hic omnis tibi consumitur labor, infernis cruciatibus addicta. Cui illa. Quid me futurum sit, vbi expirauero, Deus viderit: ipsius opus sum: ego quidem, dum spirabo, in eo sperabo, & hoc laborabo vnum, vt illi seruiam. Quin & aliquando filium Rosarij, quod habebat ipsa in manibus

*vi correptum rupit, ut calculi dispergerentur: increpuitque atrociter, ne amplius vteretur. sacras præterea cubiculares imagines digito commonstrans tolli iubebat: ubi mollia non processerunt, erecto enim semper, & constanti animo fuit virgo, minas adhibuit, & manuum intentus: sed hæc etiam signo crucis, aqua lustrali, & Iesu nomine inuocato eludebantur. redibat tamen veterator ad irritos assultus: donec tandem virgo assidue trium annorum dimicationi magnum diem imposuit, cum morte vicit. Eius corpus cum propter altitudinem niuium efferri non posset, per triduum domi iacuit exanimum, nulla tabe, ne minimo quidem li-  
 uore, corruptum: color quoque non destituerat vultum: & teneritudo carnis, ut ceruix, manus, brachia facile  
 flecterentur, quocumque conuerteres, eadem manebat.*

# B O E T I C A P R O V I N C I A.



**D**E HAC NIHIL accepi generatim, nisi adiunctos nobis (nisi fallor) sedecim, vnum morte creptum.

HISPALENSIS DOMVS PRO-  
fessa, & Collegium.

**N**ON IN TEMPO Nostro solum, sed & in alijs, compitis etiam, plateisque, ad custodias item publicas, & ad triremes, si quando hic sunt, concionamur frequentes. valescunt interea vsus sacramentorum; & dissoluta multorum amicitiae reglutinantur.

**CONIUNGITVR** in Collegio, gymnasioque, vt par est pietatis studium cum ardore discendi. e Nostreis, qui tertium quartumve annum Theologiae operam dederunt, vicalim erudiunt plebem. Vnus praeterea Sacerdos pueros in publicis scholis, ad ea, quorum cognitio est animae necessaria. Doctrinae Christianae instituta Congregatio inter ceteras nobilis. conueniunt in gymnasium sodales diebus festis & instituuntur caelestium praeceptorum disciplinis. Externi ad nos venitant nongenti: & tum omnes, tum maxime, qui se beata Vir-  
gini

gini dicarunt (ij sunt circiter nonaginta) in timore Domini iecerunt fundamentum sapientiæ. hi, egros in ualeudinario, victos in carcere, adeunt, iuuantque, rudes obuios docent, at temere iurantes coercent. Ex hoc gymnasio, decem (e quibus unus, dissuadentibus multis, & parente mirum in modum altercante, singulari exemplo explorata constantia est) sex e Sodalitio, in Societatem venire: in alias Religiosorum familias, fere septuaginta. e Nostreis quinque in Indiam profecti. De rebus Theologicis ter, bis de Philosophicis est publice disputatum. declamationes a rhetoribus sapius habitæ. Quotannis in templo maximo, ijs, qui scribenda oratione, pāgendove carmine ceteris antecellunt, proponuntur præmia: magnam eorum partem hoc anno discipuli nostri tulere. sed insignis omnino supplicatio non est prætermittenda. Ea decreta in apparatu bellico numini placando. adolescentes e cætu sacro Maria Virginis, eius imaginem præportabant candenti vexillo: purpureo, effigiem Sancti Herminigildi (a quo nomen Collegio nostro) reliquum agmen discipulorum: Nostri Christum affixum cruci pulcherrimo ordine præferebant. mille interim faces faciebant conspicuam pompam. ea totam urbem non sine admiratione delectauit. Nec desuere ex hoc Collegio missiones nostris laboriosa, utiles oppidis, ad quæ mittebantur. pax restituta inter multos, inter duos præcipue, qui populum diuiserant. vir etiam, Nostreis hortantibus, consilium interficiendæ uxoris abiecit.

GRANATENSE COLLEGIVM  
& Cordubense.

**P**RÆTER forenses conciones, & vſitatas  
noſocomiorum curationes, carcer vnus, atque  
alter, alternis menſibus apud nos peccata conſiten-  
tur. diebus feſtis obeuntur mane compita: & quiſ-  
quiliæ plebis, quibus res diuina nulli curæ, eam vt  
audiant, adducuntur ad templum fructu non con-  
temnendo: offenſæ complures Noſtrorum rogatu  
remiſſæ: expeditiones multa in adiacentes populos  
ſuſceptæ. Sed emicuit Complutenſis. Duo Sacerdo-  
tes huc miſſi: cum permagna hominum multitudo  
conſlueret cauſa confeſſionis; viros vnus, alter mu-  
lieres audiebat conſitentes, vt reſpirandi locus vix  
eſſet: prauæ aliquot conſuetudines abolitæ: inter  
has illa, qua incedebant mulieres velata parte oris,  
vel quia ſic putarent decere, vel ne ſatiarent aſpe-  
ctum. vna concione puellæ duæ tanto amore virgini-  
tatis incenſæ, vt nec matrum blanditijs, nec pã-  
trum minis potuerint a ſuſcepto religionis propoſito  
abſtineri.

**C**ETERVM templo peramplo & capaci ex-  
trema fere manus impoſita. eſt illud è ſolido ſaxo,  
exceptis fornicibus ſacellorum: & eſt iam ſacris  
faciendis dicatum: vt fuit ex æde veteri, inſigni ap-  
paratu, & notabili celebritate, frequentiaque ci-  
uium præcipuæ nobilitatis translata Euchariftia.  
Magno erat in ære alieno Collegium, reſque eius  
ſumi-

familiaris angusta: sed Deus iniecit mentem pecunioso mercatori, cui nobiscum nulla familiaritas: is sex aureorum millia cum dedisset sponte, collaudata videlicet nostræ vitæ integritate, aliosque adiuvandi diligentia (sic enim dicebat) satisfactum est creditoribus nostris.

C O R D V B E N S E Collegium celebrant discipuli mille. Philosophiæ curriculum inchoatum magna frequentia. Theologica theses ter defensæ. ad noua impositum fastigium: breui illuc sacra deferentur. compita, ergastula, nosocomia, in sua quæque genere non neglecta.

## COLLEGIVM MONTELANVM & reliqua.

M O N T E L A N V M Collegium Domum Probationis adiunctam habet: ita & veterani intendunt se in utilitatem proximorum, & ad idem exemplum tyrones informantur. sacrosancta mysteria obeuntur a pluribus: & quidem Pentecostæ, ex occasione iubilæi, communicantes numerati sexies mille. Hic manet mos aliquot annorum vsu receptus, ut quotidie clerici aliquot, virique nobiles veniant in Collegium, ubi secundum lectionem librorum spiritualium, promitur ab vno e Nostris exemplum e vitis Sanctorum, sermoque adiicitur rei ac tempori opportunus. compertum est eam rem esse pluribus adiumento.

Quod

Quod etiam dicendum de excursionibus ad loca suburbana. Sed hæc, atque talia, nemini esse debent ignota.

EADDEM DE MALACENSI. Seligam tamen rem vnam e multis. Præfectus classis cum Prætoræ urbis de iurisdictione contendebat, lisque erat in graue adducta discrimen, & ut videbatur, non iure, sed ferro, & multorum cade finienda: visum est Deo, ut Nostrorum interuentu componeretur.

MULTVS SIM, si in Gaditano de doctrina Christiana circumforanea, de vñitata concione diebus festis, de multiplici missione, de Nostrorum commoratione ad naualia, militarem propter, & nauticam turbam, deque muneribus similibus disseram. Cum Episcopus venisset in Collegium exceptus est a discipulis dramate aduentitio, eamque rem ipsi, cinibusque, acceptam gratis animis ferunt.

IN XERENSI, Marcenensi, Sedeque Eccizensi eadem scititata.

DE TRIGVERENSI hoc amplius. In Andeualos excursus. hi, oppidis viginti continentur, rudes, & egeni rerum, sine quibus animæ salus acquiri non potest. positum hic trimesire spatium maximo fructu popularium: paces factæ, iniuriæ remissa, præsertim a quattuor, qui persequabantur eadem fraternam.

IN VAEZANO Theologiam duo profitentur, bisque de ea, Episcopi, cinium, Professorum.



rumque publicorum, qui frequentes aderant appro-  
 batione disputatum. semel quot hebdomadis in pu-  
 blicum carcerem, itemq. in valetudinarium itum est.  
 magna cum utilitate victorum & aegrotantium.  
 hoc ubi primum est animadversum a discipulis pu-  
 blicæ Academiæ, conuenere ex ijs multi: eademq.  
 officia præstare excitati Nostrorum exemplo. ex ijs  
 frequentant Collegium amplius trecenti voluntaria  
 verberatione corporis castigandi. Diebus con-  
 secratis Aduentui Domini, vernoque ie-  
 iunio, duo Sacerdotes Vbedam de-  
 stinantur proxime consecu-  
 tus est tantus animo-  
 rum motus, vt  
 Collegium  
 Vbedani fundaturi viderentur, nisi  
 difficultas temporum mo-  
 ram cupitis affer-  
 ret.

# PROVINCIA MEXICANA.



**DESCRIPTA EST MEXI-  
CANA** Provincia Collegijs  
quattuor, Nouitiorum præterea  
Domo, Seminario, & quattuor Re-  
sidentijs. Socij ea per loca centum  
oetoginta duo. Reliqua ordine persequemur.

**MEXICANVM COLLEGIVM,**  
Seminarium Sancti Ildefonsi,  
& Sedes Tepotzotlana.

**IN COLLEGIO MEXICANO**  
oetoginta: ex his multi difficultatem Indicæ lin-  
guæ superarunt: quæ res, incolis, adempta per in-  
terpretes loquendi audiendique molestia, est utilis,  
æque, & iucunda. & certe, factum est, Dei beni-  
gnitate, ac labore Nostrorum, vt deprauata multa  
corrigerentur, infirma corroborarentur, lapsa eri-  
gerentur, colligerentur dispersa, turbulenta com-  
ponerentur. ea partim e rerum deinceps subiicien-  
darum narratione innotescunt. Adolescens litteris,  
& pietati nuntium remiserat, vt liberius voluta-  
retur in libidinum ceno: audita vnus concione emer-  
sit, ac ne prolaberetur iterum, abdidit se in viro-  
rum Cœnobium Deo famulantium. putabat alius dæ-

S

monum

monum præstigijs sibi licere quicquid collibuisse: hic etiam efficaci nostrorum oratione commotus, voluptates didicit Christianorum præceptorum ratione metiri. Quidam cum scelerum multitudinem occurrentium animo expellere non posset, quasi sublata spe veniæ, impia in Deum, & Cælites verba effundebat: respuebant hæc omnium aures: non adhibebatur misero æstuanti remedium: inspirauit Deus per vnum e Nostris auram salutarem, & fecit e turbido tranquillum: vt iam deteresa mentis caligine, studium maledicendi, verterit in benedicendi conatum. Mulier vrgentibus ærumnis ad tedium vitæ compulsa, tempore, locoque obseruatis, restem arripit, e trabe suspendit, collo aptat, propius nihil erat, quam vt iactaret in præcep corpus: subijce interea recordatio Mariæ virginis: tum vero lux animo reddita, & patefcunt demonis insidiæ: nec mora, accurrit ad Nostros: abiitque admonita promptior in spem meliorum, & firmiter aduersis, consilium inijcit viuendi. Mulieres aliæ a turpitudine famæ, & mortis periculo ad meliorem vitam, tutioremque retractæ: multorum iræ discussæ: educti obærat aliquot e carcere, Nostrorum videlicet opera, laxato debito, vel soluto, vel remisso. Damna- ti capite excitati sunt, vt voluntarijs verberibus publicam pœnam præuerterent, eaque res tum spectaculo multis, tum ipsis postea ad pie moriendum adinamento fuit. Quadraginta fontium ad triremes adacti: septuaginta leucarum spatio deni ducebantur circum colla, brachiaque onusti ferro: ijs duo e No-  
stris

stris opportuno alloquio, commeatu, victuque conuehendo solatio fuisse. Ceterum in pauperum hospitali domo, nostroque in gymnasio, ubi magistri nouem, Theologiæ tres, Philosophiæ duo, reliqui politiorum litterarum, quæ sint effecta, & si magna, omittimus scribere, quia maioribus obruuntur. Aethiopum cura non dimissa. In proprio eorum Sacello diebus festis, totiusque Quadragesimæ conciones habentur, a Sacerdotibus quattuor excipiuntur confessiones, a fratribus duobus explicatur lex Christiana. ipsi deinde integros fere dies ponunt nobiscum de rebus spiritualibus colloquentes: res profecto iucunda visu, & ad fructum animarum insignis. Superest ut de Indis aliqua ponamus. Sancti Gregorij templum est Collegio adiunctum: in eo numquam desinit haberi concio pomeridiana diebus festis: ubi postea desident homines pene usque ad vesperam perutili occupatione: sed tota Quadragesima tanta fuit auditorum frequentia, ut in acrio fuerit concionandum: etsi in plateis etiam, & comitis, quo confluunt plurimi, Catechismus exponitur. Pestilentia grassante confessionum exceptarum inire numerum haud promptum fuerit: ibamus sponte, vocabamur, expectabamur: tum superfluyente multitudine, agri in lectulis ad Collegium deportabantur, viatico, antequam communem inirent viam, instruendi, & firmandi sacramento extremæ Vnctionis: nec deeramus cuiquam, magno perinde caritatis exemplo, ut fructu. Hinc fit, ut Nostros ament Indi, ad eosque accedant fidenter, cum

rerum aduersarum remedium exposcunt. Domini-  
cum vero corpus tanta religione suscipiunt, tamque  
vbertim manantibus lacrimis, vt etiam acuerere pos-  
sint Hispanorum pietatem. Magna porro res vi-  
sæ, ac mirabiles, in ijs, qui ad nos frequenter ve-  
niunt gratia sacramentorum. De his pauca repo-  
nentur. In Indam virginem vir impudicus exarse-  
rat: eam cum muneribus non pelliceret, nec flecte-  
ret blanditijs, in ædes quasdam compulit, vi extor-  
turus quod aliter non posset. hic puella sola cum es-  
set, preces ad Deum intendit, nec frustra. sumpto  
enim virili animo, ac robore, eijcit ab se hominem  
importunum impetu violento: is paucis post diebus  
interijt. ab eius obitu quidam Sacerdos virginem  
conuenit, quærit, an agnoscat iuuenem (illum nomi-  
nabat) affirmanti. at iste, inquit Sacerdos, ex hu-  
manis ereptus est, vulnere sibi, eo die quo vitium  
tibi offerre voluerat, diuinitus inflicto: iussit orare  
te, vt sibi ignoscas, sumasque partem ipsius facul-  
tatum; remisit, & nuntium, & munus virgo ma-  
gni animi, ad Nostrosque, oculos suffusa lacrimis,  
& referens, ea quæ nuntiata fuerant, accessit. Se-  
quitur uita & mors cuiusdam mulieris, cui Franci-  
scæ nomen, prorsus admiranda. In oppido nata erat  
ab urbe Mexico procul: diuino instinctu Mexicum  
uenit: ubi cum esset, ad nostrum templum crebro  
uentitabat, in res cælestes, & utilitates proximo-  
rum semper intenta: animo tantummodo uita frue-  
batur, imbecillo corpore, quasi alieno, ac superua-  
cuo circumdata erat: Dei nomen assidue in ore, quem

unum in pectore, habebat: obiurgabat scelera acriter, castigabat vehementer, admonebat omnes officij sui: in nosocomio versabatur agrotis studiose inseruiens, quoad familiares eius morbi paterentur: ij autem usque adeo graues erant, atque acerbi, ut decem interdum diebus vix gustaret cibum. cum mens interea diuinis visis illustraretur, & perfunderetur gaudijs. quin etiam hoc aliquando narrauit: Incesserat me cupido pernoscenti in vindicandis sceleribus, quæ non expiata essent, vim diuinæ seueritatis: cum interea liberior animus, prostratum corpus deseruit, & memoranda mihi species obiecta. puerum conspicio elegantissima forma, vultuque letissimo, credidi Angelum custodem: is mihi blande arridens trepidanti, & quid agerem nesciæ: Sequere me, inquit, quod cupis ostendam: tum per deuium quoddam iter, & confragosum, ducit me in barathrum formidolosum sædumque, ubi plurimos excruciatos vidi pœnis infandis, dolore intolerabili, quem eiulatu testabantur. inhorruì. ab hoc tatro spectaculo deducor in campum amœnum, ac placidum, quo nullus vmquam, nec cælo temperatior, nec solo fertilior, nec florum varietate iucundior: & per viam constratam auro cum essem progressa, affulsit domus non humano condita artificio: aureis columnis sustentabatur, gemmaque radiabat: summæ nimirum pulchritudini, & maiestati debita: ut meæ me deformitatis, atque humilitatis puderet. hæc inter, aspicio virum diuinæ dignitate, & maiestate excellentem: agnouì terrarum,

rum, calique Rectorem; dominum meum: splendorem tamen non sustinui: & deieci oculos pudore victa: paulum cum sustulisssem: ecce tibi mulier incredibili forma, ornatu pulcherrimo, vestituque regali, scilicet Dei Mater, ac Vi. go, cui me, vel a primis annis consecraui: facem dextera ferebat late fulgentem: mox cum ad filium accessisset: Fili non dum, inquit, est tempus ut Francisca apud nos maneat, reuertatur potius ad munia, & accuret pensum: annuit filius parenti, in hique imperat reuertar ad custodiam corporis, simulque rudem gentem commendat doctrina Christiana initijs, bonisque præceptis imbuendam. Ea verba ita mihi hæserunt in animo, ut eorum nec obliuisci, nec meminisse, quin maxima afficiar voluptate, possim. Quin & memorabat in montis vertice oblatas sibi ades e crysallo, non absimile piaculari globulo, quem in Rosarium indiderat: auditos cantus suauitate vocum, & varietate modorum alternantibus choris longe iucundissimos. igitur ubi ad se redijt, quasi nihil egisset antea, secum ipsa certans, illuc intendit, ut expoliret rudes, & reduceret errantes in viam. Nempe intelligebat facere se, quæ dominus imperasset, sibi que eam causam producenda vitæ fuisse: id adeo vel ex hoc cognosces. Vir quidam erat in omne facinus promptus, &, quoniam latere diu scelera non possunt, apud omnes famosus. huius correctionem laborem suum, cum rata esset Francisca, ad eum venit: & diuino spiritu. Quousque tandem, inquit, abutere Dei clementia, quem ad finem

effre-



effrenis ista sese iactabit libido? numquam virtutem respicies? semper turpitudine delectabere? non metuis instantis periculum mortis? non tæterrinos Inferorum cruciatus, qui te manent, perhorrescis? expergiscere miser, expergiscere, & flagitiorum culpam confessione abole, infamiam mutatione vitæ: numquam sera fuit peccati pœnitentia. Durus adhuc ille, quantoque veriora exprobrabantur, acrius accendi, nec ferre muliebrem reprehensionem, increpare immo illam, & ni obloqui desisteret, minas intendere. Francisca nihil territa, uehementior insurgit, consumptisque precibus diuinam iusticiam, quod tardio rem infligit pœnam, hoc grauiorem, inculcat: impunitum nullum vñquam scelus fuisse. isque mentis ardor verba dicentis sequebatur, vt incenderetur, ipsa, inflammari que audientem: cui, & necessitas ostensa ab incerto mortis, & spes a Dei misericordia, & salus a confessione peccatorum. In his atque talibus sese mulier exercebat, sed cum videret deprauatione humanæ naturæ valescere illicita, & tardiora esse remedia, quam mala, ea cura ita penetravit animum, vt caperet tedium vitæ, & desiderium æternorum. cum hac cogitatione, vt ipsa cuiusdam rettulit, concessit in angulum cubiculi: dein ricta in lacrimas, voce supplex, Deum orat animæ excessum e corpore, abrumpat laqueos, laxet custodiam, ne polluant amplius aures, oculosque, tam improba hominum dicta, factaque: sed molestis soluta vinculis tota mente, atque animo insistam in laudes tuas. Intenta namini ea dum precatur, ce-

leri iactu non visa sagitta adhæsit ad præcordia, certo doloris sensu, cuius vi, atque acerbitate cum ad extremum usque viguisset integris sensibus, defungitur: illud supremum orans, ut vel pro foribus nostri templi corpus sepeliretur. Hac, quæ de Francisca accepi, promere animus fuit, ut non minimum oblectationis afferrent, & fortasse etiam profutura. nunc reliqua persequamur. In Sancti Gregorij templo constituta Sodalitas hominum, quorum, alia nulla cura, nisi ut bonitate, & beneficentia aditum sibi ad calum struant. inserunt amorem virtutis in multorum pectoribus, extrahunt vitia, subleuant egentes, custodias publicas adeunt, sustentantque, eorum uxoribus, cibos quos coxere, ferentibus: secundum hæc reficiunt sermonibus pijs. inuentus, qui conuocatis claudis, cæcisque idem faceret domi suæ. adolescens ab increpito patre vitæ dissolutioris acceptam alapam æquissimo animo tulit, nihil erga eum reuerentia intermissa. Alia huiusmodi de hæc piorum Congregatione memorari possent, nisi in rebus, quæ per se ipsæ intelliguntur, raperer studio breuitatis. Ceterum ex hoc quoque Collegio missi in expeditionem duo, ad oppidum, cui vocabulum Zumpauaca: exceptique ingenti lætitia, & gratulatione. a prima statim concione curio aperire nescientibus, & commendare ambigentibus, institutum Societatis: admonere eos, ne oblatam occasionem amitterent tantopere expetendam. uisus est principio frigere populus, & suspectam Nostrorum habere facilitatem: octiduo post depulsa suspicionis caligi-

caligine, veritas enituit: tantus deinde consensuum concursus ad eos est factus, ut pane obruerent audientes. multi distantibus e locis, ut interessent concioni (ea quater habebatur hebdomada) & obirent confessionem, cum vespere se dedissent in viam, in viciniore spelunca pernoctabant, diluculo venturi in templum. agnouit curialium feruorem curio, tantoque acrius accendit. Fuit mulier, quæ bi-duo ante perceptionem panis caelestis seruauit inediam, ut famelicum magis cum corpore animum ad satiantes epulas asferret. non defuere, qui cum antea numquam communicassent, accepto corpore Domini, fere statim feliciter expirarunt. Sed nihil æque declarauit fructum ab Indis perceptum aduentu Nostrorum, ut communis omnium dolor in eorum discessu. Fit enim natura, ut bona desiderata magis, quam possessa noscantur.

HOC TANDEM anno bonis initijs Seminarium institutum erudiendæ iuuentuti liberalibus disciplinis: nomen illi a beato Ildefonso. e plurimis, qui vel e centenis ducenisque leucis venere, centum delecti, qui ætate ingenioque magis idonei: ijs tredecim e Nostreis præficiuntur: atque ut paucis absoluiam, ad exemplum Seminarij Romani: ut iam nunc futuræ vbertatem messis e viriditate segetis coniectare possis.

DE SEDE TEPOTZOTLANA ne repetam illa, quæ proximis litteris, seligam vnum atque alterum. Superiore anno ingruit pestilentia agrorum contactu morbos vulgante: ea materia No-  
stris

*stris exercenda caritatis. instructum valetudina-  
 rium, interuisti, adiuti, curati, sepultique multi morta-  
 lium, magna superstitem voluptate, & utilitate de-  
 cedentium, excursus etiam de more. Quodam in op-  
 pido tota fere Nobilitas, præeunte Praefecto, atque  
 eius uxore, de peccatis totius vite confessa est. nec  
 defuerunt hoc etiam anno quædam miraculis non  
 absimilia. irrigat enim frequentibus aquis hoc re-  
 cens plantarium suum bonus agricola, dum succe-  
 scentes arbores corroborentur. Vnum breuiter collo-  
 cabo. Mulier quædam, ut sunt fere omnes natura ad  
 pietatem propensa, frequenti ad templum nostrum ad-  
 uentu, cælestia mysteria religiosissime usurpabat. Ea  
 vni e Nostris narravit, quiddam in familiari sermo-  
 ne, ad hunc modum. Grauiissime ægotabam, iamque  
 appropinquabam supremis, deserta ab omnibus, cum  
 puero æque affecto, socio solitudinis, & morbi: spem  
 omnem, ac subsidium in Deo habebam. Nam illi præ-  
 ces tuli non irritas. videre visa auctorem salutis cum  
 Matre Virgine, duobusque viris ignotis quidem mi-  
 hi, sed eius venerationis, ut facile Sanctos putarem:  
 aspiciebam altare adornatum supra humanum mo-  
 rem, in eoque Eucharistiam augustissimam: tum vox  
 audita. Surge, comede, inceptumque opus tradenda  
 mulieribus Christianæ doctrinæ, mox in calum a nobis  
 adducenda, feliciter exple. somnus me repente reli-  
 quit, & morbus. ea mihi causa frequentandi sacrosan-  
 cti mysterij, & explicandæ, quoad possum, mulieri-  
 bus, Christianæ legis præcepta. Et sane, non vanam  
 fuisse imaginem, eius vite, laborque, quæ, modica li-  
 cet*

cet virium, semper ad pietatem attentâ, numquam cessat in suscepto opere, declarat. In alijs etiam mulieribus, virisque apparuit virtus sanctissimæ Eucharistiæ, siue in perferendis contumelijs, siue in repellendis iratorum damonum, seu magis impudicorum inuenum, assaultibus. Sed hæc, iam Dei beneficio, apud mulieres Indas communia.

## COLLEGIVM ANGELOPOLITANVM, Vaxacensē, & Alia quædam.

**H**ISPANORVM CLASSIS fœde iactata, constiterat in portu huius vrbis, strage prorsus miserabili. vidisses agmina virorum, mulierumque: qui effugerant naufragium pallida facie, vultuque horrido, pauore fæne, penuria omnium rerum pene consumpti: quo magis fuit opus ad eorum subleuationem Nostrorū cura, atque industria igitur occursum vltro venientibus, repletisque iam valedudinarijs patuere principum domus: fomenta, cibi-que passim præbiti. Nostri assidere laborantibus, aurem dare consitentibus: illorum corpora, horum animos rescicere pabulo: incitare ciues verbo, & exemplo: gaudere inter eos orto certamine, vtrum illi magis sustentarent indigentes ope, an ipsi iuuarent consilio. Itum præterea ad lanificia magno fructu: & ad quadam oppida huius diæceseos: eorum nomina, Otumba, Almeria: hic coronati exceperunt Nostros: & fructuosius laboratum cum illis, quò diutius sacerdo.

cerdote caruerunt. curatum est, ut ne cuius audiretur confessio, nisi capita doctrinae Christianae memoriter recitasset: vtilissimum inuentum, omnibus confiteri enixe cupientibus: tanta apud hos reuerentia Dominici Corporis, ut vix dici queat, quanto cum horrore, & tremore ad illud accedant. quippe persuasum habent, si quis semel rite communicarit, eum amplius peccare non posse. Simili studio, officioque itum Plantzontlami oppidum, habent Indorum amplius centum millia: itemque Taslauzquitepec. Quae utrobique gesta, quoniam officia nostra nobis non possunt esse ignota, praetermittantur.

VAXACI tum ciuibus amantissimis vrimur, tum Episcopo studiosissimo nostrarum rationum: ea nobis calcaria ad currendum in salutem proximorum. Aethiops morti addictus cum adiuuaretur a Nostro, vario sermone fecit, ut num ablutus fuisset baptisate in incerto esset: igitur baptizatus praevia verborum cautione. Gymnasium Humanitatis denovo apertum sollemni caerimonia, latitiaque plurimorum. hinc fructus multiplex in pietate, & in literis. Adolescens ab impudica femina, a qua sollicitabatur ad stupram, sese proripuit pileo relicto: reiecit alter magno animo dona, quae offerebantur: cum adhiberet interim asperitatem cilicij, & seuitiam verberum, quo facilius corpus in officio contineret. multi ad Religiones varias appulerunt animum, non nulli ad Societatem: nec defuit specimen litterariae exercitationis. Missiones aliquot ex hoc Collegio factae: illa difficillima, & quod plerumque consequens, vtilissima,

ma, in prouinciam Zutupechenam: ea est arduo accessu, & culicibus infesta: ideoque Sacerdotibus caret: huc ierunt Nostri rogante Episcopo, qui eos ab se dimisit cum lacrimis, præmissis litteris per uniuersam diæcesim, ut benigne exciperentur. facilius est mente percipi, quam perscribi litteris, quæ illic ad Dei gloriam facta. Itum in oppida remota ab alijs situ, cultuque, ut vix homines agnosceres, nomine potius, quam re, Christianos. Illud mirabile, quod cum Sacerdos dominico die Quinquagesimæ timoris ne incutiendi, an diuino instinctu, prædiceret futurum, ut moreretur aliquis, ante Cineralia, & postridie, vnus, cui vita liberior, excussus equo obisset, capite ad terram afflictò: ita conuersi sunt omnium animi, id quod volebat, ad confessionem, ut vnus obitus videretur saluti quamplurimis fuisse.

E VALLISOLETANO COLLEGIO,  
Sedeque Veræ Crucis, messis vberrima, præcipue in Veræ Crucis, propter quadraginta narium Hispanicarum appulsum, & aliarum aliquot cladem, in ipso fere portu, & in conspectu ciuitatis. Missi præterea nonnulli ad populos longe remotos, eoque magis egenos rudimentorum Christianæ disciplinæ: sunt ad Albaradum flumen. igitur pro tempore edocti, & inuenta ratio, qua a peritioribus identidem rudiores instruerentur.



VADALAXARANA PASCVARENSIS,  
& Manillana Sedes.

**N**OVAE GALAECIAE Episcopus vehementer nobiscum egit, ut saltem duo Sacerdotes cum socio, secum proficiscerentur: eosque in vrbe habuit ad septem menses: ij concionibus habendis, confessionibus audiendis, ciuibus, clericisque imbuendis ad officia legis Christianae, lucris animarum persequendis, ita seduli fuisse, ut ipsemet Episcopus, Clerusque, decem aureorum millibus: vnus e canonicorum numero, alter e procerum, millibus vterque ternis, constituerint fundare Collegium: empirique redditus annui sociorum duodecim sustentationi: & iam Scholæ aperta. fructus e ciuitate re ipsa magnus: spe maior ex oppidis adiacentibus. sunt quidem Ethnicorum praeda assuetorum & bello: sed, Deo aspirante, quantavis asperitas mitescit. Missus hinc vnus, ipsos dies quadraginta addictos pœnitentia, quodā in oppido, alter multis obeundis locis, sex integros menses, labore quidem magno, sed fructu maiore consumpsit.

PASCVARI quidem Nostri vestigal nullum domesticum habent, verum ciuium liberalitate fit, ut e rebus necessarijs nihil desiderent: quo magis excitantur ad munia. Placata duorum rabies, alioqui non nisi alterius interitu finienda: exoratus vir, ut ignosceret vxori, quam morti destinauerat. Sed hic quoque, ut alij ante annis, miranda eueneret non-

nonnulla. Utitur enim Deus clementissimus miraculorum illecebra gentibus demerendis, ut Christiana Fidei vellibeat nomen dare, vel iuuet dedisse. Deiparae effigies in nostro templo, de qua proxime est scriptum, habet suam illam venerationem: nec frustratur vocatus piorum. Indam abductam a pulchritudine pudicitiae pellacia iuuenis, cum per quietem vidiſſet ſe ſiſſi ante tribunal Dei, accuſante diabolo, accepimus ad meliora conuerſam. Ceterum extra urbem, non pauciora: nec minora fortasſe. Excursus eſt enim ad Chichimecas, populos feros, armisque promptos: adiuti, auditiſque maxima illorum letitia, & commendatione diuinæ bonitatis. Inda mulier, falſis criminationibus damnata fuſtuarij, cum eam noctem, quam conſecutura erat dies pœnæ, conſumpſiſſet lacrimis, precibusque, conſpexit feminam in luce plurima, cingentibus latera alijs duabus eximie pulchritudinis: a qua firmata amantiſſimis verbis, & bene ſperare iuſſa: at ipſa, ubi eſſugit periculum, ſe totam diuino obſequio mancipauit. Indum in amorem pellicis ita effuſum, ut omnia hominum admonita deriſui haberet, Deus ita conuertit terrore iniecto. Ingentibus procellis effundebatur imber nocte intempeſta, cum turbidus nimbus incubuit teſto occultanti flagitium, & inter cæli fremitum, ac tonitrua, abruptis nubibus, ingeminante igne, ter vox audita: Conſige, interſice: ter cecidit fulmen tanto fragore, ac ſtrepitu, ut domum totam concuſſerit, horrendum in modum: illæſis corporibus, conuerſis animis ad ſalubrem pœnitentiam.

Ergo

Ergo Indus hac violentia victus. Maior adhibita machina ad Indam expugnandam. Hæc olim, cum quod facere, aut pati posset turpiter, luxuria, ac libidine, nihil infectum relinqueret, vnius e Nostris sermone resipuerat: sed postea, muliebri leuitate, seu inueterata consuetudine, animum ad scelera præcipitem non potuerat sustinere. igitur illi excitanda immisum a Deo admirabile hoc somnium. videt iuuenem multo conspicuum lumine, specieque humanum modum prætergressa: vestis illi candida, & Crux radians in fronte: ab eo, per abruptum iter tenebrisque obsitum ducitur in præaltam voraginem, qua nihil magis clausum ad exitus, nihil magis septum: vasta erat fornax, & , quod magis mirum, caliginoso igne: per malignam tantum lucem conspiciebantur quamplurimi volutati in flammis, cruciatu, formaque pænarum proorsus inenarrabili: audiebantur ploratus virorum, mulierumque, & plulatus ita horrifici, vt auribus ferre non posset: hunc locum, is, qui ducebat, Infernum vocari respondit: cum ire pergerent, venerunt ad lacum depressæ illius altitudinis, vbi in paludibus igneis multorum animæ varie torquebantur: cadebantur uirgis ferreis: adalligatæ ad equorum caudas in diuersa raptabantur: ex arboribus suspendebantur: aliæ vncis ardentibus impactæ veru torrebantur: nonnullæ flammabantur in scrobe effossæ: multæ laniatæ, lacera- taque iacebant, abiectæ ostentui: distinctio pænarum ex delicto erat: ita dicebat iuuenis, & locum esse purgandis criminibus post mortem. vbi emer-  
serunt

serunt e tenebris, locaque difficilia superarunt, de-  
 uenientibus in opacum iugum uiridissimi nemoris,  
 quod aether largior purpureo lumine uestiebat ( eas  
 facile existimauit esse beatorum sedes) aperit se illis  
 regia auro, gemmisque ad magnificentiam exculca:  
 ipsius in uestibulo pueri duo, ueste, candorem niuis,  
 facie, splendorem Solis superante: agnouit mulier fi-  
 lios suos in ipsa pueritia olim defunctos: ingredi si-  
 mul cupientem & complecti, aditu comes prohi-  
 buit, ut inquinatam, & adhuc uiuentem: & acce-  
 pta visio admonitionis loco. admirabilis profecto,  
 ut praedixi, & tanto magis, uti acceperam a com-  
 mentarijs Nostrorum, his animalibus tradenda. Ergo  
 haec de excursionem ad Chichimecas. Sequitur altera  
 difficilior, & amplior, in regionem uidelicet calore  
 intractabilem: etiam Decembri mense flammis  
 vomit, nebulis perpetuis abundat, montibus aspe-  
 ris, ac sterilibus clauditur, uenatorum animalcu-  
 lorum bipedum, & culicum ingentium ferax, quin  
 etiam crocodilorum, serratis dentibus, acumine, &  
 magnitudine formidandis, & quod mirum est, iu-  
 formis terra, atque horrida hominum ingenia non  
 efferauit. mites ipsi, ex cultique legibus, & aduer-  
 sum hospites humani nudi pectora, humeros pictis  
 linteaminibus operti: flabella in manibus plumata  
 laborioso artificio: neque enim lasciuit gens otio,  
 uarijs exercitationibus, uenatui praecipue intenta:  
 ceterum nefariis olim superstitionibus addicta: nec  
 ita pridem illata lux Euangelii: ebrietatem auersan-  
 tur sponte, seu quia infructuosa uites uina uix ad hi-

mēstre spatium ferunt. & exceperunt Nostros mē-  
 te benignissima, eamque ferentes vultu, ultro cadē-  
 tibus lacrimis, nec mendaci sermone testabantur :  
 adiecere opportuno munere instrumenta, leuando  
 calori, culicibusque abigendis : Statimque desiderio  
 emendationis uitæ ita æstuarē cœperunt, ut plus  
 animi calerent diuino igne, quam æstu corpora ex-  
 terno. laeti alacresque ad conciones ventitabant :  
 pœnitentiæ sacramentum vsurpant, crescente singu-  
 lorum ardore ex mutuis hortatibus, & exemplis :  
 praueniebant oppida adeunda nostrorum aduentum,  
 & preparatis ad confessionem animis, eos a quibus  
 audirentur inuitabant : erat videre viros cibarijs  
 onustos, feminas infantibus, excitos e locis longin-  
 quis cupiditate exoneranda conscientia : vt plexum-  
 que ad vicinos pagos intercluderentur aditus, mul-  
 titudine aliunde ingruente : & audiebantur ad mul-  
 tam noctem : quibus satisfieri non poterat, prose-  
 quebantur cateruatim, vel bidui itinere occasione  
 imminentes : igitur confessionem diligentissime exe-  
 quebantur : pridie Communionis illud erat omnium  
 negotium, illud studium, vt precatione, castigatio-  
 ne corporis, de rebus diuinis colloquutione, ad illam  
 aptiores redderentur. His rebus, atque talibus,  
 instaurata religio Christiana pene collapsa : damo-  
 num superstitione abiecta : impie deuotiones, & ma-  
 gicæ notæ interdictæ : multaue introductæ, etiam  
 post abitum Nostrorum, conseruandæ pietati : Vsu  
 enim compertum est, procliuitate humani ingenij  
 languere quamuis incensa mortalium pectora, nisi  
 iubin-

subinde foucantur.

IN MANILLANO templo iam ampliore, magna omnium letitia exerceri capta munera Societatis. Ioannes Piciechus vir religione & opulentia clarus, dux militiae domum nostram promissit, e lapide adificaturum: iamque oblata materia dimidium operis effectum. magna etiam ciuium erga nos beneuolentia: cui ipsorum causa suscipiendo labore respondemus. anno huius seculi octogesimo septimo festo die beati Michaelis operante Episcopo, sexcenti Eucharistiae mysticis refecti. hinc etiam nonnulla afferuntur relatu mirabilia. erit vnum instar mulierum. Mercator Ethnicus tenui lintre flumen traiciens, a crocodilo innaditur, deprimitur in vastum gurgitem, mox absorbendus: innocat ille in tantis angustiis Deum Christianorum: nec mora; duorum opera virorum, quos albatos fuisse dicebat, se extractum vidit e belluae faucibus, & locatum in sicco: memor beneficij lustrali aqua est tinctus, & cum duobus filijs paruulis Christianus effectus. Nec deerant similia in hac Sede, totaque Prouincia Mexicana, quae super narrata memorarentur, siue ludibrium oculorum, siue vera ea species fuit. Sed verebatur adium audientium res novas expectantium.

# P R O V I N C I A L V S I T A N I A



**C**ONTINET LVSITANIA  
nouem locis collegas triginta quat-  
tuor supra quingentos. Olisipone in  
Domo Professa, septuaginta duos, in  
Collegio quinquaginta, in Conimbri-  
censi centum octoginta tres, in Eba-  
rensi centum viginti septem, in Portuensi quin-  
decim, in Bracharensi vndetriginta, in Brigantino vi-  
gintitres, in Funchalensi quattuordecim, totidem  
in Angrensi, in Angolana Sede septem. In duode-  
cim decedentium locum succedere duo & quadra-  
ginta.

## DOMVS OLISIPONENSIS.

**M**AGNO THESAURO aucta hoc an-  
no, ornataque aedes nostra, reliquijs, quibus  
haud facile inuenias superiores. in his spina e coro-  
na Domini, particulaque Sanctae Crucis visenda ma-  
gnitudinis: Sanctorum virorum capita vnum, &  
viginti, brachia sex, ossa pene innumera, aposto-  
lorum, martyrum, virginumque, argenteis inclu-  
sa thecis, mira operis varietate, & splendore gem-  
marum. Ea causa a summo Pontifice, quater anno,  
iubilei impetrandi, diebus nempe, beatis Ursula,  
Gregorio Thaumaturgo, Brigitta virgini, & san-  
ctissime



Etissimæ Crucis inuentioni sacris. hæc porro e templo  
 maximo ad nostrum perlata; ferijs beati Rocchi, in-  
 credibili gratulatione pompæque totius ciuitatis:  
 cum insigni commendatione Ioannis Borgea, viri il-  
 lustrissimi; qui eius muneris, ut aliorum multorum  
 auctor nobis & conciliator fuit. hæc de re nihil tra-  
 demus hoc tempore aliud, quod ea proprio manda-  
 ti volumine plerisque prouincijs innotuit. Illud  
 etiam nouum hoc anno, & ad Dei gloriam perquam  
 illustre, quod socij non e Lusitania tantum, sed et  
 alijs quoque prouincijs in orientem Solem, occi-  
 dentemque, atque etiam in Septentrionem, diuer-  
 sas orbis partes, nauigaturi; religionis propaga-  
 ndæ, expectantes cursum, bonam anni partem in hæc  
 domo versabuntur. & ad Iapahios quidem destinatus  
 batur eorum Episcopus Pater Sebastianus Morales  
 quod mihi quoque paucis exequendum uideor. Cum  
 gnarum esset Philippo Regi in Iaponijs insulis iam  
 quadragesimum continenter annum hæc gerere rem  
 Christianam, augeri que quotidie non hominibus mo-  
 do e populo, sed & dynastijs, & regibus, excitata  
 Christo assertori nostro templo amplius ducenta  
 subijte animo succrescenti gregi pastorem desiderari,  
 & constituendum Episcopum, quem nunquam illi  
 populi uidissent: eumque cognitis sibi de causis non  
 nisi e nostra Societate. probauit eam rem Pontifici  
 maximo, persuasitque per litteras Patri Nostro  
 Generali. Igitur designatus par tanto oneri Pater  
 Sebastianus, sollemnique caerimonis, sexto Kalen-  
 das Aprilis consecratus in nostro templo: præbentæ

rege ad ornatum Episcopi aureos ter. mille quadringentos, ad annuos redditus bis millenos. nec Theotonij defuit Eborensis Episcopi solita liberalitas: munera ad eum misit amplissima, quae tribuere princeps amico posset. & quoniam instabat navigatio, nouus Episcopus, pridie quam conscenderet nauem, in patrum, fratrumque consessu concione habuit. breuem illam quidem, sed plenam spiritus, & dignam persona, quam sustinebat. soluit cum Deo classis, quae praesulem uehebat, ac socios septem, Aprilis adulto, prosperoque cursu per Atlanticum oceanum ad Fortunatas insulas praeteruectam, ad Aequatorem accessisse, non modo sine incommoda valetudine, sed etiam sine nausea Episcopi, conuectores exemplo atque alloquio ad pietatem incitantis, accepimus litteris Nostrorum. canjeruet cum Deus, ut ea mente, quam illi dedit, exequatur munus, cui illum praeposuit. eodem tempore classis Brasiliensis, in qua quinque de Nostris in duas diuisi naues, praetoriam, & aliam quamdam onerariam, Olisipone soluit: & hi quidem, ut certiores facti sumus, prospera navigatione usque Brasiliam tenuerunt: praetoria ad Maderam insulam tempestate delata ventos ferentes & tempus commodius opperitur. Tertia classis & numero nauigiorum maior, & milite instructior, septemtrionem cogitabat: in ea de Nostris unus & viginti: adhuc erat in anchoris, cum aliae dederunt in altum vela: nec mora fuit inutilis: purgabantur interim confessione, & aduersus perduelles fidei militantium animi fidei armis muniebantur. Atque

hac

hac generatim: nunc singula expédiam. Quattuor e Noſtris diem ſuum obiere. Petrus Lombardus Italus trigeſimo tertio anno ab ingreſſu in Societatem. Sequuta mors patris Ludouici Fonſecæ Hiſpani: claſſe Hiſpalenſi venerat cum alijs Patribus in hanc urbem. hic, dum excipiendis confeſſionibus agrotorum militum in noſocomio dat operam, peſtilenti oppreſſus morbo, eiusque vi vincente remedia extinctus eſt. Tertius Hieronymus Conſaluius non dum expleto tyrocinio. Poſtremus Balthaſar Almeida (trigeſimum iam annum in Societate fuerat) obiit in claſſe, quæ in Angliam nauigabat. Repererem nunc, quæ alijs annis, de concionibus, confeſſionibus, noſocomijs, publicis cuſtodijs, trirēmibus: illa ſcilicet communia, niſi propria eminere: & ſi e carcere, areque alieno ſoluti decem, e trirēmibus centum octoginta, cum expleto tempore damnationis, adhuc in opere tenerentur: adiectaque pecunia (ea fuit aureorum quater millium) ſupra tempus debitum liberationi: Catholicis præterea ſeptem, qui ex Anglicana perſecutione in hanc urbem profugerant ſeminudi, veſte rebusque neceſſarijs ſubuentum eſt. Venit etiam Chriſtianus quidam, natione Turca, qui annis ſuperioribus, ex inſula Chio, cui a Rege erat præſectus, cum uxore auctore conſilij, liberisque fidei complectendæ Romam conſugit: eam rem cum Turcæ iniquiſſime ferrent, eius ſocerum, fratremque uxoris, cum paruulis liberis, coniectos in vincla adigunt ad ſervitutem: & reverendum erat ne aut necarentur, aut deſciſcerent.

fide: igitur, ut eriperet eos periculo, citius ipse fue-  
 rat causa, in Hispaniam contendit ad Philippum Re-  
 gem, a quo comiter acceptus, commendatusque, Hi-  
 spalim primo, mox Olisiponem venit: hic adruit no-  
 stros ( & ferebat litteras a Patre Generali ) & a  
 Sacerdote adiutus collegit necessariam summam au-  
 teorum mille, discessuque: fine anni misit litteras  
 testes restituta suorum libertatis ad Diffidebant ab  
 vxoribus viri vnde uiginti, & necem nonnulli ma-  
 ebantur, cum ijs reconciliati. decem ac septem  
 ab sepellices abegere. Fratrum suorum eadem diuer-  
 sis temporibus factam fratres duo inimicitijs, & ar-  
 mis vltu ibant, nec audiebant precatores: sed tandem,  
 de Nostrorum consilio, honestiorem beneficij, quā vl-  
 tionis occasionem rati, cessere: aurci septingenti sexa-  
 ginta redditu dominis suis. Ibat forte per urbem duo  
 e Nostris: magnopere vocatur & vicina domo, ac cur-  
 runt, vident hominem iam iamque præcisam restem, e qua  
 se ipse suspenderat, iacentem in pavimento, ita defe-  
 ctum spiritum, & rigentibus brachijs, ut manus ad  
 frontem adduci non posset, cruci signanda: post appli-  
 cationem celestis ignis reddita, aperti que oculi  
 mirantis: Crucem in fuscis imprimit fronti, seque ipse  
 respiciens, vitam meliorem instituit ab initio confes-  
 sionis. Cuiusdam Sacerdotis opera, hæreticus e Ger-  
 mania diu olim simulata religionis, cum Romana Ec-  
 clesia redijt in gratiam: & apud nos, cum alijs quat-  
 tuor, iussu Quasitoris, ad res fidei instructus. Adueni-  
 quidam, qui an Christianus esset, non satis comper-  
 tum, admonitu vnus e Nostris, iussuque Archiepi-  
 scopi.

scopi, primum, quod ita res postularet, ea, qua par erat, condicione ablatus est. Catechumeni septendecim, Emmanuel Ciabra Episcopo rem diuinam procurante, baptizati. Et quoniam in vocandis tribus diuina providentia eluxit, eam rem paucis exponam. Hebraei adolescentes duo in Mauritania Tingitana educati, mercatori Lusitano ob aes alienum, dati fuerant a patruo, nexi. et causa Mazagani (urbis est in Africa Lusitanorum municipium) attinebantur. horum alteri, nocturno visu, senex ore cultuque venerandus, ut Iudaica superstitione exuta, Christum, Petrique nomen induat, persuadet. Experrectus narrat socio somnium, monstratque salutis viam. idem iam erat utrisque consilium. Et exequi statuerant. Supererat scrupulus, ne creditor fraudaretur eorum discessu. igitur differunt celantque, donec illi esset a patruo satisfactum. commodum cum patruo iam libera si exierant, ex urbe, cum se Christianos velle esse profitentur, et redituros vnde discesserant: proinde ille aut abeat solus, aut addat se ipsis comitem, futurus parentis loco: simulare illos principio putauit patruus per iocum, quod dissimularet ipse, an quod ita vellet. ubi videt rem serio agi, promissis onerat, terret minis obstrictis auribus adolescentium, itur postremo in lacrimas, et preces, sed frustra detorque: reuertuntur ambo pariter, relicto patruo, in urbem, animo votoque Christiani. Et alter, paucis post diebus, Olisiponem nauigat ad ades Cathedralium: manet alter in Africa implicitus morbo, Dei permissu, ut ipsius constantia esset illustrior.

nam pater adolescentis, patruusque, pecuniosi homines, & atroces ira, Ducem quemdam Maurorum allectum præmijs subornant; ut ad Mazaganum non parvam manum equitum ducat. exequentibus obaiam Lusitanis, cum utrinque stetissent acies prælio instructæ: Maurus, impetrato alloquio, eo die se non uenisse pugnatum affirmat, sed solum oratum, ut liceat Hebræo patri filium videre, & alloqui: permissum, acceptis prius obsidibus. & pugnavit quidem pater, quibus poterat artibus, machinisque, sed filius victor discessit: cum enim sordidatus senex, & squalidus, miserationis augendæ, Deum hominesque contestans, ploratus, questusque, diu duxisset irritos, barbaque sibi, & crine vellendo, vesteque conscindenda, ritu gentis, nulla re composita ad ostentationem, nihil proficeret, nec desisteret tamen, præcidit sermonem, spemque omnem, fortis adolescens, tali responso. Si me diligeres pater, gauderes haud dubie filij bono: adderes etiam cumulum lætitiæ, tua sententia ad meam adiungenda: nihil enim tibi utilius, nec vero gloriosius: ego quidem ad consilium adijciam exemplum, hoc si feceris, & parentem meum agnoscam, & amorem tuum. tu vero quibuscumque in rebus habebis filium non repugnantem: sin secus, maiorem habeo patrem Deum, cui obtemperandum est magis, quam hominibus: at animus turbidus vera non diiudicat: & ego prænuntio tibi me modis omnibus Christianum futurum. tam præclarum nomen aut aqua promerebor, aut sanguine: ut scias vile esse corpus iſe  
qui



qui animæ gloriam petunt . ceterum nihil me amplius debere naturæ existimo . His auditis pater irritus consilij , mærensque , cum Maurorum equitatu discessit : Lusitani intra mœnia iuuenem receperunt letantem . Nec minor in Turcæ adolescentis conuersione vis numinis apparuit . erat huic mater iam pridem Christiana Mazagani Lusitano equiti seruiens , quæ beatæ Monica exemplum , in parturiendo iterum filio religioni Christianæ , & in Africa , renouauit . nam Catharina , hoc est mulieri nomen , cum assiduis precibus orasset Deum , ut eius nato , in tantis tenebris noctis Maumetana , præferret lucem , eius , ut postea patuit instinctu , constituit , salute filio quærenda , rem Christiano nomine dignam , vel agere , vel pati : & maius imbecilliore sexu facinus ausa , communicato prius consilio cum præfecto arcis , acceptis que litteris , ne ut desertrix seruitij ab exploratoribus retraheretur , penetrat Mauritaniam . hic Azamori cum substitisset ( est oppidi nomen ) filium e Fessensi vrbe , vbi negotiabatur , accersit , tantumque valuit , religionis Christianæ veritatem , vanitatem Maumetis sæpe dissertando , ut peruicerit animum adolescentis : atque , ut est verbum Domini efficax , mulier etiam cuius domi diuersabantur ( hæc eius sermones excipiebat interdum ) ad vtriusque sententiam accesserit . porro visum rem totam agere cautius , & tutius . & positi aliquot in oppido dies auertende suspicionis . tandem , captato tempore , inumbrante vespere , discedunt , & socijs tenebris , æquantes iter nocti , obscuro adhuc



capta lucis ad Mazaganum perueniunt . clausæ  
erant portæ: vbi Catharinam esse constitit cum du-  
plici prada, accepta est ingenti studio, lætitiæque  
ciuitatis . illi deinde missi Olisiponem, vt initiati  
meditamenti Fidei Christo consecrentur . Mortui  
ex hoc Collegio tres, & domi quidem duo, Pater  
Antonius Maceuius vir spectatæ virtutis, & Bla-  
sius Ferdinandus, tertius Pater Robertus Hiber-  
nus, cum multarum peritus linguarum incumbit in  
salutem militum, immemor suæ, circa eam classem,  
qua in Angliam ferebat bellum. ceterum discipuli ad  
nos ventitant fere bis mille, & plerique claritate ge-  
neris insignes: Sed eo studio feruntur in literas, ac  
pietatem, vt impleant omnes partes officij sui. vin-  
ctos qua possunt ope solantur, visitant adiutantque  
qui vario morborum afflicti genere in valetudina-  
rijs decumbunt: idque cum commune est omnium,  
tum proprium illorum, qui de Sodalitio Virginis: in-  
uentus in hoc numero, qui veterem Iosephi pudici-  
tiam non dissimili periculo reddidit: alter eiusdem or-  
dinis acceptam in templo alapam multis inspectan-  
tibus, memor præcepti euangelici eo animo tulit, vt  
alteram offerret oris partem, adeo repressit famulos  
properos ultionis: nec vero desunt e tam proba in-  
uentute, qui ad nostram Societatem, aut ad alias Re-  
ligiosorum familias viam affectant. Nunc ad alia.  
Acerrimi inter primarios quosdam viros ac militum  
Hi panorum duces exorta erat contentio, e parua re  
ad magnum certamen progressa, & vtrinque compa-  
rata manu maiora metuebantur: placuit diuine bo-  
nitati,

nitati, ut vnus e Nostris interuentu irarum ardor  
 resederit. Sed & hic agniti diaboli astus, repressique.  
 Agitabatur vnus nocturnis somnis, spectrisque diur-  
 nis, sic assidue, ut statueret interitum finem facere  
 miseriarum: alter cum conspicatus demonem esset  
 humana in specie, & si primo visu perterritus, mox,  
 sermone mutuo sumpta audacia, adductus erat in fa-  
 miliarem eius consuetudinem, ipsoque suadente, pæ-  
 ne in mortem voluntariam: quam rem perinde hic,  
 atque ille, perduxisset ad exitum, ni Deus ostendis-  
 set utrique, Nostris vsus administris, fœditatem con-  
 silij, lumine diuinius immisso. Nec minùs obuiam  
 itum calliditati hominis in multorum perniciem ruen-  
 ti: Ingentem pecuniam extorserat quidam ab iuuenē  
 amante, per speciem ferendarum litterarum ad vir-  
 ginem, ab eaque referendarum, simulato artificio: id  
 ubi occultis spargi sermonibus, ut perueniret ad pæ-  
 rentem virginis, ita animum eius penetravit, ut euo-  
 catis propinquis, vel e milliaribus quadringentis, in-  
 famiam filia cogitaret nece iuuenis delere. iam strue-  
 bantur insidia, commissura familias duas nobilissi-  
 mas iamque ibatur in facinus: cum vnus e Nostris in  
 tempore admonitus, per veritatis ingressus vesti-  
 gia, ex rem deduxit, ut patesceret dolus, restituta-  
 que virgini fama, componerentur familiae, quas ficta  
 crimina distraxerant. Nostrorum denique opera ef-  
 fectum, ut sedecim aureorum millia male parta legi-  
 timis dominis redderentur.

## CONIMBRICENSE COL

legium.

**A**CCESSE RE ad Societatem viginti quatuor, decessere duo, alter eorum Dominicus Joannes, per ipsos viginti annos in hoc Collegio coquus: ceterum ita despiciens sui, ut aestimaretur propterea ab hominibus, & diligèretur a Deo: de cuius rebus ita sapienter differebat hominidioti, qui ne litteram quidem nosset, ut viris doctis, hocque vnum agentibus, admirationi esset: quin etiam integras libelli paginas ad verbum ediscendi omnibus, De contemptu mundi, memoriter recitabat: cum appropinquaret supremis, rogatus quod maximum esset morienti solatium, vocem dedit Societatis filio dignissimam, Labor omnis, quamvis difficilis, sine querela susceptus: ad egregiam demissionem animi addidit laudem flos perpetuæ castitatis, quem illibatam servasse perhibetur. Alter Franciscus Betoncorius, qui etsi quintum agens in Societate annum, vitæ prius, quam Philosophiæ cui studebat, cursum peregit, tamen hys claruit virtutibus, ut quasi pervenisset ad metam, spes sit præmium a Deo accepisse: certe in diuturnitate morbi, & acerbitate interitus, superans animus dolores corporis, metumque mortis fidem fecit securæ aternitatis: ita cum defunctum audisset medicus qui præerat valetudini, ingressus cubiculum, ubi positum erat corpus exanime, precatus de more, ad extremum adiecit. Hoc ego deinceps pa  
trono

cyono apud Deum utar; tantam opinionem apud eum  
meruerat patientia infirmitatis. Dicamus nunc ali-  
quid de excursionibus. Ea septem fuere: ad excellen-  
tissimum Bragantia Ducem, ad Visum urbem, ad  
Tranquosum, Pinellum, Penamacorium: oppida  
hac sunt Tagum inter, & Durium, ad Orientem, lo-  
cis maxime mediterraneis: ad Talabricam, Aug-  
rium dicitur, adiacetque Oceano ad ostium fluminis  
Vacca: ad oppidum denique, cui nomen a Monte Ma-  
iore: his omnibus locis, ubi Nostorum adventus in-  
cundus, ita commoratio fuit utilis, & discessus mole-  
stus. Hæc confuse: nunc aliqua seligentur. In oppi-  
do Villanica, ubi Dux Bragantia habitat, in carce-  
re erant complures, eos cum comperisset Sacerdos  
propter asperitatem hiemis, & penuriam vestis,  
confici frigore, in ipso Ducis Sacello, inter concionan-  
dum, ostendit iniquum esse, tam exquisite instratis pa-  
nimentis, quæ pedibus subicerentur, tam incuriose  
pauperes, Christi membra, nudos relinqui. non vana  
cohortatio. statim Serenissima Catharina Ducis ma-  
ter, aulae quibus conuestiebatur gynæceum, com-  
plicari per famulos, & ad concionatorem compor-  
tari iussit. Dux ad eundem misit summam pecuniæ  
bene magnam: ipsemet Sacerdos onerat humeros ve-  
ste stragula, & comitibus illis, qui ab Duce vene-  
rant, in carcerem contendit: fuit ea res subsidio pau-  
peribus, spectaculo mediocribus, diuitibus exem-  
plo: breuique collata vestis tam multa, ut instrue-  
rentur lecti, & induerentur homines ad quadragin-  
ta. Cives cuiusdam oppidi per annum plenum atque  
inte-

integrum sacris, & Sacerdote caruerant: acciuit No-  
 ster in templum insuetam multitudinem, & Sacro  
 facto, pro concione hortatur, certiores faciant præ-  
 sulem orbitatis ipsorum: factum: impetratus ab eo  
 animarum rector inastimabili gaudio cunctos affe-  
 cit: erat in medio foro eiusdem oppidi templum vetu-  
 stum, & nobile, nec ducebant illicitum oppidani,  
 eius limina ianuamque ipsam, obtendere rebus vena-  
 libus, prætendentes diuturnitatem consuetudinis: ut  
 concionem habuit in eodem templo Noster, ita valuit  
 dicendo. ut mutati ad pœnitentiam animi priorem  
 licentiam posteriore religione oblitterarent. Alitero  
 in oppido, homines nescio qui, sic familiam Religio-  
 forum diuexauerant, ut adegerint ad discessum: por-  
 ro incolæ ad vacui cænobij ædem Quadragesima  
 singulis hebdomadis, ibant supplicatum: hac occasio-  
 ne vsus noster Sacerdos, e suggestu cur vacuefactum  
 sit cænobium inquiri, accusat factum, dein religione  
 incussa animis, permouit auditores ut legatione mis-  
 sa reuocarent sacram familiam, cuius precibus apud  
 Deum adiuuarentur: eiusque reditus est mira om-  
 nium gratulatione celebratus. Testamentarius qui-  
 dam bonam pecunia partem iamdiu auerterat, eam-  
 que mala fide possidebat: is audita concione suâ frau-  
 dem secum reputans, ad veri domini pedes se abijcit,  
 crimen fatetur, doli mali veniam petit: erat domi-  
 nus ipse vir genere iuxta animoque nobilis, comiter  
 absoluit confitentem, & liberaliter hereditate do-  
 nauit: lis quorundam vetus finita: mille aurei resti-  
 tuti: ducenti quinquaginta remissi: reditus annu in  
 subsi-

subsidium egenorum Sodalitio Misericordiae a pecunioso homine legati: itum ad victos in carcere: quod etiam oppidanos aduertit, ut vel opera benigne illis facerent, vel pecunia: magnam enim sibi beneuolentiam Noster apud omnes compararat, sic ut semper sequerentur eius consilium, & nonnunquam etiam praeuenterent. Vnus quidem, cum ab eo acciretur, ut rem alienam restitueret, non prius adiit ad Patrem, quam domino satisfacisset: tum ad illum. Nolui Pater in tuum conspectum venire, ante, quam prestarem, quod te velle intelligebam. alter vi morbi in lecto decumbens, admonitus ab ipso, cum aduersario rediret in gratiam, famulorum humeris iussit se ad eum deferri, ut firmanda pace admonenti obsequeretur. Pertinet ad hoc Collegium Lapense Dei Matris templum, religiosum omnibus circa populis, & miraculis illustre: celebratur in anniuersarijs Virginis sic, ut affluant plerumque ad septem hominum, vel nouem millia: huc missus Sacerdos, Sextili mense medio, vtiliter laborauit: sed accidit quiddam ad memoriam insigne: ipso die Deiparae assumptae, vir opulentus, in oppido non longe, ludos scenicos virili sexui ac muliebri talium rerum auido, ad spectaculum effusis magnifice dabat: ea fuit causa, cur prater consuetudinem ex illo oppido sollemnis pompa non diceretur ad templum: non tulit impune, in ipsa orchestra nescio vnde exorta rixa multitudinem ad arma conuertit, & vulnerati multi caesque: in quibus seruus domini ludorum: quin etiam ipse non effugerat eadem, ni seruatus esset ab inimico, verente scilicet, ne

eius interitus sibi crimini daretur: & iudicatum est  
 datas fuisse pœnas neglectæ religionis. Sed diu va-  
 gati extra urbem domum reuertamur. Coacta Sy-  
 nodo, præfidente Alphonso Episcopo Albicastren-  
 se, triduo concionandi munus tribus e nostris Sacer-  
 dotibus mandatum. Maiore hebdomada multi ex  
 Academia spiritualibus exercitationibus in Collegio  
 exculti. In his Alexander, Ducis Brigantini frater,  
 maxima indole adolescens, qui nobis dat operam. Is  
 cum huc redisset in instauratione studiorum, tantum  
 vestis auro textili Collegio dedit, quantum satis esset  
 Sacerdoti, maximoque altari vestiendis. non est omis-  
 sa eorum cura qui in vinculis detinentur: ijs persua-  
 sum, ut quotidie explorent latebras conscientie, bea-  
 tissimamque Virginem recitandis suppliciter lita-  
 nijs quotidie comprecantur.

### COLLEGIVM EBORENSE.

**E**MULTIS varia affectis morbo, absumpti  
 duo, laicus vnus, alter Sacerdos: ille post ex-  
 pletum annum in Societate duodevigesimum, hic  
 post vigesimum sextum. nomen Sacerdoti Ferdinan-  
 dus Coutignus, vir rara admodum virtute, & insi-  
 gni scientia rerum diuinarum, sacrosancta Eucharis-  
 tia, sanctissimæque Dei Genitrici mirifice addictus.  
 cum adhuc integra esset valetudine, quam tamen as-  
 sidua castigatione corporis attenuauerat, prædixit, se  
 fine anni moriturum: nec fefellit. Decembri mense  
 die



die sacro Deiparae Virgini conceptae supremum diem  
expleuit. Nuntium instantis mortis ita gratanter  
accepit, ut assenerari nihil audire potuisse incun-  
dius. Tum conuersus ad Christi imaginem, illud  
ex psalmo repetijt. Tibi derelictus est pauper, or-  
phano tu eris adiutor. magna erat apud omnes in opi-  
nionem sanctitatis: ita, cum laudibus, & lacrimis,  
illatus in sepulcrum. Duorum iacturam compensa-  
uere duodeviginti, e quibus duo claritudine natalium  
illustri. alter dynasta Aluitiensis frater, magna eius  
propinquorum admiratione, perinde quam mærore:  
ad hunc leniendum missus Aluitium Sacerdos, sic  
profecit, ut a matre haud ita pridem nescia toleran-  
di, abstulerit ad filium litteras hortantes ad perse-  
uerandum. Non solum in nostro templo conciones  
habita, sed & in varijs cænobijs, & frequenter  
itum in oppida propinqua. Ad hominem inopia  
morboque afflictum adierat Sacerdos gratia confes-  
sionis, re confecta, orat agrotus remedium mor-  
bi, & leuamen doloris: neque enim se esse ijs facul-  
tatibus, ut medicum vocet, ematque fomenta, quæ  
ab ipso imperentur: hæc inter, inflatam tibiam osten-  
tabat, & paralyti correptam. Quin tu adiuua Pa-  
ter, si quid potes. Hic Noster. Quantum in me  
erat, effeci: super illud est vnum, ut te precibus  
apud Deum commendem. hæc dicens, recitat formu-  
lam e sacris Euangelijs, & Crucis signum imprimi-  
mit, tibie tumescenti: miram agroti fidem: statim  
in melius ire valetudo, remitti paulatim dolor, &  
tumor imminuit octauo post die recuperata sanitate

ad templum gratias agens Deo, & Sacerdoti apud Deum, accessit. Cum sacri Quasitores exercerent publice de more iudicium, & pœnas aberrantium a Fide, vnus e Nostri concionem habuit rei ac tem-  
pori congruentem: nec desuimus eorum subsidio, quorum crimina fuerunt igne expianda. Ceterum, cum iubente Theotonio sacrorū antistite, propitiandi numinis, ad dies aliquot producta esset e Sacrarijs diuina hostia publice adoranda, eiusdem mandatu concionati Nostri ad parœcias vr̄bis permagno mul-  
tis adiumento fuere. Virgo nobilis amorem pudicitia nuptijs præferens contulit se in cœnobium vir-  
ginum Deo dicatarum. luxum altera, ac molliciem, qua difflebat, ad scueriora studia conuertit. Audi-  
tores habemus in academia mille quingentos. magna omnium industria, & pietas. maior eorum, qui beatam Virginem patronam habent. id adeo ex vno facto intelligetis. Iuuenis amplissima familia cum  
communibus suffragijs præfectus Sodalitio fuisset, nihil sibi prius faciendum ratus, quam vt cum dele-  
cta sodalium manu, lautos humeris conuelleret ci-  
bos, ad carcerem, pauperibus reficiendis: id gran-  
de subsidium illis attulit, & gaudium ciuitati. Mis-  
si in expeditionem ex hoc Collegio in loca diuersa tria, ad diœcesim Eluensem, ad Amœam, vr̄bem  
vetustate nobilem, Portallegre vulgo indigetant,  
denique ad Turdetanos. est Turdetanorum regio  
qua Algarbiorum regnum continetur, pars illa ve-  
teris Lusitania, qua magis ad meridiem spectat. &  
ad Sacrum promontorium excurrrens, versus Gadi-  
tanum

tanum fretum, Ana fluuio a Bælica, a Tingitana Mauritania, Atlantico sinu discluditur: abundat urbibus oppidisque: rudiores incolæ ob excolentium inopiam: in hanc prouinciam missi duo, vix dici potest quam lætis animis excepti: eam ubi cognouit intratâ ab ipsis, Algarbiensis Episcopus, per obuias litteras gratias egit, præcepit simul curionibus, vt liberaliter itineri necessaria venientibus suppeditarentur. certamen erat oppidorum ijs accipiendis: quin & in vrbe ipsa, Episcopum inter Præfectumque incunda quedam æmulatio, vtrius domum diuerterentur. medium Nostorum consilium fuit: laudatâ humanitate vtriusque, ad hospitalem domum se recipiunt. id vt compertum Præfecto, cubicula apparari, prætendique cubilia conopeis sericis, cultu magnifico iussit. at Nostri memores votiuæ paupertatis, deiecto ornatu, more pauperum se collocant: postridie, urbana dissimulatione, ad famulos admirantes. Ita male ista erant composita, vt ne vnâ quidem noctem subsistere quiverint. Ad conciones incredibilis frequentia, motus animorum tantus, vt crebris eum suspirijs, & comploratione te-  
starentur. renouatus vsus Sacramentorum, sublata diffidia, iniuria remissa, peccandi occasiones oppressæ. Hæc propter, & talia, excitata in omnibus cupiditas Societatis, vt operam muli, aliqui etiam pecuniam cum precibus, votisque offerant, Collegio extruendo. Nec pauciores percepti fructus ex Ammaensi agro, & Eluensi. Sed neque ego exequi debeo, neque vobis operæ est audire singula: commu-

niter multa complectar. publicæ custodiæ ubique  
aditæ, adiutæque. pueri elementa Christianæ legis  
edocti: concionibus firmior ætas instructi. Altera  
in diœcesi, pagellæ, in quibus imago beatæ Virgi-  
nis, ad sex millia distributæ, tanta veneratione ac-  
cipientium, vt earum attactu morbi depulsi: mul-  
ta dominis restituta: odia restincta. Obuiam itum  
parricidijs, inuetarataque consuetudini, vt puellæ  
non nisi post nuptias, viduæ non ante quam viros  
eluxissent per biennium, in templo conspicerentur.  
igitur hæc communia. Nunc e proprijs pauca. Puel-  
la amissa post quadriennium parentibus reddita. al-  
tera quædam puella, per annos ipsos quattuor falsi  
criminis suspecta, eamque ob causam septies vene-  
no appetita, quod semper, cum se Deiparæ commen-  
dasset, illæsa euomuerat, parenti reconciliata. Alio  
quodam in oppido, quod factiones duæ in diuersa di-  
duxerant, conglutinata pax, anteatentata sapius pu-  
blicis precibus, priuatisque multorum. Sed huius  
quoque adeo expetita pacificationis, vt & rerum  
omnium aliarum, auctor Deus, Nostri tantum ad-  
ministrari. quo maior nostrum omnium esse debet in  
obsequendo sedulitas, verecundia in prædicando,  
in gratijs agendis numini assiduitas, & diligentia.  
iuuat enim fateri præpotentem auctorem muneris,  
quod accepisse delectat.

PORTVENSE BRACHARENSE  
& B iganthinum Collegia.

**N**VLLE IN PORTVENSEI No-  
strorum scholæ, eo promptior animarum pro-  
curatio. confessiones exceptæ ad decem millia. Vir  
quidam nobilis annum agens octogesimum, cum colli-  
gere vellet sarcinas, ut breui discessurus, centum vi-  
ginti milliarium itinere ad nos venit, rationes (sic  
enim dicebat ipse) cum Deo componendi: mox genera-  
li peracta confessione ingenti cum gaudio domum re-  
uertit. placati, pacatique homines inter se amplius  
centum viginti: adiuti supremo supplicio afficiendi:  
& semel, non paruo cum eorum fructu, qui ad specta-  
culum conuenerant. adhibita enim tempestiua con-  
cio, secutaque, cum adhuc esset in oculis mortuorum  
fontium imago, correctio morum. conciones perinde  
in templo nostro, quam alibi frequentes. Fidei ru-  
dimenta, die dominico ciuium liberi: die festo, si quis  
intra hebdomadam incurrit, Aethiopes, seruitiorum  
manus: quarta seria pauperes edocentur: quos etiam  
episcopus non sine stipe dimittit. Mulieres quat-  
tuor & quadraginta turpi vitæ nuntium remiserunt:  
sex milites vxores duxerunt illas, quarum corpori  
insueuerant: ex his vnus honesto loco, non inferius  
duxit dignitate sua, multis licet reclamantibus, stu-  
pro cognitam opificis filiam coniugio accipere: Chri-  
stianum quippe officium præponderabat. Hac pauca  
de Portuensi.

SEQUITUR BRACHARENSE. In templum, quod ampliabatur, sanctissimum Christi corpus, e veteris sacelli angustijs, præeunte choro effusaque ciuitate, septimo Kalendas Martias illatam: nec multo post delati in conditorium, sociorum cineres, ossaque, funebri pompa. ex eo creuit cum pietate ciuium labor Nostrorum: accessit opportunitas duplicis iubilei communis videlicet a Pontifice transmissi, et anniuersarij, quod illo ipso die erat proprium Sodalitij Parthenij. hinc utilitas ad multos non simplex Vir in primis nobilis & opulentus e pellice filium susceperat, eamque per annos quindecim habebat domi, non sine graui propinquorum offensa: nec mortalium monitus auribus accipiebat: ceterum corpori cum accidisset morbus, animum aduertit. etenim ager vocato Sacerdoti omnium rerum arbitrium permisit. igitur exacta pellex, nec sine dote, ut honeste collocaretur: is postea conualuit, mentemque ipsam ad saniora conuertit. a cade infamiaque complures prohibiti. aliorum tenuitas a ditiorum potentia defensa. actum cum magistratu de vinetis expediendis: & ipsorum corpora Nostrorum sæpe resecta auxilio, animique consilio instructi: subleuata non paucorum inopia, eo maiore cura, quod orba adhuc ciuitas Archiepiscopum desiderat. Catechismi explicatio ad pueros non intermissa: sæpe etiam intermiscetur sermo prouectiori atati (ea plerumque interuenit) utilitati futurus. Excursus in oppida vicina, in rem fructumque multorum. Torro in duorum itinere hoc accidit. addit se illis socium adolescens

scens externus, idemque (quantum possunt colloquia de rebus diuinis) vario sermone, incensum cupidine animum Deo seruiendi ad sacrum cœnobium intendit. Sacerdos profectus ad *Aquas Flauias*, id est oppidi nomen, cum multa patrauit ad Dei gloriam, tum maxime illud, quod ædiculam carceri adnexam, sed desertam iamdiu & celebrari desitam, ad uinctorum vsum restituendam colendamque curauit. fecit eodem loco ipse non semel rem diuinam, celestiaque sacramenta cupientibus impertijt. scholæ iuuenum frequentia, & probitate efflorescunt. Præluceat Congregatio beatæ *Virginis*, vt honorarius Episcopus magna virtute vir, & doctrina, alijque ciues amplissimi in eam orauerint admitti. In supplicatione reipublicæ causa suscepta, sodales, qui nudati terga verberibus se caderent, numerati ad trecentos. auctum denique Collegium coempta area, ædibusque vicinis.

OBIIT BRIGANTIAE vnus post actû sextumdecimum in Societate annum; rerum domesticarum administer sedulus, & frugi. reliqui ad ciuitatis commoda intenti: præcipue (quod opus est in hac vrbe) ad iratorum animos reconciliandos. excitata erat nuper inter optimates contentio, & e priuatorum odijs ad publicam perniciem exarserat: ad rem ita difficilem Nostrorum opera vtî voluit *Mirandensis* Episcopus, eorumque conatus adiuti ope diuina: natali die beati *Ioannis Baptistæ*, quinquaginta ciues e primoribus, dexteris datis in Collegio, in mutuam gratiam rediere: Vir quidam nobilitate pollens



pollens viribusque a Iudice, & Pratore Brigantino sic atrociter dissidebat, ut de eorum pernicie agita-  
ret. hanc pacificationem Collegij Rector mandatam  
sibi per litteras a Duce perduxit ad exitum, magna  
eius gratulatione. fenebris pecunia reddita: confecta  
dos virgini, cœnobium non suis opibus expetenti: re-  
sipuit vnus, quem furor & largitio ad aliorum cœ-  
dem instigabat. Ruri, quo graui tempore anni sece-  
dunt Nostri, ad relaxandos e labore animos, corpora-  
que reficienda, adificata ades Sacro faciundo: quo  
tamen in secessu consulitur pagis propinquis non ir-  
rita excursione.

FVNCALENSE ET ANGRENSE  
Collegia, & Sedes Angolana.

**N**EC MINORE cum fructu Funcalense  
Collegium laborauit in componendis multo-  
rum simultatibus. antiquæ cuiusdam Sodalitatis stu-  
dia, quæ pæne consenuerant, ut exarescerent, Nostri  
concionatoris industria reuiuiscunt. adolescens qui-  
dam familiæ vetustate quam fama nobilior, cum esset  
vicinus ad moriendum, vocauit vnum e Nostriis (nec  
defuere qui dæmonem se vidiſſe dicerent ad caput æ-  
grotantis) tantamq. vim clementissimus Deus vtriq.  
præbuit, ut & Noster decessurum excitaret ad dete-  
stationem scelerum, & ille totam spem reponens in di-  
uina misericordia, quantum fieri potuit in illis an-  
gustijs rerum & temporum, compararet animum ad  
Chri-

*Christiane moriendum: de peccatis confessus est ipse idemque vt faceret parens eius, vltimis precibus exorauit. mulier, ne amicum foueret, diuinitus admonita: quotiescumque ille ingrediebatur tectum, afflatu fumi & intolerando odore sulphuris iniecto: excluso amatore, eam ab se molestiam depulit. excursiones aliquot in pagos vicinos non infructuosæ fuerunt. ad templum denique ornatus cætum aureorum accessit.*

*IN ANGRENSI Collegio difficultas annonæ, & pestilentia, materiam attulere Nostris exercendi munia Societatis: & dum aliorum vitæ consulitur, non absuit discrimen: afflictati aliquot morbo, nec vllus decessit: diuina providente sapientia, ne quibus ad salutem corporis deerat medicina, ijs animorum medici deessent. Subuentum pluribus de nostra tenuitate, actumque cum opulentioribus, vt aliquos e varijs locis hanc ad insulam fame compulsos susceperent alendos. Venio ad eos qui scholas nostras frequentant. Parthenia Sodalitas hoc anno instituta, immane quantum, animos ad pietatem accendit. Episcopus in eam ipsiusque vicarius, & canonici complures, volentes adlecti: est etiam cur de Hispanorum militum fructu grates Deo agantur: ij sunt in præsidij huius insulæ benemulti: Sacramenta frequenter usurpant, inedia, flagellis, cilicio macerant corpus, vt animus vegetior fiat: mensibus singulis Sanctorum patrocinia sortiuntur: neque in hunc cætum admittitur, nisi quos vitæ innocentia probarit: si adscitus degenerat, aut resipiscit, aut abit. libri non nisi de rebus pijs in excubijs circulisque militaribus ab vno legun-*

leguntur, alijs silentibus: abest alea lusus, & sermō-  
num lasciuiā: dicas familiam Religiosorum. Dux ipse  
præest ceteris, & conspicitur exemplo. is quotidie  
rudioribus exponit Christianam doctrinam: cum lu-  
strat diurnas stationes, vigilasque nocturnas, præire  
iubet militem, qui ferat vincula, minus religiose  
de Deo loquentium pedibus inferenda: largum via-  
ticum præbuit mulierculæ, ut a milite discederet. uti  
le id militibus letumque: nec abest numinis præsen-  
tia. militem comitiali correptum morbo, &, ut  
rumor erat, morti proximum, admota ad eius pectus  
agni caelestis imagine in cera sacra, excitauit omni-  
bus videntibus: miles ipse rediit ad se se admirabun-  
dus: sed, re postea cognita, admiratio cessit in gratia-  
rum actionem. Hisce nunc studijs ciuium militumque  
florebat insula: quam non ita pridem tumultu bellico  
siluescentem vidisses, & bonis frugibus infecundam.

R E S A N G O L A N A. ut melior ite Alua  
ro regi, ita etiam religioni Christianæ. septem e No-  
stris sunt in Loanda insula, totique in Lusitanorum  
Æthiopumque salutem incumbunt. Messaganum  
portus est, ubi Dux Paulus Didacus de Societate op-  
time meritis præsidium collocauit: & quoniam qui  
e Lusitania huc aduehuntur, periculosis malis ten-  
tantur initio, & premuntur inopia rerum, eam rem  
cum detulisset concionator ad populum, tantum est  
pecuniæ corrogatum, ut loco salubriore valetudina-  
rium sit instructum, coalescatque in formam pagi, do-  
mibus circum extruendis. huc missus vnus e Nostris  
adiumento aduenarum. nec absunt laboranti solacia  
diuina.

diuina. Duo præterea missi in prouinciam dynastæ,  
 qui superioribus annis Christianam fidem suscep-  
 rat. hic commorati diutius, plurimos sacro baptis-  
 mate abluerunt, Tondellam in his, qui secundus a  
 Principe totius Prouinciæ imperium admini-  
 strat. porro e baptizatis, duo, quia spiri-  
 tu prope labente, cum salute animi,  
 corporis quoque receperant,  
 tantam opinionē spar-  
 serunt vulgo ue-  
 ra religio-  
 nis, ut quamplurimi Aethiopes se ad  
 Christum adiungant; magna in præ-  
 sens lætitia, maiore spe in po-  
 sterum, ut lætiora  
 succedant.

# P R O V I N C I A B R A S I L I A.



**V**ERSANTVR in hac Prouincia  
socij centum sexaginta tributi Do-  
micilijs octo. In Baicensi Collegio  
septuaginta; in Pernambucensi vi-  
ginti duo, in Collegio Fluminis Ia-  
nuarij triginta, in sede Ilheorum  
& Portus Securi vndecim, in Praefectura Spiritus  
Sancti, in Sancti Vincentij quinque, Piratininga  
septem, quattuor denique in Thucumana missione.  
Decessit vnus. Accessere egregia indolis adolescen-  
tes quinque.

## BAICENSE COLLEGIVM.

**C**RESCIT cum Collegij re domestica ardor  
collegarum, & laboris fructus erga proxi-  
mos. nihil dico de xenocijs, nihil de publicis cu-  
stodijs, nihil de adiutis in vita, firmatisque duobus  
suspendiosis in morte. Discipulorum numerus au-  
xit excitauitque Congregationem beatae Virgini  
sacram die ipso Angelicae salutationis: tamque prae-  
clari operis Episcopum probatorem & promotorem  
habet. Conciones habita a Nostreis tum in templo  
maximo, tum domi nostrae. fructum coniectes  
ex consentientium vndecim millibus, communican-  
tium

tium millibus quinque. Non silenda conuersio Sacerdotis, qui & Decanus erat huius ciuitatis, & Proepiscopus diæceseos. Is insensus erat nobis, nec bona admodum fama. Infirmirate correptus est corporis, vnde, vt saepe, anima sanitas est orta. recepta valetudine multis cum lacrimis Patrem Visitatorem orauit, vt adscisceretur inter Nostros: festa ætas prohibuit. eum, apud quoscumque offenderat, eosdem adiens vltro, veniam petijt malefactorum: idemque his e suggestu vt fieret suo nomine, postulauit. tam insignis mutatio admirationi, exemplo multis, ei, vt spes est, cum paulo post pie decederet bona omnia relinquens pauperibus, saluti fuit. Inter inimicos, & plusquam ciuili odio dissidentes, & quidem inter primores ciuitatis, duosque inter coniuges, pax composita. plerique, quos in proximorum cades furor armauerat, ab insania reuocati: muliercula a cano quæstiosa libidinis ad patientiam castæ paupertatis adducta. & si his quoque, corrogata iam eleemosyna supra aureos septingentos, mariti quærantur. Hæc inter non neglecta sacchararia, & e laborum tristitia dulcis sapor expressus. quadringenti salutaris aqua loti, matrimonio copulati tercentum septuaginta septem. confessiones auditiæ quamplurimæ. Indi, Lusitanorum mancipia, Christianis legibus instructi: permulti ad amorem pudicitie reuocati. duo, vxores acceperunt quas adamauerant pellices. coniugum iurgia, atque adeo diuortia sublata. nuptiæ violentæ in voluntarias conuersæ. vir consilium interficiendæ vxoris abiecit.

adiuti

adiuti in extremis necessitatibus morientes. Indorum pagi Nostrorum curæ commissi, lustrati informatique: baptizati ducenti, ligati coniugio centum viginti, quinque millia confessionum excepta, tria Indorum millia refecta pane caelesti. Grassantem famem, quæ etiam aliquot extinxit, secutamque vim morbi, Nostrorum industria subleuauit, collata ope, stipeque collecta. in his, nonnulli cum baptismo, epota alijs lustrali aqua, recipere valetudinem. his enim rebus, & crescit multitudo Catechumenorum, & augetur credentium fides.

## SEDES ILHEORVM ET PORTVS

Securi.

**F** PACIFICATIONE multorum, de qua memorauimus anno proximo, consecuta multiplex utilitas animorum. Confessi de vniuersa vita criminibus amplius triginta: sacro fonte abluti ducenti: quadraginta septem sanctiore vinculo nexi: non deserti in offitinis sacchari, occupata opera, homines Indi: quasi magis per aspera infestaque iuina (insensant latrocinij's loca omnia Amures) & periculum fructu pensatum. Christo aliquot adiuncti. ex his anicula moribunda, parentum mortuorum umbras, quas sibi assistere dicebat, audacter discussit: timorem alter acceleranda mortis, baptismo: uterque per hanc ianuam calum ingressus.

A T



AT IN SEDE PORTVS SECVRI  
*initiati Christianis mysterijs sedecim. sollēni ritu sponsalia facta quattuordecim. dissidentibus nonnullis, & in primis Præfectis oppidi, graui periculo atque exemplo, redyt concordia. conciones habitæ, doctrinaque Christiana exposita non infrequenter: corrassa pecunia multorum animis corporibusque utilitatis fuit.*

COLLEGIVM FLVMINIS IANUARIJ & Sedes Piratiningæ.

CONGREGATIO discipularum, de qua nuper est positum, altiores agit radices. pueri elementarij sunt senibus, in ijs quæ pertinent ad doctrinam, Fidei magistri. E Nostrorum concionibus fructus non spernendi. ad confessionem accedere hominum sex millia: ad sacram synaxim, tria. Vinctorum animi corporaque, singulis diebus dominicis suo pabulo recreantur. occursum interim inimicitijs cadibusque multorum. Inter feminas tres honesto loco constituta pax, hoc admirabilior, quo pertinacior sexus. Vir nobilis, neque ita erga nos bene affectus, quos perpetuis litibus exercebat, afflictus morbo, quo etiam expertus Nostrorum pietatem, animum mutauit, futurus in posterum nobis defensor, nisi & vitam cum morte mutasset. Pari utilitate per Lusitanorum villas excursum. per confessionem Christo reconciliati muli: i, per lauacrū conciliati viginti. per legitimos toros coniugati quinquageni. Indorum

X molli-

mollities emollita peccatum originis abstergere aqua  
salutari septuaginta sex: culpas vitæ, Sacramento con-  
fessionis mille quingenti. quingenti percipere Eu-  
charistiam. uxores duxere ecclesiastico ritu trigin-  
ta. elucet nimirum horum pietas imitanda Ethnicis,  
Lusitanis æmulanda. Obstitit vnus, per triduum,  
petulantia mulieris impudica: & contra, mulier ab-  
tera adolescenti procaci.

PIRATININGAE similis Nostorum  
labor, & æqualis proportionē fructus: si ad compu-  
tationem reuoces, Christo nomen dedere trecenti.  
adiunxere sibi uxorem centum. Oppidanorum om-  
nium confessiones susceptæ. nempe parochus abest.  
Indorum pagi adeuntur: quibus &, quasi modo  
genitis infantibus, lac præbetur, & vitæ adminicu-  
la. Maramomi (superioribus litteris, exscriptoris  
mendo, an meo, Moromimi orant) posita feritate  
vnius è Nostri opera excoluntur: nec abest spes vbe-  
rioris messis.

DE RELIQUIS Domicilijs difficultate na-  
uigandi, seu raritate nauigantium, nihil habitum. an-  
nus sequens, Deo adiuuante, quod nunc relinqui-  
mus, conduplicabit.

# PROVINCIA INDIA.

**N**UMERAVIT INDIA so-  
cios quadringentos sex: admisit v-  
num & triginta: amisit quattuor-  
decim: in quibus Patrem Sebastia-  
num Moralem, primum Iaponiorum  
Episcopum. Is inter nauigandum, cum habendis con-  
cionibus, confessionibus audiendis, administrandis  
Sacramentis nauticae turbae, strenuam operam na-  
uat, in febrem primo, tum in lethargum incidit,  
eoque extinctus est, non procul Mosambico, cum  
multis lacrimis & lamentatione flebili conuecto-  
rum, communem parentem vocantium: sollemnia  
pietatis Mosambici celebrata illustri pompa: eius  
cadauer, inter Fratres quos vocant Misericordiae,  
Clericos templi maximi, Monachosque Dominica-  
nos contentionis sedandae, placuit Duci Gubernato-  
rique Cosula collocari in Sacello Deiparae, cui co-  
gnomentum ab arce. eximia vir caritate, magnae  
par, inter Nostros insolita, potestati, quam gere-  
bat. mortem eius secuta est duorum sociorum, &  
quibus alter Sacerdos: tam grauis iactura solatium  
aliquod, quinque naues e Lusitania nostris omnibus  
saluis (etsi in secunda nauigatione afflictati morbis)  
Goam appulsa. Aprili mense Reguli Iaponij cum  
Patre Visitatore sociisque sedecim soluerunt Goa Ia-  
ponem petentes. Iamque, ut multa concludam, in

hoc terrarum tractu, omiffa Iaponia regione, nouem hominum millia ad Christum conuerfa: ex his quinque millia acceperunt baptismum.

### DOMVS PROFESSA GOANA.

**L**OCI OPPORTUNITATE (est enim in umbilico urbis) magna conuenarum frequentia. Quadragesima nouem hominum millia confessione crimina eluerunt: & totius quidem vitæ, quinquaginta, compositæ inimiciæ: ira pacatæ: viuida nobilium odia repressa: factiosi reconciliati: remiffæ verberum iniuriæ vulnerumque: obuiam itum in præfens atroci ciuitatis periculo, in posterum exemplo: mulieres duæ viris, uiri quattuor vxoribus venenum parauerant, Deo volente, hi perinde, quam illæ, ab iniquo conatu depulsi: Curatum opera Nostrorum: vt condonaretur multis æs alienum, quod non erant soluendo, ipsique soluerentur. e trimibus pariter liberati nonnulli tenuēs, atque egentes: nec Christiani solum, sed etiam Ethnici; quæ causa non paucorum conuersionis, adulter viro interfecto vxorem abduxerat cum grandi pecunia, Mauritiani cogitans: hinc magna in eos inquisitio, trecenti aurei, haud multo secus, indicij nomine, promittebantur, vel alterum retrahenti: suafu Nostrorum effectum, vt rediret furtum, & mulier secura periculi in tuto reponeretur. dutenti item aurei redditu: adiuti pauperes eleemosyna: puella pa-

renti.

rentibus orba honesto matrimonio collocata. In hac ciuitate, atque insula (commune utrique Goæ nomen) sacra aqua lustrati homines amplius mille, coram Eduardo Menesio Prorege, & Episcopo Sinen- si (qui Goæ erat per illos dies) insigni carimonia. spectata super ceteros pueri constantia, quem paren- tes Ethnici ad Idalcanum regem persæpe adduxe- rant, specie explorandæ voluntatis, blanditijs mi- nisque deducendum a proposito: is enim eorum per- tinacia perductus ad iudicem Ecclesiasticum, ita pru- denter reddidit rationem vocationis suæ, ut virtute superarit ætatem: eas ob causas baptizato Constan- tis nomen impositum. Ad hæc, illustris femina nu- rus Mealæ viri principis, qui olim Concanum re- gnum affectabat. Sequuntur in hoc genere alia. Chri- stianus senex e Corana insula Ethnicum filium, quem ægrotum habebat quodam in oppido, cupiebat Chri- sto adiungere: igitur, quasitis rebus leuandæ inua- letudini, ad eum adit, rogat num velit fieri Chri- stianus: annuit ægrotus. tum senex genuflexus, bea- tam Virginem veneratur Rosario suppliciter percur- so: dein applicat fomenta: & fuere salutaria: rece- pta valetudine iuuenis cum familia vniuersa Chri- stianam fidem suscepit. Anus Christiana pauper- cula in Mauritaniâ missa a quibusdam, ut res emptas pretio afferret, aliena consumpta pecunia, illic habi- tare decreuerat: huc cum isset Christianus quidam, admirabili exemplo caritatis, pollicetur mulieri as alienum omne dissoluturum, & quoad suppeteret vi- ta, præbiturum victui necessaria, dum ad suos re-

uerteretur: utrumque factum: ab eo perducta ad  
 Quasitores, adiutaque est, & nunc domi habetur  
 honorifice, parentis loco. Hac inter inimicus homo  
 serit zizania, sed agricola non dormit. Eduardus  
 Menesius Prorex de re Christiana optime meritus  
 certam pecuniam coemendae domui, iuxta eadem no-  
 stram, ad usum Catechumenorum erogauit. Ad eum-  
 dem cum perlatum esset, Columbum (est arcis no-  
 men) obsideri ab hostibus: classem submisit solu-  
 endo obsidio, ei que praefecit Emmanuelem Sosam a Co-  
 rino, duosque e nostris Sacerdotes impetrauit sub-  
 sidio animarum. haud dubie fuerunt. parua res di-  
 ctu: sed, quid per illos effectum, cui haec non sunt  
 incognita, ad intelligendum satis efficax. expeditio-  
 nis hic exitus fuit: in itinere fugati hostes: arx eo-  
 rum non procul flumine capta: oppida duo, & tri-  
 ginta nauigia cum rebus omnibus incensa: excepta  
 tormenta bellica: praeda abacta: exusta urbs, &  
 demonis fanum, per quod ante videbatur stare, non  
 sine praestigijs: ubi Lusitana classis portum inuehe-  
 batur, ebullientes aquae, veluti subiecto igne, aditum  
 prohibebant. nunc tandem post ingentem suorum  
 stragem capti ciues viderunt flammis aequata tellus,  
 & superstitionem extinctam. Atque haec in itinere.  
 Ut ventum est ad Columbum, prospera a Nostris pu-  
 gnata pugna, casi hostes mille, in quibus decem centu-  
 riones, & tres elephanti. reliqui impares praelio ca-  
 pessere fugam. Consecutus Lusitanus fugientes, in  
 transitu pontis obtruncat: nullo fere damno: quat-  
 tuor tantum vulnerati. igitur disiectis opibus muni-  
 tioni-

tionibusque, quibus arx erat obsepta, liberati oppidani Deo grates egerunt.

COLLEGIVM SANCTI PAULI.

**M**ORTVI QVATTVOR, defletique: præcipue Pater Arias Sosa, & Pater Ioannes Rodericus, olim Bustamantes, & comes Patriæ Patriarchæ, viri in acquirendis Christo animis virtutis indefessæ. Animarum vero lucrum, etsi proprium Domus Professæ, a Collegio non negligitur. excurritur per insulam, stâtis mensibus, cum aliquo quæstu. eo die, qui conuerso Paulo sacer est, baptizati homines, conspicuo apparatu, amplius quingenti: ex ijs multi claris natalibus, & Brachmanes etiam nonnulli. Neophytis pauperibus donata vestis a Prorege, & optimatibus: & quod mirabile magis, ab Ethnicis ipsis: eoque rerum, personarumque honore celebratus baptismus, ut omnibus præ letitia, religione etiam motis, lacrimæ excuterentur. sollemnis pompa in die Parasceues, numquam alias illustrior: quingenti se atrociter diuerberarunt. Longumque illud spectaculum plerosque Ethnicos effusi sanguinis plurimi admiratione defixit. Pater filia pudicitiam, cogente inopia, viro nobili vendere constituerat, iamque conuenerat de pretio: at vnus e Nostris sacerdos iniquum pactum in tempore rescidit, & puellæ maritum dedit non inferiori nobilitate. ob hæc ei gratiæ a parentibus actæ. Procedit etiam res scholastica: die festo vndecim millium, virginum,



quo iubileum indictum, & amplius duo millia communicarunt, pomeridianis horis Theologicae positiones, in magna illustrium eruditorumque corona, defensæ. Pater Prævincialis quo tempore inuisit Collegium, ingenti studio scholarum exceptus est. eminuit ingenium pueruli elementarij, doctrinam omnem Christianam sine ullo errore, nusquam interrupto ordine, recitantis. Ceterum discipulorum magna religio. varia cænobia expetunt multi: nec desunt qui nostram Societatem: condiscipulorum paupertati subueniunt; ne opum penuria, discendicupiditas retardetur.

### DOMVS PROBATIONIS ET Collegium Raccholanum.

**M**AGNUM TYRONVM experimentum, exemplumque caritatis in trecentis agris, qui ad hunc portum appulerant, primum per manus in nosocomium exportandis, tum in refouendis corporibus, sordibusque eluendis, donec penitus confirmarentur. Petrus Castrinus de quo proxime scriptum, auxit beneficium, cum quadringentis aureis circiter relictis muro extollendo, Nostriſque ſalutatis (magnum vtrumque ſignum beneuolentia) in Luſitaniam reuertit. Ceterum circa pagos Tyrocinij vectigales, verſatur Sacerdos cum laico, in loco Quinque ſociorum ſpecioſa cade memorando: vbi & conditum Sacellum, & Domina Noſtra Martyrum indictum nomen: apparet fructus commemoratio-

*nis in conuersione multorum.*

DE RACCHOLANO Collegio fere omnes narratio erit eorum, qui Fidem nuper complexi. igitur, super multos Brachmanes, trium vicorum incolæ communi consensu, sese Christo dedere: ex ijs baptizati mille sexcenti: Goam trecenti eandem ob causam missi. Duo millia Catechesi instituuntur. Aegroti diuersis in locis duo, Sacerdotem accersentes, petiere baptismum: quò accepto vnus, eodem die, alter post biduum decessit. Alieri in specie melius factum: cui cum baptismo redijt corporis valetudo. Christianus quidam cupidus ad Christum adducenda vxoris quæ inter Mauros viuebat, vbi illa erat, iter intendit: Cogitur ab affinibus esse cum ea: sed illam tandem anno duodecimo, quattuorque liberos attulit Christianis præceptis imbuendos. Haud procul vno templo vicus erat sic secundus superstitianum, ut si quis Christianam capefferet fidem, a vicanis interficeretur: ea de causa vastum erat oppidum, desertumque, & per annos quadraginta, vagam vitam oppidani palantes persequebantur: confusi limites, terminique agrorum. aperuit tandem fere omnium oculos Deus, & in cõcordiam rediere omnes venientes ad Christianam fidem. missusque Sacerdos eorum rogatu, fuit animorum reconciliator, & arbitri finium regundorum. conficiebatur porro vinum in hoc vico, pernicies incolarum, & pendebatur veltigal vinarium Regiam desiere illud conficere, manente licet veltigali, malunt, vt pote Christiani, consulere moribus, quam pecuniæ: prædia iniuste possessa reddi-

reddiderunt dominis admirantibus: templumque extruitur eorum opera atque impensa. extructa etiam alibi ades Deiparae Catechumenorum, ab illis ipsis, quibus extruebatur: e loco distant lapides humeris longo agmine conuectabantur, interim Christianam doctrinam concinentibus: igitur & celebrari caput magna gratulatione. confluxere eo die Dux Salsetanus, Reguli Iaponij, Patresque, Visitator, & Provincialis, alijque nobiles quamplurimi. Iustrali aqua loti tercentum septemdecim: singulis diebus Sabbati inuisitur incredibili frequentia, parique significatione pietatis. & opinio est cunctorum, euulsa semina inimicitiarum, posito templo. Die quodam, cum perageretur Sacrum, ex vno pago conuenere nobiles viri omnes, eoque peracto, proculuti ad aram genibus ut inter Catechumenos aggregarentur, orabant, certantes gaudio cum accipientibus. Ethnicus diues cum exisset e vinculis, ex voto, palmetum centum arboribus frequens Deiparae ad templi usum attribuit. Alter Ethnicus mercator e domo adi proxima celebritatem prospectabat: semel post meridiem, oppressus somno vidit se genibus supplicem ad altare perrepere, & a Sacerdote Dei Matri commendari: somnium acceptum pro consilio: ipse cum vxore & liberis quinque auxit numerum Cathecumenorum. Margani (est vici nomen) labor constitit. explicatum eorum lingua symbolum, concionesque habitae: nec minor fructus in pueris, qui litteras docentur. ex his singulis diebus festis triceni mittuntur ad conterminos pagos, communicandae Christianae doctrinae:

præ-

pramisque persoluta doctioribus . ne parentum quidem parua religio . importuna imbrum vi collapsum erat templum: Brachmanes etiam ipsi, suis e domibus, trabes, lignaque humeris apportabant, ei reficiendo . itaque properatum opus , ut absolueretur quatruiduo: corrogari deincepta pecunia , ut firmitus alterum e lapide statueretur . Fortuito igne magna pars vici erat exusta, ea ut restitueretur, opulenti viri, collaborantes pauperes eleemosyna iuuerunt. Sequitur vnum, atque alterum visum, quae speciem habuere miraculi . Christianus quidam oculorum tabe notus , per quietem videbat se in aula perampla , ubi iugis aquae fons: audiebat vnum e Nostreis , ut lauaret admonentem: mirum dictu , ut lauisse visus, caeco dies reluxit: eadem nocte, vxor eius credidit se moneri a Sacerdote, ut si velit virum sanum, votum suscipiat ieiunii septem Quadragesimarum: & suscepit illa certa exequendi . Christianus alter, antea varijs superstitionibus mirifice deditus, filio aegroto ut redderetur salus , an consuetudine , an nimia cupidine, munus diabolo parat: offertur dormienti imago vnus e Nostreis consilium dissuadentis , suadentis aegroti confessionem: excitatus paret somnio , paulo post filius conualescit.

COLLEGIVM BAZAINVM, ET  
Cocinense cum Sede Vaipicotana.

PAR NOSTRORVM labor in eadem materia, par fructus: complectar multa, obuia similitudi-

litudine, tædij metu. *Adiuncti ad Christianorum cætum, super hominum nouem millia, amplius quadringenti. Baptismi pulcherrimi celebrati sex, sacrificali ornatu, effuso studio nobilium, lætaque plebe ( qui mos est gentis ) pulsu pedum modulante sonum vocis: cum interea baptizandorum agmina in Serica veste, per vias incederent festo cultu instructas: omnia prorsus tum apparatu magnifico: tum etiam Ethnicis inuüdendo. non sunt hæc parua, etsi paucis dicantur: sed his locis communia, & urgent propria. Pagus est in Salsetano tractu, Marolum incolæ appellant, penes quem regimen in alios quinquaginta septem: Christo nomen dedit in perui-gilio Virginis assumptæ, fecitque exemplum pagis tredecim eiusdem Fidei capeßendæ. Inter hos aliqui præcipui senectute, & mulier quidem, cum decimum supra centesimum, vir cum duodeuigesimum annum perageret: nec defuere, qui in lectulo decumbentes, statim a baptismo quem enixe petierant, ex-pirarunt. Ceterum tantus Neophytorum ardor animi, vt Maroli maturam segetem demetere prius noluerint, quam benedixisset Sacerdos manipulis, quos in speciem attulerant: & bouem præterea ad eum adduxerint, quam prius stulta superstitione venerabantur.*

*T C O C I N V M E S T* veluti emporium huius regionis, ex eo, præ confluentium multitudine, quorum confessiones audiuntur, rixæ tolluntur, pactio-nes iniustæ retractantur, furta compensantur, ma-ius lucrum animarum: tria mancipia liberata nexu serui-

*seruitutis : totidem e cæno impudiciæ extracta: exa-  
dificatio templi liberalitate viri nobilis non minimis  
sumptibus magnos progressus habet: sunt & aliqua  
ad eius vsum collata, vt lampas argentea magni pre-  
tij . In Christianam religionem per baptismi ianuam  
ducenti tredecim ingressi.*

*V A I P I C O T A E* porro, vt etiam Cocini,  
res enim similes coniungam, mulieres aliquot, &  
earum vna a Fide abhorrens, multis diebus cruciata  
dolore partus, vel recitato super eas Euangelio, vel  
superducto oleo aquaue, quibus Nostri benedixissent  
(hæc enim, pro videntium fide, multorum remedia  
morborum) citra damnum, viuos fetus enixa. ex quo  
augetur Fidei veneratio, & fidelium numerus. Dæ-  
monia quoque ex obsessis corporibus eiecta . In Pa-  
ruano regno finitimo, iuuenes duo e Seminario quod  
procurant Nostri, duos energumenos sanarunt, ira  
frementibus magistris superstitionum, quibus nihil  
processerat: memorando vterque exemplo: sed al-  
terius magis fama vulgauit. Missus hic erat ad Re-  
gem, officij causa. Regis filiam vexabat diabolus,  
nec vlla spes remedij, omnibus frustra tentatis. venit  
in mentem Regi, Reginaque, experiri ecquid posset  
religio, quam Patres nostri docerent: cum præsertim  
haberent domi, eorum alumnum: nocte adulta Re-  
gina cum comitibus it ad cubiculum adolescentis,  
excitat dormientem, orat malum demonem e filia  
expellat: is attonitus Reginae conspectu, precum effi-  
cacia, nec dū penitus sopore discusso: Eyciam inquit,  
uix compos mentis, instinctu diuino: & pænitus

*mox dicti: sed erat irrevocabile. It ad puellam cum parentibus, amoueri iubet superstitiosa medicamenta (Canianes appellant) procumbit ingenua, septem psalmos recitare incipit, dictos Pœnitentiæ: cum peruenisset ad quartum, cuius initium, Miserere, contremiscens dæmon tollit votem cum gemitu horribilem: & apparebat metus. at Rex ad adstantes, Videt malis rem sibi esse cum valente aduersario: & ad diabolum: Non hic vides Cassanaires (hi sunt, ut alias est scriptum, sacrificuli idolorum) iam iamque dabis pœnas audacissime. Noster pergit: cum absoluisset preces, iacuit illa aliquādiu exanimis, dein, excusso dæmonio, surrexit gratantibus parentibus, gratesque agentibus Christo: ad quem spes est, ut toto cum regno, propediem conuertantur.*

### C O V L A N A D O M V S E T R E L I - quæ Sedes.

**E** V A N G E L I O credidere centum viginti, super templa olim extructa, nouum est additum in regno, cui nomen Grunde: ubi Christiani aliquot: & plures breui futuros mite incolarum ingenium pollicetur. Centum iam Fidei præceptis imbuuntur. Nec minus in Lusitanis est elaboratum. placati, elutique peccatorum sordibus multi: concubina vni extracta, & in matrimonio honeste locata.

I N O R A T R A V A N C O R I S Christianorum decem millia, per curias octodecim tributa; eorum omnium cura Societati commissa.



**IN LITTORE PISCARIO** Sedes sex, ut superiore anno memorauimus: locorum non in-  
 Tutucurinum, Punicale, Manapaz, Bembar, Tre-  
 tandur, Manar: baptismo expiati hoc anno mille du-  
 centi septuaginta duo: eorum plerique e Manar in-  
 sula: ubi inchoatum templum vsui Neophytorum.  
 In hoc tractu, ex prescripto Patris Prouincialis,  
 institutum Seminarium, ubi triginta alantur iue-  
 nes, suo tempore sacris initiandi. sexaginta puellæ,  
 quarum pudicitia propter paupertatem periclitaba-  
 tur, nuptui tradita. In magna annone caritate persua-  
 sum diuitibus, ut pauperes eleemosyna subleuarent.  
**DE NIQVE** hæc habemus de ijs qui Malacca  
 versantur. Rex Deior negligens fœderis facti cum  
 Lusitanis sese cum Maurorum Rege Achene coniun-  
 xerat: eorum aduentus Malacam timebatur, prope  
 fame laborantem. Igitur Episcopus, oblata occasio-  
 ne Pauli Limæ viri bello egregij, qui cum classe erat  
 in portu, ea uti voluit: illum exorauit, ut auertendi  
 periculi vrbs hostilis expugnationem tentaret: du-  
 cti de nostris Sacerdotes duo militibus audiendis: pri-  
 die quam iniretur oppugnatio, confessi omnes, sa-  
 croque epulo refecti in insula, vnde ab hoste conspi-  
 cebantur: quesit Rex, quid agerent Lusitani: ubi  
 audiuit comparare se ad mortem strenue oppeten-  
 dam, contremuit. Die sacro Virgini in calum ascen-  
 denti vrbs oppugnari cœpta a Lusitanis quadringen-  
 tis viginti: in ea erant hominum decem millia, tor-  
 menta bellica non parua magnitudinis, suis in locis  
 disposita, nongenta: & paucis post horis, diuino pro-  
 tegente

regente numine, captæ maxima hostium strage, multa eorum navigia incensa : desiderati e Lusitanis quinquaginta : reliqui Malacam, magna gratulatione, lætitiæque civium effusorum obviam, victores revertere.

**EXCIDERUNT**, Patres Optimi, Fratresque mihi carissimi, hæc quoque litteræ annuæ, sicut inconditæ & rudes, ita fideles & rectæ: neque enim ornari quæ reddidi, & quæ accepi non siliui; ut si laudari non debeat stylus, culpari non metuat animus scribentis. Et fuit, ut prædixi, in arcto labor, sed præcipuum munus nostrorum annalium reor, non servare auribus, sed consulere, vel locorum distantia, vel memoriæ sequentis aui. quamquam & simplex Veritas per se oblectat. nec nihil sperarem fortasse, si magnum votum admitteret angusta conscientia. Quod si non quero adminicula purgationis, sciatis velim, non esse fastidij, sed securitatis de vestra benivolentiæ præsumptæ. Valete. E Collegio Romano Decimo Kalendas Decembres CIO ID. XC.

Omnium in Christo servus

Franciscus Bencius.







